

Namo tassa bhagavato arahato sammāsambuddhassa

Saṃyuttanikāye

Nidānavagga-aṭṭhakathā

1. Nidānasamṃyuttam

1. Buddhavaggo

1. Paṭiccasamuppādasuttavaṇṇanā

1. Evaṃ me sutanti – nidānavagge paṭhamam paṭiccasamuppādasuttam. Tatrāyam anupubbapadaṇṇanā – **tatra kho bhagavā bhikkhū āmantesīti**, ettha **tatrāti** desakālaparidīpanam. Tañhi “yam samayam viharati, tatra samaye, yasmiṇca jetavane viharati, tatra jetavane”ti dīpeti. Bhāsītabbayutte vā desakāle dīpeti. Na hi bhagavā ayutte dese kāle ca dhammam bhāsati. “Akālo kho tāva bāhiyā”tiādi (udā. 10) cettha sādhamam. **Khoti** padapūraṇamatte, avadhāraṇe ādikālatthe vā nipāto. **Bhagavāti** lokagarudīpanam. **Bhikkhūti** kathāsavanayuttapuggalavacanam. Apicettha “bhikkhakoti bhikkhu, bhikkhācariyam ajjhūpagatoti bhikkhū”tiādinā (pārā. 45; vibha. 510) nayena vacanattho veditabbo. **Āmantesīti** ālapi, abhāsi, sambodhesi, ayamettha attho. Aññatra pana ñāpanepi hoti. Yathāha – “āmantayāmi vo, bhikkhave, paṭivedayāmi vo, bhikkhave”ti. Pakkosanepi. Yathāha – “ehi tvam, bhikkhu, mama vacanena sārīputtam āmantehi”ti (a. ni. 9.11). **Bhikkhavoti** āmantanākārādīpanam. Tañca bhikkhanasīlatādiguṇayogasiddhattā vuttam. Bhikkhanasīlatāguṇayuttopi hi bhikkhu, bhikkhanadhammatāguṇayuttopi bhikkhane sādhu-kāritāguṇayuttopi saddavidū maññanti. Tena ca tesam bhikkhanasīlatādiguṇayogasiddhena vacanena hīnādhikajanasevitavuttiṃ pakāsento uddhatadīnabhāvaniggaham karoti. “Bhikkhavo”ti iminā ca karuṇāvippahārasommahadayanayanānīpātapubbaṅgamaṇa vacanena te attano abhimukhe karonto teneva kathetukamyatādīpakena nesam vacanena sotukamyatam janeti, teneva ca sambodhanatthena sādhamam manasikārepi niyojati. Sādhamam manasikārayattā hi sāsanasampatti.

Aparesupi devamanussesu vijjamānesu kasmā bhikkhūyeva āmantesīti ce? Jeṭṭhasēṭṭhāsannasādāsannihitabhāvato. Sabbaparisa-sādharāṇā hi bhagavato dhammadesanā, parisāya jeṭṭhā bhikkhū paṭhamam uppannattā, seṭṭhā anagāriyabhāvam ādiṃ katvā satthucariyānuvidhāyakattā sakalasāsanapaṭiggāhakattā ca, āsannā tattha nisennesu satthusantikattā, sadāsannihitā satthusantikāvacarattāti. Apica te dhammadesanāya bhājanam yathānusiṭṭham paṭipattisabbhāvato. Visesato ca ekacce bhikkhūyeva sandhāya ayam desanāpīti evam āmantesi.

Kimattham pana bhagavā dhammam desento paṭhamam bhikkhū āmantesi, na dhammameva desesīti? Satījananattam. Bhikkhū aññam cintetāpi vikkhittacittāpi dhammam paccavekkhantāpi kammaṭṭhānam manasikarontāpi nisinnā honti. Te anāmantetvā dhamme desiyamāne “ayam desanā kimnidānā kimpaccayā katamāya aṭṭhuppattiyā desitā”ti sallakkhetum asakkontā duggahitam vā gaṇheyyum, na vā gaṇheyyum, tena nesam satījananattam bhagavā paṭhamam āmantetvā pacchā dhammam deseti.

Bhadanteti gāravavacanametam, satthuno paṭivacanadānam vā. Apicettha “bhikkhavo”ti vadamāno bhagavā bhikkhū ālapi. “Bhadante”ti vadamānā te bhagavantaṃ paccālapanti. Tathā hi “bhikkhavo”ti bhagavā ābhāsati, “bhadante”ti paccābhāsanti. “Bhikkhavo”ti paṭivacanam dāpeti, “bhadante”ti paṭivacanam denti. **Te bhikkhūti** ye bhagavā āmantesi, te. **Bhagavato paccassosunti**

bhagavato āmantanaṃ patiassosum, abhimukhā hutvā suṇiṃsu sampatiṇṇiṃsu paṭiggahesunti attho. **Bhagavā etadavocāti**, bhagavā etaṃ idāni vattabbaṃ sakalasuttaṃ avoca. Ettāvataṃ yaṃ āyasmataṃ ānandena atthabyañjanasampannaṃ buddhānaṃ desanāññāgambhīrabhāvasaṃsūcakassa imassa suttassa sukhāvagāhaṇatthaṃ kāladesadesakaparisaṃpadasappaṭimaṇḍitaṃ nidānaṃ bhāsitaṃ, tassa atthavaṇṇanā samattā.

Idāni **paṭiccasamuppādaṃ** votiadinā nayena bhagavatā nikkhittassa suttassa saṃvaṇṇanāya okāso anupatto. Sā panesā suttavaṇṇanā yasmā suttanikkhepaṃ vicāretvā vuccamānā pākaṭā hoti, tasmā suttanikkhepaṃ tāva vicāressāma. Cattāro hi suttanikkhepā – attajjhāsayo, parajjhāsayo, pucchāvasiko, aṭṭhuppattikoti. Tattha yāni suttāni bhagavā parehi anajjhīṭṭho kevalaṃ attano ajjhāsayeneva katheti, seyyathidaṃ – dasabalasuttantahāraṃ candopama-viṇopama-sammappadhāna-iddhipāda-indriyabala-bojjhaṅgamaggaṅga-suttantahāraṃ evamādīni, tesam **attajjhāsayo** nikkhepo.

Yāni pana ‘‘paripakkā kho rāhulassa vimuttiparipācanīyā dhammā. Yaṃnūnāhaṃ rāhulaṃ uttarim āsavānaṃ khaye vineyya’’nti (saṃ. ni. 4.121; ma. ni. 3.416) evaṃ paresaṃ ajjhāsayaṃ khantiṃ nijjhānakkhamaṃ manāṃ abhinīhāraṃ bujjhanabhāvañca apekkhitvā parajjhāsayavasena kathitāni, seyyathidaṃ – cūḷarāhulovādasuttaṃ, mahārāhulovādasuttaṃ, dhammacakkappavattanaṃ, anattalakkhaṇasuttaṃ, āsīvisopamasuttaṃ, dhātuvibhaṅgasuttanti, evamādīni, tesam **parajjhāsayo** nikkhepo.

Bhagavantaṃ pana upasaṅkamitvā catasso parisā cattāro vaṇṇā nāgā supaṇṇā gandhabbā asurā yakkhā mahārājāno tāvatimsādayo devā mahābrahmāti evamādayo ‘‘bojjhaṅgā bojjhaṅgāti, bhante, vuccanti – (saṃ. ni. 5.202) nīvaraṇā nīvaraṇāti, bhante, vuccanti – ime nu kho, bhante, pañcupādānakkhandhā, kiṃsūda vittaṃ purisassa seṭṭha’’ntiadinā (saṃ. ni. 1.246; su. ni. 183) nayena pañhaṃ pucchanti. Evaṃ puṭṭhena bhagavatā yāni kathitāni bojjhaṅgasamuyuttādīni, yāni vā panaññānīpi devatāsamyutta, mārasamyutta, brahmasamyutta, sakkapañha, cūḷavedalla, mahāvedalla, sāmaññaphalaālavaka, sūciloma, kharalomasuttādīni, tesam **pucchāvasiko** nikkhepo.

Yāni pana tāni uppannaṃ kāraṇaṃ paṭicca kathitāni, seyyathidaṃ – dhammadāyādaṃ. Cūḷasānādasuttaṃ puttamaṃsūpamaṃ dārukkhandhūpamaṃ aggikkhandhūpamaṃ pheṇapiṇḍūpamaṃ pāricchattakūpamaṃti evamādīni, tesam **aṭṭhuppattiko** nikkhepo.

Evametesu catūsu nikkhepesu imassa paṭiccasamuppādasuttassa parajjhāsayo nikkhepo. Parapuggalajjhāsayavasena hidaṃ bhagavatā nikkhittaṃ. Katamesaṃ puggalānaṃ ajjhāsayavasenaṃti? Ugghaṭitaññūnaṃ. Cattāro hi puggalā ugghaṭitaññū vipaṇcitaññū neyyo padaparamoti. Tattha yassa puggalassa saha udāhaṭavelāya dhammābhisamayo hoti, ayaṃ vuccati puggalo **ugghaṭitaññū**. Yassa puggalassa saṃkhittena bhāsitaṃ vitthārena atthe vibhājiyamāne dhammābhisamayo hoti, ayaṃ vuccati puggalo **vipaṇcitaññū**. Yassa puggalassa uddesato paripucchato yoniso manasikaroto, kalyāṇamitte sevato, bhajato, payirupāsato, anupubbena dhammābhisamayo hoti, ayaṃ vuccati puggalo **neyyo**. Yassa puggalassa bahumpi suṇato, bahumpi dhārayato, bahumpi vācayato na tāya jātiyā dhammābhisamayo hoti, ayaṃ vuccati puggalo **padaparamo**. Iti imesu catūsu puggalesu ugghaṭitaññūpuggalānaṃ ajjhāsayavasena idaṃ suttaṃ nikkhittaṃ.

Tadā kira pañcasatā janapadavāsikā bhikkhū sabbeva ekacarā dvicarā ticarā catucarā pañcacarā sabhāgavuttino dhutaṅgadharā āradhāvīriyā yuttayogā vipassakā saṅhaṃ sukhumaṃ suññataṃ paccayākāradesanaṃ patthayamānā sāyanhasamaye bhagavantaṃ upasaṅkamitvā, vanditvā, rattakambalasāṇiyā parikkhipamānā viya desanaṃ paccāsīsamānā parivāretvā nisīdiṃsu. Tesam ajjhāsayavasena bhagavā idaṃ suttaṃ ārabhi. Yathā hi cheko cittaṃ aparikkammaṃ labhitvā, na āditova rūpaṃ samuṭṭhāpesi, mahāmattikalepādīhi pana bhittiparikammaṃ tāva katvā, kataparikkammāya bhittiyā rūpaṃ samuṭṭhāpeti, kataparikkammaṃ pana bhittim labhitvā, bhittiparikammabyāpāraṃ akatvā, raṅgajātāni yojetvā, vaṭṭikaṃ vā tūlikaṃ vā ādāya rūpameva

samuṭṭhāpeti, evameva bhagavā akatābhinivesaṃ ādikammikakulaputtaṃ labhitvā nāssa āditova arahattapadaṭṭhānaṃ saṅhaṃ sukhumaṃ suññataṃ vipassanālakkaṇaṃ ācikkhati, sīlasamādhikammassakatādiṭṭhisampadāya pana yojento pubbabhāgapaṭipadaṃ tāva ācikkhati. Yaṃ sandhāya vuttaṃ –

“Tasmātiha tvam, bhikkhu, ādimeva visodhehi kusalesu dhammesu. Ko cādi kusalanāṃ dhammānaṃ? Sīlaṅca suvisuddhaṃ diṭṭhi ca ujukā. Yato kho te, bhikkhu, sīlaṅca suvisuddhaṃ bhavissati diṭṭhi ca ujukā. Tato tvam, bhikkhu, sīlaṃ nissāya sīle patiṭṭhāya cattāro satipaṭṭhāne tividhena bhāveyyāsi. Katame cattāro? Idha tvam, bhikkhu, ajjhataṃ vā kāye kāyānupassī viharāhi ātāpī sampajāno satimā vineyya loke abhijjhādomanassaṃ. Bahiddhā vā kāye...pe... ajjhatabhiddhā vā kāye...pe... dhammesu dhammānupassī viharāhi ātāpī sampajāno satimā vineyya loke abhijjhādomanassaṃ. Yato kho tvam, bhikkhu, sīlaṃ nissāya sīle patiṭṭhāya ime cattāro satipaṭṭhāne evaṃ tividhena bhāveyyāsi, tato tuyhaṃ, bhikkhu, yā ratti vā divaso vā āgamissati, vuddhiyeva paṭikaṅkhā kusalesu dhammesu, no parihānī”ti (saṃ. ni. 5.369).

Evam ādikammikakulaputtassa sīlakathāya parikammaṃ kathetvā, arahattapadaṭṭhānaṃ saṅhaṃ sukhumaṃ suññataṃ vipassanālakkaṇaṃ ācikkhati.

Parisuddhasīlaṃ pana āraddhavīriyaṃ yuttayogaṃ vipassakaṃ labhitvā, nāssa pubbabhāgapaṭipadaṃ ācikkhati, ujukameva pana arahattapadaṭṭhānaṃ saṅhaṃ sukhumaṃ suññataṃ vipassanālakkaṇaṃ ācikkhati. Ime pañcasatā bhikkhū pubbabhāgapaṭipadaṃ parisodhetvā ṭhitā sudhantasuvaṇṇasadisā suparimajjitamaṅkhandhasannibhā, eko lokuttaramaggova nesaṃ anāgato. Iti tassāgamanatthāya satthā tesam ajjhāsayaṃ apekkhamāno idaṃ suttaṃ ārabhi.

Tattha **paṭiccasamuppādaṃ** paccayākāraṃ. Paccayākāro hi aññamaññaṃ paṭicca sahite dhamme uppādeti. Tasmā paṭiccasamuppādoti vuccati. Ayamettha saṅkhepo, vitthāro pana visuddhimaggato gahetabbo.

Voti ayaṃ vo-saddo paccatta-upayogakaraṇa-sampadāna-sāmvacana-padaṭṭhānaṃ dissati. “Kacci pana vo anuruddhā samaggā sammodamānā”tiādīsu (ma. ni. 1.326; mahāva. 466) hi paccatte dissati. “Gacchatha, bhikkhave, paṇāmemi vo”tiādīsu (ma. ni. 2.157) upayoge. “Na vo mama santike vatthabba”ntiādīsu (ma. ni. 2.157) karaṇe. “Vanapatthapariyāyaṃ vo, bhikkhave, desessāmī”tiādīsu (ma. ni. 1.190) sampadāne. “Sabbesaṃ vo, sārīputta, subhāsita”ntiādīsu (ma. ni. 1.345) sāmvacane. “Ye hi vo ariyā parisuddhakāyakammantā”tiādīsu (ma. ni. 1.35) padaṭṭhānamatte. Idha paṇāyaṃ sampadāne daṭṭhabbo. **Bhikkhaveti** patissavena abhimukhībhūtānaṃ puna ālapanāṃ. **Desessāmīti** desanāpaṭijānaṃ. **Taṃ suṇāthāti** taṃ paṭiccasamuppādaṃ taṃ desanaṃ mayā vuccamānaṃ suṇātha.

Sādhukaṃ manasi karoṭhāti ettha pana sādhukaṃ sādhuṭi ekatthametaṃ. Ayaṅca sādhusaddo āyācana-sampaṭicchana-sampahaṃsana-sundara-dalḥīkammādīsu dissati. “Sādhu me, bhante, bhagavā saṃkhittena dhammaṃ desetū”tiādīsu (a. ni. 4.257; saṃ. ni. 4.65; 5.381) hi āyācane dissati. “Sādhu, bhanteti kho so bhikkhu bhagavato bhāsitaṃ abhinanditvā anumoditvā”tiādīsu (ma. ni. 3.86) sampaṭicchane. “Sādhu sādhu, sārīputtā”tiādīsu (dī. ni. 3.349) sampahaṃsane.

“Sādhu dhammarucī rājā, sādhu paññāṇavā naro;
Sādhu mittānamaddubbho, pāpassa akaraṇaṃ sukha”nti. –

Ādīsu (jā. 2.18.101) sundare. “Tena hi, brāhmaṇa, sādhukaṃ suṇāhī”tiādīsu (a. ni. 5.192) sādhuasaddoyeva dalḥīkamme āṇattiyantipi vuccati. Idha paṇāyaṃ ettheva dalḥīkamme āṇattiyā ca attho veditabbo, sundaratthepi vaṭṭati. Dalḥīkaraṇatthena hi “dalḥāṃ imaṃ dhammaṃ suṇātha, suggahitaṃ gaṇhantā”, āṇattiatthena “mama āṇattiyā suṇātha” sundaratthena “sundaramimaṃ bhaddakaṃ dhammaṃ suṇāthā”ti etaṃ dīpitaṃ hoti. **Manasi karoṭhāti** āvajjetha. Samannāharathāti

attho. Avikkhittacittā hutvā nisāmetha, citte karothāti adhippāyo.

Idānettha **taṃ suṇāthāti** sotindriyavikkhepanivāraṇametam. **Sādhukaṃ manasi karothāti** manasikāre dalhīkammaniyojanena manindriyavikkhepanivāraṇam. Purimañcetta byañjanavipallāsagāhaniivāraṇam, pacchimaṃ atthavipallāsagāhaniivāraṇam. Purimena ca dhammassavane niyojeti, pacchimena sutānaṃ dhammānaṃ dhāraṇūpaparikkhāsu. Purimena ca “sabyañjano ayaṃ dhammo, tasmā savaṇīyo”ti dīpeti, pacchimena “sāttho, tasmā manasi kātabbo”ti. Sādhukapadaṃ vā ubhayapadehi yojetvā, “yasmā ayaṃ dhammo dhammagambhīro ca desanāgambhīro ca, tasmā suṇātha sādhukaṃ. Yasmā atthagambhīro ca paṭivedhagambhīro ca, tasmā sādhukaṃ manasi karothā”ti evaṃ yojanā veditabbā. **Bhāsissāmīti** desessāmi. “Taṃ suṇāthā”ti ettha paṭiññātaṃ desanaṃ saṃkhittatova na desessāmi, apica kho vitthāratopi naṃ bhāsissāmīti vuttaṃ hoti. Saṅkhepavithhāravācakāni hi etāni padāni. Yathāha vaṅgīsatthero –

“Saṃkhittenapi deseti, vitthārenapi bhāsati;
Sālikāyiva nigghoso, paṭibhānaṃ udīrayī”ti. (saṃ. ni. 1.214; theragā. 1241);

Evaṃ vutte ussāhajātā hutvā **evaṃ, bhanteti kho te bhikkhū bhagavato paccassosum** satthu vacanaṃ sampañcchimsu, paṭiggahesunti vuttaṃ hoti.

Atha nesam **bhagavā etadavoca** – etaṃ idāni vattabbaṃ “katamo ca, bhikkhave, paṭiccasamuppādo”tiādiṃ sakalaṃ suttaṃ avoca. Tattha **katamo ca, bhikkhave, paṭiccasamuppādoti** kathetukamyatāpucchā. Pañcavidhā hi pucchā adīṭṭhajotanāpucchā diṭṭhasaṃsandanāpucchā vimaticchedanāpucchā anumatipucchā kathetukamyatāpucchāti, tāsam idam nānattaṃ –

Katamā **adīṭṭhajotanā pucchā** (mahāni. 150; cūḷani. puṇṇakamāṇavapucchānidessa 12)? Pakatiyā lakkhaṇaṃ aññātaṃ hoti adīṭṭhaṃ atulitaṃ atīritaṃ avibhūtaṃ avibhāvitaṃ. Tassa ñāṇāya dassanāya tulanāya tīraṇāya vibhūtāya vibhāvanatthāya pañhaṃ pucchati. Ayaṃ adīṭṭhajotanāpucchā.

Katamā **diṭṭhasaṃsandanāpucchā**? Pakatiyā lakkhaṇaṃ ñātaṃ hoti diṭṭhaṃ tulitaṃ tīritaṃ vibhūtaṃ vibhāvitaṃ. So aññehi paṇḍitehi saddhiṃ saṃsandanatthāya pañhaṃ pucchati. Ayaṃ diṭṭhasaṃsandanāpucchā.

Katamā **vimaticchedanāpucchā**? Pakatiyā saṃsayapakkhando hoti vimatipakkhando dveḷhakajāto – “evaṃ nu kho, na nu kho, kathaṃ nu kho”ti, so vimaticchedanatthāya pañhaṃ pucchati, ayaṃ vimaticchedanāpucchā.

Katamā **anumatipucchā**? Bhagavā bhikkhūnaṃ anumatiyā pañhaṃ pucchati – “taṃ kiṃ maññātha, bhikkhave, rūpaṃ niccaṃ vā aniccaṃ vā”ti, aniccaṃ, bhante. Yaṃ panāniccaṃ dukkhaṃ vā taṃ sukhaṃ vāti, dukkhaṃ, bhante. Yaṃ panāniccaṃ dukkhaṃ vipariṇāmadhammaṃ, kallaṃ nu taṃ samanupassituṃ – “etaṃ mama esohamasmi eso me attā”ti, no hetam bhanteti (saṃ. ni. 3.79). Ayaṃ anumatipucchā.

Katamā **kathetukamyatāpucchā**? Bhagavā bhikkhūnaṃ kathetukamyatāya pañhaṃ pucchati – “cattārome, bhikkhave, satipaṭṭhānā. Katame cattāro”ti? Ayaṃ kathetukamyatāpucchāti.

Tattha buddhānaṃ purimā tisso pucchā natthi. Kasmā? Buddhānañhi tīsu addhāsu kiñci saṅkhatam addhāvimuttaṃ vā asaṅkhatam adīṭṭhaṃ ajotitaṃ atulitaṃ atīritaṃ avibhūtaṃ avibhāvitaṃ nāma natthi. Tena nesam adīṭṭhajotanāpucchā natthi. Yaṃ pana bhagavatā attano ñāṇena paṭividdham, tassa aññena samaṇena vā brāhmaṇena vā devena vā mārena vā brahmunā vā saddhiṃ saṃsandanakiccaṃ natthi. Tenassa diṭṭhasaṃsandanāpucchā natthi. Yasmā panesa akathaṃkathī tiṇṇavicikiccho sabbadhammesu vihatasaṃsayo. Tenassa vimaticchedanāpucchā natthi. Itarā pana dve pucchā bhagavato atthi. Tāsu ayaṃ

kathetukamyatā pucchāti veditabbā.

Idāni tāva pucchāya puṭṭhaṃ paccayākāraṃ vibhajanto **avijjāpaccayā, bhikkhave, saṅkhārātiādīmāha**. Ettha ca yathā nāma “pitaraṃ kathessāmi”ti āraddho “tissassa pitā soṇassa pitā”ti paṭhamataraṃ puttampi katheti, evameva bhagavā paccayaṃ kathetuṃ āraddho “avijjāpaccayā saṅkhārā”tiādīnā nayena saṅkhārādīnaṃ paccaye avijjādidhamme kathento paccayuppannampi kathesi. Āhāravaggassa pana pariyosāne “paṭiccasamuppādaṅca vo, bhikkhave, desessāmi paṭiccasamuppanne ca dhamme”ti (saṃ. nī. 2.20) ubhayaṃ ārabhitvā ubhayampi kathesi. Idāni **avijjāpaccayā saṅkhārātiādīsu** pana avijjā ca sā paccayo cāti avijjāpaccayo. Tasmā avijjāpaccayā saṅkhārā sambhavantīti iminā nayena attho veditabbo. Ayamettha saṅkhepo, vitthārena pana sabbākārasampannā anulomapaṭiccasamuppādakathā visuddhimagge kathitā, tasmā sā tatha kathitavaseneva gahetabbā.

Paṭilomakathāyaṃ pana **avijjāya tvevāti** avijjāya tu eva. **Asesavirāganirodhāti** virāgasāṅkhātena maggena asesanirodhā. **Saṅkhāranirodhoti** saṅkhārānaṃ anuppādanirodho hoti. Evaṃnirodhānaṃ pana saṅkhārānaṃ nirodhā viññāṇādīnaṅca nirodhā nāmarūpādīni niruddhāniyeva hontīti dassetuṃ **saṅkhāranirodhā viññāṇanirodhoti**tiādīni vatvā, **evametassa kevalassa dukkhakkhandhassa nirodho hotīti** āha. Tattha **kevalassāti** sakalassa, suddhassa vā, sattavirahitassāti attho. **Dukkhakkhandhassāti** dukkharāsissa. **Nirodho hotīti** anuppādo hoti. Iti bhagavā anulomato dvādasahi padehi vaṭṭakathaṃ kathetvā tameva vaṭṭaṃ vinivaṭṭetvā paṭilomato dvādasahi padehi vivaṭṭaṃ kathento arahattena desanāya kūṭaṃ gaṇhi. Desanāpariyosāne te pañcasatā āraddhavipassakā ugghaṭitaññūpuggalā sūriyarasamisamphuṭṭhāni paripākagatāni padumāni viya saccāni bujjhitvā arahattaphale patiṭṭhahiṃsu.

Idamavoca bhagavāti idaṃ vaṭṭavivaṭṭavasena sakalasuttaṃ bhagavā avoca. **Attamanā te bhikkhūti** tuṭṭhacittā te pañcasatā khīṇāsavā bhikkhū. **Bhagavato bhāsitaṃ abhinanduntī** karavīkarutamañjunā kaṇṇasukhena paṇḍitajanahadayānaṃ amatābhisekasadisena brahmassarena bhāsato bhagavato vacanaṃ abhinandiṃsu, anumodiṃsu ceva sampaṭicchīṃsu cāti attho. Tenetaṃ vuccati –

“Subhāsitaṃ sulapitaṃ, sādhu sādhuṭi tādino;
Anumodamānā sirasā, sampaṭicchīṃsu bhikkhavo”ti.

Paṭhamapaṭiccasamuppādasuttavaṇṇanā niṭṭhitā.

2. Vibhaṅgasuttavaṇṇanā

2. Dutiyepi vuttanayeneva suttanikkhepo veditabbo. Ayaṃ pana viseso – paṭhamam ugghaṭitaññūpuggalānaṃ vasena saṅkhepato dassitaṃ, idaṃ vipañcitaññūnaṃ vasena vitthāratoti. Imasmiṅca pana sutte catasso vallihārakapurisūpamā vattabbā, tā visuddhimagge vuttā eva. Yathā hi vallihārako puriso valliyaṃ aggaṃ disvā tadanusārena mūlaṃ pariyesanto taṃ disvā valliṃ mūle chetvā ādāya kamme upaneyya, evaṃ bhagavā vitthāradesanaṃ desento paṭiccasamuppādassa aggabhūtā jarāmarāṇā paṭṭhāya yāva mūlabhūtaṃ avijjāpadaṃ, tāva desanaṃ āharitvā puna vaṭṭavivaṭṭaṃ desento niṭṭhapesi.

Tatrāyaṃ jarāmarāṇādīnaṃ vitthāradesanāya atthanicchayo – jarāmarāṇaniddese tāva **tesaṃ tesanti** ayaṃ saṅkhepato anekesaṃ sattānaṃ sādharmaṇaniddesoti viññātabbo. Yā devadattassa jarā, yā somadattassāti evaṅhi divasampi kathentassa neva sattā pariyādānaṃ gacchanti. Imehi pana dvīhi padehi na koci satto apariyādīno hoti. Tasmā vuttaṃ, “ayaṃ saṅkhepato anekesaṃ sattānaṃ sādharmaṇaniddeso”ti. **Tamhi tamhīti** ayaṃ gatiyāvasena anekesaṃ sattanikāyānaṃ sādharmaṇaniddeso. **Sattanikāyeti** sādharmaṇaniddesena niddiṭṭhassa sarūpanidassanaṃ. **Jarā jiraṇatāti**tiādīsu pana **jarāti** sabhāvaniddeso. **Jiraṇatāti** ākāraniddeso. **Khaṇḍiccanti**tiādāyo tayo kālātikame kiccaniddesā, pacchimā dve pakatiniddesā. Ayaṅhi **jarāti** iminā padena sabhāvato dīpitā, tenassāyaṃ sabhāvaniddeso. **Jiraṇatāti**

iminā ākārato, tenassāyaṃ ākāraniddeso. **Khaṇḍiccanti** iminā kālātikame dantanakhānaṃ khaṇḍitabhāvakaraṇakiccato. **Pāliccanti** iminā kesalomānaṃ palitabhāvakaraṇakiccato. **Valittacatāti** iminā maṃsaṃ milāpetvā tacavalibhāvakaraṇakiccato dīpitā. Tenassā ime khaṇḍiccantiādayo tayo kālātikame kiccaniddesā. Tehi imesaṃ vikāraṇaṃ dassanavasena pākaṭṭibhūtā pākaṭṭajarā dassitā. Yatheva hi udakassa vā vātassa vā aggino vā tiṇarukkhādīnaṃ saṃbhaggapalibhaggatāya vā jhāmatāya vā gatamaggo pākaṭṭo hoti, na ca so gatamaggo tāneva udakādīni, evameva jarāya dantādīsu khaṇḍiccādivasena gatamaggo pākaṭṭo, cakkhuṃ ummīletvāpi gayhati na ca khaṇḍiccādīneva jarā. Na hi jarā cakkhuviññeyyā hoti.

Āyuno saṃhāni indriyānaṃ paripākoti imehi pana padehi kālātikameyeva abhibyattāya āyukkhaya-cakkhādiindriya-paripākasaññitāya pakatiyā dīpitā. Tenassime pacchimā dve pakatiniddesāti veditabbā. Tattha yasmā jaraṃ pattassa āyu hāyati, tasmā jarā “āyuno saṃhāni” ti phalūpacārena vuttā. Yasmā ca daharakāle suppasannāni sukhumampi attano visayaṃ sukheveva gaṇhanasamatthāni cakkhādīni indriyāni jaraṃ pattassa paripakkāni āluṭṭitāni avisadāni, oḷārikampi attano visayaṃ gahetuṃ asamatthāni honti, tasmā “indriyānaṃ paripāko” ti phalūpacāreneva vuttā.

Sā panāyaṃ evaṃ niddiṭṭhā sabbāpi jarā pākaṭṭa paṭicchannāti duvidhā hoti. Tattha dantādīsu khaṇḍādibhāvadassanato rūpadhammesu jarā **pākaṭṭajarā** nāma, arūpadhammesu pana jarā tādisassa vikārassa adassanato **paṭicchannajarā** nāma. Tattha yvāyaṃ khaṇḍādibhāvo dissati, so tādisānaṃ dantādīnaṃ suviññeyyattā vaṇṇoyeva, taṃ cakkhunā disvā manodvārena cintetvā “ime dantā jarāya pahaṭṭā” ti jaraṃ jānāti udakatthāne baddhāni gosīsādīni oloketvā heṭṭhā udakassa atthibhāvaṃ jānaṃ viya. Puna avīci savīcīti evampi duvidhā hoti. Tattha maṇi-kanaka-rajata-pavālacandasūriyādīnaṃ viya mandadasakādīsu pāṇīnaṃ viya ca pupphaphalapallavādīsu ca apāṇīnaṃ viya antarantarā vaṇṇavisesādīnaṃ duviññeyyattā jarā **avīcijarā** nāma, nirantarajarāti attho. Tato aññesu pana yathāvuttesu antarantarā vaṇṇavisesādīnaṃ suviññeyyattā jarā **savīcijarā** nāmāti veditabbā.

Ito paraṃ **tesaṃ tesantiādi** vuttanayeneva veditabbāṃ. **Cuti cavanatāti**ādīsu pana **cutīti** cavanakavasena vuccati, ekacatupaṇcakkhandhasāmaññavacanametam. **Cavanatāti** bhāvavacanena lakkhaṇanidassanaṃ. **Bhedoti** cutikkhandhānaṃ bhaṅguppattiparidīpanaṃ. **Antaradhānanti** ghaṭṭasseva bhinnassa bhinnānaṃ cutikkhandhānaṃ yena kenaci pariyaṇena thānābhāvaparidīpanaṃ. **Maccu maraṇanti** maccusaṅkhātaṃ maraṇaṃ, tena samucchadamaraṇādīni nisedheti. Kālo nāma antako, tassa kiriyā **kālakiriyā**. Evaṃ tena lokasammutiyā maraṇaṃ dīpeti.

Idāni paramatthena dīpetuṃ **khandhānaṃ bhedoti**ādīmāha. Paramatthena hi khandhāyeva bhijjanti, na satto nāma koci marati. Khandhesu pana bhijjamānesu satto marati, bhinnesu matoti vohāro hoti. Ettha ca catupaṇcavokāravasena khandhānaṃ bhedo, ekavokāravasena kaḷavarassa nikkhepo. Catuvokāravasena ca khandhānaṃ bhedo, sesadvayavasena kaḷavarassa nikkhepo veditabbo. Kasmā? Bhavadvayepi rūpakāyasaṅkhātassa kaḷavarassa sabbhāvato. Atha vā yasmā cātumahārājikādīsu khandhā bhijjanteva, na kiñci nikkhipati, tasmā tesaṃ vasena khandhānaṃ bhedo, manussādīsu kaḷavarassa nikkhepo. Ettha ca kaḷavarassa nikkhepakāraṇato maraṇaṃ “kaḷavarassa nikkhepo” ti vuttanti evamattho daṭṭhabbo. **Iti ayaṅca jarā idaṅca maraṇaṃ, idaṃ vuccati, bhikkhveti** idaṃ ubhayampi ekato katvā jarāmaraṇanti kathīyati.

Jātiniddese **jāti sañjātīti**ādīsu jāyanaṭṭhena **jāti**, sā aparipuṇṇāyatanavasena yuttā. Sañjāyanaṭṭhena **sañjāti**, sā paripuṇṇāyatanavasena yuttā. Okkamanaṭṭhena **okkanti**, sā aṇḍajalābujavasena yuttā. Te hi aṇḍakosaṅca vatthikosaṅca okkamantā pavisantā viya paṭisandhiṃ gaṇhanti. Abhinibbattaṭṭhena **abhinibbatti**, sā saṃsedajaopapātikavasena yuttā. Te hi pākaṭṭāyeva hutvā nibbattanti. Ayaṃ tāva vohāradesanā.

Idāni paramatthadesanā hoti. Khandhāyeva hi paramatthato pātubhavanti, na satto. Tattha ca **khandhānanti** ekavokārabhave ekassa, catuvokārabhave catunnaṃ, paṇcavokārabhave paṇcannampi

gahaṇaṃ veditaḅbaṃ. **Pātubhāvoti** uppatti. **Āyatanānanti** ettha tatra tatra uppajjamānāyatanavasena saṅgaho veditaḅbo. **Paṭilābhōti** santatiyaṃ pātubhāvoyeva. Pātubhavantāneva hi tāni paṭiladdhāni nāma honti. **Ayaṃ vuccati, bhikkhave, jātīti** iminā padena vohārato paramatthato ca desitāya jātiyā nigamaṇaṃ karotīti.

Bhavaniddese **kāmabhavoti** kammabhavo ca upapattibhavo ca. Tattha kammabhavo nāma kāmabhavūpagakammameva. Tañhi tattha upapattibhavassa kāraṇattā “sukho buddhānaṃ uppādo (dha. pa. 194) dukkho pāpassa uccayo”tiādīni (dha. pa. 117) viya phalavohārena bhavoti vuttaṃ. Upapattibhavo nāma tena kammena nibbattaṃ upādiṇṇakkhandhapañcakaṃ. Tañhi tattha bhavatīti katvā bhavoti vuttaṃ. Sabbathāpi idaṃ kammaṇca upapattiṇca ubhayampetaṃ midha “kāmabhavo”ti vuttaṃ. Esa nayo rūpārūpabhavesūti.

Upādānaniddese **kāmupādānanti**ādīsu vatthukāmaṃ upādiyanti etena, sayāṃ vā taṃ upādiyati **kāmupādānaṃ**, kāmo ca so upādānañcāti kāmupādānaṃ. **Upādānanti** daḷhaggahaṇaṃ vuccati. Daḷhattho hi ettha upasaddo upāyasaupakaṭṭhādīsu viya. Pañcakāmaguṇikarāgassetāṃ adhivacanaṃ. Ayamettha saṅkhepo. Vitthārato panetaṃ, “tattha katamaṃ kāmupādānaṃ? Yo kāmesu kāmaccando”ti (dha. sa. 1220; vibha. 938) vuttanayeneva veditaḅbaṃ.

Tathā diṭṭhi ca sā upādānañcāti **diṭṭhupādānaṃ**. Atha vā diṭṭhiṃ upādiyati, upādiyanti vā etena diṭṭhinti diṭṭhupādānaṃ. Upādiyati hi purimadiṭṭhiṃ uttaradiṭṭhi, upādiyanti ca tāya diṭṭhiṃ. Yathāha – “sassato attā ca loko ca idameva saccāṃ moghamañña”ntiādi (ma. ni. 3.27). Sīlabbatupādānaattavādudupādānavajjassa sabbadiṭṭhigatassetāṃ adhivacanaṃ. Ayamettha saṅkhepo, vitthārato panetaṃ, “tattha katamaṃ diṭṭhupādānaṃ? Natthi dinna”nti (dha. sa. 1221) vuttanayeneva veditaḅbaṃ.

Tathā sīlabbatamupādiyanti etena, sayāṃ vā taṃ upādiyati, sīlabbatañca taṃ upādānañcāti vā **sīlabbatupādānaṃ**. Gosīlagovatādīni hi “evaṃ suddhī”ti (dha. sa. 1222; vibha. 938) abhinivesato sayameva upādānānti. Ayamettha saṅkhepo, vitthārato panetaṃ, “tattha katamaṃ sīlabbatupādānaṃ? Ito bahiddhā samaṇabrāhmaṇānaṃ sīlena suddhī”ti vuttanayeneva veditaḅbaṃ.

Idāni vadanti etenāti vādo, upādiyanti etenāti upādānaṃ, kiṃ vadanti upādiyanti vā? Attānaṃ. Attano vādudupādānaṃ **attavādudupādānaṃ**. Attavādamattameva vā attāti upādiyanti etenāti attavādudupādānaṃ. Vīsativatthukāya sakkāyadiṭṭhiyā etaṃ adhivacanaṃ. Ayamettha saṅkhepo, vitthārato panetaṃ, “tattha katamaṃ attavādudupādānaṃ? Idha assutavā puthujjano ariyānaṃ adassāvī”ti vuttanayeneva veditaḅbaṃ.

Tañhānidde **rūpataṇhā...pe... dhammataṇhāti** etaṃ cakkhuvārādīsu javanavīthiyā pavattāya taṇhāya “setṭhiputto brāhmaṇaputto”ti evamādīsu pitito nāmaṃ viya pitisadisārammaṇato nāmaṃ. Ettha ca rūpārammaṇā taṇhā, rūpe taṇhāti **rūpataṇhā**. Sā kāmarāgabhāvena rūpaṃ assādentī pavattamānā **kāmataṇhā**, sassatadiṭṭhisahagatarāgabhāvena “rūpaṃ niccaṃ dhavaṃ sassata”nti evaṃ assādentī pavattamānā **bhavataṇhā**, ucchedadiṭṭhisahagatarāgabhāvena “rūpaṃ ucchijjati vinassati pecca na bhavati”ti evaṃ assādentī pavattamānā **vibhavataṇhāti** rūpataṇhā evaṃ tividhā hoti. Yathā ca rūpataṇhā, tathā saddataṇhādayopīti evaṃ tāni aṭṭhārasa taṇhāvicarītāni honti. Tāni ajjhattarūpādīsu aṭṭhārasa, bahiddhārūpādīsu aṭṭhārasāti chattiṃsa. Iti atītāni chattiṃsa, anāgatāni chattiṃsa, paccuppannāni chattiṃsāti evaṃ aṭṭhasataṃ taṇhāvicarītāni honti. “Ajjhattikassa upādāya asmīti hoti, itthasmīti hoti”ti (vibha. 973) vā evamādīni ajjhattikarūpādinissitāni aṭṭhārasa, “bāhirassa upādāya iminā asmīti hoti, iminā itthasmīti hoti”ti (vibha. 975) vā evamādīni bāhirarūpādinissitāni aṭṭhārasāti chattiṃsa, iti atītāni chattiṃsa, anāgatāni chattiṃsa, paccuppannāni chattiṃsāti evampi aṭṭhasataṃ taṇhāvicarītāni honti. Puna saṅgahe kariyamāne rūpādīsu ārammaṇesu chaḷeva taṇhākāyā tissoyeva kāmataṇhādayo hontīti. Evaṃ –

“Niddesatthena niddesa, vitthārā vitthārassa ca;
Puna saṅgahato taṅhā, viññātabbā vibhāvinā”ti.

Vedanāniddese **vedanākāyā**ti vedanāsamūhā. **Cakkhusamphassajā vedanā...pe...**
manosamphassajāvedanāti etaṃ “cakkhusamphassajāvedanā atthi kusalā, atthi akusalā, atthi
abyākata”ti evaṃ vibhaṅge (vibha. 34) āgatattā cakkhudvārādīsu pavattānaṃ
kusalākusalābyākatavedanānaṃ “sāriputto mantāniputto”ti evamādīsu mātito nāmaṃ viya mātisadisato
vatthuto nāmaṃ. Vacanattho panettha – cakkhusamphassahetu jātā vedanā cakkhusamphassajā vedanāti.
Eseva nayo sabbattha. Ayaṃ tāvettha sabbasaṅgāhikā kathā. Vipākavasena pana cakkhudvāre dve
cakkhuvīññāṇāni, dve manodhātuyo, tisso manoviññāṇadhātuyoti etāhi sampayuttavasena vedanā
veditabbā. Eseva nayo sotadvārādīsu. Manodvāre manoviññāṇadhātusampayuttāva.

Phassaniddese **cakkhusamphassoti** cakkhumhi samphasso. Esa nayo sabbattha.
Cakkhusamphasso...pe... kāyasamphassoti ettāvata ca kusalākusalavipākā pañcavatthukā dasa
phassā vuttā honti. **Manosamphassoti** iminā sesabāvīsati lokiyavipākamanasampayuttā phassā.

Saḷāyatananiddese **cakkhāyatananti**ādīsu yaṃ vattabbaṃ, taṃ visuddhimagge khandhaniddese
ceva āyatananiddese ca vuttameva.

Nāmarūpaniddese namanalakkhaṇaṃ **nāmaṃ**. Rupanalakkhaṇaṃ **rūpaṃ**. Vibhajane panassa
vedanāti vedanākkhandho, **saññā**ti saññākkhandho, **cetanā phasso manasikāro**ti saṅkhārakkhandho
veditabbo. Kāmañca aññepi saṅkhārakkhandhasaṅgahitā dhammā santi, ime pana tayo sabbadubbalesupi
cittesu santi, tasmā etesaṃyeva vasenettha saṅkhārakkhandho dassito. **Cattāro ca mahābhūtā**ti ettha
cattāroti gaṇanaparicchedo. **Mahābhūtā**ti pathavīpatejavāyānametaṃ adhivacanaṃ. Yena pana
kāraṇena tāni mahābhūtānīti vuccanti, yo cettha añño vinicchayanayo, so sabbo visuddhimagge
rūpakhandhaniddese vutto. **Catunnañca mahābhūtānaṃ upādāyā**ti ettha pana **catunnanti**
upayogathe sāmivacanaṃ, cattāri mahābhūtānīti vuttaṃ hoti. **Upādāyā**ti upādīyivā, gahetvāti attho.
Nissāyātipi eke. “Vattamāna”nti ayañcettha pāṭhaseso. Samūhatthe vā etaṃ sāmivacanaṃ, catunnaṃ
mahābhūtānaṃ samūhaṃ upādāya vattamānaṃ rūpanti ettha attho veditabbo. Evaṃ sabbathāpi yāni ca
cattāri pathavīdāni mahābhūtāni, yañca catunnaṃ mahābhūtānaṃ upādāya vattamānaṃ
cakkhāyatanādībhedenā abhidhammapāliyaeva vuttaṃ tevīsatividhaṃ rūpaṃ, taṃ sabbampi rūpanti
veditabbaṃ.

Viññāṇaniddese **cakkhuvīññāṇanti** cakkhumhi viññāṇaṃ, cakkhuto vā jātaṃ viññāṇanti
cakkhuvīññāṇaṃ. Evaṃ sotaghānajivhākāyaviññāṇāni. Itaraṃ pana manoyeva viññāṇanti
manoviññāṇaṃ. Dvipañcaviññāṇavajjitatebhūmakavipākacittassetāṃ adhivacanaṃ.

Saṅkhāraniddese abhisāṅkharāṇalakkhaṇo **saṅkhāro**. Vibhajane panassa **kāyasaṅkhāro**ti kāyato
pavattasaṅkhāro. Kāyadvāre copanavasena pavattānaṃ kāmāvacarakusalato aṭṭhannaṃ, akusalato
dvādasannanti vīsatiyā kāyasañcetanānametaṃ adhivacanaṃ. **Vacīsaṅkhāro**ti vacanato
pavattasaṅkhāro, vacīdvāre vacanabhedavasena pavattānaṃ vīsatiyā eva vacīsañcetanānametaṃ
adhivacanaṃ. **Cittasaṅkhāro**ti cittato pavattasaṅkhāro, kāyavacīdvāre copanaṃ akatvā raho nisīditvā
cintentassa pavattānaṃ lokiyakusalākusalavasena ekūnatīṃsamanosañcetanānametaṃ adhivacanaṃ.

Avijjāniddese **dukkhe aññāṇanti** dukkhasacce aññāṇaṃ, mohassetāṃ adhivacanaṃ. Esa nayo
dukkhasamudaye aññāṇantiādīsu. Tattha catūhi kāraṇehi dukkhe aññāṇaṃ veditabbaṃ antogadhato
vatthuto ārammaṇato paṭicchādanato ca. Tathā hi taṃ dukkhasaccapariyāpannattā dukkhe antogadhaṃ,
dukkhasaccañcassa nissayapaccayabhāvena vatthu, ārammaṇapaccayabhāvena ārammaṇaṃ,
dukkhasaccaṃ etaṃ paṭicchādeti tassa yāthāvalakkhaṇapaṭivedhanivāraṇena ñāṇappavattiyā cettha
appadānena.

Dukkhasamudaye aññāṇaṃ tīhi kāraṇehi veditabbaṃ vatthuto ārammaṇato paṭicchādanato ca. Nirodhe paṭipadāya ca aññāṇaṃ ekeneva kāraṇena veditabbaṃ paṭicchādanato. Nirodhapaṭipadānañhi paṭicchādakameva aññāṇaṃ tesam yāthāvalakkhaṇapaṭivedhanivāraṇena tesu ca ñāṇappavattiyā appadānena. Na pana taṃ tattha antogadhaṃ tasmim saccadvaye apaniyāpannattā, na tassa taṃ saccadvayaṃ vatthu asahajātattā, nārammaṇaṃ, tadārabba appavattanato. Pacchimañhi saccadvayaṃ gambhīrattā duddasaṃ, na tattha andhabhūtaṃ aññāṇaṃ pavattati. Purimaṃ pana vacanīyattena sabhāvalakkhaṇassa duddasattā gambhīraṃ, tattha vipallāsagāhavasena pavattati.

Apica “dukkhe”ti ettāvata saṅghato vatthuto ārammaṇato kiccato ca avijjā dīpitā. “Dukkhasamudaye”ti ettāvata vatthuto ārammaṇato kiccato ca. “Dukkhanirodhe dukkhanirodhagāminiyā paṭipadāya”ti ettāvata kiccato. Avisesato pana “aññāṇa”nti etena sabhāvato niddiṭṭhāti ñātabbā.

Iti kho, bhikkhveti evaṃ kho, bhikkhave. **Nirodho hotīti** anuppādo hoti. Apicettha sabbeheva tehi nirodhapadehi nibbānaṃ desitaṃ. Nibbānañhi āgamma te te dhammā nirujjhanti, tasmā taṃ tesam tesam nirodhoti vuccati. Iti bhagavā imasmim sutte dvādasahi padehi vaṭṭavivaṭṭaṃ desento arahattanikūteneva desanaṃ niṭṭhapesi. Desanāpariyosāne vuttanayeneva pañcasatā bhikkhū arahatte patiṭṭhahimsūti.

Vibhaṅgasuttaṃ dutiyaṃ.

3. Paṭipadāsuttavaṇṇanā

3. Tatiye **micchāpaṭipadanti** ayam tāva aniyyānikapaṭipadā. Nanu ca avijjāpaccayā puññābhisaṅkhāropi atthi āneñjābhisaṅkhāropi, so kathaṃ micchāpaṭipadā hotīti. Vaṭṭasīsattā. Yañhi kiñci bhavattayasaṅkhātaṃ vaṭṭaṃ patthetvā pavattitaṃ, antamaso pañcābhiññā aṭṭha vā pana samāpattiyo, sabbaṃ taṃ vaṭṭapakkiyaṃ vaṭṭasīsanti vaṭṭasīsattā micchāpaṭipadāva hoti. Yaṃ pana kiñci vivaṭṭaṃ nibbānaṃ patthetvā pavattitaṃ, antamaso uḷunḷakayāgumattadānampi paṇṇamuṭṭhidānamattampi, sabbaṃ taṃ vivaṭṭapakkiyaṃ vivaṭṭanissitaṃ, vivaṭṭapakkhikattā sammāpaṭipadāva hoti. Appamattakampi hi paṇṇamuṭṭhimattadānakusalaṃ vā hotu mahantaṃ velāmadānādikusalaṃ vā, sace vaṭṭasampattiṃ patthetvā vaṭṭanissitavasena micchā ṭhapitaṃ hoti, vaṭṭameva āharitaṃ sakkoti, no vivaṭṭaṃ. “Idaṃ me dānaṃ āsavakkhayāvahaṃ hotū”ti evaṃ pana vivaṭṭaṃ patthentena vivaṭṭavasena sammā ṭhapitaṃ arahattampi paccekabodhiññānampi sabbaññūtaññānampi dātuṃ sakkotiyeva, na arahattaṃ appatvā pariyosānaṃ gacchati. Iti anulomavasena micchāpaṭipadā, paṭilomavasena sammāpaṭipadā desitāti veditabbā. Nanu cettha paṭipadā pucchitā, nibbānaṃ bhājitaṃ, niyyātanepi paṭipadāva niyyātītā. Na ca nibbānassa paṭipadāti nāmaṃ, savipassanānaṃ pana catunnaṃ maggānametaṃ nāmaṃ, tasmā pucchāniyyātanepi padabhājanaṃ na sametīti. No na sameti, kasmā? Phalena paṭipadāya dassitattā. Phalena hettha paṭipadā dassitā. “Avijjāya tveva asesavirāganirodhā saṅkhāranirodho”ti etaṃ nirodhasaṅkhātaṃ nibbānaṃ yassā paṭipadāya phalaṃ, ayam vuccati, bhikkhave, sammāpaṭipadāti ayamettha attho. Imasmiñca atthe asesavirāganirodhāti ettha virāgo nirodhasseva vevacanaṃ, asesavirāgā asesanirodhāti ayañhettha adhippāyo. Yena vā virāgasāṅkhātena maggena asesanirodho hoti, taṃ dassetaṃ etaṃ padabhājanaṃ vuttaṃ. Evañhi sati sānubhāvā paṭipadā vibhattā hoti. Iti imasmimpi sutte vaṭṭavivaṭṭameva kathitanti. Tatiyaṃ.

4. Vipassīsuttavaṇṇanā

4. Catutthe **vipassīsātī** tassa kira bodhisattassa yathā lokiyamanussānaṃ kiñcideva passantānaṃ parittakammābhiniḅbattassa kammajapasādassa dubbalattā akkhīni vipphandanti, na evaṃ vipphandiṃsu. Balavakammanibbattassa pana kammajapasādassa balavattā avipphandantehi animisehi eva akkhīni passi seyyathāpi devā tāvatimsā. Tena vuttaṃ – “animisanto kumāro pekkhatīti kho,

bhikkhave, vipassissa kumārassa ‘vipassī vipassī’ tveva samañña udapādī’ ti (dī. ni. 2.40). Ayañhettha adhippāyo – antarantarā nimisajanitandhakāravirahena visuddham passati, vivaṭehi vā akkhīhi passatīti **vipassī**. Ettha ca kiñcāpi pacchimabhavikānaṃ sabbabodhisattānaṃ balavakammanibbattassa kammajapasādassa balavattā akkhīni na vipphandanti, so pana bodhisatto eteneva nāmaṃ labhi.

Apica viceyya viceyya passatīti **vipassī**, vicinitvā vicinitvā passatīti attho. Ekadivasam kira vinicchayaṭṭhāne nisīditvā atthe anusāsantassa rañño alaṅkatapaṭiyattaṃ mahāpurisaṃ āharitvā anke ṭhapayimsu. Tassa taṃ anke katvā palālayamānasseva amaccā sāmikaṃ assāmikaṃ akaṃsu. Bodhisatto anattamanasaddaṃ nicchāresi. Rājā ‘kimetaṃ upadhārethā’ ti āha. Upadhārayamānā aññaṃ adisvā ‘aṭṭassa dubbicchitattā evaṃ kataṃ bhavissatī’ ti puna sāmikameva sāmikaṃ katvā ‘ñatvā nu kho kumāro evaṃ karotī’ ti? Vīmaṃsantā puna sāmikaṃ assāmikamakāṃsu. Puna bodhisatto tatheva saddaṃ nicchāresi. Atha rājā ‘jānāti mahāpuriso’ ti tato paṭṭhāya appamatto ahoṣi. Tena vuttaṃ ‘viceyya viceyya kumāro atthe paṇāyati ñāyenāti kho, bhikkhave, vipassissa kumārassa bhiyyosomattāya ‘vipassī vipassī’ tveva samañña udapādī’ ti (dī. ni. 2.41).

Bhagavatoti bhāgyasampannassa. **Arahatoti** rāgādiarīnaṃ hatattā, saṃsāracakkassa vā arānaṃ hatattā, paccayānaṃ vā arahattā arahātī evaṃ guṇato uppannāmadheyassa. **Sammāsambuddhassāti** sammā nayena hetunā sāmaṃ paccattapurisakārena cattāri saccāni buddhassa. **Pubbeva sambodhāti** sambodho vuccati catūsu maggesu ñāṇaṃ, tato pubbeva. **Bodhisattasseva satoti** ettha **bodhīti** ñāṇaṃ, bodhimā satto **bodhisatto**, ñāṇavā paññavā paṇḍitoti attho. Purimabuddhānañhi pādamaṭṭe abhinīhāro paṭṭhāya paṇḍitova so satto, na andhabāloti bodhisatto. Yathā vā udakato uggantvā ṭhitaṃ paripākagataṃ padumaṃ sūriyaramisamphassa avassaṃ bujjhissatīti bujjhanakapadumanti vuccati, evaṃ buddhānaṃ santike byākaraṇassa laddhattā avassaṃ anantarāyena pāramiyo pūretvā bujjhissatīti bujjhanakasattotipi **bodhisatto**. Yā ca eṣā catumaggañāṇasāṅkhātā bodhi, taṃ patthayamāno pavattatīti bodhiyaṃ satto āsattotipi **bodhisatto**. Evaṃ guṇato uppannānavasena bodhisattasseva sato. **Kicchanti** dukkhaṃ. **Āpannoti** anuppatto. Idaṃ vuttaṃ hoti – aho ayaṃ sattaḷoko dukkhaṃ anuppattoti. **Cavati ca upapajjati cāti** idaṃ aparāparaṃ cutipaṭisandhivasena vuttaṃ. **Nissaraṇanti** nibbānaṃ. Tañhi jarāmaṇadukkhato nissaṭṭatā tassa nissaraṇanti vuccati. **Kudāssu nāmāti** katarasmimṃ nu kho kāle.

Yoniso manasikārāti upāyamanasikārena pathamanasikārena. **Ahu paññāya abhisamayoti** paññāya saddhim jarāmaṇakāraṇassa abhisamayo samavāyo samāyogo ahoṣi, ‘jātipaccayā jarāmaṇa’ nti idaṃ tena diṭṭhanti attho. Atha vā **yoniso manasikārā ahu paññāyāti** yoniso manasikārena ca paññāya ca abhisamayo ahu. ‘Jātiyā kho sati jarāmaṇa’ nti, evaṃ jarāmaṇakāraṇassa paṭivedho ahoṣīti attho. Esa nayo sabbattha.

Iti hidanti evamidam. **Samudayo samudayoti** ekādasasu ṭhānesu saṅkhārādīnaṃ samudayaṃ sampiṇḍetvā niddisati. **Pubbe ananussutesūti** ‘avijjāpaccayā saṅkhārānaṃ samudayo hotī’ ti. Evaṃ ito pubbe ananussutesu dhammesu, catūsu vā ariyasaccadhammesu. **Cakkhūti** ādīni ñāṇavevacanāneva. Nānameva hettha dassanaṭṭhena **cakkhu**, ñātaṭṭhena **ñāṇaṃ**, pajānanaṭṭhena **paññā**, paṭivedhanaṭṭhena **vijjā**, obhāsanaṭṭhena **ālokoti** vuttaṃ. Taṃ panetaṃ catūsu saccesu lokiyalokuttaramissakaṃ niddiṭṭhanti veditabbaṃ. Nirodhavārepi imināva nayena attho veditabbo. Catutthaṃ.

5-10. Sikhīsuttādivaṇṇanā

5-10. Pañcamādīsū **sikhissa**, **bhikkhavi**tiādīnaṃ padānaṃ ‘sikhissapi, bhikkhave’ ti na evaṃ yojetvā attho veditabbo. Kasmā? Ekāsane adesitattā. Nānāṭhānesu hi etāni desitāni, attho pana sabbattha sadisoyeva. Sabbabodhisattānañhi bodhipallaṅke nisinnānaṃ na añño samaṇo vā brāhmaṇo vā devo vā māro vā brahmā vā ācikkhati – ‘atīte bodhisattā paccayākāraṃ sammāsivā buddhā jātā’ ti. Yathā pana paṭhamakappikakāle deve vuṭṭhe udakassa gatamaggeneva aparāparaṃ vuṭṭhiudakaṃ gacchati, evaṃ

tehi tehi purimabuddhehi gatamaggeneva pacchimā pacchimā gacchanti. Sabbabodhisattā hi ānāpānacatutthajjhānato vuṭṭhāya paccayākāre ñāṇaṃ otāretvā taṃ anulomapaṭilomaṃ sammasitvā buddhā hontīti paṭipāṭiyā sattu su suttesu buddhavipassanā nāma kathitāti.

Buddhavaggo paṭhamo.

2. Āhāravaggo

1. Āhārasuttavaṇṇanā

11. Āhāravaggassa paṭhame **āhārāti** paccayā. Paccayā hi āharanti attano phalaṃ, tasmā āhārāti vuccanti. **Bhūtānaṃ vā sattānantiādīsu bhūtāti** jātā nibbattā. **Sambhavesinoti** ye sambhavaṃ jātīṃ nibbattīṃ esanti gavesanti. Tattha catūsu yonīsu aṇḍajajalābujā sattā yāva aṇḍakosaṃ vatthikosañca na bhindanti, tāva sambhavesino nāma, aṇḍakosaṃ vatthikosañca bhinditvā bahi nikkhantā bhūtā nāma. Saṃsedajā opapātikā ca paṭhamacittakkaṇe sambhavesino nāma, dutiyacittakkaṇato pabhuti bhūtā nāma. Yena vā iriyāpathena jāyanti, yāva tato aññaṃ na pāpuṇanti, tāva sambhavesino nāma, tato paraṃ bhūtā nāma. Atha vā **bhūtāti** jātā abhinibbattā, ye bhūtā abhinibbattāyeva, na puna bhavissantīti saṅkhaṃ gacchanti, tesam khīṇāsavānaṃ etaṃ adhivacanaṃ. Sambhavamesantīti **sambhavesino**. Appahīnabhavasamyojanattā āyatimpi sambhavaṃ esantānaṃ sekkhaputhujjanānametaṃ adhivacanaṃ. Evaṃ sabbathāpi imehi dvīhi padehi sabbasatte pariyaḍiyati. **Vāsaddo** cettha sampiṇḍanatto, tasmā bhūtānañca sambhavesīnañcāti ayamatto vedītabbo.

Ṭhitiyāti ṭhitatthaṃ. **Anuggahāyāti** anuggahatthaṃ. Vacanabhedoyeva cesa, attho pana dvinnampi padānaṃ ekoyeva. Atha vā **ṭhitiyāti** tassa tassa sattassa uppannadhammānaṃ anuppabandhavasena avicchedāya. **Anuggahāyāti** anuppannānaṃ uppādāya. Ubhopi cetāni “bhūtānaṃ vā ṭhitiyā ceva anuggahāya ca, sambhavesīnaṃ vā ṭhitiyā ceva anuggahāya cā”ti evaṃ ubhayattha daṭṭhabbāntīti.

Kabaḷīkāro āhāroti kabaḷaṃ katvā ajjhoharītabbako āhāro, odanakummāsādivatthukāya oḷāyetaṃ adhivacanaṃ. **Oḷāriko vā sukhumo vāti** vatthuoḷārikatāya oḷāriko, sukhumatāya sukhumo. Sabhāvena pana sukhumarūpapariyāpannattā kabaḷīkāro āhāro sukhumova hoti. Sāpi cassa vatthuto oḷārikatā sukhumatā ca upādāyupādāya vedītabbā. Kumbhīlānañhi āhāraṃ upādāya morānaṃ āhāro sukhumo. Kumbhīlā kira pāsāṇe gilanti, te ca nesam kucchippattā vilīyanti. Morā sappavicchikādīpāṇe khādanti. Morānaṃ pana āhāraṃ upādāya taracchānaṃ āhāro sukhumo. Te kira tivassachadditāni visāṇāni ceva aṭṭhīni ca khādanti, tāni ca nesam kheḷena temitamattāneva kandaṃmūlaṃ viya mudukāni hontī. Taracchānaṃ āhāraṃ upādāya hatthīnaṃ āhāro sukhumo. Te hi nānārukhasākhādayo khādanti. Hatthīnaṃ āhārato gavayagokaṇṇamigādīnaṃ āhāro sukhumo. Te kira nissārāni nānārukhapannaḍīni khādanti. Tesampi āhārato gunnaṃ āhāro sukhumo. Te allasukkhatiṇāni khādanti. Tesam āhārato sasānaṃ āhāro sukhumo. Sasānaṃ āhārato sakuṇānaṃ āhāro sukhumo. Sakuṇānaṃ āhārato paccantavāsīnaṃ āhāro sukhumo. Paccantavāsīnaṃ āhārato gāmaḥojakānaṃ āhāro sukhumo. Gāmaḥojakānaṃ āhārato rājarājamahāmattānaṃ āhāro sukhumo. Tesampi āhārato cakkavattīno āhāro sukhumo. Cakkavattīno āhārato bhummānaṃ devānaṃ āhāro sukhumo. Bhummānaṃ devānaṃ āhārato cātumahārājīkānaṃ. Evaṃ yāva paranimmitavasavattīnaṃ āhārā vitthāretabbā. Tesam panāhāro sukhumotveva niṭṭhaṃ patto.

Ettha ca oḷārike vatthusmiṃ oḷā paritā hoti dubbalā, sukhome balavatī. Tathā hi ekapattapūrampi yāguṃ pīto muhutteneva jighacchito hoti yaṃkiñcīdeva khādītukāmo, sappiṃ pana pasatamattaṃ pivitvā divasaṃ abhottukāmo hoti. Tattha vatthu kammajatejasāṅkhātaṃ parissayaṃ vinodeti, na pana sakkoti pāletuṃ. Oḷā pana pāleti, na sakkoti parissayaṃ vinodetuṃ. Dve pana ekato hutvā parissayañceva vinodenti pāleti cāti.

Phasso dutiyoti cakkhusamphassādi chabbidhopi phasso etesu catūsu āhāresu dutiyo āhāro

veditabbo. Desanāyayo eva cesa, tasmā iminā nāma kāraṇena dutiyo tatiyo cāti idamettha na gavesitabbaṃ. **Manosañcetanā**ti cetanāva vuccati. **Viññāṇanti** cittaṃ. Iti bhagavā imasmiṃ ṭhāne upādiṇṇakaanupādiṇṇakavasena ekarāsiṃ katvā cattāro āhāre dassesi. Kabaḷīkārahāro hi upādiṇṇakopi atthi anupādiṇṇakopi, tathā phassādayo. Tattha sappādīhi gilitānaṃ maṇḍūkādīnaṃ vasena upādiṇṇakakabaḷīkārahāro daṭṭhabbo. Maṇḍūkādayo hi sappādīhi gilitā antokucchigatāpi kiñci kālaṃ jīvantiyeva. Te yāva upādiṇṇakapakkhe tiṭṭhanti, tāva āhāratthaṃ na sādheti. Bhijjitvā pana anupādiṇṇakapakkhe ṭhitā sādheti. Tadāpi upādiṇṇakāhāroti vuccantīti. Idaṃ pana ācariyānaṃ na rucantīti aṭṭhakathāyameva paṭikkhipitvā idaṃ vuttaṃ – imesaṃ sattānaṃ khādantānampi akhādantānampi bhuñjantānampi abhuñjantānampi paṭisandhicitteneva sahaṅgātā kammajā oḷā nāma atthi, sā yāvapi sattamā divasā pāleti, ayameva upādiṇṇakakabaḷīkārahāroti veditabbo. Tebhūmakavipākavasena pana upādiṇṇakaphassādayo veditabbā, tebhūmakakusalākusalakiriyavasena anupādiṇṇakā. Lokuttarā pana ruḷhīvasena kathitīti.

Etthāha – “yadi paccayaṭṭho āhāraṭṭho, atha kasmā aññesuṃpi sattānaṃ paccayesu vijjamānesu imeyeva cattāro vuttā”ti? Vuccate – ajjhattikasantatiyā visesapaccayattā. Visesapaccayo hi kabaḷīkārahārabhakkhānaṃ sattānaṃ rūpakāyassa kabaḷīkāro āhāro, nāmakāye vedanāya phasso, viññāṇassa manosañcetanā, nāmarūpassa viññāṇaṃ. Yathāha – “seyyathāpi, bhikkhave, ayaṃ kāyo āhāraṭṭhitiko āhāraṃ paṭicca tiṭṭhati, anāhāro no tiṭṭhati (saṃ. ni. 5.183), tathā phassapaccayā vedanā, saṅkhārapaccayā viññāṇaṃ, viññāṇapaccayā nāmarūpa”nti (saṃ. ni. 2.1; vibha. 225).

Ko panettha āhāro kiṃ āharatīti? Kabaḷīkārahāro ojaṭṭhamakarūpāni āharati phassāhāro tisso vedanā, manosañcetanāhāro tayo bhava, viññāṇāhāro paṭisandhināmarūpanti.

Kathaṃ? Kabaḷīkārahāro tāva mukhe ṭhapitamatteyeva aṭṭha rūpāni samuṭṭhāpeti, dantavicuṇṇitaṃ pana ajjhohariyamānaṃ ekekaṃ sitthaṃ aṭṭhaṭṭharūpāni samuṭṭhāpetiyeva. Evaṃ kabaḷīkārahāro ojaṭṭhamakarūpāni āharati. Phassāhāro pana sukhavedanīyo phasso uppajjamānoyeva sukhaṃ vedanaṃ āharati, dukkhavedanīyo dukkhaṃ, adukkhamasukhavedanīyo adukkhamasukhanti evaṃ sabbathāpi phassāhāro tisso vedanā āharati.

Manosañcetanāhāro kāmabhavūpagaṃ kammaṃ kāmabhavaṃ āharati, rūpārūpabhavūpagāni taṃ taṃ bhavaṃ. Evaṃ sabbathāpi manosañcetanāhāro tayo bhava āharati. Viññāṇāhāro pana ye ca paṭisandhikkhaṇe taṃsāmpayuttakā tayo khandhā, yāni ca tisantativasena tiṃsa rūpāni uppajjanti, sahaṅgātādīpaccayanayena tāni āharatīti vuccati. Evaṃ viññāṇāhāro paṭisandhināmarūpaṃ āharatīti. Ettha ca “manosañcetanā tayo bhava āharatī”ti sāsavakusalākusalacetanāva vuttā. “Viññāṇaṃ paṭisandhināmarūpaṃ āharatī”ti paṭisandhiviññāṇameva vuttaṃ. Avisesena pana taṃsāmpayuttataṃsamuṭṭhānadhāmmānaṃ āharaṇatopete “āhārā”ti veditabbā.

Etesu catūsu āhāresu kabaḷīkārahāro upatthambhento āhāraḷiccaṃ sādheti, phasso phusantoyeva manosañcetanā āyūhamānāva, viññāṇaṃ vijānantameva. Kathaṃ? Kabaḷīkārahāro hi upatthambhentoyeva kāyaṭṭhapanena sattānaṃ ṭhitiyā hoti. Kammajānitoṃpi hi ayaṃ kāyo kabaḷīkārahārena upatthaddho dasapi vassāni vassasatampi yāva āyuparimāṇā tiṭṭhati. Yathā kiṃ? Yathā māyūyā janitopi dārako dhātīyā thaññādīni pāyevā posiyamāno ciraṃ tiṭṭhati, yathā ca upatthambhena upatthambhitaṃ gehaṃ. Vuttampi cetam –

“Yathā, mahārāja, gehe papatante aññena dārunā upatthambhitaṃ santam eva taṃ gehaṃ na patati. Evameva kho, mahārāja, ayaṃ kāyo āhāraṭṭhitiko āhāraṃ paṭicca tiṭṭhati”ti.

Evaṃ kabaḷīkāro āhāro upatthambhento āhāraḷiccaṃ sādheti.

Evaṃ sādhentopi ca kabaḷīkāro āhāro dvinnāṃ rūpasantatīnaṃ paccayo hoti āhārasamuṭṭhānassa ca upādiṇṇakassa ca. Kammajānaṃ anupālako hutvā paccayo hoti, āhārasamuṭṭhānānaṃ janako hutvāti.

Phasso pana sukhādivatthubhūtaṃ ārammaṇaṃ phusantoyeva sukhādivedanāpavattanena sattānaṃ ʘhitiyā hoti. Manosañcetanā kusalākusalakammavasena āyūhamānāyeva bhavamūlanipphādanato sattānaṃ ʘhitiyā hoti. Viññānaṃ vijānantameva nāmarūpappavattanena sattānaṃ ʘhitiyā hotīti.

Evaṃ upatthambhanādivasena āhāraḱiccaṃ sādhayamānesu panetesu cattāri bhayāni daṭṭhabbāni. Seyyathidaṃ – kabaḱikārāhāre nikantiyeva bhayaṃ, phasse upagamanameva, manosañcetanāya āyūhanameva, viññāṇe abhinipātoyeva bhayanti. Kiṃ kārāṇā? Kabaḱikārāhāre hi nikantiṃ katvā sītādīnaṃ purakkhatā sattā āhāratthāya muddāgaṇaṇādikammāni karontā anappakaṃ dukkhaṃ nigacchanti. Ekacce ca imasmiṃ sāsane pabbajitvāpi vejjakammādikāya anesanāya āhāraṃ pariyesantā diṭṭheva dhamme gārayhā honti, samparāyepi, “tassa saṅghāṭipi ādittā sampajjalitā”tiādīnā lakkhaṇasaṃyutte (saṃ. ni. 2.218) vuttanayena samaṇapetā honti. Iminā tāva kārāṇena kabaḱikāre āhāre nikanti eva bhayanti veditabbā.

Phassaṃ upagacchantāpi phassassādino paresaṃ rakkhitagopitesu dārādīsu bhaṇdesu aparajjhanti, te saha bhaṇdena bhaṇdasāmikā gahetvā khaṇḱākhaṇḱikaṃ vā chinditvā saṅkārakūṭe chaḍḍenti, rañño vā niyyādenti. Tato te rājā vividhā kammakārāṇā kārāpeti. Kāyassa ca bhedā duggati tesāṃ pāṭikaṅkhā hoti. Iti phassassādāmūlakaṃ diṭṭhadhammikampi samparāyikampi bhayaṃ sabbamāgatameva hoti. Iminā kārāṇena phassāhāre upagamanameva bhayanti veditabbāṃ.

Kusalākusalakammāyūhane pana tammūlakaṃ tīsu bhavesu bhayaṃ sabbaṃ āgatameva hoti. Iminā kārāṇena manosañcetanāhāre āyūhanameva bhayanti veditabbāṃ.

Paṭisandhiviññāṇaṇca yasmiṃ yasmiṃ ʘhāne abhinipatati, tasmīṃ tasmīṃ ʘhāne paṭisandhināmarūpaṃ gahetvāva nibbattati. Tasmīṇca nibbatte sabbabhayāni nibbattāniyeva honti tammūlakattāti iminā kārāṇena viññāṇāhāre abhinipātoyeva bhayanti veditabboti.

Kiṃnidānātiādīsu nidānādīni sabbāneva kārāṇavevacanāni. Kārāṇaṇhi yasmā phalaṃ nideti, “handā naṃ gaṇhathā”ti appeti viya, tasmā **nidānanti** vuccati. Yasmā taṃ tato samudeti jāyati pabhavati, tasmā **samudayo jāti pabhavoti** vuccati. Ayaṃ panettha padattho – kiṃnidānaṃ etesanti **kiṃnidānā**. Ko samudayo etesanti **kiṃsamudayā**. Kā jāti etesanti **kiṃjātikā**. Ko pabhavo etesanti **kiṃpabhavā**. Yasmā pana tesāṃ taṇhā yathāvuttana atthena nidānaṇceva samudayo ca jāti ca pabhavo ca, tasmā “taṇhānidānā”tiādimāha. Evaṃ sabbapadesu attho veditabbo.

Ettha ca ime cattāro āhārā taṇhānidānāti paṭisandhiṃ ādiṃ katvā attabhāvasaṅkhātānaṃ āhārānaṃ purimataṇhānaṃ vasena nidānaṃ veditabbāṃ. Kathaṃ? Paṭisandhikkhaṇe tāva paripuṇṇāyatanānaṃ sattānaṃ sattasantativasena, sesānaṃ tato ūnaṇasantativasena uppannarūpabbhantaram jātā oḱā atthi, ayaṃ taṇhānidāno upādiṇṇakakabaḱikārāhāro. Paṭisandhicittasampayuttā pana phassacetanā sayaṇca cittaṃ viññāṇanti ime taṇhānidānā upādiṇṇaka-phassamanosañcetanā-viññāṇāhārāti evaṃ tāva purimataṇhānidānā paṭisandhikā āhārā. Yathā ca paṭisandhikā, evaṃ tato paraṃ paṭhamabhavaṅgacittakhaṇādīnibbattāpi veditabbā.

Yasmā pana bhagavā na kevalaṃ āhārānameva nidānaṃ jānāti, āhāranidānabhūtāya taṇhāyapi, taṇhāya nidānānaṃ vedanādīnampi nidānaṃ jānātiyeva, tasmā **taṇhā cāyaṃ, bhikkhave, kiṃnidānā**tiādīnā nayena vaṭṭaṃ dassetvā vivaṭṭaṃ dassesi. Imasmiṇca pana ʘhāne bhagavā atītābhimukhaṃ desanaṃ katvā atītena vaṭṭaṃ dasseti. Kathaṃ? Āhārasena hi ayaṃ attabhāvo gahito.

Taṇhāti imassattabhāvassa janakaṃ kammaṃ, vedanāphassasaḱāyatanaṃamarūpaviññāṇāni yasmiṃ attabhāve ʘatvā kammaṃ āyūhitaṃ, taṃ dassetuṃ vuttāni, avijjasaṅkhārā tassattabhāvassa janakaṃ kammaṃ. Iti dvīsu ʘhānesu attabhāvo, dvīsu tassa janakaṃ kammanti saṅkhepena kammaṇceva kammavipākaṇcāti, dvepi dhamme dassentena atītābhimukhaṃ desanaṃ katvā atītena vaṭṭaṃ dassitaṃ.

Tatrāyaṃ desanā anāgatassa adassitattā aparipuṇṇāti na daṭṭhabbā. Nayato pana paripuṇṇātveva daṭṭhabbā. Yathā hi cakkhumā puriso udakapiṭṭhe nipannaṃ suṃsumāraṃ disvā tassa parabhāgaṃ olokeno gīvaṃ passeyya, orato piṭṭhiṃ, pariyoṣāne naṅguṭṭhamūlaṃ, heṭṭhā kucchiṃ olokeno pana udakagataṃ agganāṅguṭṭhañceva cattāro ca hatthapāde na passeyya, so na ettāvātā “aparipuṇṇo suṃsumāro”ti gaṇhāti, nayato pana paripuṇṇotveva gaṇhāti, evaṃsampaḍamidaṃ veditabbaṃ.

Udakapiṭṭhe nipannasuṃsumāro viya hi tebhūmakavaṭṭaṃ. Tīre ṭhito cakkhumā puriso viya yogāvācaro. Tena purisena udakapiṭṭhe suṃsumārassa diṭṭhakālo viya yoginā āhārasasena imassattabhāvassa diṭṭhakālo. Parato gīvāya diṭṭhakālo viya imassattabhāvassa janikāya taṇhāya diṭṭhakālo. Piṭṭhiyā diṭṭhakālo viya yasmiṃ attabhāve taṇhāsāṅkhātaṃ kammaṃ kataṃ, vedanādivasena tassa diṭṭhakālo. Naṅguṭṭhamūlassa diṭṭhakālo viya tassattabhāvassa janakānaṃ avijjāsāṅkhārānaṃ diṭṭhakālo. Heṭṭhā kucchiṃ oloketassa pana agganāṅguṭṭhañceva cattāro ca hatthapāde adisvāpi “aparipuṇṇo suṃsumāro”ti agahetvā nayato paripuṇṇotveva gahaṇaṃ viya yattha yattha paccayavaṭṭaṃ pāḷiyaṃ na āgataṃ, tattha tattha “desanā aparipuṇṇā”ti agahetvā nayato paripuṇṇātveva gahaṇaṃ veditabbaṃ. Tattha ca āhārataṇhānaṃ antare eko sandhi, taṇhāvedanānaṃ antare eko, viññāṇasāṅkhārānaṃ antare ekoti evaṃ tisandhicusāṅkhepameva vaṭṭaṃ dassitanti. Paṭhamam.

2. Moḷiyaphaggunasuttavaṇṇanā

12. Dutiye sambhavesīnaṃ vā anuggahāyāti imasmimyeva ṭhāne bhagavā desanaṃ niṭṭhāpesi. Kasmā? Diṭṭhigatikassa nisinnattā. Tassañhi parisati moḷiyaphagguno nāma bhikkhu diṭṭhigatiko nisinno. Atha satthā cintesi – “ayaṃ uṭṭhahitvā maṃ pañhaṃ pucchissati, athassāhaṃ vissajjessāmī”ti pucchāya okāsadānatthaṃ desanaṃ niṭṭhāpesi. **Moḷiyaphaggunoti** moḷīti cūlā vuccati. Yathāha –

“Chetvāna moḷiṃ varagandhavāsitaṃ
Vehāyasaṃ ukkhipi sakyapuṅgavo;
Ratanacaṅkoṭavarena vāsavo,
Sahassanetto sirasā paṭiggahī”ti.

Sā tassa gihikāle mahantā ahosi. Tenassa “moḷiyaphagguno”ti saṅkhā udapādi. Pabbajitampi naṃ teneva nāmena sañjānanti. **Etadavocāti** desanānusandhiṃ ghaṭento etaṃ “ko nu kho, bhante, viññāṇāhāraṃ āhāretī”ti vacanaṃ avoca. Tassattho – bhante, ko nāma so, yo etaṃ viññāṇāhāraṃ khādanti vā bhuñjati vāti?

Kasmā panāyaṃ itare tayo āhāre apucchitvā imameva pucchati? Jānāmīti laddhiyā. So hi mahante piṇḍe katvāva kabalīkārāhāraṃ bhuñjante passati, tenassa taṃ jānāmīti laddhi. Tittiravaṭṭakamorakukkuṭādayo pana mātusamphassena yāpente disvā “ete phassāhārena yāpentī”ti tassa laddhi. Kacchapā pana attano utusamaye mahāsamuddato nikkhamitvā samuddatīre vālikantare aṇḍāni ṭhapetvā vālikāya paṭicchādetvā mahāsamuddameva otaranti. Tāni mātuānussaraṇavasena na pūṭini honti. Tāni manosañcetanāhārena yāpentīti tassa laddhi. Kiñcāpi therassa ayaṃ laddhi, na pana etāya laddhiyā imaṃ pañhaṃ pucchati. Diṭṭhigatiko hi ummattakasadiṣo. Yathā ummattako pacchiṃ gahetvā antaravithiṃ otiṇṇo gomayampi pāsānampi gūthampi khajjakhaṇḍampi taṃ taṃ manāpampi amanāpampi gahetvā pacchiyaṃ pakkhipati. Evameva diṭṭhigatiko yuttampi ayuttampi pucchati. So “kasmā imaṃ pucchasi”ti na niggahetabbo, pucchitapucchitaṭṭhāne pana gahaṇameva nisedhetabbaṃ. Teneva naṃ bhagavā “kasmā evaṃ pucchasi”ti avatvā gahitaḡāhameva tassa mocetuṃ **no kallo pañhoti**ādīmāha.

Tattha **no kalloti** ayutto. **Āhāretīti ahaṃ na vadāmīti** ahaṃ koci satto vā puggalo vā āhāretīti na vadāmi. **Āhāretīti cāhaṃ vadeyyanti** yadi ahaṃ āhāretīti vadeyyaṃ. **Tatrasa kallo pañhoti** tasmim mayā evaṃ vutte ayaṃ pañho yutto bhavēyya. **Kissa nu kho, bhante, viññāṇāhāroti**, bhante, ayaṃ viññāṇāhāro katamassa dhammassa paccayoti attho. **Tatra kallaṃ veyyākaraṇanti** tasmim evaṃ

pucchite pañhe imaṃ veyyākaraṇaṃ yuttaṃ “viññāṇāhāro āyatim punabbhavābhiniḅbattiyā paccayo”’ti. Ettha ca **viññāṇāhāro**ti paṭisandhicittam. **Āyatim punabbhavābhiniḅbattī**ti teneva viññāṇena sahuppannāmarūpaṃ. **Tasmiṃ bhūte sati saḷāyatananti** tasmiṃ punabbhavābhiniḅbattisaṅkhāte nāmarūpe jāte sati saḷāyatanam hotīti attho.

Saḷāyatanapaccayā phassoti idhāpi bhagavā uttari pañhassa okāsam dento desanam niṭṭhāpesi. Diṭṭhigatiko hi navapuccham uppādetum na sakkoti, niddiṭṭham niddiṭṭhamyeva pana gaṇhitvā pucchati, tenassa bhagavā okāsam adāsi. Attho panassa sabbapadesu vuttanayeneva gahetabbo. “Ko nu kho, bhante, bhavati”’ti kasmā na pucchati? Diṭṭhigatikassa hi satto nāma bhūto nibbattoyevāti laddhi, tasmā attano laddhiviruddham idanti na pucchati. Apica idappaccayā idaṃ idappaccayā idanti bahūsu ṭhānesu kathitattā saññattim upagato, tenāpi na pucchati. Satthāpi “imassa bahum pucchantassāpi titti natthi, tucchapucchameva pucchati”’ti ito paṭṭhāya desanam ekābaddham katvā desesi. **Channam tvevāti** yato paṭṭhāya desanāruḷham, tameva gahetvā desanam vivaṭṭento evamāha. Imasmiṃ pana sutte viññāṇāmarūpānam antare eko sandhi, vedanātaṇhānam antare eko, bhavajātīnam antare ekoti. Dutiyam.

3. Samaṇabrāhmaṇasuttavaṇṇanā

13. Tatiye **samaṇā vā brāhmaṇā vāti** saccāni paṭivijjhitaṃ asamattā bāhirakasamaṇabrāhmaṇā. **Jarāmarāṇam nappajānantī**tiādīsu jarāmarāṇam na jānanti dukkhasaccavasena, jarāmarāṇasamudayaṃ na jānanti saha taṇhāya jāti jarāmarāṇassa samudayoti samudayasaccavasena, jarāmarāṇanirodham na jānanti nirodhasaccavasena, paṭipadam na jānanti maggasaccavasena. Jātim na jānanti dukkhasaccavasena, jātisamudayaṃ na jānanti saha taṇhāya bhavo jātisamudayoti samudayasaccavasena. Evaṃ saha taṇhāya samudayaṃ yojetvā sabbapadesu catusaccavasena attho veditabbo. **Sāmaññattham vā brahmaññattham vāti** ettha ariyamaggo sāmaññañceva brahmaññañca. Ubhayatthāpi pana attho nāma ariyaphalam veditabham. Iti bhagavā imasmiṃ sutte ekādasasu ṭhānesu cattāri saccāni kathesīti. Tatiyam.

4. Dutiyasamaṇabrāhmaṇasuttavaṇṇanā

14. Catutthe **ime dhamme katame dhammeti** ettakam papañcam katvā kathitam, desanam paṭivijjhitaṃ samattānam puggalānam ajjhāsayena **ime dhamme nappajānantī**tiādī vuttam. Sesam purimasadisameva. Catuttham.

5. Kaccānagottasuttavaṇṇanā

15. Pañcame **sammādiṭṭhi sammādiṭṭhī**ti yaṃ paṇḍitā devamanussā tesu tesu ṭhānesu sammādassanam vadanti, sabbampi taṃ dvīhi padehi saṅkhipitvā pucchati. **Dvayanissitoti** dve koṭṭhāse nissito. **Yebhuyyēnāti** iminā ṭhapetvā ariyapuggale sesamahājanam dasseti. **Atthitanti** sassatam. **Natthitanti** ucchedam. **Lokasamudayanti** loko nāma saṅkhāraloko, tassa nibbatti. **Sammappaññāya passatoti** sammāpaññā nāma savipassanā maggapaññā, tāya passantassāti attho. **Yā loke natthitāti** saṅkhāraloke nibbattesu dhammesu paññāyantesveva yā natthīti ucchedadiṭṭhi uppajjeyya, sā na hotīti attho. **Lokanirodhanti** saṅkhārānam bhaṅgam. **Yā loke atthitāti** saṅkhāraloke bhijjamānesu dhammesu paññāyantesveva yā atthīti sassatadiṭṭhi uppajjeyya, sā na hotīti attho.

Apica **lokasamudayanti** anulomapaccayākāram. **Lokanirodhanti** paṭilomapaccayākāram. Lokanissaye passantassāpi hi paccayānam anucchedena paccayuppannassa anucchedam passato yā natthīti ucchedadiṭṭhi uppajjeyya, sā na hoti. Paccayanirodham passantassāpi paccayanirodhena paccayuppannanirodham passato yā atthīti sassatadiṭṭhi uppajjeyya, sā na hotīti ayampettha attho.

Upayupādānābhinivesavinibandhoti upayehi ca upādānehi ca abhinivesehi ca vinibandho. Tattha

upayāti dve upayā taṇhupayo ca diṭṭhupayo ca. Upādānādīsupi eseva nayo. Taṇhādīṭṭhiyo hi yasmā ahaṃ mamantiādīhi ākārehi tebhūmakadhamme upenti upagacchanti, tasmā upayāti vuccanti. Yasmā pana te dhamme upādiyanti ceva abhinivisanti ca, tasmā upādānāti ca abhinivesāti ca vuccanti. Tāhi cāyaṃ loko vinibandho. Tenāha “upayupādānābhinivesavinibandho”ti.

Taṅcāyanti tañca upayupādānaṃ ayaṃ ariyasāvako. **Cetaso adhiṭṭhānanti** cittassa patiṭṭhānabhūtaṃ. **Abhinivesānusayanti** abhinivesabhūtañca anusayabhūtañca. Taṇhādīṭṭhīsu hi akusalacittaṃ patiṭṭhāti, tā ca tasmim̐ abhinivisanti ceva anusenti ca, tasmā tadubhayaṃ cetaso adhiṭṭhānaṃ abhinivesānusayanti ca āha. **Na upetīti** na upagacchati. **Na upādiyati** na gaṇhāti. **Nādhiṭṭhāti** na adhiṭṭhāti, kinti? **Attā meti**. **Dukkhamevāti** pañcupādānakkhandhamattameva. **Na kaṅkhatīti** “dukkhameva uppajjati, dukkhaṃ nirujjhati, na añño ettha satto nāma atthi”ti kaṅkhaṃ na karoti. **Na vicikicchati** na vicikicchaṃ uppādeti.

Aparappaccayāti na parappaccayena, aññassa apattiyāyevā attapaccakkhaññānamevassa ettha hotīti. **Ettāvataḥ kho, kaccāna, sammādiṭṭhi hotīti** evaṃ sattasaññāya pahīnattā ettakena sammādassanaṃ nāma hotīti missakasammādiṭṭhiṃ āha. **Ayameko antoti** esa eko nikūṭanto lāmakanto paṭhamakaṃ sassataṃ. **Ayaṃ dutiyoti** esa dutiyo sabbaṃ natthīti uppajjanakadiṭṭhisāṅkhāto nikūṭanto lāmakanto dutiyako ucchedoti attho. Sesamettha uttānamevāti. Pañcamaṃ.

6. Dhammakathikasuttavaṇṇanā

16. Chaṭṭhe **nibbidāyāti** nibbindanattāya. **Virāgāyāti** virajjanattāya. **Nirodhāyāti** nirujjhanattāya. **Paṭipanno hotīti** ettha sīlato paṭṭhāya yāva arahattamaggā paṭipannoti veditabbo. **Dhammānudhammapaṭipannoti** lokuttarassa nibbānadhammassa anudhammabhūtaṃ paṭipadaṃ paṭipanno. **Anudhammabhūtanti** anurūpasabhāvabhūtaṃ. **Nibbidā virāgā nirodhāti** nibbidāya ceva virāgena ca nirodhena ca. **Anupādā vimuttoti** catūhi upādānehi kiñci dhammaṃ anupādiyitvā vimutto. **Diṭṭhadhammanibbānappattoti** diṭṭheva dhamme nibbānappatto. **Alaṃ vacanāyāti**, evaṃ vattabataṃ arahati, yutto anucchavikoti attho. Evamettha ekena nayena dhammakathikassa pucchā kathitā, dvīhi taṃ visesetvā sekkhāsekkhabhūmiyo niddiṭṭhāti. Chaṭṭhaṃ.

7. Acelakassapasuttavaṇṇanā

17. Sattame **acelo kassapoti** līngena acelo niccelo, nāmena kassapo. **Dūratovāti** mahatā bhikkhusaṅghena parivutaṃ āgacchantaṃ dūrato eva addasa. **Kiñcideva desanti** kiñcideva kāraṇaṃ. **Okāsanti** pañhabyākaraṇassa khaṇaṃ kālaṃ. **Antaragharanti** “na pallatthikāya antaraghare nisīdissāmī”ti ettha antonivesanaṃ antaragharaṃ. “Okkhittacakkhu antaraghare gamissāmī”ti ettha indakhīlato paṭṭhāya antogāmo. Idhāpi ayameva adhippeto. **Yadākaṅkhasīti** yaṃ icchasi.

Kasmā pana bhagavā kathetukāmo yāvatiyaṃ paṭikkhipīti? Gāravajananatthaṃ. Diṭṭhigatikā hi khippaṃ kathiyamāne gāraṃ na karonti, “samaṇaṃ gotamaṃ upasaṅkamitumpi pucchitumpi sukaraṃ, pucchitamatteyeva kathetī”ti vacanampi na saddahanti. Dve tayo vāre paṭikkhitte pana gāraṃ karonti, “samaṇaṃ gotamaṃ upasaṅkamitumpi pañhaṃ pucchitumpi dukkara”nti yāvatiyaṃ yācite kathiyamānaṃ sussūsanti saddahanti. Iti bhagavā “ayaṃ sussūsissati saddahissatī”ti yāvatiyaṃ yācāpetvā kathesi. Apica yathā bhisakko telaṃ vā phāṇitaṃ vā pacanto mudupākakharapākānaṃ pākakālaṃ āgamayamāno pākakālaṃ anatikkamitvāva otāreti. Evaṃ bhagavā sattānaṃ ñānaparipākaṃ āgamayamāno “ettakena kālena imassa ñānaṃ paripākaṃ gamissatī”ti ñatvāva yāvatiyaṃ yācāpesi.

Mā hevaṃ, kassapāti, kassapa, mā evaṃ bhaṇi. **Sayaṃkataṃ dukkhanti** hi vattum na vaṭṭati, attā nāma koci dukkhassa kāraṇaṃ natthīti dīpeti. Paratopi eseva nayo. **Adhiccasaṃuppannanti** akāraṇena yadicchāya uppannaṃ. **Iti puṭṭho samānoti** kasmā evamāha? Evaṃ kirassa ahosi – “ayaṃ ‘sayaṃkataṃ dukkha’ntiādīnaṃ puṭṭho ‘mā heva’nti vadati, ‘natthī’ti puṭṭho ‘atthī’ti vadati. ‘Bhavaṃ

gotamo dukkhaṃ na jānāti na passatī ti puṭṭho ‘jānāmi khvāha’nti vadati. Kiñci nu kho mayā virajjhivā pucchito’ ti mūlato paṭṭhāya attano pucchameva sodhento evamāha. **Ācikkhatu ca me, bhante, bhagavāti** idha satthari sañjātagāravo ‘bhava’nti avatvā ‘bhagavā’ ti vadati.

So karotītiādi, ‘sayamkataṃ dukkha’nti laddhiyā paṭisedhanatthaṃ vuttaṃ. Ettha ca **satoti** idaṃ bhummatthe sāmivacanaṃ, tasmā evamattho daṭṭhabbo – so karoti so paṭisaṃvedayatīti kho, kassapa, ādimhiyeva evaṃ sati pacchā sayamkataṃ dukkhanti ayaṃ laddhi hoti. Ettha ca **dukkhanti** vaṭṭadukkhaṃ adhippetam. **Iti vadanti** etassa purimena ādisaddena anantarena ca sassatasaddena sambandho hoti. ‘Dīpeti gaṇhātī’ ti ayaṃ panettha pāṭhaseso. Idañhi vuttaṃ hoti – iti evaṃ vadanto āditova sassataṃ dīpeti, sassataṃ gaṇhātī. Kasmā? Tassa hi taṃ dassanaṃ etaṃ pareti, kārakañca vedakañca ekameva gaṇhantaṃ etaṃ sassataṃ upagacchatīti attho.

Añño karotītiādi pana ‘paramkataṃ dukkha’nti laddhiyā paṭisedhanatthaṃ vuttaṃ. ‘Ādito sato’ ti idaṃ pana idhāpi āharitabbaṃ. Ayañhettha attho – añño karoti añño paṭisaṃvediyatīti kho pana, kassapa, ādimhiyeva evaṃ sati, pacchā ‘kāraako idheva ucchijjati, tena kataṃ añño paṭisaṃvediyatī’ ti evaṃ uppannāya ucchedadīṭṭhiyā saddhiṃ sampayuttāya vedanāya abhitunnassa viddhassa sato ‘paramkataṃ dukkha’nti ayaṃ laddhi hotīti. **Iti vadanti**ādi vuttanayeneva yojetabbaṃ. Tatrāyaṃ yojanā – evañca vadanto āditova ucchedaṃ dīpeti, ucchedaṃ gaṇhātī. Kasmā? Tassa hi taṃ dassanaṃ etaṃ pareti, etaṃ ucchedaṃ upagacchatīti attho.

Ete teti ye sassatucchedasaṅkhāte ubho ante (anupagamma tathāgato dhammaṃ deseti, ete te, kassapa, ubho ante) anupagamma pahāya anallīyivā majjhena tathāgato dhammaṃ deseti, majjhimāya paṭipadāya ṭhito desetīti attho. Kataraṃ dhammanti ce? Yadidaṃ avijjāpaccayā saṅkhārātī. Ettha hi kāraṇato phalaṃ, kāraṇanirodhena cassa nirodho dīpito, na koci kāraako vā vedako vā niddiṭṭho. Ettāvataṃ sesapañhā paṭisedhitā honti. **Ubho ante anupagammātī** iminā hi tatiyapañho paṭikkhitto. **Avijjāpaccayā saṅkhārātī** iminā adhiccasaṃuppannatā ceva ajānanañca paṭikkhittanti veditabbaṃ.

Labheyyanti idaṃ so bhagavato santike bhikkhubhāvaṃ patthayamāno āha. Atha bhagavā yonena khandhake titthiyaparivāso (mahāva. 86) paññatto, yaṃ aññatitthiyapubbo sāmaṇerabhūmiyaṃ ṭhito ‘ahaṃ, bhante, itthannāmo aññatitthiyapubbo imasmiṃ dhammavinaye ākaṅkhāmi upasampadaṃ. Svāhaṃ, bhante, saṅghaṃ cattāro māse parivāsaṃ yācāmi’ tiādinā nayena samādiyivā parivasati, taṃ sandhāya **yo kho, kassapa, aññatitthiyapubbotī**ādimāha. Tattha **pabbajjanti** vacanasiliṭṭhatāvasena vuttaṃ. Aparivasitvāyeva hi pabbajjaṃ labhati. Upasampadatthikena pana nātikālena gāmapavesanādīni aṭṭha vattāni pūrentena parivasitabbaṃ. **Āraddhacittātī** aṭṭhavattapūraṇena tuṭṭhacittā. Ayamettha saṅkhepo, vitthārato panesa titthiyaparivāso samantapāsādikāya vinayaṭṭhakathāya pabbajjakkhandhakavaṇṇanāyaṃ (mahāva. aṭṭha. 86) vuttanayeneva veditabbo.

Apica mayātī ayamettha pāṭho, aññattha pana ‘apica metthā’ ti. **Puggalavemattatā viditātī** puggalanānattaṃ viditaṃ. ‘Ayaṃ puggalo parivāsāraho, ayaṃ na parivāsāraho’ ti idaṃ mayhaṃ pākaṇṭanti dasseti. Tato kassapo cintesi – ‘aho acchariyaṃ buddhasāsanam, yattha evaṃ ghaṃsitvā koṭṭetvā yuttameva gaṇhanti, ayuttaṃ chaḍḍentī’ ti. Tato suṭṭhuraṃ pabbajjāya sañjātussāho **sace, bhanteti**ādimāha. Atha bhagavā tassa tibbacchandataṃ viditvā ‘na kassapo parivāsaṃ arahatī’ ti aññataraṃ bhikkhuṃ āmantesi – ‘gaccha, bhikkhu, kassapaṃ nahāpetvā pabbājetvā ānehī’ ti. So tathā katvā taṃ pabbājetvā bhagavato santikaṃ agamāsi. Bhagavā gaṇe nisīditvā upasampādesi. Tena vuttaṃ **alattha kho acelo kassapo bhagavato santike pabbajjaṃ, alattha upasampadanti**. **Acirūpasampannotī**ādi sesaṃ brāhmaṇasaṃyutte (saṃ. ni. 1.187) vuttamevātī. Sattamaṃ.

8. Timbarukasuttavaṇṇanā

18. Aṭṭhame sā vedanātīādi ‘sayamkataṃ sukhadukkha’nti laddhiyā nisedhanatthaṃ vuttaṃ. Etthāpi **satoti** bhummattheyeva sāmivacanaṃ. Tatrāyaṃ atthadīpanā – ‘sā vedanā, so vediyatī’ ti kho,

timbaruka, ādimhiyeva evaṃ sati “sayamkatam sukhadukkha”nti ayam laddhi hoti. Evañhi sati vedanāya eva vedanā katā hoti. Evañca vadanto imissā vedanāya pubbepi atthitam anujānāti, sassatam dīpeti sassatam gaṇhāti. Kasmā? Tassa hi tam dassanam etaṃ pareti, etaṃ sassatam upagacchatīti attho. Purimañhi attham sandhāyevetaṃ bhagavatā vuttam bhavissati, tasmā aṭṭhakathāyam tam yojetvāvassa attho dīpito. **Evampāham na vadāmīti** aham “sā vedanā, so vediyatī”ti evampi na vadāmi. “Sayamkatam sukhadukkha”nti evampi na vadāmīti attho.

Aññā vedanātiādi “paramkatam sukhadukkha”nti laddhiyā paṭisedhanattham vuttam. Idhāpi ayam atthayojanā – “aññā vedanā añño vediyatī”ti kho, timbaruka, ādimhiyeva evaṃ sati pacchā yā purimapakke kārakavedanā, sā ucchinnā. Tāya pana katam añño vediyatīti evaṃ uppannāya ucchedaditthiyā saddhim sampayuttāya vedanāya abhitunnassa sato “paramkatam sukhadukkha”nti ayam laddhi hoti. Evañca vadanto kārako ucchinno, aññena paṭisandhi gahitāti ucchedam dīpeti, ucchedam gaṇhāti. Kasmā? Tassa hi tam dassanam etaṃ pareti, etaṃ ucchedam upagacchatīti attho. Idhāpi hi imāni padāni aṭṭhakathāyam āharitvā yojitāneva. Imasmim sutte vedanāsukhadukkham kathitam. Tañca kho vipākasukhadukkameva vaṭṭatīti vuttam. Aṭṭhamam.

9. Bālapaṇḍitasuttavaṇṇanā

19. Navame **avijjānīvaraṇassā**ti avijjāya nivāritassa. **Evamayam kāyo samudāgatoti** evaṃ avijjāya nivāritattā taṇhāya ca sampayuttatāyeva ayam kāyo nibbato. **Ayañceva kāyoti** ayañcassa attano saviññāṇako kāyo. **Bahiddhā ca nāmarūpanti** bahiddhā ca paresam saviññāṇako kāyo. Attano ca parassa ca pañcahi khandhehi chahi āyatanehi cāpi ayam attho dīpetabbova. **Itthetam dvayanti** evametaṃ dvayam. **Dvayam paṭicca phassoti** aññattha cakkhurūpādīni dvayāni paṭicca cakkhusamphassādayo vuttā, idha pana ajjhakkabāhirāni āyatanāni. Mahādvayam nāma kiretam. **Salēvāyatanāni**ti salēva phassāyatanāni phassakāraṇāni. **Yehi phutṭhoti** yehi kāraṇabhūtehi āyatanehi uppannena phassena phutṭho. **Aññatarenāti** ettha paripuṇṇavasena aññataratā veditabbā. **Tatrāti** tasmim bālapaṇḍitanam kāyanibbattanādimhi. **Ko adhippayāsoti** ko adhikāpayogo.

Bhagavaṃmūlakāti bhagavā mūlam etesanti bhagavaṃmūlakā. Idam vuttam hoti – ime, bhante, amhākam dhammā pubbe kassapasammāsambuddhena uppādītā, tasmim parinibbute ekam buddhantaram añño samaṇo vā brāhmaṇo vā ime dhamme uppādetum samattho nāma nāhosi, bhagavatā pana no ime dhammā uppādītā. Bhagavantañhi nissāya mayam ime dhamme ājānāma paṭivijjhāmāti evaṃ bhagavaṃmūlakā no, bhante, dhammāti. **Bhagavaṃnettikāti** bhagavā hi dhammānam netā vinetā anunetā, yathāsabhāvato pāṭiyekkam pāṭiyekkam nāmam gahetvā dassatīti dhammā bhagavaṃnettikā nāma honti. **Bhagavaṃpaṭisaraṇāti** catubhūmakadhammā sabbaññutaññāṇassa āpātham āgacchamānā bhagavati paṭisaranti nāmāti bhagavaṃpaṭisaraṇā. **Paṭisaraṇīti** samosaranti. Apica mahābodhimaṇḍe nisinnassa bhagavato paṭivedhavasena phasso āgacchati “aham bhagavā kinnāmo”ti? Tvaṃ phusanatṭhena phasso nāma. Vedanā, saññā, saṅkhārā, viññāṇam āgacchati “aham bhagavā kinnāma”nti, tvaṃ vijānanatṭhena viññāṇam nāmāti evaṃ catubhūmakadhammānam yathāsabhāvato pāṭiyekkam pāṭiyekkam nāmam gaṇhanto bhagavā dhamme paṭisaratīti bhagavaṃpaṭisaraṇā. **Bhagavantaṃyeva paṭibhātūti** bhagavatova etassa bhāsītassa attho upaṭṭhātu, tumheya no kathetvā dethāti attho.

Sā ceva avijjāti ettha kiñcāpi sā avijjā ca taṇhā ca kammaṃ javāpetvā paṭisandhim ākaḍḍhitvā niruddhā, yathā pana ajjāpi yaṃ hiyyo bhesajjam pītam, tadeva bhojanam bhuñjāti sarikkhakattena tadevāti vuccati, evamidhāpi sā ceva avijjā sā ca taṇhāti idampi sarikkhakattena vuttam. **Brahmacariyanti** maggabrahmacariyam. **Dukkhakkhayāyāti** vaṭṭadukkhassa khayatthāya. **Kāyūpago hotīti** aññam paṭisandhikāyam upagantā hoti. **Yadidam brahmacariyavāsoti** yo ayam maggabrahmacariyavāso, ayam bālato paṇḍitassa visesoti dasseti. Iti imasmim sutte sabbopi sapaṭisandhiko puthujjano “bālo”ti, appaṭisandhiko khīṇāsavo “paṇḍito”ti vutto. Sotāpannasakadāgāmianāgāmino pana “paṇḍitā”ti vā “bālā”ti vā na vattabbā, bhajamānā pana

paṇḍitapakkhāṃ bhajanti. Navamaṃ.

10. Paccayasuttavaṇṇanā

20. Dasame paṭiccasamuppādañca vo bhikkhave, desessāmi paṭiccasamuppanne ca dhammeti sathā imasmiṃ sutte paccaye ca paccayanibbatte ca sabhāvadhamme desessāmīti ubhayaṃ ārabhi. **Uppādā vā tathāgatānanti** tathāgatānaṃ uppādepi, buddhesu uppannesu anuppannesupi jātipaccayā jarāmarāṇaṃ, jātiyeva jarāmarāṇassa paccayo. **Ṭhitāva sā dhātūti** ṭhitova so paccayasabhāvo, na kadāci jāti jarāmarāṇassa paccayo na hoti. **Dhammaṭṭhitatā dhammaniyāmatāti** imehipi dvīhi paccayameva katheti. Paccayena hi paccayuppannā dhammā tiṭṭhanti, tasmā paccayova “dhammaṭṭhitatā”ti vuccati. Paccayo dhamme niyāmeti, tasmā “dhammaniyāmatā”ti vuccati. **Idappaccayatāti** imesaṃ jarāmarāṇādīnaṃ paccayā idappaccayā, idappaccayāva idappaccayatā. **Tanti taṃ paccayaṃ.** **Abhisambujjhatīti** ñāṇena abhisambujjhati. **Abhisametīti** ñāṇena abhisamāgacchati. **Ācikkhatīti** katheti. **Desetīti** dasseti. **Paññāpetīti** jānāpeti. **Paṭṭhapetīti** ñāṇamukhe ṭhapeti. **Vivaratīti** vivaritvā dasseti. **Vibhajātīti** vibhāgato dasseti. **Uttānikarotīti** pākaṭaṃ karoti. **Passathāti cāhāti** passatha iti ca vadati. Kinti? **Jātipaccayā, bhikkhave, jarāmarāṇantiādi.**

Iti kho, bhikkhavi evaṃ kho, bhikkhave. **Yā tatrāti** yā tesu “jātipaccayā jarāmarāṇa”ntiādīsu. **Tathatātiādīni** paccayākārasseva vevacanāni. So tehi tehi paccayehi anūnādhikeheva tassa tassa dhammassa sambhavato **tathatāti**, sāmaggīṃ upagatesu paccayesu muhuttampi tato nibbattānaṃ dhammānaṃ asambhavābhāvato **avitathatāti**, aññadhammapaccayehi aññadhammānupattito **anaññathatāti**, jarāmarāṇādīnaṃ paccayato vā paccayasamūhato vā **idappaccayatāti** vutto. Tatrāyaṃ vacanatto – imesaṃ paccayā idappaccayā, idappaccayā eva idappaccayatā, idappaccayānaṃ vā samūho idappaccayatā. Lakkhaṇaṃ panettha saddasatthato veditabbā.

Aniccanti hutvā abhāvaṭṭhena aniccaṃ. Ettha ca aniccanti na jarāmarāṇaṃ aniccaṃ, aniccāsabhāvānaṃ pana khandhānaṃ jarāmarāṇatā aniccaṃ nāma jātaṃ. **Saṅkhatādīsipi** eseva nayo. Ettha ca **saṅkhatanti** paccayehi samāgantvā kataṃ. **Paṭiccasamuppananti** paccaye nissāya uppannaṃ. **Khayadhammanti** khayāsabhāvaṃ. **Vayadhammanti** vigacchanakasabhāvaṃ. **Virāgadhammanti** virajjanakasabhāvaṃ. **Nirodhadhammanti** nirujjhanakasabhāvaṃ. Jātiyāpi vuttanayeneva aniccata veditabbā. Janakapaccayānaṃ vā kiccānubhāvakkhaṇe diṭṭhattā ekena pariyāyenettha aniccātiādīni yujjantiyeva. Bhavādayo aniccādisabhāvāyeva.

Sammappaññāyāti savipassanāya maggapaññāya. **Pubbantanti** purimaṃ atītanti attho. **Ahosim nu khoti**ādīsū “ahosiṃ nu kho nanu kho”ti sassatākārañca adhiccāsamupattiākārañca nissāya atīte attano vijjāmānatañca avijjāmānatañca kaṅkhati. Kiṃ kāraṇanti na vattabbā, ummattako viya bālaputhujjano yathā vā tathā vā pavattati. **Kiṃ nu kho ahosinti** jātilingupapattiyo nissāya “khattiyo nu kho ahosiṃ, brāhmaṇavessasuddagahaṭṭhapabbajitadevamanussānaṃ aññataro”ti kaṅkhati. **Kathaṃ nu khoti** saṅghānākāraṃ nissāya “dīgho nu kho ahosiṃ rassaodātakaṇhapamāṇikaappamāṇikādīnaṃ aññataro”ti kaṅkhati. Keci pana “issaranimmānādīni nissāya ‘kena nu kho kāraṇena ahosi’nti hetuto kaṅkhatī”ti vadanti. **Kiṃ hutvā kiṃ ahosinti** jātiādīni nissāya “khattiyo hutvā nu kho brāhmaṇo ahosiṃ...pe... devo hutvā manusso”ti attano paramparaṃ kaṅkhati. Sabbattheva pana **addhānanti** kālādhivacanamaṃ. **Aparantanti** anāgataṃ antaṃ. **Bhavissāmi nu kho nanu khoti** sassatākārañca ucchedākārañca nissāya anāgate attano vijjāmānatañca avijjāmānatañca kaṅkhati. Sesametta vuttanayameva.

Etarahi vā paccuppannaṃ addhānanti idāni vā paṭisandhimādiṃ katvā cutipariyantaṃ sabbampi vattamānakālaṃ gahetvā. **Ajjhattaṃ kathaṃkathī bhavissatīti** attano khandhesu vicikicchī bhavissati. **Ahaṃ nu khosmīti** attano atthibhāvaṃ kaṅkhati. Yuttaṃ panetanti? Yuttaṃ ayuttanti kā ettha cintā. Apicettha idaṃ vatthumpi udāharanti – cūlamātāya kira putto muṇḍo, mahāmātāya putto amuṇḍo, taṃ puttāṃ muṇḍesum, so uṭṭhāya “ahaṃ nu kho cūlamātāya putto”ti cintesi. Evaṃ ahaṃ nu khosmīti

kaṅkhā hoti. **No nu khosmīti** attano natthibhāvaṃ kaṅkhati. Tatrāpi idaṃ vatthu – eko kira macche gaṇhanto udake ciratṭhānena sītibhūtaṃ attano ūruṃ macchoti cintetvā pahari. Aparo susānapasse khettaṃ rakkhanto bhīto saṅkuṭito sayi, so paṭibujjhivā attano jaṇṇukāni dve yakkhāti cintetvā pahari. Evaṃ no nu khosmīti kaṅkhati.

Kim nu khosmīti khattiyova samāno attano khattiyabhāvaṃ kaṅkhati. Eseva nayo sesesupi. Devo pana samāno devabhāvaṃ ajānanto nāma natthi, sopi pana “ahaṃ rūpī nu kho arūpī nu kho” tiādinā nayena kaṅkhati. Khattiyādayo kasmā na jānantīti ce? Apaccakkhā tesam tattha tattha kule uppatti. Gahaṭṭhāpi ca potthalikādayo pabbajitasaññino, pabbajitāpi “kuppaṃ nu kho me kamma” ntiādinā nayena gahaṭṭhasaññino. Manussāpi ca rājāno viya attani devasaññino honti. **Kathaṃ nu khosmīti** vuttanayameva. Kevalañhettha abbhantare jīvo nāma atthīti gahetvā tassa saṅṭhānākāraṃ nissāya “dīgho nu khosmi rassacaturassachaḷaṃsaatṭhaṃsasolaṃsādīnaṃ aññatarappakāro” ti kaṅkhanto kathaṃ nu khosmīti? Kaṅkhatīti veditabbo. Sarīrasaṅṭhānaṃ pana paccuppannaṃ ajānanto nāma natthi. **Kuto āgato so kuhiṃ gāmī bhavissatīti** attabhāvassa āgatigatiṭṭhānaṃ kaṅkhanto evaṃ kaṅkhati. **Ariyasāvakkassāti** idha sotāpanno adhippeto, itarepi pana tayo avāritāyevāti. Dasamaṃ.

Āhāravaggo dutiyo.

3. Dasabalavaggo

1. Dasabalasuttavaṇṇanā

21. Dasabalavaggassa paṭhamaṃ dutiyasseva saṅkhepo.

2. Dutiyadasabalasuttavaṇṇanā

22. Dutiyam bhagavatā attano ajjhāsayaṃsa vasena vuttaṃ. Tattha **dasabalasamannāgatoti** dasahi balehi samannāgato. Balañca nāmetaṃ duvidham kāyabalañca ñāṇabalañca. Tesu tathāgatassa kāyabalaṃ hatthikulānusārena veditabbaṃ. Vuttañhettaṃ porāṇehi –

“Kālāvakañca gaṅgeyyaṃ, paṇḍaraṃ tambapiṅgalaṃ;
GandhamaṅgalaHEMAṅCA, uposathachaddantime dasā” ti. (ma. ni. aṭṭha. 1.148; vibha. aṭṭha. 760); –

Imāni dasa hatthikulāni. Tattha **kālāvaka**nti pakatihatthikulam daṭṭhabbaṃ. Yaṃ dasannaṃ purisānaṃ kāyabalaṃ, taṃ ekassa kālāvakassa hatthino. Yaṃ dasannaṃ kālāvakānaṃ balaṃ, taṃ ekassa gaṅgeyyassa. Yaṃ dasannaṃ gaṅgeyyānaṃ, taṃ ekassa paṇḍarassa. Yaṃ dasannaṃ paṇḍarānaṃ, taṃ ekassa tambassa. Yaṃ dasannaṃ tambānaṃ, taṃ ekassa piṅgalassa. Yaṃ dasannaṃ piṅgalānaṃ, taṃ ekassa gandhahatthino. Yaṃ dasannaṃ gandhahatthīnaṃ, taṃ ekassa maṅgalassa. Yaṃ dasannaṃ maṅgalānaṃ, taṃ ekassa hemavatassa. Yaṃ dasannaṃ hemavatānaṃ, taṃ ekassa uposathassa. Yaṃ dasannaṃ uposathānaṃ, taṃ ekassa chaddantassa. Yaṃ dasannaṃ chaddantānaṃ, taṃ ekassa tathāgatassa. Nārāyanasaṅghātābalantipi idameva vuccati. Tadeṭtaṃ pakatihatthigaṇānāya hatthīnaṃ koṭisahassānaṃ, purisagaṇānāya dasannaṃ purisakoṭisahassānaṃ balaṃ hoti. Idaṃ tāva tathāgatassa kāyabalaṃ. “Dasabalasamannāgato” ti ettha pana etaṃ saṅgahaṃ na gacchati. Etañhi bāhirakaṃ lāmakam tiracchānagatānaṃ sīhādīnampi hoti. Etañhi nissāya dukkhapariññā vā samudayappahānaṃ vā maggabhāvanā vā phalāsacchikiriyā vā natthi. Aññaṃ pana dasasu ṭhānesu akampanatthena upatthambhanatthena ca dasavidham ñāṇabalaṃ nāma atthi. Taṃ sandhāya vuttaṃ “dasabalasamannāgato” ti.

Katamaṃ pana tanti? Ṭhānāṭṭhānādīnaṃ yathābhūtaṃ jānanaṃ. Seyyathidaṃ – ṭhānañca ṭhānato aṭṭhānañca aṭṭhānato jānanaṃ ekaṃ, atītānāgatapaccuppannānaṃ kammamādānānaṃ ṭhānaso hetuso

yathābhūtaṃ vipākajānanaṃ ekaṃ, sabbatthagāminipaṭipadājānanaṃ ekaṃ, anekadhātunādhātulokajānanaṃ ekaṃ, parasattānaṃ parapuggalānaṃ nānādhimuttikatājānanaṃ ekaṃ, tesamyeva indriyaparopariyattajānanaṃ ekaṃ, jhānavimokkhasamādhisamāpattīnaṃ saṃkilesavodānavuṭṭhānānanaṃ ekaṃ, pubbenivāsajānanaṃ ekaṃ, sattānaṃ cutūpapātājānanaṃ ekaṃ, āsavakkhayajānanaṃ ekanti. Abhidhamme pana –

“Idha tathāgato ṭhānañca ṭhānato aṭṭhānañca aṭṭhānato yathābhūtaṃ pajānāti. Yampi tathāgato ṭhānañca ṭhānato aṭṭhānañca aṭṭhānato yathābhūtaṃ pajānāti. Idampi tathāgatassa tathāgatabalaṃ hoti, yaṃ balaṃ āgamma tathāgato āsabhaṃ ṭhānaṃ paṭijānāti, parisāsu sīhanādaṃ nadati, brahmacakkaṃ pavatteti”ti.

Ādinā (vibha. 760) nayena vitthārato āgatāneva. Atthavaṇṇanāpi nesaṃ vibhaṅgaṭṭhakathāyañceva (vibha. aṭṭha. 760) papañcasūdaniyā ca majjhimaṭṭhakathāya (ma. ni. aṭṭha. 1.148) sabbākārato vuttā. Sā tattha vuttanayeneva gahetabbā.

Catūhi ca vesārajjeḥīti ettha sārājjaṭṭhānaṃ vesārajjaṃ, catūsu ṭhānesu vesārajjabhāvaṃ paccavekkhantassa uppannasomanassamayaññassetam nāmaṃ. Katamesu catūsu?

“Sammāsambuddhassa te paṭijānato ime dhammā anabhisambuddhā”tiādīsu codanāvattḥūsu. Tatrāyaṃ pāli –

“Cattārimāni, bhikkhave, tathāgatassa vesārajjāni...pe.... Katamāni cattāri?
‘Sammāsambuddhassa te paṭijānato ime dhammā anabhisambuddhā’ti tatra vata maṃ samaṇo vā brāhmaṇo vā devo vā māro vā brahmā vā koci vā lokasmiṃ saha dhammena paṭicodessatīti nimittametaṃ, bhikkhave, na samanupassāmi. Etamaṃ, bhikkhave, nimittaṃ asamanupassanto khemappatto abhayappatto vesārajjappatto viharāmi. ‘Khīṇāsavassa te paṭijānato ime āsavā aparikkhīṇā’ti tatra vata maṃ...pe... ‘ye kho pana te antarāyikā dhammā vuttā, te paṭisevato nālaṃ antarāyāyā’ti tatra vata maṃ...pe... ‘yassa kho pana te atthāya dhammo desīto, so na niyyāti takkarassa sammā dukkhakkhayāyā’ti tatra vata maṃ samaṇo vā brāhmaṇo vā...pe... vesārajjappatto viharāmi”ti (a. ni. 4.8).

Āsabhaṃ ṭhānanti seṭṭhaṭṭhānaṃ uttamaṭṭhānaṃ. Āsabhā vā pubbabuddhā, tesam ṭhānanti attho. Apica gavasatajeṭṭhako usabho, gavasahassajeṭṭhako vasabho, vajasatajeṭṭhako vā usabho, vajasahassajeṭṭhako vasabho, sabbagavasetṭho sabbaparissayasaho seto pāsādiko mahābhāravaho asanisatasaddehipi asampakampiyo nisabho, so idha usabhoti adhippeto. Idampi hi tassa pariyaṇavacanaṃ. Usabhassa idanti **āsabhaṃ. Ṭhānanti** catūhi pādehi pathaviṃ uppīletvā avatṭhānaṃ (ma. ni. 1.150). Idaṃ pana āsabhaṃ viyāti **āsabhaṃ**. Yatheva hi nisabhasaṅkhāto usabho usabhabalena samannāgato catūhi pādehi pathaviṃ uppīletvā acalaṭṭhānena tiṭṭhati, evaṃ tathāgatopi dasahi tathāgatabalehi samannāgato catūhi vesārajjapādehi aṭṭhāparisapathaviṃ uppīletvā sadevake loke kenaci paccatthikena paccāmittena akampiyo acalaṭṭhānena tiṭṭhati. Evaṃ tiṭṭhamāno ca taṃ āsabhaṃ ṭhānaṃ paṭijānāti upagacchati na paccakkhāti, attani āropeti. Tena vuttaṃ “āsabhaṃ ṭhānaṃ paṭijānāti”ti.

Parisāsūti “aṭṭha kho imā, sārīputta, parisā. Katamā aṭṭha? Khattiyaparīsā brāhmaṇaparīsā gahapatiparīsā samaṇaparīsā cātumahārājīkaparīsā tāvatīmsaparīsā mārāparīsā brahmaparīsā”ti, imāsu aṭṭhasu parisāsu. **Sīhanādaṃ nadatīti** seṭṭhanādaṃ abhītanādaṃ nadati, sīhanādasadisam vā nādaṃ nadati. Ayamatto sīhanādasuttēna dīpetabbo. Yathā vā sīho sahanato ceva hananato ca sīhoti vuccati, evaṃ tathāgato lokadhammānaṃ sahanato parappavādānañca hananato sīhoti vuccati. Evaṃ vuttassa sīhassa nādaṃ sīhanādaṃ. Tattha yathā sīho sīhabalena samannāgato sabbattha visārado vigatalomahaṃso sīhanādaṃ nadati, evaṃ tathāgatasīhōpi tathāgatabalehi samannāgato aṭṭhasu parisāsu visārado vigatalomahaṃso, “iti rūpa”ntiādinā nayena nānāvīdhadesanāvīlāsasampannaṃ sīhanādaṃ nadati. Tena vuttaṃ “parisāsu sīhanādaṃ nadati”ti.

Brahmacakkaṃ pavatteti ettha **brahmanti** seṭṭhaṃ uttamaṃ, visuddhassa dhammacakkasettaṃ adhivacanaṃ. Taṃ pana dhammacakkaṃ duvidhaṃ hoti paṭivedhaññaṇca desanāññaṇca. Tattha paññāpabhāvitāṃ attano ariyaphalāvahaṃ paṭivedhaññaṃ, karuṇāpabhāvitāṃ sāvakaṇaṃ ariyaphalāvahaṃ desanāññaṃ. Tattha paṭivedhaññaṃ uppajjamānaṃ uppananti duvidhaṃ. Tañhi abhinikkhamaṇato paṭṭhāya yāva arahattamaggā uppajjamānaṃ, phalakkhaṇe uppannaṃ nāma. Tusitabhavanato vā yāva mahābodhipallaṅke arahattamaggā uppajjamānaṃ, phalakkhaṇe uppannaṃ nāma. Dīpaṅkarato vā paṭṭhāya yāva arahattamaggā uppajjamānaṃ, phalakkhaṇe uppannaṃ nāma. Desanāññaṃpi pavattamānaṃ pavattanti duvidhaṃ. Tañhi yāva aññāsikoṇḍaṇṇassa sotāpattimaggā pavattamānaṃ, phalakkhaṇe pavattaṃ nāma. Tesu paṭivedhaññaṃ lokuttaraṃ, desanāññaṃ lokiyaṃ. Ubhayampi panetaṃ aññehi asādhāraṇaṃ buddhānaṃyeva orasaññaṃ.

Idāni yaṃ iminā ñāṇena samannāgato sīhanādaṃ nadati, taṃ dassetuṃ **iti rūpanti**ādīmāha. Tattha **iti rūpanti** idaṃ rūpaṃ ettakaṃ rūpaṃ, ito uddhaṃ rūpaṃ natthīti ruppanasabhāvañceva bhūtopādāyabhedāṇca ādiṃ katvā lakkhaṇarasapaccupaṭṭhānapadaṭṭhānavasena anavasesarūpapariggaho vutto. **Iti rūpassa samudayo**ti iminā evaṃ pariggahitassa rūpassa samudayo vutto. Tattha **itīti** evaṃ samudayo hotīti attho. Tassa vitthāro “avijjāsamudayā rūpasamudayo taṇhāsamudayā, kammamudayā āhārasamudayā rūpasamudayoti nibbatilakkhaṇaṃ passantopi rūpakkhandhassa udayaṃ passaṭī”ti (paṭi. ma. 1.50) evaṃ veditabbo. Atthaṅgamepi “avijjānirodhā rūpanirodho...pe... vipariṇāmalakkhaṇaṃ passantopi rūpakkhandhassa nirodhaṃ passaṭī”ti ayāṃ vitthāro.

Iti vedanātiādīsipi ayāṃ vedanā ettakā vedanā, ito uddhaṃ vedanā natthi, ayāṃ saññā, ime saṅkhārā, idaṃ viññāṇaṃ ettakaṃ viññāṇaṃ, ito uddhaṃ viññāṇaṃ natthīti vedayitasañjānanaabhisaṅkharāṇavijjānanaasabhāvañceva sukhādirūpasaññādiphassādicakkhuvīññāṇādibhedāṇca ādiṃ katvā lakkhaṇarasapaccupaṭṭhānapadaṭṭhānavasena anavasesavedanāsaññāsāṅkhāraviññāṇapariggaho vutto. **Iti vedanāya samudayo**tiādīhi pana evaṃ pariggahitānaṃ vedanāsaññāsāṅkhāraviññāṇaṃ samudayo vutto. Tatrāpi **itīti** evaṃ samudayo hotīti attho. Tesampi vitthāro “avijjāsamudayā vedanāsamudayo”ti (paṭi. ma. 1.50) rūpe vuttanayeneva veditabbo. Ayāṃ pana viśeso – tīsu khandhesu “āhārasamudayā”ti avatvā “phassasamudayā”ti vattabbaṃ, viññāṇakkhandhe “nāmarūpasamudayā”ti. Atthaṅgamapadampi tesamēva vasena yojetabbaṃ. Ayamettha saṅkhepo. Vitthārato pana udayabbayavinicchayo sabbākāraparipūro visuddhimagge vutto.

Imasmiṃ sati idaṃ hotīti ayampi aparo sīhanādo. Tassattho – imasmiṃ avijjādiḷe paccaye sati idaṃ saṅkhārādiḷikaṃ phalaṃ hoti. **Imassuppādā idaṃ uppajjati**ti imassa avijjādiḷikassa paccayassa uppādā idaṃ saṅkhārādiḷikaṃ phalaṃ uppajjati. **Imasmiṃ asati idaṃ na hotīti** imasmiṃ avijjādiḷe paccaye asati idaṃ saṅkhārādiḷikaṃ phalaṃ na hoti. **Imassa nirodhā idaṃ nirujjhati**ti imassa avijjādiḷikassa paccayassa nirodhā idaṃ saṅkhārādiḷikaṃ phalaṃ nirujjhati. Idāni yathā taṃ hoti ceva nirujjhati ca, taṃ vitthārato dassetuṃ **yadidaṃ avijjāpaccayā saṅkhārā**tiādīmāha.

Evaṃ svākkhātōti evaṃ pañcakkhandhavibhajanādivasena suṭṭhu akkhātō kathito. **Dhammoti** pañcakkhandhapaccayākāradhammo. **Uttānoti** anikujjito. **Vivaṭōti** vivarivā ṭhapito. **Pakāsitōti** dīpito jotito. **Chinnapilotikōti** pilotikā vuccati chinnaṃ bhinnaṃ tattha tattha sibbitagaṇṭhitaṃ jīṇṇavatthaṃ, taṃ yassa natthīti aṭṭhahatthaṃ navahatthaṃ vā ahatasāṭakaṃ nivattho, so chinnapilotikō nāma. Ayampi dhammo tādiso. Na hettha kohaññādivasena chinnabhinnasibbitagaṇṭhitabhāvo atthi. Apica khuddakasāṭakopi pilotikāti vuccati, sā yassa natthi, aṭṭhanavahattho mahāpaṭo atthi, sopi chinnapilotikō, apagatapilotikōti attho. Tādiso ayāṃ dhammo. Yathā hi catuhatthaṃ sāṭakaṃ gahetvā pariggahaṇaṃ karonto puriso ito cito ca añchanto kilamati, evaṃ bāhirakasamaye pabbajitā attano parittakaṃ dhammaṃ “evaṃ sati evaṃ bhavissati”ti kappetvā kappetvā vaḍḍhentā kilamanti. Yathā pana aṭṭhahatthanavahatthena pariggahaṇaṃ karonto yathāruci pārupati na kilamati, natthi tattha añchitvā vaḍḍhanakiccaṃ; evaṃ imasmiṃpi dhamme kappetvā kappetvā vibhajanakiccaṃ natthi, tehi tehi kāraṇehi mayāva ayāṃ dhammo suvibhatto suvitthāritōti idampi sandhāya “chinnapilotikō”ti āha.

Apica kacavaropi pilotikāti vuccati, imasmiñca sāsane samaṇakacavaramaṃ nāma patitṭhātuṃ na labhati. Tenevāha –

“Kāraṇḍavaṃ niddhamatha, kasambuṃ apakassatha;
Tato palāpe vāhetha, assamaṇe samaṇamānine.

“Niddhamitvāna pāpicche, pāpācāragocare;
Suddhā suddhehi saṃvāsamaṃ, kappayavho patissatā;
Tato samaggā nipakā, dukkhassantaṃ karissathā”ti. (a. ni. 8.10);

Iti samaṇakacavarassa chinnattāpi ayaṃ dhammo chinnapilotiko nāma hoti.

Alamevāti yuttameva. **Saddhāpabbajitenāti** saddhāya pabbajitena. **Kulaputtenāti** dve kulaputtā ācārakulaputto jātikulaputto ca. Tattha yo yato kutoci kulā pabbajitvā silādayo pañca dhammakhandhe pūreti, ayaṃ **ācārakulaputto** nāma. Yo pana yasakulaputtādayo viya jātisampannakulā pabbajito, ayaṃ **jātikulaputto** nāma. Tesu idha ācārakulaputto adhippeto. Sace pana jātikulaputto ācāravā hoti, ayaṃ uttamoyeva. Evarūpena kulaputtana. **Vīriyaṃ ārabhitunti** caturaṅgasamannāgataṃ vīriyaṃ kātuṃ. Idānissa caturaṅgaṃ dassento **kāmaṃ taco cāti**ādīmāha. Ettha hi taco ekaṃ aṅgaṃ, nhāru ekaṃ, aṭṭhi ekaṃ, maṃsalohitaṃ ekanti. Idañca pana caturaṅgasamannāgataṃ vīriyaṃ adhiṭṭhahantena navasu ṭhānesu samādhātappaṃ purebhatte pacchābhatte purimayāme majjhimayāme pacchimayāme gamane ṭhāne nisajjāya sayaneti.

Dukkhaṃ, bhikkhave, kusīto viharatīti imasmiṃ sāsane yo kusīto puggalo, so dukkhaṃ viharati. Bāhiraṃsamaye pana yo kusīto, so sukhaṃ viharati. **Vokiṇṇoti** missībhūto. **Sadatthanti** sobhanaṃ vā atthaṃ sakaṃ vā atthaṃ, ubhayenāpi arahattameva adhippetamaṃ. **Parihāpetīti** hāpeti na pāpuṇāti. Kusītapuggalassa hi cha dvārāni aguttāni honti, tīṇi kammāni aparissuddhāni, ājīvaṭṭhamakamaṃ silaṃ apariyodātaṃ, bhinnājīvo kulūpako hoti. So sabrahmacārīnaṃ akkhiṃhi patitarajamaṃ viya upaghātakaro hutvā dukkhaṃ viharati, pīṭhamaddano ceva hoti laṇḍapūrakō ca, satthu ajjhāsayaṃ gahetuṃ na sakkoti, dullabhaṃ khaṇaṃ virādheti, tena bhutto raṭṭhapiṇḍopi na mahapphalo hoti.

Āraddhavīriyo ca kho, bhikkhaveti āraddhavīriyo puggalo imasmiṃyeva sāsane sukhaṃ viharati. Bāhiraṃsamaye pana yo āraddhavīriyo, so dukkhaṃ viharati. **Pavivittoti** vivitto viyutto hutvā. **Sadatthamaṃ paripūreṭīti** arahattaṃ pāpuṇāti. Āraddhavīriyassa hi cha dvārāni suguttāni honti, tīṇi kammāni parisuddhāni, ājīvaṭṭhamakamaṃ silaṃ pariyoḍātaṃ sabrahmacārīnaṃ akkhiṃhi susītalañjanaṃ viya dhātugatacandanaṃ viya ca manāpo hutvā sukhaṃ viharati, satthu ajjhāsayaṃ gahetuṃ sakkoti. Satthā hi –

“Ciraṃ jīva mahāvīra, kappamaṃ tiṭṭha mahāmuni”ti –

Evamaṃ gotamiyā vandito, “na kho, gotami, tathāgatā evamaṃ vanditabbā”ti paṭikkhipitvā tāya yācito vanditabbākāraṃ ācikkhanto evamāha –

“Āraddhavīriye pahitatte, niccaṃ daḷhaparakkame;
Samagge sāvake passa, eṣā buddhāna vandanā”ti. (apa. therī 2.2.171);

Evamaṃ āraddhavīriyo satthu ajjhāsayaṃ gahetuṃ sakkoti, dullabhaṃ khaṇaṃ na virādheti. Tassa hi buddhuppādo dhammadesanā saṅghasuppaṭipatti saphalā hoti saudrayā, raṭṭhapiṇḍopi tena bhutto mahapphalo hoti.

Hīnena aggassāti hīnāya saddhāya hīnena vīriyena hīnāya satiyā hīnena samādhinā hīnāya paññāya aggasañkhātassa arahattassa patti nāma na hoti. **Aggena ca khoti** aggehi saddhādīhi aggassa arahattassa

patti hoti. **Maṇḍapeyyanti** pasannaṭṭhena maṇḍaṃ, pātabbaṭṭhena peyyaṃ. Yañhi pivitvā antaravīthiyaṃ patito visaññī attano sātakādīnampi assāmiko hoti, taṃ pasannampi na pātabbaṃ, mayhaṃ pana sāsanaṃ evaṃ pasannañca pātabbañcāti dassento “maṇḍapeyya”nti āha.

Tattha tividho maṇḍo – desanāmaṇḍo, paṭiggahamaṇḍo, brahmacariyamaṇḍoti. Katamo desanāmaṇḍo? Catunnaṃ ariyasaccānaṃ ācikkhanā desanā paññāpanā paṭṭhapanā vivaraṇā vibhajanā uttānīkammaṃ, catunnaṃ satipaṭṭhānānaṃ...pe... ariyassa aṭṭhaṅgikassa maggassa ācikkhanā...pe... uttānīkammaṃ, ayaṃ **desanāmaṇḍo**. Katamo paṭiggahamaṇḍo? Bhikkhū bhikkhuniyo upāsakā upāsikāyo devā manussā ye vā panaññepi keci viññātāro, ayaṃ **paṭiggahamaṇḍo**. Katamo brahmacariyamaṇḍo? Ayameva ariyo aṭṭhaṅgiko maggo, seyyathidaṃ – sammādiṭṭhi...pe... sammāsamādhī, ayaṃ **brahmacariyamaṇḍo**. Apica adhimokkhamāṇḍo saddhindriyaṃ, assaddhiyaṃ kasaṭo, assaddhiyaṃ kasaṭaṃ chaḍḍetvā saddhindriyassa adhimokkhamāṇḍaṃ pivatīti maṇḍapeyyantiādīnāpi (paṭi. ma. 1.238) nayanettha attho veditabbo. **Satthā sammukhībhūtoti** idamettha kāraṇavacanaṃ. Yasmā satthā sammukhībhūto, tasmā vīriyasampayogaṃ katvā pivatha etaṃ maṇḍaṃ. Bāhirakañhi bhesajjamaṇḍampi vejjassa asamukhā pivantānaṃ pamāṇaṃ vā uggamaṇaṃ vā niggamaṇaṃ vā na jānāmāti āsaṅkā hoti. Vejjasammukhā pana “vejjo jānissatī”ti nirāsaṅkā pivanti. Evameva amhākaṃ dhammassāmi satthā sammukhībhūtoti vīriyaṃ katvā pivathāti maṇḍapāne nesamaṃ niyojento **tasmātiha, bhikkhavi**tiādīmāha. Tattha **saphalāti** sānisamsā. **Saudrayāti** savaḍḍhi. Idāni niyojanānurūpaṃ sikkhitabbaṃ niddisanto **attatthaṃ vā hi, bhikkhavi**tiādīmāha. Tattha **attatthanti** attano atthabhūtaṃ arahattaṃ. **Appamādena sampādetunti** appamādena sabbakiccāni kātuṃ. **Paratthanti** paccayaḍāyakānaṃ mahapphalānisamsaṃ. Sesamaṃ sabbattha uttānamevāti. Dutiyaṃ.

3. Upanisasuttavaṇṇanā

23. Tatiye “jānato aha”ntiādīsu **jānatoti** jānantassa. **Passatoti** passantassa. Dvepi padāni ekatthāni, byañjanaṃ nānaṃ. Evaṃ santepi “jānato”ti nāṇalakkhaṇaṃ upādāya puggalaṃ niddisati. Jānalakkhaṇaṇhi nāṇaṃ. “Passato”ti nāṇappabhāvaṃ upādāya. Passanappabhāvaṇhi nāṇaṃ, nāṇasamaṅgīpuggalo cakkhumā viya cakkhunā rūpāni, nāṇena vivate dhamme passati. **Āsavānaṃ khayanti** ettha āsavānaṃ pahānaṃ asamuppādo khīṇākāro natthibhāvoti ayampi āsavakkhayoti vuccati, bhaṅgopi maggaphalanibbānāni. “Āsavānaṃ khayā anāsavaṃ cetovimutti”ntiādīsu (ma. ni. 1.438; vibha. 831) hi khīṇākāro āsavakkhayoti vuccati. “Yo āsavānaṃ khayō vayo bhedo paribhedo aniccatā antaradhāna”nti (vibha. 354) ettha bhaṅgo.

“Sekkhaṃ sikkhamānassa, ujumaggānusārino;
Khayasmim paṭhamamaṃ nāṇaṃ, tato aññā anantarā”ti. (itivu. 62); –

Ettha maggo. So hi āsave khepento vūpasamento uppajjati, tasmā āsavānaṃ khayoti vutto. “Āsavānaṃ khayā samaṇo hotī”ti ettha phalaṃ. Tañhi āsavānaṃ khīṇante uppajjati, tasmā āsavānaṃ khayoti vuttaṃ.

“Āsavā tassa vaḍḍhanti, āra so āsavakkhayā”ti; (Dha. pa. 253) –
Ettha nibbānaṃ. Tañhi āgamma āsavā khīyanti, tasmā āsavānaṃ khayoti vuttaṃ. Idha pana maggaphalāni adhippetāni. **No ajānato no apassatoti** yo pana na jānāti na passati, tassa no vadāmīti attho. Etena ye ajānato apassatopi saṃsārādīhiyeva suddhiṃ vadanti, te paṭikkhittā honti. Purimena padadvayena upāyo vutto, iminā anupāyaṃ paṭisedheti.

Idāni yaṃ jānato āsavānaṃ khayō hoti, taṃ dassetukāmo **kiñca, bhikkhave, jānatoti** pucchaṃ ārabhi. Tattha jānānā bahuvīdhā. Dabbajātiko eva hi koci bhikkhu chattaṃ kātuṃ jānāti, koci cīvarādīnaṃ aññataraṃ, tassa īdisāni kammāni vattasīse ṭhatvā karontassa sā jānānā saggamaggaphalānaṃ padaṭṭhānaṃ na hotīti na vattaṃ. Yo pana sāsane pabbajitvā vejjakammādīni kātuṃ jānāti, tassevaṃ jānato āsavā vaḍḍhantiyeva. Tasmā yaṃ jānato passato ca āsavānaṃ khayō hoti,

tadeva dassento **iti rūpanti**ādīmāha. **Evam kho, bhikkhave, jānatoti** evam pañcannaṃ khandhānaṃ udayabbayaṃ jānantassa. **Āsavānaṃ khayō hotīti** āsavānaṃ khayante jātatā “āsavānaṃ khayō”ti laddhanāmaṃ arahattaṃ hoti.

Evam arahattanikūṭena desanaṃ niṭṭhapetvā idāni khīṇāsavassa āgamanīyaṃ pubbabhāgapaṭipadam dassetuṃ **yampissa taṃ, bhikkhavi**etiādīmāha. Tattha **khayasmim khayeññanti** āsavakkhayaśāṅkhāte arahattaphale paṭiladdhe sati paccavekkhaṇaññaṃ. Tañhi arahattaphalaśāṅkhāte khayasmim paṭhamavāraṃ uppanne pacchā uppannattā khayeññanti vuccati. **Saupanisanti** sakāraṇaṃ sappaccayaṃ. **Vimuttīti** arahattaphalavimuttīti. Sā hissa upanissayapaccayena paccayo hoti. Evam ito paresupi labbhamānavasena paccayabhāvo veditabbo.

Virāgoti maggo. So hi kilese virājento khepento uppanno, tasmā virāgoti vuccati. **Nibbidāti** nibbidāññaṃ. Etena balavavipassanaṃ dasseti. **Balavavipassanāti** bhayatūpaṭṭhāne ññaṃ ādīnavānupassane ññaṃ muñcitukamyatāññaṃ saṅkhārupekkhāññanti catunnaṃ ññaṃ adhivacanaṃ. **Yathābhūtaññadassananti** yathāśābhāvajānanasāṅkhātaṃ dassanaṃ. Etena taruṇavipassanaṃ dasseti. Taruṇavipassanā hi balavavipassanāya paccayo hoti. **Taruṇavipassanāti** saṅkhāraparicchede ññaṃ kaṅkhāvitarāṇe ññaṃ sammasane ññaṃ maggāmagge ññanti catunnaṃ ññaṃ adhivacanaṃ. **Samādhīti** pādakajjhānasamādhīti. So hi taruṇavipassanāya paccayo hoti. **Sukhanti** appanāya pubbabhāgasukhaṃ. Tañhi pādakajjhānassa paccayo hoti. **Passaddhīti** darathapaṭippassaddhi. Sā hi appanāpubbabhāgassa sukhasa paccayo hoti. **Pīṭīti** balavapīti. Sā hi darathapaṭippassaddhiyā paccayo hoti. **Pāmojjanti** dubbalapīti. Sā hi balavapītiyā paccayo hoti. **Saddhāti** aparāparaṃ uppajjanasaddhā. Sā hi dubbalapītiyā paccayo hoti. **Dukkhanti** vaṭṭadukkaṃ. Tañhi aparāparasaddhāya paccayo hoti. **Jātīti** savikārā khandhajāti. Sā hi vaṭṭadukkhasa paccayo hoti. **Bhavoti** kammabhavo. (So hi savikārāya jātiyā paccayo hoti.) Etenupāyena sesapadānīpi veditabbāni.

Thullaphusitaketi mahāphusitake. **Pabbatakandarapadarasākhāti** ettha **kandaraṃ** nāma ‘ka’ntiladdhanāmena udakena dārīto udakabhinnō pabbatapadeso, yo “nitambo”tipi “nadīkuñcho”tipi vuccati. **Padaraṃ** nāma aṭṭhamāse deve avassante phalīto bhūmippadeso. **Sākhāti** kusumbhagāminīyo khuddakamātikāyo. **Kusobbhāti** khuddakaāvāṭā. **Mahāsobbhāti** mahāāvāṭā. **Kunnadiyoti** khuddakanadiyo. **Mahānadiyoti** gaṅgāyamunādīkā mahāsaritā. **Evameva kho, bhikkhave, avijjūpanisā saṅkhārāti**ādīsu avijjā pabbatoti daṭṭhabbā. Abhisāṅkhārā meghoti, viññāṇādivaṭṭaṃ kandarādayoti, vimuttī sāgaroti.

Yathā pabbatamatthake devo vassivā pabbatakandarādīni pūrento anupubbena mahāsamuddaṃ sāgaraṃ pūreti, evam avijjāpabbatamatthake tāva abhisāṅkhārameghassa vassanaṃ veditabbaṃ. Assutavā hi bālaputhujjano avijjāya aññāṇī hutvā taṇhāya abhilāsaṃ katvā kusalākusalakammaṃ āyūhati, taṃ kusalākusalakammaṃ paṭisandhiviññāṇassa paccayo hoti, paṭisandhiviññāṇādīni nāmarūpādīnaṃ. Iti pabbatamatthake vuṭṭhadevassa kandarādayo pūretvā mahāsamuddaṃ āhacca ṭhitakālo viya avijjāpabbatamatthake vuṭṭhassa abhisāṅkhārameghassa paramparapaccayatāya anupubbena viññāṇādivaṭṭaṃ pūretvā ṭhitakālo. Buddhavacanaṃ pana pāḷiyaṃ agahitampi “idha tathāgato loka uppajjati, agārasmā anagāriyaṃ pabbajati”ti imāya pāḷiyā vasena gahitamevāti veditabbaṃ. Yā hi tassa kulagehe nibbatti, sā kammabhavapaccayā savikārā jāti nāma. So buddhānaṃ vā buddhasāvakaṇaṃ vā sammukhībhāvaṃ āgamma vaṭṭadosadīpakaṃ lakkhaṇāhaṭaṃ dhammakathaṃ sutvā vaṭṭavasena pīḷito hoti, evamassa savikārā khandhajāti vaṭṭadukkhasa paccayo hoti. So vaṭṭadukkheṇa pīḷito aparāparaṃ saddhaṃ janetvā agārasmā anagāriyaṃ pabbajati, evamassa vaṭṭadukkhaṃ aparāparasaddhāya paccayo hoti. So pabbajjāmatteva asantutṭho unapañcavassakāle nissayaṃ gahetvā vattapaṭipattiṃ pūrento dvemātikā paṇaṃ katvā kammākammaṃ uggahetvā yāva arahattā nijjaṭaṃ katvā kammaṭṭhānaṃ gahetvā araṇṇe vasanto pathavīkasiṇādīsu kammaṃ ārabhati, tassa kammaṭṭhānaṃ nissāya dubbalapīti uppajjati. Tadassa saddhūpanisaṃ pāmojjaṃ, taṃ balavapītiyā paccayo hoti. Balavapīti darathapaṭippassaddhiyā, sā appanāpubbabhāgasukhasa, taṃ sukhaṃ pādakajjhānasamādhissa. So samādhinā cittakallataṃ janetvā taruṇavipassanāya kammaṃ karoti. Iccassa

pādakajjhānasamādhī taruṇavipassanāya paccayo hoti, taruṇavipassanā balavavipassanāya, balavavipassanā maggassa, maggo phalavimuttiyā, phalavimutti paccavekkhaṇañāṇassāti. Evaṃ devassa anupubbena sāgaram pūretvā ṭhitakālo viya khīṇāsavassa vimuttisāgaram pūretvā ṭhitakālo veditabboti. Tatiyaṃ.

4. Aññatitthiyasuttavaṇṇanā

24. Catutthe **pāvisīti** pavīṭṭho. So ca na tāva pavīṭṭho, “pavisissāmī”ti nikkhantattā pana evaṃ vutto. Yathā kiṃ? Yathā “gāmaṃ gamissāmī”ti nikkhantapuriso taṃ gāmaṃ appattoṇi “kahaṃ itthannāmo”ti vutte “gāmaṃ gato”ti vuccati, evaṃ. **Atippagoti** tadā kira therassa atippagoyeva nikkhantadivaso ahosi, atippagoyeva nikkhantabhikkhū bodhiyaṅgaṇe cetiyaṅgaṇe nivāsanapārupanaṭṭhāneti imesu ṭhānesu yāva bhikkhācāravelā hoti, tāva papañcaṃ karonti. Therassa pana “yāva bhikkhācāravelā hoti, tāva paribbājakehi saddhiṃ ekadvekkathāvāre karissāmī”ti cintayato **yamṇūnāhanti** etadahosi. **Paribbājakānaṃ āramoti** so kira āramo dakkhiṇadvārassa ca veḷuvanassa ca antarā ahosi. **Idhāti** imesu catūsu vādesu. **Kiṃvādī kimakkhāyīti** kiṃ vadati kiṃ ācikkhati, kiṃ ettha samaṇassa gotamassa dassananti pucchanti. **Dhammassa cānudhammaṃ byākareyyāmāti**, bhotaṃ gotamena yaṃ vuttaṃ kāraṇaṃ, tassa anukāraṇaṃ katheyyāma. **Sahadhammiko vādānupātoti** parehi vuttakāraṇena sakāraṇo hutvā samaṇassa gotamassa vādānupāto vādappavatti viññūhi garahitabbaṃ kāraṇaṃ koci appamattakopi kathaṃ nāgaccheyya? Idaṃ vuttaṃ hoti – kathaṃ sabbākārenapi samaṇassa gotamassa vāde gārayhaṃ kāraṇaṃ na bhaveyyāti?

Iti vadanti phassapaccayā dukkhanti evaṃ vadantoti attho. **Tatrāti** tesu catūsu vādesu. **Te vata aññatra phassāti** idaṃ “tadapi phassapaccayā”ti paṭiññāya sādhakavacanaṃ. Yasmā hi na vinā phassena dukkhapaṭisaṃvedanā atthi, tasmā jānitabbametaṃ yathā “tadapi phassapaccayā”ti ayamettha adhippāyo.

Sādhu, sādhu, ānandāti ayaṃ sādhu-kāro sārīputtattherassa dīnno, ānandattherena pana saddhiṃ bhagavā āmantesi. **Ekamidāhanti** ettha **idhāti** nipātamaṃ, ekaṃ samayanti attho. Idaṃ vacanaṃ “na kevalaṃ sārīputtova rājagahaṃ pavīṭṭho, ahampi pāvisiṃ. Na kevalaṃ tasevāyaṃ vitakko uppanno, mayhampi uppajji. Na kevalaṃ taseva sā tithiyehi saddhiṃ kathā jātā, mayhampi jātapubbā”ti dassanattaṃ vuttaṃ.

Acchariyaṃ abbhutanti ubhayampetaṃ vimhayadīpanameva. Vacanattho panettha accharam pahaṇitūṃ yuttanti acchariyaṃ. Abhūtapubbaṃ bhūtanti abbhutaṃ. **Ekena padenāti** “phassapaccayā dukkha”nti iminā ekena padena. Etena hi sabbavādānaṃ paṭikkhepattho vutto. **Esevatthoti** esoyeva phassapaccayā dukkhanti paṭiccasamuppādattho. **Taññevettha paṭibhātūti** taññevettha upaṭṭhātu. Idāni thero jarāmaraṇādīkāya paṭiccasamuppādakathāya taṃ atthagambhīrañceva gambhīrāvabhāsañca karonto **sace maṃ, bhanteti**ādiṃ vatvā yaṃmūlakā kathā uppannā, tadeva padaṃ gahetvā vivaṭṭaṃ dassento **channaṃtvevāti**ādimāha. Sesam uttānamevāti. Catutthaṃ.

5. Bhūmijasuttavaṇṇanā

25-26. Pañcame **bhūmijoti** tassa therassa nāmaṃ. Sesamidhāpi purimasutte vuttanayeneva veditabbaṃ. Ayaṃ pana viseso – yasmā idaṃ sukhadukkaṃ na kevalaṃ phassapaccayā uppajjati, kāyenapi kariyamānaṃ kariyati, vācāyapi manasāpi, attanāpi kariyamānaṃ kariyati, parenapi kariyamānaṃ kariyati, sampajānenapi kariyamānaṃ kariyati, asampajānenapi, tasmā tassa aparaṃpi paccayavisesaṃ dassetuṃ **kāye vā hānanda, satīti**ādimāha. **Kāyasañcetanāhetūti** kāyadvāre uppānacetanāhetu. Vacīsañcetanāmanosañcetanāsupi eseva nayo. Ettha ca kāyadvāre kāmāvacarakusalākusalavasena vīsati cetanā labbhanti, tathā vacīdvāre. Manodvāre navahi rūpārūpacetanāhi saddhiṃ ekūnatimsāti tīsu dvāresu ekūnasattati cetanā honti, tappaccayaṃ vipākasukhadukkaṃ dassitaṃ. **Avijjāpaccayā cāti** idaṃ tāpi cetanā avijjāpaccayā hontīti dassanattaṃ

vuttaṃ. Yasmā pana taṃ yathāvuttacetanābhedam kāyasaṅkhārañceva vacīsāṅkhārañca manosāṅkhārañca parehi anussāhito sāmam asaṅkhārikacittena karoti, parehi kāriyamāno sasaṅkhārikacittenaṃ karoti, “idaṃ nāma kammaṃ karoti, tassa evarūpo nāma vipāko bhavissatī”ti, evaṃ kammañca vipākañca jānantopi karoti, mātāpītūsu cetiyavandanādīni karontesu anukarontā dāraḱā viya kevalam kammameva jānanto “imassa pana kammassa ayam vipāko”ti vipākam ajānantopi karoti, tasmā taṃ dassetuṃ **sāmam vā taṃ, ānanda, kāyasaṅkhāram abhisāṅkharotī**tiādi vuttaṃ.

Imesu, ānanda, dhammesūti ye ime “sāmam vā taṃ, ānanda, kāyasaṅkhāra”ntiādīsu catūsu thānesu vuttā chasattati dvesatā cetanādhammā, imesu dhammesu avijjā upanissayakoṭiyā anupatitā. Sabbepi hi te “avijjāpaccayā saṅkhārā”ti ettheva saṅgahaṃ gacchanti. Idāni vivaṭṭam dassento **avijjāya tvevā**tiādimāha. **So kāyo na hotīti** yasmim kāye sati kāyasañcetanāpaccayam ajjhataṃ sukhadukkham uppajjati, so kāyo na hoti. Vācāmanesupi eseva nayo. Apica kāyoti cetanākāyo, vācāpi cetanāvācā, manopi kammamanoyeva. Dvārakāyo vā kāyo. Vācāmanesupi eseva nayo. Khīṇāsavo cetiyam vandati, dhammam bhaṇati, kammaṭṭhānam manasi karoti, kathamassa kāyādayo na hotīti? Avipākattā. Khīṇāsavena hi kataṃ kammaṃ neva kusalam hoti nākusalam. Avipākam hutvā kiriyāmatte tiṭṭhati, tenassa te kāyādayo na hotīti vuttaṃ.

Khettaṃ taṃ na hotītiādīsipi viruṇaṭṭhena taṃ khettaṃ na hoti, patiṭṭhāṇaṭṭhena vatthu na hoti, paccayaṭṭhena āyatanam na hoti, kāraṇaṭṭhena adhikaraṇam na hoti. Sañcetanāmūlakañhi ajjhataṃ sukhadukkham uppajjeyya, sā sañcetanā etesaṃ viruṇaṇādīnam atthānam abhāvena tassa sukhadukkhasa neva khettaṃ, na vatthu na āyatanam, na adhikaraṇam hotīti. Imasmim sutte vedanādīsū sukhadukkameva kathitaṃ, tañca kho vipākamevāti. Pañcamam.

Chaṭṭham upavāṇasuttaṃ uttānameva. Ettha pana vaṭṭadukkameva kathitanti. Chaṭṭham.

7. Paccayasuttavaṇṇanā

27-28. Sattame paṭipāṭiyā vuttasu pariyosānapadam gahetvā **katamañca, bhikkhave, jarāmarañanti**ādi vuttaṃ. **Evaṃ paccayam pajānātīti** evaṃ dukkhasaccavasena paccayam jānāti. Paccayasamudayādayopi samudayasaccādīnamyeva vasena veditabbā. **Diṭṭhisampannoti** maggaḍṭṭhiyā sampanno. **Dassanasampannoti** tasseva vevacanam. **Āgato imam saddhammanti** maggasaddhammam āgato. **Passatīti** maggasaddhammameva passati. **Sekkhena ṇāṇenāti** maggañāṇeneva. **Sekkhāya vijjāyāti** maggavijjāya eva. **Dhammasotaṃ samāpannoti** maggasaṅkhātameva dhammasotaṃ samāpanno. **Ariyoti** puthujjanabhūmim atikkanto. **Nibbedhikapaññoti** nibbedhikapaññāya samannāgato. **Amatadvāram āhacca tiṭṭhatīti** amataṃ nāma nibbānam, tassa dvāram ariyamaggaṃ āhacca tiṭṭhatīti. Aṭṭhamam uttānameva. Sattamaaṭṭhamāni.

9. Samaṇabrāhmaṇasuttavaṇṇanā

29-30. Navamam akkharabhāṇakānam bhikkhūnam ajjhāsayena vuttaṃ. Te hi **parīti** upasaggaṃ pakkhipitvā vuccamāne paṭivijjhitaṃ sakkonti. Navamam.

Dasame sabbam uttānameva. Imesu dvīsū suttasu catusaccapaṭivedhova kathito. Dasamam.

Dasabalavaggo tatiyo.

4. Kaḷārakhattiyavaggo

1. Bhūtasuttavaṇṇanā

31. Kaḷārakhattiyavaggassa paṭhame **ajitapañheti** ajitamāṇavena pucchitapañhe.

Saṅkhātadhammāseti saṅkhātadhammā vuccanti ñātadhammā tulitadhammā tīritadhammā. **Sekkhāti** satta sekkhā. **Puthūti** teyeva satta jane sandhāya puthūti vuttaṃ. **Idhāti** imasmim̐ sāsane. **Nipakoti** nepakkaṃ vuccati paññā, tāya samannāgatattā nipako, tvaṃ paṇḍito pabrūhīti yācati. **Iriyanti** vuttiṃ ācāraṃ gocaraṃ vihāraṃ paṭipattiṃ. **Mārisāti** bhagavantaṃ ālapati. Sekkhānañca saṅkhātadhammānañca khīṇāsavānañca paṭipattiṃ mayā pucchito paṇḍita, mārisa, mayhaṃ kathehīti ayamettha saṅkhepattho.

Tuṇhī ahoṣīti kasmā yāva tatiyaṃ puṭṭho tuṇhī ahoṣi? Kiṃ pañhe kaṅkhati, udāhu ajjhāsayeti? Ajjhāsaye kaṅkhati, no pañhe. Evaṃ kirassa ahoṣi – “sathā maṃ sekkhāsekkhānaṃ āgamanīyapaṭipadaṃ kathāpetukāmo; sā ca khandhavasena dhātuvasena āyatanavasena paccayākārasena bahūhi kāraṇehi sakkā kathetuṃ. Kathaṃ kathento nu kho satthu ajjhāsayaṃ gahetvā kathetuṃ sakkhissāmi”ti? Atha sathā cintesi – “ṭhapetvā maṃ añño pattaṃ ādāya caranto sāvako nāma paññāya sārīputtasamo natthi. Ayampi mayā pañhaṃ puṭṭho yāva tatiyaṃ tuṇhī eva. Pañhe nu kho kaṅkhati, udāhu ajjhāsaye”ti. Atha “ajjhāsaye”ti ñatvā pañhakathanatthāya nayaṃ dadamāno **bhūtamidanti, sārīputta, passasīti** āha.

Tattha **bhūtanti** jātaṃ nibbattaṃ, khandhapañcakassettaṃ nāmaṃ. Iti sathā “pañcakkhandhavasena, sārīputta, imaṃ pañhaṃ kathehī”ti therassa nayaṃ deti. Sahanayadānena pana therassa tīre ṭhitapurisassa vivaṭo ekaṅgaṇo mahāsamuddo viya nayasatena nayasahassena pañhabyākaraṇaṃ upaṭṭhāsi. Atha naṃ byākaraṇto **bhūtamidanti, bhanteti**ādīmāha. Tattha **bhūtamidanti** idaṃ nibbattaṃ khandhapañcakaṃ. **Sammappaññāya passatīti** saha vipassanāya maggappaññāya sammā passati. **Paṭipanno hotīti** sīlato paṭṭhāya yāva arahattamaggā nibbidādīnaṃ atthāya paṭipanno hoti. **Tadāhārasambhavanti** idaṃ kasmā ārabhi? Etaṃ khandhapañcakaṃ āhāraṃ paṭicca ṭhitaṃ, tasmā taṃ āhārasambhavaṃ nāma katvā dassetuṃ idaṃ ārabhi. Iti imināpi pariyāyena sekkhapaṭipadā kathitā hoti. **Tadāhāranirodhāti** tesam̐ āhāraṇaṃ nirodhena. Idaṃ kasmā ārabhi? Tañhi khandhapañcakaṃ āhāranirodhā nirujjhati, tasmā taṃ āhāranirodhasambhavaṃ nāma katvā dassetuṃ idaṃ ārabhi. Iti imināpi pariyāyena sekkhasseva paṭipadā kathitā. **Nibbidāti** ādīni sabbāni kāraṇavacanānīti veditabbāni. **Anupādā vimuttoti** catūhi upādānehi kañci dhammaṃ agahetvā vimutto. **Sādhu sādhu**ti iminā therassa byākaraṇaṃ sampahaṃsetvā sayampi tatheva byākaraṇto puna “bhūtamida”ntiādīmāhāti. Paṭhamam̐.

2. Kaḷārasuttavaṇṇanā

32. Dutiye **kaḷārakhattiyoti** tassa therassa nāmaṃ. Dantā panassa kaḷārā visamasanṭhānā, tasmā “kaḷāro”ti vuccati. **Hīnāyāvattoti** hīnassa gīhibhāvassa atthāya nivatto. **Assāsamalattāti** assāsaṃ avassayaṃ paṭiṭṭhaṃ na hi nūna alattha, tayo magge tīṇi ca phalāni nūna nālattāti dīpeti. Yadi hi tāni labheyya, na sikkhaṃ paccakkhāya hīnāyāvattēyyāti ayaṃ therassa adhippāyo. **Na khvāhaṃ, āvusoti** ahaṃ kho, āvuso, “assāsaṃ patto, na patto”ti na kaṅkhāmi. Therassa hi sāvakaṃ pāramiññaṃ avassayo, tasmā so na kaṅkhati. **Āyatim̐ panāvusoti** iminā “āyatim̐ paṭisandhi tumhākaṃ ugghāṭitā, na ugghāṭitā”ti arahattappattiṃ pucchati. **Na khvāhaṃ, āvuso, vicikicchāmīti** iminā thero tattha vicikicchābhāvaṃ dīpeti.

Yena bhagavā tenupasaṅkamīti “imaṃ sutakāraṇaṃ bhagavato ārocessāmi”ti upasaṅkami. **Aññā byākatāti** arahattaṃ byākataṃ. **Khīṇā jāṭīti** na therena evaṃ byākatā, ayaṃ pana thero tuṭṭho pasanno evaṃ padabyañjanāni āropetvā āha. **Aññataraṃ bhikkhuṃ āmantesīti** taṃ sutvā sathā cintesi – “sārīputto dhīro gambhīro. Na so kenaci kāraṇena evaṃ byākarissati. Saṃkhittena pana pañho byākato bhavissati. Pakkosāpetvā naṃ pañhaṃ byākarāpessāmi”ti aññataraṃ bhikkhuṃ āmantesi.

Sace taṃ sārīputtāti idaṃ bhagavā “na esa attano dhammatāya aññaṃ byākarissati, pañhametaṃ pucchissāmi, taṃ kathentova aññaṃ byākarissatī”ti aññaṃ byākarāpetuṃ evaṃ pucchi.

Yamnidānāvuso, jātīti, āvuso, ayam jāti nāma yampaccayā, tassa paccayassa khayā khīṇasmim jātiyā paccaye jātisāṅkhātaṃ phalaṃ khīṇanti viditaṃ. Idhāpi ca thero pañhe akaṅkhitvā ajjhāsaye kaṅkhati. Evaṃ kirassa ahosi – “aññā nāma taṇhā khīṇā, upādānaṃ khīṇaṃ, bhavo khīṇo, paccayo khīṇo, kilesā khīṇātiādīhi bahūhi kāraṇehi sakkā byākātuṃ, kathaṃ kathento pana satthu ajjhāsayaṃ gahetuṃ sakkhissāmī”’ti.

Kiñcāpi evaṃ ajjhāsaye kaṅkhati, pañhaṃ pana aṭṭhapetvāva paccayākāravasena byākāsi. Satthāpi paccayākāravaseneva byākarāpetukāmo, tasmā esa byākarontova ajjhāsayaṃ gaṇhi. Tāvadeva “gahito me satthu ajjhāsayo”’ti aññāsi. Athassa nayasatena nayasahassena pañhabyākaraṇaṃ upaṭṭhāsi. Yasmā pana bhagavā uttari pañhaṃ pucchati, tasmā tena taṃ byākaraṇaṃ anumoditanti veditabbaṃ.

Kathaṃ jānato pana teti idaṃ kasmā ārabhi? Savisaye sīhanādaṃ nadāpetuṃ. Thero kira sūkaranihātaleṇadvāre dīghanakhaparibbājakassa vedanāpariggahasutte kathiyamāne tālavaṇṭaṃ gahetvā satthāraṃ bījayamāno ṭhito tisso vedanā pariggahetvā sāvakaṃpāramiññaṃ adhigato, ayamassa savisayo. Imasmim savisaye ṭhito sīhanādaṃ nadissatīti naṃ sandhāya satthā idaṃ pañhaṃ pucchi. **Aniccāti** hutvā abhāvattṭhena aniccā. **Yadaniccaṃ taṃ dukkhanti** ettha kiñcāpi sukhā vedanā ṭhitisukhā vipariṇāmadukkhā, dukkhā vedanā ṭhitidukkhā vipariṇāmasukhā, adukkhamasukhā ñāṇasukhā aññāṇadukkhā, vipariṇāmakotiṇiyā pana sabbāva dukkhā nāma jātā. **Viditanti** yasmā evaṃ vedanāttayaṃ dukkhanti viditaṃ, tasmā yā tattha taṇhā, sā na upaṭṭhāsīti dasseti.

Sādhu sādhuti therassa vedanāparicchedajānane sampahaṃsanaṃ. Thero hi vedanā ekāti vā dve tisso catassoti vā avuttepi vuttanayena tāsāṃ tisso paricchedaṃ aññāsi, tena taṃ bhagavā sampahaṃsanto evamāha. **Dukkhasminti** idaṃ bhagavā iminā adhippāyena āha – “sāriputta, yaṃ tayā ‘iminā kāraṇena vedanāsu taṇhā na upaṭṭhāsī’ti byākataṃ, taṃ subyākataṃ. ‘Tisso vedanā’ti vibhajantena pana te atippapañco kato, taṃ ‘dukkhasmi’nti byākarontenapi hi te subyākatameva bhaveyya. Yaṃkiñci vedayitaṃ, taṃ dukkhanti ñātamattepi hi vedanāsu taṇhā na tiṭṭhati”’.

Kathaṃ vimokkhāti katarā vimokkhā, katarena vimokkhena tayā aññā byākatāti attho? **Ajjhattaṃ vimokkhāti** ajjhattavimokkhena, ajjhattasaṅkhāre pariggahetvā pattaarahattenāti attho. Tattha catukkaṃ veditabbaṃ – ajjhattaṃ abhiniveso ajjhattaṃ vuṭṭhānaṃ, ajjhattaṃ abhiniveso bahiddhā vuṭṭhānaṃ, bahiddhā abhiniveso bahiddhā vuṭṭhānaṃ, bahiddhā abhiniveso ajjhattaṃ vuṭṭhānanti. Ajjhattañhi abhinivesitvā bahiddhādhammāpi daṭṭhabbāyeva, bahiddhā abhinivesitvā ajjhattadhammāpi. Tasmā koci bhikkhu ajjhattaṃ saṅkhāresu ñāṇaṃ otāretvā te vavatthapetvā bahiddhā otāreti, bahiddhāpi pariggahetvā puna ajjhattaṃ otāreti, tassa ajjhatta saṅkhāre sammasanakāle maggavuṭṭhānaṃ hoti. Iti ajjhattaṃ abhiniveso ajjhattaṃ vuṭṭhānaṃ nāma. Koci ajjhattaṃ saṅkhāresu ñāṇaṃ otāretvā te vavatthapetvā bahiddhā otāreti, tassa bahiddhā saṅkhāre sammasanakāle maggavuṭṭhānaṃ hoti. Iti ajjhattaṃ abhiniveso bahiddhā vuṭṭhānaṃ nāma. Koci bahiddhā saṅkhāresu ñāṇaṃ otāretvā, te vavatthapetvā ajjhattaṃ otāreti, ajjhattampi pariggahetvā puna bahiddhā otāreti, tassa bahiddhā saṅkhāre sammasanakāle maggavuṭṭhānaṃ hoti. Iti bahiddhā abhiniveso bahiddhā vuṭṭhānaṃ nāma. Koci bahiddhā saṅkhāresu ñāṇaṃ otāretvā te vavatthapetvā ajjhattaṃ otāreti, tassa ajjhattasaṅkhāre sammasanakāle maggavuṭṭhānaṃ hoti. Iti bahiddhā abhiniveso ajjhattaṃ vuṭṭhānaṃ nāma. Tatra thero “ajjhattasaṅkhāre pariggahetvā tesāṃ vavatthānakāle maggavuṭṭhānena arahattaṃ pattosmī”’ti dassento **ajjhattaṃ vimokkhā khvāhaṃ, āvusoti** āha.

Sabbupādānakkhayāti sabbesaṃ catunnampi upādānānaṃ khayena. **Tathā sato viharāmīti** tenākārena satiyā samannāgato viharāmī. **Yathā satāṃ viharantanti** yenākārena maṃ satiyā samannāgataṃ viharantaṃ. **Āsavā nānussavantīti** cakkhuto rūpe savanti āsavanti sandanti pavattantīti evaṃ chahi dvārehi chasu ārammaṇesu savanadhammā kāmāsavādayo āsavā nānussavanti nānuppavaḍḍhanti, yathā me na uppajantīti attho. **Attānañca nāvajānāmīti** attānañca na avajānāmi. Iminā omānapahānaṃ kathitaṃ. Evañhi sati pajānanā pasannā hoti.

Samaṇenāti buddhasamaṇena. **Tesvāhaṃ na kaṅkhāmī**ti tesu ahaṃ “kataro kāmāsavo, kataro bhavāsavo, kataro diṭṭhāsavo, kataro avijjāsavo”ti evaṃ sarūpabhedatopi, “cattāro āsavā”ti evaṃ gaṇanaparicchedatopi na kaṅkhāmi. **Te me pahīnāti na vicikicchāmī**ti te mayhaṃ pahīnāti vicikicchāṃ na uppādemī. Idaṃ bhagavā “evaṃ byākarontenapi tayā subyākataṃ bhaveyya ‘ajjhataṃ vimokkhā khvāhaṃ, āvuso’tiādīni pana te vadantena atippapañco kato”ti dassento āha.

Uṭṭhāyāsanaṃ vihāraṃ pāvisīti paññattavarabuddhāsanaṃ uṭṭahitvā vihāraṃ antomahāgandhakuṭiṃ pāvisi asambhinnāya eva parisāya. Kasmā? Buddhā hi anīṭṭhitāya desanāya asambhinnāya parisāya uṭṭhāyāsanaṃ gandhakuṭiṃ pavisantā puggalathomanatthaṃ vā pavisanti dhammathomanatthaṃ vā. Tattha puggalathomanatthaṃ pavisanto satthā evaṃ cintesi – “imaṃ mayā samkhittena uddesaṃ uddiṭṭhaṃ vitthārena ca avibhattaṃ dhammapaṭiggāhakā bhikkhū uggahetvā ānandaṃ vā kaccāyanaṃ vā upasaṅkamitvā pucchissanti, te mayhaṃ ñāṇena saṃsandetvā kathessanti, tatopi dhammapaṭiggāhakā puna maṃ pucchissanti. Tesamahaṃ ‘sukathitaṃ, bhikkhave, ānandena, sukathitaṃ kaccāyanena, maṃ cepi tumhe etamatthaṃ puccheyyātha, ahampi naṃ evameva byākareyya’nti evaṃ te puggale thomessāmi. Tato tesu gāravaṃ janetvā bhikkhū upasaṅkamissanti, tepi bhikkhū atthe ca dhamme ca niyojessanti, te tehi niyojitā tisso sikkhā paripūretvā dukkhassantaṃ karissanti”ti.

Atha vā panassa evaṃ hoti – “esa mayi pakkante attano ānubhāvaṃ karissati, atha naṃ ahampi tatheva thomessāmi, taṃ mama thomaṇaṃ sutvā gāravaṃ jātā bhikkhū imaṃ upasaṅkamitabbhaṃ, vacanañcassa sotabbhaṃ saddhātabbhaṃ maññissanti, taṃ tesam bhavissati dīgharattaṃ hitāya sukhāyā”ti dhammathomanatthaṃ pavisanto evaṃ cintesi yathā dhammadāyādasutte cintesi. Tatra hissa evaṃ ahosi – “mayi vihāraṃ pavitṭhe āmisadāyādaṃ garahanto dhammadāyādañca thomento imissaṃyeva parisati nisinnā sārīputto dhammaṃ desessati, evaṃ dvinnampi amhākaṃ ekajjhāsayaṃ matiyā desitā ayaṃ desanā aggā ca garukā ca bhavissati pāsāñcchattasadisā”ti.

Idha pana āyasmantaṃ sārīputtaṃ ukkaṃsetvā pakāsetvā ṭhapetukāmo puggalathomanatthaṃ uṭṭhāyāsanaṃ vihāraṃ pāvisi. Idisesu ṭhānesu bhagavā nisinnāsaneveva antarahito cittaṅgatiyā vihāraṃ pavisatīti veditabbo. Yadi hi kāyagatiyā gaccheyya, sabbā parisā bhagavantaṃ parivāretvā gaccheyya, sā ekavāraṃ bhinnā puna dussannipātā bhaveyyāti bhagavā adissamānena kāyena cittaṅgatiyā eva pāvisi.

Evaṃ pavitṭhe pana bhagavati bhagavato adhippāyānurūpameva sīhanādaṃ naditukāmo **tatra kho āyasmā sārīputto acirapakkantassa bhagavato bhikkhū āmantesi. Pubbe appaṭisaṃviditanti** idaṃ nāma pucchissatīti pubbe mayā aviditaṃ aññātaṃ. **Paṭhamaṃ pañhanti**, “sace taṃ, sārīputta, evaṃ puccheyyumaṃ kathaṃ jānatā pana tayā, āvuso sārīputta, kathaṃ passatā aññā byākatā khīṇā jātī”ti imaṃ paṭhamaṃ pañhaṃ. **Dandhāyitattanti** satthu āsayajānanatthaṃ dandhabhāvo asīghatā. **Paṭhamaṃ pañhaṃ anumodīti**, “jāti panāvuso sārīputta, kimnidānā”ti imaṃ dutiyaṃ pañhaṃ pucchanto, “yaṃnidānāvuso, jātī”ti evaṃ vissajjitaṃ paṭhamaṃ pañhaṃ anumodī.

Etadahosīti bhagavatā anumodite nayasatena nayasahassena pañhassa ekaṅgaṇikabhāvena pākāṭībhūtattā etaṃ ahosi. **Divasampāhaṃ bhagavato etamatthaṃ byākareyyanti** sakaladivasampi ahaṃ bhagavato etaṃ paṭiccasamuppādatthaṃ puṭṭho sakaladivasampi aññamaññehi padabyañjanehi byākareyyaṃ. **Yena bhagavā tenupasaṅkamīti** evaṃ kirassa ahosi – “thero uḷārasīhanādaṃ nadati, sukāraṇaṃ etaṃ, dasabalassa naṃ ārocessāmi”ti. Tasmā yena bhagavā tenupasaṅkami.

Sā hi bhikkhu sārīputtassa dhammadhātūti ettha dhammadhātūti paccayākārassa vivaṭabhāvadassanasamatthaṃ sāvakaṃpāramīññaṃ. Sāvakañāñhi sāvakaṃpāramīññaṃ sabbaññūtaññāgatikameva hoti. Yathā buddhānaṃ atītānāgatapaccuppannā dhammā sabbaññūtaññāssa pākāṭā honti, evaṃ therassa sāvakaṃpāramīññaṃ sabbepi sāvakaññāssa gocaradhamme jānātīti. Dutiyaṃ.

3. Nāṇavatthusuttavaṇṇanā

33. Tatiye **taṃ suṇāthā**ti taṃ nāṇavatthudesanaṃ suṇātha. **Nāṇavatthū**ṇi cettha nāṇameva nāṇavatthūti veditabbaṃ. **Jarāmarane nāṇanti**ādīsu catūsu paṭhamamaṃ savanamayañāṇaṃ sammāsanañāṇaṃ paṭivedhañāṇaṃ paccavekkhañāṇanti catubbidhaṃ vaṭṭati, tathā dutiyaṃ. Tatiyaṃ pana ṭhapetvā sammāsanañāṇaṃ tividhameva hoti, tathā catutthaṃ. Lokuttaradhammesu hi sammāsanaṃ nāma natthi. **Jātiyā nāṇanti**ādīsupi eseva nayo. **Iminā dhammenā**ti iminā catusaccadhammena vā maggañāṇadhammena vā.

Diṭṭhenātiādīsu **diṭṭhenā**ti nāṇacakkhunā diṭṭhena. **Viditenā**ti paññāya viditena. **Akālīkenā**ti kiñci kālaṃ anatikkamitvā paṭivedhānantaramyeva phaladāyakena. **Pattenā**ti adhigatena. **Pariyogā**ḥenāti pariyogāhitena paññāya anupaviṭṭhena. **Atītānāgate nayaṃ neti**ti “ye kho kecī”tiādīnā nayena atīte ca anāgate ca nayaṃ neti. Ettha ca na catusaccadhammena vā maggañāṇadhammena vā sakkā atītānāgate nayaṃ netuṃ, catusacce pana maggañāṇena paṭividdhe parato paccavekkhañāṇaṃ nāma hoti. Tena nayaṃ neti veditabbā. **Abbhañña**sūti abhīññaṃsu jāniṃsu. **Seyyathāpāhaṃ, etarahi**ti yathā ahaṃ etarahi catusaccavasena jānāmi. **Anvaye nāṇanti** anuaye nāṇaṃ, dhammañāṇassa anugamane nāṇaṃ, paccavekkhañāṇassetamaṃ nāmaṃ. **Dhamme nāṇanti** maggañāṇaṃ. Imasmiṃ sutte khīṇāsavassa sekkhabhūmi kathitā hoti. Tatiyaṃ.

4. Dutiyāñāṇavatthusuttavaṇṇanā

34. Catutthe **sattasattarī**ti satta ca sattari ca. Byañjanabhāṇakā kira te bhikkhū, bahubyañjanaṃ katvā vuccamāne paṭivijjhitaṃ sakkonti, tasmā tesamaṃ ajjhāsayena idamaṃ suttaṃ vuttaṃ. **Dhammaṭṭhiti**nāṇanti paccayākāre nāṇaṃ. Paccayākāro hi dhammānaṃ pavattiṭṭhitikāraṇattā dhammaṭṭhiti vuccati, ettha nāṇaṃ dhammaṭṭhiti nāṇaṃ, etasseva chabbidhassa nāṇassetamaṃ adhivacanaṃ. **Khayadhammanti** khayagamanasabhāvaṃ. **Vayadhammanti** vayagamanasabhāvaṃ. **Virāgadhammanti** virajjanasabhāvaṃ. **Nirodhadhammanti** nirujjhanasabhāvaṃ. **Sattasattarī**ti ekekasmīṃ satta satta katvā ekādasasu padesu sattasattari. Imasmiṃ sutte vipassanāpaṭivipassanā kathitā. Catutthaṃ.

5. Avijjāpaccayasuttavaṇṇanā

35. Pañcame **samudayo hoti**ti sathā idheva desanaṃ osāpesi. Kimkāraṇāti? Diṭṭhigatikassa okāsādānatthaṃ. Tassañhi parisati upārambhacitto diṭṭhigatiko atthi, so pañhaṃ pucchissati, athassāhaṃ vissajjessāmīti tassa okāsādānatthaṃ desanaṃ osāpesi. **No kallo pañhoti** ayutto pañho. Duppañho esoti attho. Nanu ca “katamaṃ nu kho, bhante, jarāmarāṇa”nti? Idamaṃ supucchitanti. Kiñcāpi supucchitaṃ, yathā pana satasahassagghanike suvaṇṇathāle vaḍḍhitassa subhojanassa matthake āmalakamattepi gūthapiṇḍe ṭhapite sabbaṃ bhojanaṃ dubbhojanaṃ hoti chaḍḍetabbaṃ, evameva “kassa ca panidaṃ jarāmarāṇa”nti? Iminā sattūpaladdhivādapadena gūthapiṇḍena taṃ bhojanaṃ dubbhojanaṃ viya ayampi sabbo duppañhova jātoti.

Brahmacariyavāsoti ariyamaggavāso. **Taṃ jīvaṃ taṃ sarīraṃ**ti yassa hi ayaṃ diṭṭhi, so “jīve ucchijjamāne sarīraṃ ucchijjati, sarīre ucchijjante jīvitaṃ ucchijjati”ti gaṇhāti. Evaṃ gaṇhato sā diṭṭhi “satto ucchijjati”ti gahitattā ucchedadiṭṭhi nāma hoti. Sace pana saṅkhārāva uppajjanti ceva nirujjhanti cāti gaṇheyya, sāsānāvacaṛā sammādiṭṭhi nāma bhavēyya. Ariyamaggo ca nāmeso vaṭṭamaṃ nirodhento vaṭṭamaṃ samucchindanto uppajjati, tadeva taṃ vaṭṭamaṃ ucchedadiṭṭhiyā gahitākārassa sambhave sati vināva maggabhāvanāya nirujjhatīti maggabhāvanā niratthakā hoti. Tena vuttaṃ “brahmacariyavāso na hoti”ti.

Dutiyānaye **aññaṃ jīvaṃ aññaṃ sarīraṃ**ti yassa ayaṃ diṭṭhi, so “sarīraṃ idheva ucchijjati, na jīvitaṃ, jīvitaṃ pana pañjarato sakuṇo viya yathāsukhaṃ gacchatī”ti gaṇhāti. Evaṃ gaṇhato sā diṭṭhi

“imasmā lokā jīvitam paralokam gata”nti gahitattā sassatadiṭṭhi nāma hoti. Ayañca ariyamaggo tebhūmakavaṭṭam vivaṭṭento uppajjati, so ekasaṅkhārepi nicce dhuve sassate sati uppannopi vaṭṭam vivaṭṭetum na sakkotīti maggabhāvanā niratthakā hoti. Tena vuttam “aññaṃ jīvam aññaṃ sarīranti vā bhikkhu diṭṭhiyā sati brahmacariyavāso na hotī”ti.

Visūkāyikānītiādi sabbam micchādiṭṭhivevacanameva. Sā hi sammādiṭṭhiyā vinivijjhanatṭhena visūkamiva attānaṃ āvaraṇato **visūkāyikam**, sammādiṭṭhiṃ ananuvattitvā tassā virodhena pavattanato **visevitam**, kadāci ucchedassa kadāci sassatassa gahaṇato virūpaṃ phanditam **vipphanditanti** vuccati. **Tālāvattukātānīti** tālavatthu viya katānī, puna aviruhaṇatṭhena matthakacchinnatālo viya samūlam tālam uddharitvā tassa patiṭṭhitatṭhānaṃ viya ca katānīti attho. **Anabhāvaṃkatānīti** anuabhāvaṃ katānīti. Pañcamam.

6. Dutiyāvijjāpaccayasuttavaṇṇanā

36. Chaṭṭhe iti vā, bhikkhave, yo vadeyyāti tassam parisati diṭṭhigatiko pañham pucchitukāmo atthi, so pana avisāradadhātuko uṭṭhāya dasabalam pucchitum na sakkoti, tasmā tassa ajjhāsayena sayameva pucchitvā vissajjento satthā evamāha. Chaṭṭham.

7. Natumhasuttavaṇṇanā

37. Sattame na tumhākanti attani hi sati attaniyam nāma hoti. Attāyeva ca natthi, tasmā “na tumhāka”nti āha. **Napi aññesanti** añña nāma paresam attā, tasmim sati aññesam nāma siyā, sopi natthi, tasmā “napi aññesa”nti āha. **Purāṇamidam, bhikkhave, kammanti** nayidam purāṇakammameva, purāṇakammanibbatto panesa kāyo, tasmā paccayavohārena evam vutto. **Abhisāṅkhatanti**ādi kammavohārasseva vasena purimaliṅgasabhāgatāya vuttam, ayam panettha attho – **abhisāṅkhatanti** paccayehi katoti daṭṭhabbo. **Abhisāṅcetayitanti** cetanāvattukko cetanāmūlakoti daṭṭhabbo. **Vedaniyanti** vedaniyavattūti daṭṭhabbo. Sattamam.

8. Cetanāsuttavaṇṇanā

38. Aṭṭhame yañca, bhikkhave, cetetīti yaṃ cetanam ceteti, pavattetīti attho. **Yañca pakappetīti** yaṃ pakappanam pakappeti, pavatteticceva attho. **Yañca anusetīti** yañca anusayam anuseti, pavatteticceva attho. Ettha ca **cetetīti** tebhūmakakusalākusalacetanā gahitā, **pakappetīti** aṭṭhasu lobhasahagatacittesu taṇhādiṭṭhikappā gahitā, **anusetīti** dvādasanam cetanānaṃ sahaajātakotiya ceva upanissayakotiya ca anusayo gahito. **Ārammaṇametam hotīti** (cetanādidhammajāte sati kammaviññāṇassa uppattiyā avāritattā) etam cetanādidhammajātam paccayo hoti. Paccayo hi idha ārammaṇanti adhippetā. **Viññāṇassa ṭhitiyāti** kammaviññāṇassa ṭhitattham. **Ārammaṇe satīti** tasmim paccaye sati. **Patiṭṭhā viññāṇassa hotīti** tassa kammaviññāṇassa patiṭṭhā hoti. **Tasmim patiṭṭhite viññāṇeti** tasmim kammaviññāṇe patiṭṭhite. **Virūḷheti** kammam javāpetvā paṭisandhiākaḍḍhanasamatthatāya nibbattamūle jāte. **Punabbhavābhiniḍḍattīti** punabbhavasāṅkhātā abhiniḍḍatti.

No ce, bhikkhave, cetetīti iminā tebhūmakacetanāya appavattanakkhaṇo vutto. **No ce pakappetīti** iminā taṇhādiṭṭhikappānam appavattanakkhaṇo. **Atha ce anusetīti** iminā tebhūmakavipākesu parittakiriyaṃ rūpeti ettha appahīnakoṭiyā anusayo gahito. **Ārammaṇametam hotīti** anusaye sati kammaviññāṇassa uppattiyā avāritattā etam anusayajātam paccayova hoti.

No ceva cetetītiādisu paṭhamapade tebhūmakakusalākusalacetanā nivattā, dutiyapade aṭṭhasu cittesu taṇhādiṭṭhiyo, tatiyapade vuttappakāresu dhammesu yo appahīnakoṭiyā anusayito anusayo, so nivatto.

Apicettha asammoḥattham ceteti pakappeti anuseti, ceteti na pakappeti anuseti, na ceteti na pakappeti anuseti, na ceteti na pakappeti na anuseti idampi catukkam vedītabbam. Tattha paṭhamanaye dhammaparicchedo dassito. Dutīyanaye **ceteti** tebhūmakakusalacetanā ceva catasso ca akusalacetanā gahitā. **Na pakappeti** aṭṭhasu cītesu taṇhādīṭṭhiyo nivattā. **Anuseti** tebhūmakakusale upanissayakoṭiyā, catūsu akusalacetanāsu saḥajātakotiya ceva upanissayakoṭiyā ca anusayo gahito. Tatiyanaye **na ceteti** tebhūmakakusalākusalam nivattam, **na pakappeti** aṭṭhasu cītesu taṇhādīṭṭhiyo nivattā, **anuseti** sutte āgataṃ vāretvā tebhūmakakusalākusalavipākakiriya rūpesu appahīnakoṭiyā upanissayo gahito. Catutthanayo purimasadisova.

Tadappatiṭṭhite tasmim appatiṭṭhite. **Avirūḥeti** kammaṃ javāpetvā paṭisandhiākaḍḍhanasamatthāya anibbattamūle. Ettha pana kiṃ kathitanti? Arahattamaggassa kiccaṃ, khīṇāsavassa kiccakaraṇantipi navālokuttaradhammātipi vattum vaṭṭati. Ettha ca viññāṇassa ceva āyatim punabbhavassa ca antare eko sandhi, vedanātaṇhānamantare eko, bhavajātīnamantare ekoti. Aṭṭhamam.

9. Dutīyacetanāsuttavaṇṇanā

39. Navame viññāṇāmarūpānaṃ antare eko sandhi, vedanātaṇhānamantare eko, bhavajātīnamantare ekoti. Navamaṃ.

10. Tatiyacetanāsuttavaṇṇanā

40. Dasame **natī** taṇhā. Sā hi piyarūpesu rūpādīsū namanatṭhena ‘‘natī’’ti vuccati. **Āgati gati hotī** āgatimhi gati hoti, āgate paccupaṭṭhite kamme vā kammanimmitte vā gahinimmitte vā paṭisandhivasena viññāṇassa gati hoti. **Cutūpapātoti** evaṃ viññāṇassa āgate paṭisandhivise gatiyā sati ito cavanasaṅkhātā cuti, tatthūpapattisaṅkhāto upapātoti ayaṃ cutūpapāto nāma hoti. Evaṃ imasmim sutte natīya ca āgatigatiyā ca antare ekova sandhi kathitoti. Dasamaṃ.

Kaḷārakhattiyavaggo catuttho.

5. Gahapativaggo

1. Pañcaverabhayasuttavaṇṇanā

41. Gahapativaggassa paṭhame **yatoti** yadā. **Bhayāni verānī** bhayaveracetanāyo. **Sotāpattiyaṅgehī** duvidham sotāpattiyā aṅgaṃ, (sotāpattiyā ca aṅgaṃ,) yaṃ pubbabhāge sotāpattiyaṅgehī saṃvattati, ‘‘sappurisasaṃsevo saddhammassavanaṃ yonisomanasikāro dhammānudhammapaṭipattī’’ti (dī. ni. 3.311) evaṃ āgataṃ, paṭiladdhaguṇassa ca sotāpattim patvā ṭhitassa aṅgaṃ, yaṃ sotāpanassa aṅgāntipi vuccati, buddhe aveccappasādādīnaṃ etaṃ adhivacanaṃ. Idamidha adhippetam. **Ariyoti** niddoso nirupārambho. **Ñāyoti** paṭiccasamuppannaṃ ñatvā ṭhitañānampi paṭiccasamuppādoti. Yathāha – ‘‘ñāyo vuccati paṭiccasamuppādo, ariyopi aṭṭhaṅgiko maggo ñāyo’’ti. **Paññāyāti** aparāparaṃ uppannāya vipassanāpaññāya. **Sudīṭṭho hotī** aparāparaṃ uppajjivā dassanavasena suṭṭhu dīṭṭho.

Khīṇanirayotiādīsū āyatim tattha anuppajjanatāya khīṇo nirayo mayhanti so aham khīṇanirayo. Esa nayo sabbattha. **Sotāpannoti** maggasotaṃ āpanno. **Avinipātadhammoti** na vinipātasabhāvo. **Niyatoti** paṭhamamaggasaṅkhātena sammattaniyāmena niyato. **Sambodhiparāyanoti** uttarimaggattayasaṅkhāto sambodhi paraṃ ayaṃ mayhanti soham sambodhiparāyano, tam sambodhim avassaṃ abhisambujjhanakoti attho.

Pāṇātipātapaccayāti pāṇātipātakammakāraṇā. **Bhayaṃ veranti** atthato ekaṃ. Verañca nāmetam

duvidham hoti bāhiraṃ ajjhantikanti. Ekena hi ekassa pitā mārito hoti, so cintesi “etena kira me pitā mārito, ahampi taṃyeva māressāmī”ti nisitaṃ satthaṃ ādāya carati. Yā tassa abbhantare uppannaveracetanā, idaṃ bāhiraṃ veraṃ nāma. Yā pana itarassa “ayaṃ kira maṃ māressāmīti carati, ahameva naṃ paṭhamataraṃ māressāmī”ti cetanā uppajjati, idaṃ ajjhatikaṃ veraṃ nāma. Idaṃ tāva ubhayampi diṭṭhadhammikameva. Yā pana taṃ niraye uppannaṃ disvā “etaṃ paharissāmī”ti jalitaṃ ayamuggaraṃ gaṇhato nirayapālassa cetanā uppajjati, idamassa samparāyikaṃ bāhiraveraṃ. Yā cassa “ayaṃ niddosaṃ maṃ paharissāmīti āgacchati, ahameva naṃ paṭhamataraṃ paharissāmī”ti cetanā uppajjati, idamassa samparāyikaṃ ajjhattaveraṃ. Yaṃ panetaṃ bāhiraveraṃ, taṃ aṭṭhakathāyaṃ “puggalavera”nti vuttaṃ. **Dukkhaṃ domanassanti** atthato ekameva. Yathā cettha, evaṃ sesapadesupi “iminā mama bhaṇḍaṃ haṭṭhaṃ, mayhaṃ dāresu cārittaṃ āpannaṃ, musā vatvā attho bhaggo, surāmadamattena idaṃ nāma kata”ntiādīnā nayena veruppatti veditabbā. **Aveccappasādenāti** adhigatena acalappasādena. **Ariyakantehīti** pañcahi sīlehi. Tāni hi ariyānaṃ kantāni piyāni. Bhavantaragatāpi ariyā tāni na vijahanti, tasmā “ariyakantāni”ti vuccanti. Sesamettha yaṃ vattabbaṃ siyā, taṃ sabbaṃ visuddhimagge anussatiniddese vuttameva. Paṭhamāṃ.

2. Dutiyapañcaverabhayasuttavaṇṇanā

42. Dutīye bhikkhūnaṃ kathitabhāvamattameva viseso. Dutiyāṃ.

3. Dukkhasuttavaṇṇanā

43. Tatiye **dukkhassāti** vaṭṭadukkhasa. **Samudayanti** dve samudayā khaṇikasamudayo ca paccayasamudayo ca. Paccayasamudayaṃ passantopi bhikkhu khaṇikasamudayaṃ passati, khaṇikasamudayaṃ passantopi paccayasamudayaṃ passati. Atthaṅgamopi accantatthaṅgamo bhedaṭṭhaṅgamoti duvidho. Accantatthaṅgamaṃ passantopi bhedaṭṭhaṅgamaṃ passati, bhedaṭṭhaṅgamaṃ passantopi accantatthaṅgamaṃ passati. **Desessāmīti** idaṃ vaṭṭadukkhasa samudayaatthaṅgamaṃ nibbattibhedaṃ nāma desessāmi, taṃ suṇāthāti attho. **Paṭiccāti** nissayavasena ceva ārammaṇavasena ca paccayaṃ katvā. **Tiṇṇaṃ saṅgati phassoti** tiṇṇaṃ saṅgatiyā phasso. **Ayaṃ kho, bhikkhave, dukkhasa samudayoti** ayaṃ vaṭṭadukkhasa nibbatti nāma. **Atthaṅgamoti** bhedo. Evañhi vaṭṭadukkhaṃ bhinnaṃ hoti appaṭisandhiyaṃ. Tatiyaṃ.

4. Lokasuttavaṇṇanā

44. Catutthe **lokassāti** saṅkhāralokassa. Ayamettha viseso. Catutthaṃ.

5. Nātikasuttavaṇṇanā

45. Pañcame **nātiketi** dvinnaṃ nātakānaṃ gāme. **Giñjakāvasatheti** iṭṭhakāhi kate mahāpāsāde. **Dhammapariyāyanti** dhammakāraṇaṃ. **Upassutīti** upassutiṭṭhānaṃ, yaṃ ṭhānaṃ upagatena sakkā hoti bhagavato saddaṃ sotuṃ, tattha ṭhitoti attho. So kira gandhakuṭtipariveṇasammajjanattaṃ āgato attano kammaṃ pahāya bhagavato dhammaghosaṃ suṇanto aṭṭhāsi. **Addasāti** tadā kira bhagavato āditova paccayākāraṃ manasikarontassa “idaṃ iminā paccayena hoti, idaṃ iminā”ti āvajjato yāva bhavaggā ekaṅgaṇaṃ ahosi, satthā manasikāraṃ pahāya vacasā sajjhāyaṃ karonto yathānusandhinā desanaṃ niṭṭhapetvā, “api nu kho imaṃ dhammapariyāyaṃ koci assosī”ti āvajjento taṃ bhikkhumaddasa. Tena vuttaṃ “addasā kho bhagavā”ti.

Assosi noti assosi nu. Atha vā **assosi noti** amhākaṃ bhāsantānaṃ assosīti. **Uggaṇhāhīti**ādīsu sutvā tuṇhībhūtova paguṇaṃ karonto uggaṇhāti nāma. Padānupadaṃ ghaṭetvā vācāya paricitaṃ karonto pariyāpuṇāti nāma. Ubhayathāpi paguṇaṃ ādhārapattaṃ karonto dhāreti nāma. **Atthasamhitoti** kāraṇanissito. **Ādibrahmacariyakoti** maggabrahmacariyassa ādi patiṭṭhānabhūto. Iti tīsupi imesu suttesu vaṭṭavivaṭṭameva kathitaṃ. Pañcamaṃ.

6. Aññatarabrāhmaṇasuttavaṇṇanā

46. Chaṭṭhe **aññataroti** nāmasasena apākaṭo aññataro brāhmaṇo. Chaṭṭhaṃ.

7. Jāṇussoṇisuttavaṇṇanā

47. Sattame **jāṇussoṇīti** ṭhānantaravasena evaṃladdhanāmo asītikoṭivibhavo mahāpurohito. Sattamaṃ.

8. Lokāyatikasuttavaṇṇanā

48. Aṭṭhame **lokāyatikoti** vitaṇḍasatthe lokāyate kataparicayo. **Jeṭṭhametaṃ lokāyatanti** paṭhamaṃ lokāyataṃ. **Lokāyatanti** ca lokasseva āyataṃ, bālaputhujjanalokassa āyataṃ, mahantaṃ gambhīranti upadhāritabbaṃ parittaṃ bhāvaṃ diṭṭhigataṃ. **Ekattanti** ekasabhāvaṃ, niccasabhāvamevāti pucchati. **Puthuttanti** purimasabhāvena nānāsabhāvaṃ, devamanussādibhāvena paṭhamaṃ hutvā pacchā na hotīti ucchedaṃ sandhāya pucchati. Evamettha ‘‘sabbamatthi, sabbamekatta’’nti imā dvepi sassatadiṭṭhiyo, ‘‘sabbam natthi, sabbam puthutta’’nti imā dve ucchedadiṭṭhiyoti veditabbā. Aṭṭhamaṃ.

9. Ariyasāvakasuttavaṇṇanā

49. Navame **kiṃ nu khoti** saṃsayuppattiākāradassanaṃ. **Samudayatīti** uppajjati. Navamaṃ.

10. Dutiyāriyasāvakasuttavaṇṇanā

50. Dasame dvepi nayā ekato vuttā. Idameva purimena nānattaṃ, sesaṃ tādīsamevāti. Dasamaṃ.

Gahapativaggo pañcamaṃ.

6. Dukkhavaggo

1. Parivīmaṃsanāsuttavaṇṇanā

51. Dukkhavaggassa paṭhame **parivīmaṃsamānoti** upaparikkhamāno. **Jarāmarāṇanti** kasmā jarāmarāṇaṃ ekameva ‘‘anekavidhaṃ nānappakāraka’’nti vatvā gahitanti ce? Tasmim gahite sabbadukkhasa gahitattā. Yathā hi cūḷāya gahite purise so puriso gahitova hoti, evaṃ jarāmarāṇe gahite sabbadukkhaṃ gahitameva hoti. Tasmā ‘‘yaṃ kho idaṃ anekavidhaṃ nānappakārakaṃ dukkhaṃ loke uppajjati’’ti nhatvā ṭhitaṃ purisaṃ viya sabbadukkhaṃ dassetvā taṃ cūḷāya gaṇhanto viya jarāmarāṇaṃ gaṇhi.

Jarāmarāṇanirodhasārūppagāminīti jarāmarāṇanirodhasa sārūppabhāvena nikkilesatāya parisuddhatāya sadisāva hutvā gāminīti attho. **Tathā paṭipanno ca hotīti** yathā taṃ paṭipannoti vuccati, evaṃ paṭipanno hoti. **Anudhammacārīti** nibbānadhammaṃ anugataṃ paṭipattidhammaṃ carati, pūretīti attho. **Dukkhaḅhayāya paṭipannoti** silaṃ ādiṃ katvā jarāmarāṇadukkhasa nirodhatthāya paṭipanno. **Saṅkhāranirodhāyāti** saṅkhāradukkhasa nirodhatthāya. Ettāvatā yāva arahattā desanā kathitā.

Idāni arahattaphalapaccavekkhaṇaṃ satatavihāraṇca dassetvā desanā nivattetabbā siyā, tathā akatvā **avijjāgatoti** idaṃ kasmā gaṇhātīti? Khīṇāsavassa samatikkantavaṭṭadukkhadassanaṃ. Apica puna vaṭṭaṃ ārabhitvā vivaṭṭe kathiyamāne bujjanakasatto cettha atthi, tassa ajjhāsavayavenāpi idaṃ gaṇhātīti veditabbo. Tattha **avijjāgatoti** avijjāya gato upagato samannāgato. **Purisapuggaloti** purisoyeva puggalo. Ubhayenāpi sammutikathaṃ katheti. Buddhānaṃhi sammutikathā paramatthakathāti dve kathā

honti. Tattha “satto naro puriso puggalo tisso nāgo”ti evaṃ pavattā sammutikathā nāma. “Khandhā dhātuyo āyatanāni”ti evaṃ pavattā paramatthakathā nāma. Paramatthaṃ kathentāpi sammutiṃ amuñcitvā kathenti. Te sammutiṃ kathentāpi paramatthaṃ kathentāpi saccameva kathenti. Teneva vuttaṃ –

“Duve saccāni akkhāsi, sambuddho vadataṃ varo;
Sammutiṃ paramatthañca, tatiyaṃ nūpalabbhati;
Saṅketavacanaṃ saccaṃ, lokasammutikāraṇaṃ;
Paramatthavacanaṃ saccaṃ, dhammānaṃ bhūtalakkhaṇa”nti.

Puññaṃ ce saṅkhāranti terasacetanābhedaṃ puññābhisaṅkhāraṃ. **Abhisāṅkharotīti** karoti. **Puññūpagamaṃ hoti viññāṇanti** kammaviññāṇaṃ kammaapuññaṃ upagataṃ sampayuttaṃ hoti, vipākaviññāṇaṃ vipākapuññaṃ. **Apuññaṃ ce saṅkhāranti** dvādasacetanābhedaṃ apuññābhisaṅkhāraṃ abhisāṅkharoti. **Āneñjaṃ ce saṅkhāranti** catucetanābhedaṃ āneñjābhisaṅkhāraṃ. **Āneñjūpagamaṃ hoti viññāṇanti** kammāneñjena kammaviññāṇaṃ, vipākāneñjena vipākaviññāṇaṃ upagataṃ hoti. Ettha ca tividhassa kammābhisaṅkhārassa gahitattā dvādasapadiko paccayākāro gahitova hoti. Ettāvataṃ vaṭṭaṃ dassitaṃ.

Idāni vivaṭṭaṃ dassento **yato kho, bhikkhavi**tiādimāha. Tattha **avijjāti** catūsu saccesu aññāṇaṃ. **Vijjāti** arahattamaggañāṇaṃ. Ettha ca paṭhamameva avijjāya pahīnāya vijjā uppajjati. Yathā pana caturaṅgepi tame rattiṃ padīpujjalena andhakāro pahīyati, evaṃ vijjuppādā avijjāya pahānaṃ veditabbaṃ. **Na kiñci loke upādiyatīti** loke kiñci dhammaṃ na gaṇhāti na parāmasati. **Anupādiyaṃ na paritassatīti** anupādiyanto agaṇhanto neva taṇhāparitassanāya, na bhayaparitassanāya paritassati, na taṇhāyati na bhāyatīti attho. **Paccattaññevāti** sayameva attanāva parinibbāyati, na aññassa ānubhāvena.

So sukhaṃ ce vedananti idaṃ kasmā ārabhi? Khīṇāsavassa paccavekkhaṇañāṇaṃ dassetvā satatavihāraṃ dassetuṃ ārabhi. **Anajjhositāti** taṇhāya gilitvā pariniṭṭhapetvā agahitā. Atha dukkhavedanā kasmā vuttā, kiṃ tampi abhinandanto atthīti? Āma atthi. Sukhaṃ abhinandantoyeva hi dukkhaṃ abhinandati nāma dukkhaṃ patvā sukhaṃ patthanato sukhasa ca vipariṇāmadukkhatoti. **Kāyapariyantikanti** kāyaparicchinnaṃ, yāva pañcadvārakāyo pavattati, tāva pavattaṃ pañcadvārikavedananti attho. **Jīvitapariyantikanti** jīvitaparicchinnaṃ. Yāva jīvitaṃ pavattati, tāva pavattaṃ manodvārikavedananti attho.

Tattha pañcadvārikavedanā pacchā uppajjitvā paṭhamaṃ nirujjhati, manodvārikavedanā paṭhamaṃ uppajjitvā pacchā nirujjhati. Sā hi paṭisandhikkhaṇe vatthurūpasmimyeva patiṭṭhāti. Pañcadvārikā pavatte pañcadvāravasena pavattamānā paṭhamavaye vīsativassakāle rajjanadussanamuyhanavasena adhimattā balavatī hoti, paṇṇāsavassakāle ṭhitā hoti, saṭṭhivassakālato paṭṭhāya parihāyamānā asītinavutivassakāle mandā hoti. Tadā hi sattā “cirattaṃ ekato nisīdimhā nipajjimhā”ti vadante “na sañjānāmā”ti vadanti. Adhimattānīpi rūpādiārammaṇāni “na passāma na suṇāma”, “sugandhaṃ duggandhaṃ vā sādumaṃ asādumaṃ vā thaddhaṃ mudukanti vā na jānāmā”ti vadanti. Iti nesamaṃ pañcadvārikavedanā bhaggā hoti, manodvārikāva pavattati. Sāpi anupubbena parihāyamānā maraṇasamaye hadayakoṭṭimyeva nissāya pavattati. Yāva panesā pavattati, tāva satto jīvatīti vuccati. Yadā nappavattati, tadā mato niruddhoti vuccati.

Svāyamattho vāpiyā dīpetabbo –

Yathā hi puriso pañcaudakamaggasampannaṃ vāpiṃ kareyya, paṭhamaṃ deve vuṭṭhe pañcahi udakamaggehi udakaṃ pavisitvā antovāpiyaṃ āvāṭe pūreyya, punappunaṃ deve vassante udakamagge pūretvā gāvutaḍḍhayanamattaṃ ottharivā udakaṃ tiṭṭheyya tato tato vissandaṃ nāma, atha niddhamanatumbe vivarivā khettesu kamme kariyamāne udakaṃ nikkhamantaṃ, sassapākakāle (udakaṃ nikkhamantaṃ,) udakaṃ parihīnaṃ “macche gaṇhāmā”ti vattabbaṃ āpajjeyya, tato

katipāhena āvātesuyeva udakaṃ saṅṭhaheyya. Yāva pana taṃ āvātesu hoti, tāva “mahāvāpiyaṃ udakaṃ atthī”ti saṅkhaṃ gacchati. Yadā pana tattha chijjati, tadā “vāpiyaṃ udakaṃ natthī”ti vuccati, evaṃsampaḍamidaṃ veditaḅbaṃ.

Paṭhamam deve vassante pañcahi maggehi udae pavisante āvāṭānaṃ pūraṇakālo viya hi paṭhamameva paṭisandhikkhaṇe manodvārikavedanāya vatthurūpe paṭiṭṭhitakālo, punappunaṃ deve vassante pañcannaṃ maggānaṃ pūritakālo viya pavatte pañcadvārikavedanāya pavattikālo, gāvutaḍḍhayaḷojanamattaṃ ajjhottharaṇaṃ viya paṭhamavaye vīsativassakāle rajjanādivasena tassā adhimattabalavabhāvo, yāva vāpito udakaṃ na niggacchati, tāva pūrāya vāpiyā ṭhitakālo viya paññāsavassakāle tassā ṭhitakālo, niddhamanatumbesu vivaṭesu kammante kariyamāne udakassa nikkhamanakālo viya saṭṭhivassakālo paṭṭhāya tassā parihāni, udae bhaṭṭhe udakamaggesu paritodakassa ṭhitakālo viya asītinavutivassakāle pañcadvārikavedanāya mandakālo, āvātesuyeva udakassa paṭiṭṭhānakālo viya hadayavatthukoṭiṃ nissāya manodvārikavedanāya pavattikālo, āvātesu paritpepi udae sati “vāpiyaṃ udakaṃ atthī”ti vattabbakālo viya yāva sā pavattati, tāva “satto jīvati”ti vuccati. Yathā pana āvātesu udae chinne “natthi vāpiyaṃ udaka”nti vuccati, evaṃ manodvārikavedanāya appavattamānāya “satto mato”ti vuccati. Imaṃ vedanaṃ sandhāya vuttaṃ “jīvitapariyantikaṃ vedanaṃ vediyamāno”ti.

Kāyassa bhedaṭi kāyassa bhedena. **Jīvitapariyādānā uddhanti** jīvitakkhayato uddhaṃ. **Idhevāṭi** paṭisandhivasena parato agantvā idheva. **Sītibhāvissantīṭi** pavattivipphandadaratharahitāni sīṭāni appavattanadhammāni bhāvissanti. **Sarīrānīṭi** dhātusarīrāni. **Avassantīṭi** avasiṭṭhāni bhāvissanti.

Kumbhakārapākāṭi kumbhakārassa bhājanapacanaṭṭhānato. **Paṭisiseyyāṭi** ṭhapeyya. **Kapallānīṭi** saha mukhavaṭṭiyā ekābaddhāni kumbhakapallāni. **Avassiseyyunti** tiṭṭheyyuṃ. **Evameva khoti** ettha idaṃ opammasamsandanam – ādittakumbhakārapāko viya hi tayo bhavā daṭṭhabbā, kumbhakāro viya yogāvacarō, pākato kumbhakārabhājanānaṃ nīharaṇadaṇḍako viya arahattamaggañānaṃ, samo bhūmibhāgo viya asaṅkhatam nibbānataṃ, daṇḍakena uṇhakumbham ākaḍḍhitvā same bhūmibhāge kumbhassa ṭhapitakālo viya āraddhavipassakassa rūpasattakam arūpasattakam vipassantassa kammaṭṭhāne ca paḷe vibhūte upaṭṭhahamāne tathārūpaṃ utusappāyādiṃ labhitvā ekāsane nisinnassa vipassanaṃ vaḍḍhetvā aggaphalaṃ arahattam patvā catūhi apāyehi attabhāvaṃ uddharitvā phalasaṃpattivasena asaṅkhate nibbānatale ṭhitakālo daṭṭhabbo. Khīṇāsavo pana uṇhakumbho viya arahattappattadivaseyeva na parinibbāṭi, sāsanaḷpaveṇiṃ pana ghaṭayamāno paṇṇāsasaṭṭhivassāni ṭhatvā carimakacittappattiyā upādiṇṇakakkhandhabhedā anupādisesāya nibbānadhātuyā parinibbāṭi. Athassa kumbhassa viya kapallāni anupādiṇṇakasarīrāneva avassantīṭi. **Sarīrāni avassantīṭi pajānāṭi** idaṃ pana khīṇāsavassa anuyogāropanattham vuttaṃ.

Viññānaṃ paññāyethāṭi paṭisandhiviññānaṃ paññāyetha. **Sādhū sādhūṭi** therānaṃ byākaraṇaṃ sampahaṃsati. **Evametanti** yadetaṃ tividhe abhisāṅkhāre asati paṭisandhiviññānaṃ appaññāṇantiādi, evameva etaṃ. **Adhimuccathāṭi** sannitṭhānasaṅkhātaṃ adhimokkham paṭilabhatha. **Esevanto dukkhassāṭi** ayameva vaṭṭadukkhassa anto ayaṃ paricchedo, yadidaṃ nibbānanti. Paṭhamam.

2. Upādānasuttavaṇṇana

52. Dutīye **upādāniyesūṭi** catunnaṃ upādānānaṃ paccayesu tebhūmakadhammesu. **Assādānupassinoti** assādaṃ anupassantassa. **Tatrāṭi** tasmim aggikkhandhe. **Tadāhāroṭi** taṃpaccayo. **Tadupādānoti** tasseva vevacanaṃ. **Evameva khoti** ettha aggikkhandho viya hi tayo bhavā, tebhūmakavaṭṭantipi etadeva, aggijaggakapuriso viya vaṭṭanissito bālaputhujjano, sukkhatīṇagomayādiḷpakkhipanaṃ viya assādānupassinō puthujjanaṃ sa taṇhādivasena chahi dvārehi kusalākusalakammakaraṇaṃ. Tīṇagomayādisu khīṇesu punappunaṃ tesam pakkhipanena aggikkhandhassa vaḍḍhanaṃ viya bālaputhujjanaṃ uṭṭhāya samuṭṭhāya yathāvuttakammāyūhanena aparāparaṃ vaṭṭadukkhaniḷbattanaṃ.

Na kālena kālaṃ sukkhāni ceva tiṇāni pakkhipeyyāti tañhi koci atthakāmo evaṃ vadeyya – “bho kasmā uṭṭhāya samuṭṭhāya kalāpe bandhitvā sukkhatinaṅkaṭṭhānaṃ pacchiyañca pūretvā sukkhagomayāni pakkhipanto etaṃ aggim jālesi? Api nu te atthi itonidānaṃ kāci vaḍḍhīti? Vamsāgatametaṃ bho amhākaṃ, itonidānaṃ pana me avaḍḍhiyeva, kuto vaḍḍhi? Ahañhi imaṃ aggim jagganto neva nhāyituṃ na bhuñjituṃ na nipajjituṃ labhāmīti. Tena hi bho kiṃ te iminā niratthakena aggijālanena? Ehi tvam etāni ābhatāni tiṇādīni ettha nikkhipa, tāni sayameva jhāyissanti, tvam pana asukasmim ṭhāne sītodakā pokkharāṇi atthi, tattha nhatvā, mālāgandhavilepanehi attānaṃ maṇḍetvā sunivattho supārutova pādūkāhi nagaraṃ pavisitvā pāsādavaramāruyha vātapānaṃ vivaritvā mahāvīthiyaṃ virocamaṇo nisīda ekaggo sukhasamappito hutvā, tattha te nisinnassa tiṇādīnaṃ khayena sayameva ayaṃ aggi appaṇṇattibhāvaṃ gamissatī”ti. So tathā kareyya. Tatheva ca tattha nisinnassa so aggi upādānakkhayena appaṇṇattibhāvaṃ gaccheyya. Idaṃ sandhāyetaṃ “na kālena kāla”ntiādi vuttaṃ.

Evameva khoti ettha pana idaṃ opammasaṃsandanaṃ – cattālīsāya kaṭṭhavāhānaṃ jalamāno mahāaggikkhandho viya hi tebhūmakavaṭṭaṃ daṭṭhabbaṃ, aggijagganapuriso viya vaṭṭasannissitako yogāvācaro, atthakāmo puriso viya sammāsambuddho, tena purisena tassa dinnaovādo viya tathāgatena “ehi tvam, bhikkhu, tebhūmakadhammesu nibbinda, evaṃ vaṭṭadukkhā muccissasi”ti tassa tebhūmakadhammesu kammaṭṭhānassa kathitakālo, tassa purisassa yathānusiṭṭhaṃ paṭipajjitvā pāsāde nisinnakālo viya yogino sugatovādaṃ sampaṭicchitvā suññāgāraṃ pavitṭhassa tebhūmakadhammesu vipassanaṃ paṭṭhapetvā anukkamena yathānurūpaṃ āhārasappāyādiṃ labhitvā, ekāsane nisinnassa aggaphale patiṭṭhitakālo, tassa nhānavilepanādīhi sudhotamaṇḍitakāyattā tasmim nisinnassa ekaggasukhasamappitakālo viya yogino ariyamaggapokkharāṇiyaṃ maggañāṇodakena sunhātasudhotakilesamalassa hirottappasātake nivāsetvā sīlavilepanānulittassa arahattamaṇḍanena atthabhāvaṃ maṇḍetvā vimuttipupphadāmaṃ piḷandhitvā iddhipādapādūkā aruyha nibbānagaram pavisitvā dhammapāsādaṃ aruyha satipaṭṭhānamahāvīthiyaṃ virocamaṇassa nibbānārammaṇaṃ phalasaṃpattim appetvā nisinnakālo. Tassa pana purisassa tasmim nisinnassa tiṇādīnaṃ khayena aggikkhandhassa appaṇṇattigamanakālo viya khīṇāsavassa yāvatāyukaṃ ṭhatvā upādiṇṇakakkhandhabhedena anupādisesāya nibbānadhātuyā parinibbutassa mahāvaṭṭavūpasamo daṭṭhabbo. Dutiyaṃ.

3. Saṃyojanasuttavaṇṇanā

53. Tatiye saṃyojanīyesūti dasannaṃ saṃyojanānaṃ paccayesu. **Jhāyeyyāti** jaleyya. **Telaṃ āsiñceyya vaṭṭim upasaṃhareyyāti** dīpapaṭijagganattaṃ telabhājanañca mahantañca vaṭṭikapālaṃ gahetvā samīpe niccaṃ ṭhitova tele khīṇe telaṃ āsiñceyya, vaṭṭiyā khīṇāya vaṭṭim upasaṃhareyya. Sesamettha saddhim opammasaṃsandanaena purimanayeneva veditabbaṃ. Tatiyaṃ.

4. Dutiyasaṃyojanasuttavaṇṇanā

54. Catutthe upamaṃ paṭhamaṃ katvā pacchā attho vutto. Sesam tādiseva. Catutthaṃ.

5. Mahārukhasuttavaṇṇanā

55. Pañcame **uddhaṃ ojaṃ abhiharantīti** pathavīrasaṅka āporasaṅka upari āropenti. Ojāya āropitattā hatthasatubbedhassa rukkhassa aṅkuraggesu bindubindūni viya hutvā sineho tiṭṭhati. Idaṃ panettha opammasaṃsandanaṃ – mahārukko viya hi tebhūmakavaṭṭaṃ, mūlāni viya āyatanāni, mūlehi ojāya ārohanaṃ viya chahi dvārehi kammārohanaṃ, ojāya abhiruḷhattā mahārukkhassa yāvakkappaṭṭhānaṃ viya vaṭṭanissitabālaputhujjanassa chahi dvārehi kammaṃ āyūhantassa aparāparaṃ vaṭṭassa vaḍḍhanavasena dīgharattaṃ ṭhānaṃ.

Kuddālapītakanti kuddālañceva pacchibhājanañca. **Khaṇḍākhāṇḍikaṃ chindeyyāti**

khuddakamahantāni khaṇḍākhaṇḍāni karonto chindeyya. Idaṃ panettha opammasaṃsandanaṃ – idhāpi hi mahārukkho viya tebhūmakavaṭṭaṃ, rukkhamaṃ nāsetukāmo puriso viya yogāvācaro, kuddālo viya ñāṇaṃ, pacchi viya samādhi, rukkhacchedanapharasu viya ñāṇaṃ, rukkhassa mūle chinnakālo viya yogino ācariyasantike kammaṭṭhānaṃ gahetvā manasikarontassa paññā, khaṇḍākhaṇḍikaṃ chindanakālo viya saṅkhepato catunnaṃ mahābhūtānaṃ manasikāro, phālaṇaṃ viya dvecattālīsāya koṭṭhāsesu vitthāramanasikāro, sakalikaṃ sakalikaṃ karaṇakālo viya upādārūpassa ceva rūpakkhandhārammaṇassa viññāṇassa cāti imesaṃ vasena nāmarūpapariggaho, mūlānaṃ upacchedanaṃ viya tasseva nāmarūpassa paccayapariyesanaṃ, vātātape visosetvā agginā ḍahanakālo viya anupubbena vipassanaṃ vaḍḍhetvā aññataraṃ sappāyaṃ labhitvā kammaṭṭhāne vibhūte upaṭṭhahamāne ekapallaṅke nisinnassa samaṇadhammaṃ karontassa aggaphalappatti, masikaraṇaṃ viya arahattappattadivaseyya aparinibbāyantaṃ yāvatāyukaṃ tīta kālo, mahāvāte opunanaṃ nadiyā pavāhanaṃ viya ca upādiṇṇakakkhandhabhedena anupādisesāya nibbānadhātuyā parinibbutassa vaṭṭavūpasamo veditabbo. Pañcamamaṃ.

6. Dutiyamahārukkhasuttavaṇṇanā

56. Chaṭṭhepi upamaṃ paṭhamaṃ vatvā pacchā attho vutto, idameva nānattaṃ. Chaṭṭhaṃ.

7. Taruṇarukkhasuttavaṇṇanā

57-59. Sattame taruṇoti ajātaphalo. Palimajjeyyāti sodheyya. Paṃsuṃ dadeyyāti thaddhapharusapaṃsuṃ haritvā mudugomayacuṇṇamissaṃ madhurapaṃsuṃ pakkhipeyya. Vuddhinti vuddhiṃ āpajjitvā pupphūpago pupphaṃ, phalūpago phalaṃ gaṇheyya. Idaṃ panettha opammasaṃsandanaṃ – taruṇarukkho viya hi tebhūmakavaṭṭaṃ, rukkhajaggako puriso viya vaṭṭanissito puthujjano, mūlaphalasantānādīni viya tīhi dvārehi kusalākusalakammāyūhanaṃ, rukkhassa vuḍḍhiāpajjanaṃ viya puthujjanaṃ tīhi dvārehi kammaṃ āyūhato aparāparaṃ vaṭṭappavatti. Vivaṭṭaṃ vuttanayeneva veditabbaṃ. Aṭṭhamanavamāni uttānatthāneva. Sattamādīni.

10. Nidānasuttavaṇṇanā

60. Dasame kurūsu viharatīti kurūti evaṃ bahuvacanavasena laddhavohāre janapade viharati. Kammāsadhammaṃ nāma kurūnaṃ nigamoti evaṃnāmako kurūnaṃ nigamo, taṃ gocaraḡāmaṃ katvāti attho. Āyasmāti piyavacanametamaṃ garuvacanametamaṃ. Ānandoti tassa therassa nāmaṃ. Ekamantaṃ nisīdīti cha nisajjadose vivajjento dakkhiṇajāṇumaṇḍalassa abhimukhaṭṭhāne chabbaṇṇānaṃ buddharasmīnaṃ anto pavisitvā pasannaalākhārasaṃ vigāhanto viya suvaṇṇapaṭaṃ pārupanto viya rattakambalavitānamajjhaṃ pavisanto viya dhammabhaṇḍāḡāriko āyasmā ānando nisīdi. Tena vuttaṃ “ekamantaṃ nisīdī”ti.

Kāya pana velāya kena kāraṇena ayamāyasmā bhagavantaṃ upasaṅkamantoti? Sāyanhavelāya paccayākārapañhaṃ pucchanakāraṇena. Taṃ divasaṃ kira ayamāyasmā kulasaṅgahatthāya gharadvāre gharadvāre sahasabhaṇḍikaṃ nikkhipanto viya kammāsadhammaṃ piṇḍāya caritvā piṇḍapātaṭaṭikkanto satthu vattaṃ dassetvā satthari gandhakuṭiṃ pavitṭhe satthāraṃ vanditvā attano divaṭṭhānaṃ gantvā antevāsikesu vattaṃ dassetvā paṭikkantesu divaṭṭhānaṃ paṭisammajjitvā cammakhaṇḍaṃ paññāpetvā udakatumbato udakena hatthapāde sītaṃ katvā pallaṅkaṃ ābhujitvā nisinna sotāpattiphalasamāpattiṃ samāpajjitvā. Atha paricchinnakālavasena samāpattito vuṭṭhāya paccayākāre ñāṇaṃ otāresi. So “avijjāpaccayā saṅkhārā”tiādito paṭṭhāya antaṃ, antato paṭṭhāya ādiṃ, ubhayantato paṭṭhāya majjhaṃ, majjhato paṭṭhāya ubho ante pāpento tikkhattuṃ dvādasapadaṃ paccayākāraṃ sammasi. Tassevaṃ sammasantaṃ paccayākāro vibhūto hutvā uttānakuttānako viya upaṭṭhāsi. Tato cintesi – “ayaṃ paccayākāro sabbabuddhehi gambhīro ceva gambhīrāvabhāso cāti kathito, mayhaṃ kho pana padesañāṇe tītaṃ sāvakaṃ sato uttāno viya vibhūto pākaṭo hutvā upaṭṭhāti, mayhamyeva nu kho esa uttānako viya upaṭṭhāti, udāhu aññesampīti attano upaṭṭhānakāraṇaṃ

satthu āroccasāmi’ ti nisinnatthānato uttāhāya cammakkaṇḍaṃ papphoṭetvā ādāya sāyanhasamaye bhagavantam upasaṅkami. Tena vuttam – “sāyanhavelāyam paccayākārapañham pucchanakāraṇena upasaṅkamanto’ ti.

Yāva gambhīroti ettha **yāvasaddo** pamāṇātikame. Atikkamma pamāṇam gambhīro, atigambhīroti attho. **Gambhīrāvabhāso**ti gambhīrova hutvā avabhāso, dissatīti attho. Ekañhi uttānameva gambhīrāvabhāsam hoti pūtipaṇṇarasavasena kāḷavaṇṇam purāṇaudakaṃ viya. Tañhi jāṇupamāṇampi sataporisaṃ viya dissati. Ekaṃ gambhīraṃ uttānāvabhāsam hoti maṇibhāsam vipasannaudakaṃ viya. Tañhi sataporisaṃpi jāṇupamāṇam viya khāyati. Ekaṃ uttānam uttānāvabhāsam hoti pātīādīsu udakaṃ viya. Ekaṃ gambhīraṃ gambhīrāvabhāsam hoti sinerupādakamahāsamudde udakaṃ viya. Evaṃ udakameva cattāri nāmāni labhati. Paṭiccasamuppāde panetaṃ natthi. Ayañhi gambhīro ca gambhīrāvabhāso cāti ekameva nāmaṃ labhati. Evarūpo samānopi atha ca pana me uttānakuttānako viya khāyati, tadidaṃ acchariyaṃ, bhante, abbhutaṃ, bhanteti evaṃ attano vimhayaṃ pakāsento pañham pucchitvā tuṇhībhūto nisīdi.

Bhagavā tassa vacanaṃ sutvā “ānando bhavaggagahaṇāya hatthaṃ pasārento viya sinerum bhinditvā miñjam nīharitum vāyamamāno viya vinā nāvāya mahāsamuddaṃ taritukāmo viya pathaviṃ parivattetvā pathavojaṃ gahetuṃ vāyamamāno viya buddhavisayaṃ pañham attano uttānuttānanti vadati, handassa gambhīrabhāvaṃ ācikkhāmi’ ti cintetvā **mā hevanti**ādīmāha.

Tattha **mā hevanti ha**-kāro nipātamattaṃ, evaṃ mā bhaṇīti attho. “Mā heva’ nti ca idaṃ vacanaṃ bhagavā āyasmantaṃ ānandaṃ ussādentopi bhaṇāti apasādentopi. Tattha ussādentopīti, ānanda, tvam mahāpañño visadañño, tena te gambhīropi paṭiccasamuppādo uttānako viya khāyati, aññesaṃ panesa uttānakoti na sallakkhetabbo, gambhīroyeva ca so gambhīrāvabhāso ca.

Tattha catasso upamā vadanti – cha māse subhojanarasapuṭṭhassa kira katayogassa mahāmallassa samajjasamaye katamallapāsāṇaparicayassa yuddhabhūmiṃ gacchantassa antarā mallapāsāṇam dassesuṃ. So “kiṃ eta’ nti āha. Mallapāsāṇoti. Āharatha nanti. “Ukkhipitum na sakkomā’ ti vutte sayam gantvā “kuhiṃ imassa bhāriyaṭṭhāna’ nti vatvā dvīhi hatthehi dve pāsāṇe ukkhipitvā kīlāguḷe viya khipitvā agamāsi. Tattha mallassa mallapāsāṇo lahukoti na aññesaṃpi lahukoti vattabbo. Cha māse subhojanarasapuṭṭho mallo viya hi kappasatasahassaṃ abhinīhārasampanno āyasmā ānando. Yathā mallassa mahābalatāya mallapāsāṇo lahuko, evaṃ therassa mahāpaññatāya paṭiccasamuppādo uttānoti vattabbo, so aññesaṃ uttānoti na vattabbo.

Mahāsamudde ca timi nāma mahāmaccho dviyojanasatiko, timiṅgalo tiyojanasatiko, timirapiṅgalo pañcayojanasatiko, ānando timinando ajjhāroho mahātimiti ime cattāro yojanasahassikā. Tattha timirapiṅgaleneva dīpenti. Tassa kira dakkhiṇakaṇṇam cālentassa pañcayojanasate padese udakaṃ calati, tathā vāmakāṇṇam, tathā naṅguṭṭham, tathā sīsam. Dve pana kaṇṇe cāletvā naṅguṭṭhena paharivā sīsam aparāparaṃ katvā kīlītuṃ āradhassa sattaṭṭhajojanasate thāne bhājane pakkhipitvā uddhane āropitaṃ viya udakaṃ pakkuthati. Yojanasatamate padese udakaṃ piṭṭhiṃ chādetum na sakkoti. So evaṃ vadeyya – “ayaṃ mahāsamuddo gambhīroti vadanti, kutassa gambhīratā, mayaṃ piṭṭhimattacchādanampi udakaṃ na labhāmā’ ti. Tattha kāyūpapannassa timirapiṅgalassa mahāsamuddo uttānoti aññesaṃca khuddakamacchānaṃ uttānoti na vattabbo, evameva ñāṇūpapannassa therassa paṭiccasamuppādo uttānoti aññesaṃpi uttānoti na vattabbo. Supaṇṇarājā ca diyaḍḍhajojanasatiko hoti. Tassa dakkhiṇapakko paññāsajojaniko hoti, tathā vāmapakko, piñchavattī ca satṭhiyojanikā, gīvā tiṃsayojanikā, mukhaṃ navayojanam, pādā dvādasajojanikā, tasmim supaṇṇavātaṃ dassetuṃ āradhe sattaṭṭhajojanasataṃ thānaṃ nappahoti. So evaṃ vadeyya – “ayaṃ ākāso anantoti vadanti, kutassa anantatā, mayaṃ pakkhavāṭappattharaṇokāsampi na labhāmā’ ti. Tattha kāyūpapannassa supaṇṇarañño ākāso parittoti aññesaṃca khuddakapakkhīnaṃ parittoti na vattabbo, evameva ñāṇūpapannassa therassa paṭiccasamuppādo uttānoti aññesaṃpi uttānoti na vattabbo.

Rāhu asurindo pana pādantato yāva kesantā yojanānaṃ cattāri sahasāni aṭṭha ca satāni honti. Tassa dvinnaṃ bāhānaṃ antare dvādasayojanasatikāṃ, bahalattena chayojanasatikāṃ, hatthapādatalāni tiyojanasatikāni, tathā mukhaṃ, ekaṅgulipabbaṃ paññāsayojanaṃ, tathā bhamukantaraṃ, nalāṭaṃ tiyojanasatikāṃ, sīsaṃ navayojanasatikāṃ. Tassa mahāsamuddaṃ otiṅṅassa gambhīraṃ udakaṃ jānuppaṃānaṃ hoti. So evaṃ vadeyya – “ayaṃ mahāsamuddo gambhīroti vadanti. Kutassa gambhīratā? Mayaṃ jānuppaṭicchādanamattampi udakaṃ na labhāmā”ti. Tattha kāyūpapannaṃ rāhuno mahāsamuddo uttānoti aññesaṅca uttānoti na vattabbo. Evameva ñāṇūpapannaṃ therassa paṭiccasamuppādo uttānoti aññesampi uttānoti na vattabbo. Etamatthaṃ sandhāya bhagavā **mā hevaṃ, ānanda, mā hevaṃ, ānandāti** āha.

Therassa hi catūhi kāraṇehi gambhīro paṭiccasamuppādo uttānoti upaṭṭhāsi. Katamehi catūhi? Pubbūpanissayasampattiyā titthavāsenā sotāpannaṭāya bahussutabhāvenāti.

Ito kira satasahassime kappe padumuttaro nāma satthā loke uppajji. Tassa haṃsavatī nāma nagaraṃ ahosi, ānando nāma rājā pitā, sumedhā nāma devī mātā, bodhisatto uttarakumāro nāma ahosi. So puttassa jātadivase mahābhinnikkhamaṇaṃ nikkhama pabbajitvā padhānāmanuyutto anukkamaṇa sabbaññutaṃ patvā, “anekajātisaṃsāra”nti udānaṃ udānetvā satthāṃ bodhipallaṅke vītināmetvā “pathaviyaṃ pādaṃ ṭhappessāmī”ti pādaṃ abhinīhari. Atha pathaviṃ bhinditvā mahantaṃ padumaṃ utṭhāsi. Tassa dhurapattāni navutihatthāni, kesaraṃ tiṃsahatthaṃ, kaṇṇikā dvādasahatthā, navaghaṭappamāṇā reṇu ahosi.

Satthā pana ubbedhato aṭṭhapaññāsahattho ahosi, tassa ubhinnaṃ bāhānamantaraṃ aṭṭhārasahatthaṃ, nalāṭaṃ pañcahatthaṃ, hatthapādā ekādasahatthā. Tassa ekādasahatthena pādena dvādasahatthāya kaṇṇikāya akkantaṃmattāya navaghaṭappamāṇā reṇu utṭhāya aṭṭhapaññāsahatthaṃ padesaṃ uggantvā okiṅṅamanosilācuṅṅaṃ viya paccokiṅṅaṃ. Tadupādāya bhagavā “padumuttaro”tveva paññāyittha. Tassa devilo ca sujāto ca dve aggasāvakaṃ ahesuṃ, amitā ca asamā ca dve aggasāvikaṃ, sumano nāma upaṭṭhāko. Padumuttaro bhagavā pitusaṅghaṃ kurumāno bhikkhusatasahassaparivāro haṃsavatīyā rājadhāniyā vasati.

Kaṇṇikāpanassa sumanakumāro nāma. Tassa rājā haṃsavatito vīsayojanasate bhogaṃ adāsi. So kadāci āgantvā pitaraṅca satthāraṅca passati. Athekadivasaṃ paccanto kupito. Sumano rañño sāsanaṃ pesesi. Rājā “tvam mayā, tāta, kasmā ṭhappito”ti paṭipesesi. So core vūpasametvā “upasanto, deva, janapado”ti rañño pesesi. Rājā tuṭṭho “sīghaṃ mama putto āgacchatū”ti āha. Tassa sahasamattā amaccā honti. So tehi saddhiṃ antarāmagge mantesi – “mayhaṃ pitā tuṭṭho sace me varaṃ deti, kiṃ gaṇhāmī”ti? Atha naṃ ekacce “hatthiṃ gaṇhatha, assaṃ gaṇhatha, janapadaṃ gaṇhatha, sattaratanāni gaṇhathā”ti āhaṃsu. Apare “tumhe pathavissarassa puttā, na tumhākaṃ dhanāṃ dullabhaṃ, laddhampi cetam sabbaṃ pahāya gamanīyaṃ, puññaṃeva ekaṃ ādāya gamanīyaṃ, tasmā deve varaṃ dadamāne temāsaṃ padumuttaraṃ bhagavantaṃ upaṭṭhātuṃ varaṃ gaṇhathā”ti. So “tumhe mayhaṃ kalyāṇamittā nāma, mametaṃ cittaṃ natthi, tumhehi pana uppāditaṃ, evaṃ karissāmī”ti, gantvā pitaraṃ vanditvā pitarā āliṅgetvā, matthake cumbitvā “varaṃ te, putta, demī”ti vutte “icchāmaṃ, mahārāja, bhagavantaṃ temāsaṃ catūhi paccayehi upaṭṭhahanto jīvitaṃ avañjhaṃ kātuṃ, idaṃ me varaṃ dehi”ti āha. Na sakkā, tāta, aññaṃ varehīti. Deva, khattiyānaṃ nāma dvekathā natthi, etameva me dehi, na mamañña atthoti. Tāta, buddhānaṃ nāma cittaṃ dujjānaṃ, sace bhagavā na icchissati, mayā dinnampi kiṃ bhavissatīti? “Sādhu, deva, ahaṃ bhagavato cittaṃ jānissāmī”ti vihāraṃ gato.

Tena ca samayena bhattakiccaṃ niṭṭhāpetvā bhagavā gandhakuṭiṃ pavitṭho hoti. So maṇḍalamāle sannisinnānaṃ bhikkhūnaṃ santikaṃ agamāsi. Te naṃ āhaṃsu – “rājaputta kasmā āgatosī”ti? Bhagavantaṃ dassanāya, dassetha me bhagavantanti. “Na mayaṃ, rājaputta, icchicchitakkhaṇe satthāraṃ daṭṭhuṃ labhāmā”ti. Ko pana, bhante, labhatīti? Sumanatthero nāma rājaputtatī. So “kuhiṃ bhante thero”ti? Therassa nisinnaṭṭhānaṃ pucchitvā gantvā vanditvā – “icchāmaṃ, bhante, bhagavantaṃ passituṃ, dassetha me bhagavanta”nti āha. Thero “ehi, rājaputtā”ti taṃ gahetvā

gandhakuṭipariveṇe ṭhapetvā gandhakuṭiṃ āruhi. Atha naṃ bhagavā “sumana, kasmā āgatosī”ti āha. Rājaputto, bhante, bhagavantam dassanāya āgatoti. Tena hi bhikkhu āsanam paññapehīti. Thero āsanam paññapesi. Nisīdi bhagavā paññatte āsane. Rājaputto bhagavantam vanditvā paṭisanthāram akāsi, “kadā āgatosi rājaputtā”ti? Bhante, tumhesu gandhakuṭiṃ pavitṭhesu, bhikkhū pana “na mayam icchiticchitakkhaṇe bhagavantam daṭṭhum labhāmā”ti maṃ therassa santikam pāhesum, thero pana ekavacaneneva dassesi, thero, bhante, tumhākam sāsane vallabho maññeti. Āma, rājakumāra, vallabho esa bhikkhu mayham sāsaneti. Bhante, buddhānam sāsane kiṃ katvā vallabho hotīti? Dānam datvā sīlam samādiyitvā uposathakammam katvā, kumārāti. Bhagavā ahampi thero viya buddhasāsane vallabho hotukāmo, temāsam me vassāvāsam adhvāsethāti. Bhagavā, “atthi nu kho gatena attho”ti oloketvā “atthī”ti disvā “suññāgāre kho, rājakumāra, tathāgatā abhīramantī”ti āha. Kumāro “aññātam bhagavā, aññātam sugatā”ti vatvā – “aham, bhante, purimataram gantvā vihāram kāremi, mayā pesite bhikkhusatasahassena saddhiṃ āgacchathā”ti paṭiññam gahetvā pitu santikam gantvā, “dinnā me, deva, bhagavatā paṭiññā, mayā pahite tumhe bhagavantam peseyyāthā”ti pitaram vanditvā nikkhamitvā yojane yojane vihāram kāretvā vīsayojanasatam addhānam gato. Gantvā attano nagare vihāraṭṭhānam vicinanto sobhanassa nāma kuṭumbikassa uyyānam disvā satasahassena kiṇitvā satasahassam vissajjetvā vihāram kāresi. Tattha bhagavato gandhakuṭiṃ, sesabhikkhūnañca rattiṭṭhānavāṭṭhānatthāya kuṭiṇamaṇḍape kārapetvā pākāraparikkhepaṃ dvārakoṭṭhakañca niṭṭhāpetvā pitu santikam pesesi “niṭṭhitam mayham kiccam, satthāram paṇiṇathā”ti.

Rājā bhagavantam bhojetvā “bhagavā sumanassa kiccam niṭṭhitam, tumhākam āgamanam paccāsīsatī”ti. Bhagavā satasahassabhikkhuparivāro yojane yojane vihāresu vasamāno agamāsi. Kumāro “satthā āgacchatī”ti sutvā yojanam paccuggantvā gandhamālādīhi pūjayamāno vihāram pavesetvā –

“Satasahassena me kītam, satasahassena māpītam;
Sobhanam nāma uyyānam paṭiggaṇha, mahāmuni”ti. –

Vihāram niyyātesi. So vassūpanāyikadivase dānam datvā attano puttadāre ca amacce ca pakkosāpetvā āha – “satthā amhākam santikam dūrato āgato, buddhā ca nāma dhammagarunova, nāmisagarukā. Tasmā aham imaṃ temāsam dve sātāke nivāsetvā dasa sīlāni samādiyitvā idheva vasissāmi, tumhe khīṇāsavasatasahassassa imināva nīhārena temāsam dānam dadeyyāthā”ti.

So sumanatherassa vasanaṭṭhānasabhāgeyeva ṭhāne vasanto yaṃ thero bhagavato vattam karoti, tam sabbam disvā, “imasmim ṭhāne ekantavallabho esa thero, etasseva ṭhānantaram patthetum vaṭṭatī”ti cintetvā, upakaṭṭhāya pavāraṇāya gāmam pavisitvā sattāham mahādānam datvā sattame divase bhikkhūsatasahassassa pādāmūle ticīvaram ṭhapetvā bhagavantam vanditvā, “bhante, yadetam mayā magge yojanantarikavihārakārāpanato paṭṭhāya puññam kataṃ, tam neva sakkasampattim, na mārabrahmasampattim patthayantena, buddhassa pana upaṭṭhākabhāvam patthentena kataṃ. Tasmā ahampi bhagavā anāgate sumanathero viya ekassa buddhassa upaṭṭhāko homī”ti pañcapaṭiṭṭhitena patitvā vanditvā nipanno. Bhagavā “mahantam kulaputtassa cittam, ijjhissati nu kho, no”ti olokeno, “anāgate ito satasahassime kappe gotamo nāma buddho uppajjissati, tasseva upaṭṭhāko bhavissatī”ti ṇatvā –

“Icchitam patthitam tuyham, sabbameva samijjhatu;
Sabbe pūrentu sankappā, cando pannaraso yathā”ti. –

Āha. Kumāro sutvā “buddhā nāma advejjhakathā hontī”ti dutiyadivaseyeva tassa bhagavato pattacīvaram gahetvā piṭṭhito piṭṭhito gacchanto viya ahosi. So tasmim buddhuppāde vassasatasahassam dānam datvā sagge nibbattitvā kassapabuddhakālepi piṇḍāya carato therassa pattaggahaṇattham uttarisātakam datvā pūjam akāsi. Puna sagge nibbattitvā tato cuto bārāṇasirājā hutvā aṭṭhannam paccekabuddhānam paṇṇasālāyo kāretvā maṇiādhārake upaṭṭhapetvā catūhi paccayehi dasavassasahassāni upaṭṭhānam akāsi. Etāni pākāṭaṭṭhānāni.

Kappasatasahassam pana dānam dadamānova amhākam bodhisattena saddhiṃ tusitapure nibbattivā tato cuto amitodanasakkassa gehe paṭisandhiṃ gahetvā anupubbena katābhinnikkhamano sammāsambodhiṃ patvā paṭhamagamanena kapilavatthum āgantvā tato nikkhamante bhagavati bhagavato parivārattham rājakumāresu pabbajantesu bhaddiyādīhi saddhiṃ nikkhamitvā bhagavato santike pabbajitvā nacirasseva āyasmato puṇṇassa mantāniputtassa santike dhammakatham sutvā sotāpattiphale paṭiṭṭhahi. Evamesa āyasmā pubbūpanissayasampanno, tassimāya pubbūpanissayasampattiyā gambhīropi paṭiccasamuppādo uttānako viya upaṭṭhāsi.

Titthavāsoti pana garūnam santike uggahaṇasavanaparipucchanadhāraṇāni vuccanti. So therassa ativiya parisuddho. Tenāpissāyam gambhīropi uttānako viya upaṭṭhāsi. Sotāpannānañca nāma paccayākāro uttānako hutvā upaṭṭhāti, ayañca āyasmā sotāpanno. Bahussutānam catuhatthe ovarake padīpe jalamāne mañcapīṭham viya nāmarūpararicchedo pākaṭo hoti, ayañca āyasmā bahussutānam aggo. Iti **bāhusaccabhāvenapissa** gambhīropi paccayākāro uttānako viya upaṭṭhāsi. Paṭiccasamuppādo catūhi gambhīratāhi gambhīro. Sā panassa gambhīratā visuddhimagge vitthāritāva. Sā sabbāpi therassa uttānakā viya upaṭṭhāsi. Tena bhagavā āyasmantaṃ ānandaṃ ussādentō **mā hevanti**ādīmāha. Ayañhettha adhippāyo – ānanda, tvaṃ mahāpañño visadaññaṇo, tena te gambhīropi paṭiccasamuppādo uttānako viya khāyati. Tasmā “mayhameva nu kho esa uttānako viya hutvā upaṭṭhāti, udāhu aññesampi”ti mā evaṃ avaca.

Yaṃ pana vuttam “apasādentō”ti, tatthāyamadhippāyo – ānanda, “atha ca pana me uttānakuttānako viya khāyatī”ti mā hevaṃ avaca. Yadi hi te esa uttānakuttānako viya khāyati, kasmā tvaṃ attano dhammatāya sotāpanno nāhosi, mayā dinnanaye ṭhatvā sotāpattimaggam paṭivijjhi? Ānanda, idaṃ nibbānameva gambhīram, paccayākāro pana uttānako jāto, atha kasmā oḷārikam kāmarāgasamyojanam paṭighasamyojanam oḷārikam kāmarāgānusayam paṭighānusayanti ime cattāro kilese samugghātetvā sakadāgāmiphalam na sacchikarosi, teyeva aṇusahagate cattāro kilese samugghātetvā anāgāmiphalam na sacchikarosi, rūparāgādīni pañca samyojanāni, mānānusayam bhavarāgānusayam avijjānusayanti ime aṭṭha kilese samugghātetvā arahattam na sacchikarosi? Kasmā vā satasahassakappādhikam ekam asaṅkhyeyyam pūritapāramino sārīputtamoggallānā viya sāvakaṇāpāramiññaṇam na paṭivijjhasi, satasahassakappādhikāni dve asaṅkhyeyyāni pūritapāramino paccekabuddhā viya ca paccekabodhiññaṇam na paṭivijjhasi? Yadi vā te sabbathāva esa uttānako hutvā upaṭṭhāsi. Atha kasmā satasahassakappādhikāni cattāri aṭṭha soḷasa vā asaṅkhyeyyāni pūritapāramino buddhā viya sabbaññutaññaṇam na sacchikarosi? Kiṃ anaththikosi etehi visesādhigamehi? Passa yāva ca te aparaddham, tvaṃ nāma sāvakaṇāpadesaññaṇe ṭhito atigambhīram paccayākāram “uttānako viya me upaṭṭhāti”ti vadasi. Tassa te idaṃ vacanam buddhānam kathāya paccanīkam hoti. Tādisena nāma bhikkhunā buddhānam kathāya paccanīkam kathetabbanti na yuttametam. Nanu mayham, ānanda, imam paccayākāram paṭivijjhitum vāyamantasseva kappasatasahassādhikāni cattāri asaṅkhyeyyāni atikkantāni. Paccayākārapaṭivijjhanatthāya ca pana me adinnadānam nāma natthi, apūritapāramī nāma natthi. “Ajja paccayākāram paṭivijjhissāmī”ti pana me nirussāham viya mārabalam vidhamantassa ayaṃ mahāpathavī dvaṅgulamattampi nākampi, tathā paṭhamayāme pubbenivāsam, majjhimayāme dibbacakkhum sampādentassa. Pacchimayāme pana me balavapaccūsasamaye, “avijjā saṅkhārānam navahi ākārehi paccayo hotī”ti diṭṭhamattheyeva dasasahasilokadhātu ayadaṇḍena ākoṭitakamsathālo viya viravasataṃ viravasahassam muñcamānā vātāhate paduminipaṇṇe udakabindu viya pakampittha. Evaṃ gambhīro cāyam, ānanda, paṭiccasamuppādo gambhīrāvabhāso ca, etassa, ānanda, dhammassa ananubodhā...pe... nātivattatīti.

Etassa dhammassāti etassa paccayadhammassa. **Ananubodhāti** nātapariññāvasena ananubujjhanā. **Appaṭivedhāti** tīraṇappahānapariññāvasena appaṭivijjhanā. **Tantākulakajātāti** tantam viya ākulajātā. Yathā nāma dunnikkhittam mūsikacchinnaṃ pesakārānam tantam tahiṃ tahiṃ ākulam hoti, “idaṃ aggam, idaṃ mūla”nti aggena vā aggam, mūlena vā mūlam samānetum dukkaram hoti. Evameva sattā imasmiṃ paccayākāre khalitā ākulā byākulā honti, na sakkonti paccayākāram ujum katum. Tattha tantam paccattapurisakāre ṭhatvā sakkāpi bhavēyya ujum katum, ṭhapetvā pana dve bodhisatte añño satto

attano dhammatāya paccayākāraṃ ujum kātuṃ samattho nāma natthi. Yathā pana ākulaṃ tantam kañjiyaṃ datvā kocchena pahaṭam tattha tattha guḷakajātam hoti gaṇṭhibaddham, evamime sattā paccayesu pakkhalitvā paccaye ujum kātuṃ asakkontā dvāsaṭṭhiditṭhigatavasena guḷakajātā honti gaṇṭhibaddhā. Ye hi keci ditṭhiyo sannissitā, sabbe te paccayaṃ ujum kātuṃ asakkontāyeva.

Kulāgaṇṭhikajātāti kulāgaṇṭhikaṃ vuccati pesakārakañjiyasuttam. Kulā nāma sakuṇikā, tassā kulāvakotipi eke. Yathā hi tadubhayampi ākulaṃ aggena vā aggaṃ, mūlena vā mūlaṃ samānetum dukkaranti purimanayeneva yojetabbaṃ.

Muñjapabbajabhūtāti muñjatiṇaṃ viya pabbajatiṇaṃ viya ca bhūtā tādisā jātā. Yathā hi tāni tiṇāni koṭṭetvā katarajju jiṇṇakāle katthaci patitaṃ gahetvā tesam tiṇānaṃ “idaṃ aggaṃ, idaṃ mūla”nti aggena vā aggaṃ, mūlena vā mūlaṃ samānetum dukkaraṃ, tampi paccattapurisakāre ṭhatvā sakkā bhaveyya ujum kātuṃ, ṭhapetvā pana dve bodhisatte añño satto attano dhammatāya paccayākāraṃ ujum kātuṃ samattho nāma natthi, evamayaṃ pajā paccayaṃ ujum kātuṃ asakkontī ditṭhigatavasena gaṇṭhikajātā hutvā apāyaṃ duggatiṃ vinipātaṃ saṃsāraṃ nātivattati.

Tattha **apāyoti** nirayatiracchānayanopettivisayaasurakāyā. Sabbepi hi te vaḍḍhisankhātassa ayassa abhāvato “apāyo”ti vuccati, tathā dukkhassa gatibhāvato **duggati**, sukhasamussayato vinipatitattā **vinipāto**. Itaro pana –

“Khandhānañca paṭipāṭi, dhātuāyatanāna ca;
Abbhocchinnaṃ vattamānā, **saṃsāroti** pavuccati”.

Taṃ sabbampi nātivattati nātikkamati, atha kho cutito paṭisandhiṃ, paṭisandhito cutinti evaṃ punappunaṃ cutipaṭisandhiyo gaṇhamānā tisu bhavesu catūsu yonīsu pañcasu gaṭīsu sattasu viññāṇaṭṭhitīsu navasu sattāvāsesu mahāsamudde vātakkhittā nāvā viya yante yuttagoṇo viya ca paribbhamatiyeva. Iti sabbametam bhagavā āyasmantaṃ ānandaṃ apasādento āha. Sesamettha vuttanayamevāti. Dasamaṃ.

Dukkhavaggo chaṭṭho.

7. Mahāvaggo

1. Assutavāsuttavaṇṇanā

61. Mahāvaggassa paṭhame **assutavāti** khandhadhātuāyatanapaccayākārasatipaṭṭhānādīsu uggahaparipucchāvinicchayaharito. **Puthujjanoti** puthūnaṃ nānappakārānaṃ kilesādīnaṃ janānādikāraṇehi puthujjano. Vuttañhetam – “puthu kilese janentīti puthujjanā”ti sabbam vitthāretabbaṃ. Apica puthūnaṃ gaṇanapathamātītānaṃ ariyadhammaparammukhānaṃ nīcadhammasamācārānaṃ janānaṃ antogadhattāpi puthujjano, puthu vā ayaṃ visumyeva saṅkham gato, visamsaṭṭho sīlasutādiguṇayuttehi ariyehi janoti puthujjano. Evametehi “assutavā puthujjano”ti dvīhipi padehi ye te –

“Dve puthujjanā vuttā, buddhenādiccabandhunā;
Andho puthujjano eko, kalyāṇeko puthujjano”ti. (mahāni. 94); –

Dve puthujjanā vuttā, tesu andhaputhujjano gahito. **Imasminti** paccuppannapaccakkhākāyaṃ dasseti. **Cātumahābhūtikasminti** catumahābhūtakāye catumahābhūtehi nibbatte catumahābhūtamayeti attho. **Nibbindeyyāti** ukkaṇṭheyya. **Virajjeyyāti** na rajjeyya. **Vimucceyyāti** mucchitukāmo bhaveyya. **Ācayoti** vuḍḍhi. **Apacayoti** parihāni. **Ādānanti** nibbatti. **Nikkhepananti** bhedo.

Tasmāti yasmā ime cattāro vuḍḍhihāninibbattibhedā paññāyanti, tasmā taṃkāraṇāti attho. Iti bhagavā cātumahābhūti ke kāye rūpaṃ pariggahetuṃ ayuttarūpaṃ katvā arūpaṃ pariggahetuṃ yuttarūpaṃ karoti. Kasmā? Tesañhi bhikkhūnaṃ rūpasmiṃ gāho balavā adhimatto, tena tesam rūpe gāhassa pariggahetabbarūpaṃ dassetvā nikkadḍhanto arūpe patiṭṭhāpanatthaṃ evamāha.

Cittantiādi sabbaṃ manāyatanasseva nāmaṃ. Tañhi cittavattutāya cittaḡocaratāya sampayuttadhammacittatāya ca **cittaṃ**, mananaṭṭhena **mano**, vijānanaṭṭhena **viññāṇanti** vuccati. **Nālanti** na samattho. **Ajjhositanti** tañhāya gilitvā pariniṭṭhapetvā gahitaṃ. **Mamāyitanti** tañhāmamattena mama idanti gahitaṃ. **Parāmaṭṭhanti** diṭṭhiyā parāmasitvā gahitaṃ. **Etaṃ mamāti** tañhāgāho, tena aṭṭhasatatañhāvicaritaṃ gahitaṃ hoti. **Esohamasmāti** mānagāho, tena nava mānā gahitā honti. **Eso me attāti** diṭṭhiḡāho, tena dvāsaṭṭhi diṭṭhiyo gahitā honti. **Tasmāti** yasmā evaṃ dīgharattaṃ gahitaṃ, tasmā nibbindituṃ na samattho.

Varam, bhikkhaveti idaṃ kasmā āha? Paṭhamañhi tena rūpaṃ pariggahetuṃ ayuttarūpaṃ kataṃ, arūpaṃ yuttarūpaṃ, atha “tesaṃ bhikkhūnaṃ rūpato gāho nikkhamitvā arūpaṃ gato” ti ñatvā taṃ nikkadḍhituṃ imaṃ desanaṃ ārabhi. Tattha **attato upagaccheyyāti** attāti gañheyya. **Bhiyyopīti** vassasatato uddhampi. Kasmā pana bhagavā evamāha? Kiṃ atirekavassasataṃ tiṭṭhamānaṃ rūpaṃ nāma atthi? Nanu paṭhamavaye pavattaṃ rūpaṃ majjhimavayaṃ na pāpuṇāti, majjhimavaye pavattaṃ pacchimavayaṃ, purebhatte pavattaṃ pacchābhattaṃ, pacchābhatte pavattaṃ paṭhamayāmaṃ, paṭhamayāme pavattaṃ majjhimayāmaṃ, majjhimayāme pavattaṃ pacchimayāmaṃ na pāpuṇāti? Tathā gamane pavattaṃ ṭhānaṃ, ṭhāne pavattaṃ nisajjaṃ, nisajjāya pavattaṃ sayanaṃ na pāpuṇāti. Ekairiyāpathepi pādassa uddharaṇe pavattaṃ atiharaṇaṃ, atiharaṇe pavattaṃ vītiaraṇaṃ, vītiaraṇe pavattaṃ vossajjanaṃ, vossajjane pavattaṃ sannikkhepanaṃ, sannikkhepane pavattaṃ sannirujjanaṃ na pāpuṇāti, tattha tattheva odhi odhi pabbaṃ pabbaṃ hutvā tattakapāle pakkhittatīlā viya paṭapaṭāyantaṃ saṅkhārā bhijjantīti? Saccametam. Yathā pana padīpassa jalato jātā taṃ taṃ vaṭṭippadesaṃ anatikkamitvā tattha tattheva bhijjati, atha ca pana pavenīsambandhavasena sabbarattim jalito padīpoti vuccati, evamidhāpi pavenīvasena ayampi kāyo evaṃ ciraṭṭhitiko viya katvā dassito.

Rattiyā ca divasassa cāti rattimhi ca divase ca. Bhummatthe hetam sāmivacanaṃ. **Aññadeva uppajjati, aññaṃ nirujjhatīti** yaṃ rattim uppajjati ca nirujjhati ca, tato aññadeva divā uppajjati ca nirujjhati cāti attho. Aññaṃ uppajjati, anuppannameva aññaṃ nirujjhatīti evaṃ pana attho na gahetabbo. “Rattiyā ca divasassa cā” ti idaṃ purīmapaveṇito parittakaṃ pavenīṃ gahetvā pavenīvaseneva vuttaṃ, ekarattim pana ekadivasam vā ekameva cittaṃ ṭhātuṃ samatthaṃ nāma natthi. Ekasmiñhi accharākkhaṇe anekāni cittakoṭṭisatasahassāni uppajjanti. Vuttampi cetam milindapañhe –

“Vāhasataṃ kho, mahārāja, vīhīnaṃ, aḍḍhacūlaṇca vāhā, vīhisattambaṇāni, dve ca tumbā, ekaccharākkhaṇe pavattassa cittassa ettakā vīhī lakkhaṃ ṭhapīyamānā parikkhayaṃ pariyādānaṃ gaccheyyu’nti.

Pavaneti mahāvane. **Taṃ muñcivā aññaṃ gañhāti, taṃ muñcivā aññaṃ gañhātīti** iminā na so gañhitabbasākhaṃ alabhivā bhūmiṃ otarati. Atha kho tasmim mahāvane vicarantaṃ taṃ taṃ sākhaṃ gañhantoyeva caratīti ayamattho dassito.

Evameva khoti ettha idaṃ opammaṣandanaṃ – araññamahāvanaṃ viya hi ārammaṇavanaṃ veditabbaṃ. Tasmim vane vicaraṇamakkaṭo viya ārammaṇavane uppajjanakacittaṃ. Sākhāgahaṇaṃ viya ārammaṇe lubbhaṇaṃ. Yathā so araññe vicarantaṃ makkaṭo taṃ taṃ sākhaṃ pahāya taṃ taṃ sākhaṃ gañhāti, evamidam ārammaṇavane vicarantaṃ cittampi kadāci rūpārammaṇaṃ gahetvā uppajjati, kadāci saddādīsū aññataraṃ, kadāci atītaṃ, kadāci anāgataṃ vā paccuppannaṃ vā, tathā kadāci ajjhattaṃ, kadāci bāhiraṃ. Yathā ca so araññe vicarantaṃ makkaṭo sākhaṃ alabhivā oruyha bhūmiyaṃ nisinnoti na vattabbo, ekaṃ pana paññasākhaṃ gahetvāva nisīdati, evameva ārammaṇavane vicarantaṃ cittampi ekaṃ olubbhārammaṇaṃ alabhivā uppannanti na vattabbaṃ, ekajātiyaṃ pana

ārammaṇaṃ gahetvāva uppajjatīti veditabbaṃ. Ettāvata ca pana bhagavatā rūpato nīharitvā arūpe gāho patiṭṭhāpito, arūpato nīharitvā rūpe.

Idāni taṃ ubhayato nikkadḍhitukāmo **tatra, bhikkhave, sutavā ariyasāvako**ti desanaṃ ārabhi. Ayaṃ panattho āsīvisadaṭṭhūpamāya dīpetabbo – eko kira puriso āsīvisena daṭṭho, athassa viṣaṃ harissāmīti cheko bhisakko āgantvā vamaṇaṃ kāretvā heṭṭhā garuḷo, upari nāgoti mantaṃ parivattetvā viṣaṃ upari āropesi. So yāva akkhippadesā āruḷhabhāvaṃ ñatvā “ito paraṃ abhiruhitūṃ na dassāmi, daṭṭhaṭṭhāneyeva ṭhapessāmi”ti upari garuḷo, heṭṭhā nāgoti mantaṃ parivattetvā kaṇṇe dhumetvā daṇḍakena paharivā viṣaṃ otāretvā daṭṭhaṭṭhāneyeva ṭhapesi. Tatrassa ṭhitabhāvaṃ ñatvā agadalepena viṣaṃ nimmathetvā nhāpetvā “sukhī hohī”ti vatvā yena kāmaṃ pakkāmi.

Tattha āsīvisena daṭṭhassa kāye visapatiṭṭhānaṃ viya imesaṃ bhikkhūnaṃ rūpe adhimattagāhakālo, cheko bhisakko viya tathāgato, mantāṃ parivattetvā upari viṣassa āropitakālo viya tathāgatena tesāṃ bhikkhūnaṃ rūpato gāhaṃ nīharitvā arūpe patiṭṭhāpitakālo, yāva akkhippadesā āruḷhavisassa upari abhiruhitūṃ adavā puna mantabalena otāretvā daṭṭhaṭṭhāneyeva ṭhapanāṃ viya satthārā tesāṃ bhikkhūnaṃ arūpato gāhaṃ nīharitvā rūpe patiṭṭhāpitakālo. Daṭṭhaṭṭhāne ṭhitassa viṣassa agadalepena nimmathanaṃ viya ubhayato gāhaṃ nīharaṇatthāya imissā desanāya āradhakālo veditabbo. Tattha **nibbindaṃ virajjatīti** iminā maggo kathito, **virāgā vimuccatīti** phalaṃ, **vimuttasminti**ādinā paccavekkhaṇā. Paṭhamāṃ.

2. Dutiyassutavāsuttavaṇṇanā

62. Dutīye **sukhavedaniyanti** sukhavedanāya paccayaṃ. **Phassanti** cakkhusamphassādiṃ. Nanu ca cakkhusamphasso sukhavedanāya paccayo na hotīti? Sahajātapaccayena na hoti, upanissayapaccayena pana javanavedanāya hoti, taṃ sandhāyetaṃ vuttaṃ. Sotasamphassādīsūpi eseva nayo. **Tajjanti** tajjātikāṃ tassārūpaṃ, tassa phassassa anurūpanti attho. **Dukkhavedaniyanti**ādi vuttanayeneva veditabbaṃ. **saṅghaṭṭanasamodhānāti** saṅghaṭṭanena ceva samodhānena ca, saṅghaṭṭanasampiṇḍanenāti attho. **Usmāti** uṇhākāro. **Tejo abhinibbattatīti** aggicuṇṇo nikkhamatīti na gahetabbaṃ, usmākārasseva pana etaṃ vevacanaṃ. Tattha **dvinnāṃ kaṭṭhānanti** dvinnāṃ araṇīnaṃ. Tattha adhoaraṇī viya vatthu, uttarāraṇī viya ārammaṇaṃ, saṅghaṭṭanaṃ viya phasso, usmādhātu viya vedanā. Dutiyāṃ.

3. Puttamaṃsūpamasuttavaṇṇanā

63. Tatiye **cattārome, bhikkhave, āhārāti**ādi vuttanayameva. Yasmā panassa aṭṭhuppattiko nikkhepo, tasmā taṃ dassetvāvettha anupubbapadavaṇṇanaṃ karissāmi. Katarāya pana idaṃ aṭṭhuppattiyā nikkhattanti? Lābhasakkārena. Bhagavato kira mahālābhasakkāro uppajji, yathā taṃ cattāro asaṅkhyeyye pūritadānapāramīsañcayassa. Sabbadisāsu hissa yamakamahāmegho vuṭṭhahitvā mahoghaṃ viya sabbapāramiyo “ekasmīṃ attabhāve vipākāṃ dassāmā”ti sampiṇḍitā viya lābhasakkāramahoghaṃ nibbattayimṃsu. Tato tato annapānayanavattamālāgandhavilepanādihattā khattiyabrāhmaṇādayo āgantvā, “kahaṃ buddho, kahaṃ bhagavā, kahaṃ devadevo narāsabho purisasiho”ti? Bhagavantaṃ pariyesanti. Sakaṭasatehipi paccaye āharitvā okāsaṃ alabhamānā samantā gāvutappamāṇampi sakaṭadhurena sakaṭadhuraṃ āhacca tiṭṭhanti ceva anuppavattanti ca andhakavindabrāhmaṇādayo viya. Sabbaṃ khandhake tesu tesu suttesu ca āgatanayena veditabbaṃ.

Yathā bhagavato, evaṃ bhikkhusaṅghassāpi. Vuttañcetāṃ –

“Tena kho pana samayena bhagavā sakkato hoti garukato mānito pūjito apacito lābhī cīvara-piṇḍapāta-senāsana-gilāna-paccaya-bhesajja-parikkhārānaṃ. Bhikkhusaṅghopi kho sakkato hoti...pe... parikkhārāna’nti (udā. 14; saṃ. ni. 2.70).

Tathā “yāvata kho, cunda, etarahi saṅgho vā gaṇo vā loke uppanno, nāhaṃ, cunda, aññaṃ ekasaṅghampi samanupassāmi evaṃ lābhaggayasaggaṃ yatharivāyaṃ, cunda, bhikkhusaṅgho”ti (dī. ni. 3.176).

Svāyaṃ bhagavato ca saṅghassa ca uppanno lābhasakkāro ekato hutvā dvinnāṃ mahānadānaṃ udakaṃ viya appameyyo ahoṣi. Atha satthā rahogato cintesi – “mahālābhasakkāro atītabuddhānampi evarūpo ahoṣi, anāgatānampi evarūpo bhavissati. Kiṃ nu kho bhikkhū āhārapariggāhakena satisampajāññaena samannāgatā majjhataṃ nicchandarāgā hutvā āhāraṃ paribhuñjitum sakkonti, na sakkonti”ti?

So addasa ekacce adhunā pabbajite kulaputte apaccavekkhitvā āhāraṃ paribhuñjamāne. Disvānassa etadahosi – “mayā kappasatasahassādhikāni cattāri asaṅkhyeyyāni pāramiyo pūrentena na cīvarādihetu pūritā, uttamaphalassa pana arahattassatthāya pūritā. Imepi bhikkhū mama santike pabbajantā na cīvarādihetu pabbajitā, arahattasseva pana atthāya pabbajitā. Te idāni asārameva sāraṃ anattameva ca atthaṃ karonti”ti evamassa dhammasaṃvego udapādi. Tato cintesi – “sace pañcamaṃ pārājikaṃ paññapetum sakkā abhavissa, apaccavekkhitāhāraparibhogo pañcamaṃ pārājikaṃ katvā paññapetabbo bhaveyya. Na pana sakkā evaṃ kātuṃ, dhuvapaṭisevanaṭṭhānañhetam sattaṇaṃ. Yathā pana kathite pañcamaṃ pārājikaṃ viya naṃ passissanti. Evaṃ dhammādāsaṃ saṃvaraṃ mariyādaṃ ṭhappessāmi, yaṃ āvajjitvā āvajjitvā anāgate bhikkhū cattāro paccaye paccavekkhitvā paribhuñjissanti”ti. Imāya atthupattiyā imaṃ puttamaṃsūpamasuttantaṃ nikkhipi. Tatha **cattārome, bhikkhave, āhārāti**adi heṭṭhā vuttatthameva.

Cattāro pana āhāre vitthāretvā idāni tesu ādīnaṃ dassetuṃ **kathaṅca, bhikkhave, kabaḷikāro āhāro daṭṭhabboti**ādīmāha? Tatha **jāyampatikā**ti jāyā ceva pati ca. **Parittaṃ sambalanti** puṭabhattasattumodakādīnaṃ aññataraṃ appamattakaṃ pātheyyaṃ. **Kantāramagganti** kantārabhūtaṃ maggaṃ, kantāre vā maggaṃ. **Kantāranti** corakantāraṃ vāḷakantāraṃ amanussakantāraṃ nirudakakantāraṃ appabhakkakantāraṃ pañcavidhaṃ. Tesu yatha corabhayaṃ atthi, taṃ corakantāraṃ. Yatha sīhabyagghādayo vāḷā atthi, taṃ vāḷakantāraṃ. Yatha balavāmukhayakkhiniādīnaṃ amanussānaṃ vasena bhayaṃ atthi, taṃ amanussakantāraṃ. Yatha pātuṃ vā nhāyitum vā udakaṃ natthi, taṃ nirudakakantāraṃ. Yatha khādītappaṃ vā bhuñjitappaṃ vā antamaso kandaṃmūlādīmattampi natthi, taṃ appabhakkakantāraṃ nāma. Yatha panetaṃ pañcavidhampi bhayaṃ atthi, taṃ kantārameva. Taṃ panetaṃ ekāhadvīhatīhādivasena nittharitabbampi atthi, na taṃ idha adhippetam. Idha pana nirudakaṃ appabhakkam yojanasatikakantāraṃ adhippetam. Evarūpe kantāre maggaṃ. **Paṭipajjeyyunti** chātakabhayena ceva rogabhayena ca rājabhayena ca upaddutā paṭipajjeyyūṃ “etaṃ kantāraṃ nittharitvā dhammikassa rañño nirupaddave raṭṭhe sukhaṃ vasissāmā”ti maññaṃānā.

Ekaputtakoti ukkhipitvā gahito anukampitabbayutto athirasarīro ekaputtako. **Vallūraṅca soṇḍikaṅcāti** ghanaghanaṭṭhānato gahetvā vallūraṃ, aṭṭhinissitasirānissitaṭṭhānāni gahetvā sūlamaṃsaṅcāti attho. **Paṭipiseyyunti** pahareyyūṃ. **Kahaṃ ekaputtakā**ti ayaṃ tesam paridevanākāro.

Ayaṃ panetta bhūtamattaṃ katvā ādito paṭṭhāya saṅkhepato atthavaṇṇanā – dve kira jāyampatikā puttaṃ gahetvā parittena pātheyyena yojanasatikaṃ kantāramaggaṃ paṭipajjimsu. Tesam paññāsayaṃjanāni gantvā pātheyyaṃ niṭṭhāsi, te khuppiṃpāsaturā virāḷacchāyāyaṃ nisīdimsu. Tato puriso bhariyaṃ āha – “bhadde ito samantā paññāsayaṃjanāni gāmo vā nigamo vā natthi. Tasmā yaṃ taṃ purisena kātabbaṃ bahumpi kasigorakkhādīkammaṃ, na dāni sakkā taṃ mayā kātuṃ, ehi maṃ māretvā upaḍḍhamasam khādītva upaḍḍham pātheyyaṃ katvā puttana saddhiṃ kantāraṃ nittharāhī”ti. Puna sāpi taṃ āha – “sāmi mayā dāni yaṃ taṃ itthiyā kātabbaṃ bahumpi suttakantaṇādikammaṃ, taṃ kātuṃ na sakkā, ehi maṃ māretvā upaḍḍhamasam khādītva upaḍḍham pātheyyaṃ katvā puttana saddhiṃ kantāraṃ nittharāhī”ti. Puna sopi taṃ āha – “bhadde māṭugāmarāṇena dvinnāṃ marāṇaṃ paññāyati. Na hi mando kumāro mātarā vinā jīvītuṃ sakkoti. Yadi pana mayaṃ jīvāma. Puna dāraṃ labheyyāma.

Handa dāni puttakaṃ māretvā, maṃsaṃ gahetvā kantāraṃ nittharāmā”ti. Tato mātā puttamāha – “tāta, pitusantikaṃ gacchā”ti, so agamāsi. Athassa pitā, “mayā ‘puttakaṃ posessāmī”ti kasigorakkhādīhi anappakaṃ dukkhamanubhūtaṃ, na sakkomi ahaṃ puttaṃ māretuṃ, tvaṃyeva tava puttaṃ mārehī”ti vatvā, “tāta mātusantikaṃ gacchā”ti āha. So agamāsi. Athassa mātāpi, “mayā puttaṃ patthentiya govatakkuravatadevatāyācanādīhipi tāva anappakaṃ dukkhamanubhūtaṃ, ko pana vādo kucchinā pariharantiyā? Na sakkomi ahaṃ puttaṃ māretu”nti vatvā “tāta, pitusantikameva gacchā”ti āha. Evaṃ so dvinnamantarā gacchantoyeva mato. Te taṃ disvā paridevitvā vuttanayena maṃsāni gahetvā khādantā pakkamimsu.

Tesaṃ so puttamaṃsāhāro navahi kāraṇehi paṭikūlattā neva davāya hoti, na madāya, na maṇḍanāya, na vibhūsanāya, kevalaṃ kantāranittharaṇatthāyeva hoti. Katamehi navahi kāraṇehi paṭikūloti ce? Sajātimaṃsatāya nātimaṃsatāya puttamaṃsatāya piyaputtamaṃsatāya taruṇamaṃsatāya āmakamaṃsatāya abhogamaṃsatāya aloṇatāya adhūpitatāyāti. Evañhi te navahi kāraṇehi paṭikūlaṃ taṃ puttamaṃsaṃ khādantā na sārattā giddhamānasā hutvā khādimsu, majjhatabhāveyeva pana nicchandarāgaparibhoge ṭhitā khādimsu. Na aṭṭinhārucammanissitaṭṭhānāni apantvā thūlathūlaṃ varamaṃsameva khādimsu, hatthasampattaṃ maṃsameva pana khādimsu. Na yāvadatthaṃ kaṇṭhappamāṇaṃ katvā khādimsu, thokaṃ thokaṃ pana ekadivasam yāpanamattameva khādimsu. Na aññamaññaṃ maccharāyanta khādimsu, vigatamaccheramaleṇa pana parisuddheneva cetasā khādimsu. Na aññaṃ kiñci migamaṃsaṃ vā moramaṃsādīnaṃ vā aññataraṃ khādāmāti sammūlha khādimsu, piyaputtamaṃsabhāvaṃ pana jānantāva khādimsu. Na “aho vata mayaṃ punapi evarūpaṃ puttamaṃsaṃ khādeyyamā”ti patthanaṃ katvā khādimsu, patthanaṃ pana vītivattāva hutvā khādimsu. Na “ettakaṃ kantāre khādinvā avasiṭṭhaṃ kantāraṃ atikkamma loṇambilādīhi yojetvā khādissamā”ti sannidhiṃ akaṃsu, kantārapariyosāne pana “pure mahājano passatī”ti bhūmiyaṃ vā nikhaṇimsu, agginā vā jhāpayimsu. Na “koci añño amhe viya evarūpaṃ puttamaṃsaṃ khādinvā na labhatī”ti mānaṃ vā dappaṃ vā akaṃsu, nihamānā pana nihamadappā hutvā khādimsu. “Kiṃ iminā aloṇena anambileṇa adhūpitena duggandhenā”ti na hīletvā khādimsu, hīḷanaṃ pana vītivattā hutvā khādimsu. Na “tuyhaṃ bhāgo mayhaṃ bhāgo tava putto mama putto”ti aññamaññaṃ atimaññaṃsu. Samaggā pana sammodamānā hutvā khādimsu. Imaṃ nesaṃ evarūpaṃ nicchandarāgādi-paribhogaṃ sampassamāno satthā bhikkhusaṅghampi taṃ kāraṇaṃ anujānāpento **taṃ kiṃ maññaṭṭha, bhikkhave, api nu te davāya vā āhāraṃ āhāreyyuntī**adimāha. Tattha **davāya vā**tiādīni visuddhimagge (visuddhi. 1.18) vitthāritāneva. **Kantārassāti** nittinṇāvasesassa kantārassa.

Evameva khoti navannaṃ paṭikūlyānaṃ vasena piyaputtamaṃsasadiṣo katvā daṭṭhabboti attho. Katamesaṃ navannaṃ? Gamanapāṭikūlyatādīnaṃ. Gamanapāṭikūlyataṃ paccavekkhantopi kabalīkārahāraṃ pariggaṇhāti, pariyesanapāṭikūlyataṃ paccavekkhantopi, paribhoganidhānaāsaya-paripakkā-paripakkasammakkhaṇanissandapāṭikūlyataṃ paccavekkhantopi, tāni panetāni gamanapāṭikūlyatādīni visuddhimagge (visuddhi. 1.294) āhārapāṭikūlyatāniddeṣe vitthāritāneva. Iti imesaṃ navannaṃ paṭikūlyānaṃ vasena puttamaṃsūpamaṃ katvā āhāro paribhuñjitabbo.

Yathā te jāyampatikā paṭikūlyam piyaputtamaṃsaṃ khādantā na sārattā giddhamānasā hutvā khādimsu, majjhatabhāveyeva nicchandarāgaparibhoge ṭhitā khādimsu, evaṃ nicchandarāgaparibhogaṃ katvā paribhuñjitabbo. Yathā ca te na aṭṭinhārucammanissitaṃ apantvā thūlathūlaṃ varamaṃsameva khādimsu, hatthasampattameva pana khādimsu, evaṃ sukhabhattamandabyañjanādīni piṭṭhihatthena apaṭikkhipitvā vaṭṭakena viya kukkuṭena viya ca odhiṃ adassetvā tato tato sappimaṃsādisaṃsaṭṭhavarabhojanaṃyeva vicinitvā abhuñjantena sīhena viya sapadānaṃ paribhuñjitabbo.

Yathā ca te na yāvadatthaṃ kaṇṭhappamāṇaṃ khādimsu, thokaṃ thokaṃ pana ekekadivasam yāpanamattameva khādimsu, evameva āharahatthakādibrāhmaṇānaṃ aññatarena viya yāvadatthaṃ udarāvadehakaṃ abhuñjantena catunnaṃ pañcannaṃ vā ālopānaṃ okāsaṃ ṭhapetvāva

dhammasenāpatinā viya paribhuñjitabbo. So kira pañcacattālīsa vassāni tiṭṭhamāno “pacchābhatte ambiluggārasamuṭṭhāpakam katvā ekadivasampi āhāraṃ na āhāresi”nti vatvā sīhanādam nadanto imam gāthamāha –

“Cattāro pañca ālope, abhutvā udakam pive;
Alam phāsuvihārāya, pahitattassa bhikkhuno”ti. (theragā. 983);

Yathā ca te na aññamaññaṃ maccharāyantā khādīṃsu, vigatamalamaccherena pana parisuddheneva cetasā khādīṃsu, evameva piṇḍapātam labhitvā amaccharāyitvā “imam sabbam gaṇhantassa sabbam dassāmi, upaḍḍham gaṇhantassa upaḍḍham, sace gahitāveseso bhavissati, attanā paribhuñjissāmi”ti sārāṇiyadhamme ṭhiteneva paribhuñjitabbo. Yathā ca te na “aññaṃ kiñci mayam migamaṃsam vā moramaṃsādīnaṃ vā aññataraṃ khādāmā”ti sammūlhā khādīṃsu, piyaputtamaṃsabhāvaṃ pana jānantāva khādīṃsu, evameva piṇḍapātam labhitvā “aham khādāmi bhuñjāmi”ti attūpaladdhisammohaṃ anuppādetvā “kabaḷikārāhāro na jānāti ‘cātumahābhūtikakāyaṃ vaḍḍhemī”ti, kāyopi na jānāti ‘kabaḷikārāhāro maṃ vaḍḍhetī”ti, evam sammohaṃ pahāya paribhuñjitabbo. Satisampajaññavasenāpi cesa asammūlheneva hutvā paribhuñjitabbo.

Yathā ca te na “aho vata mayaṃ punapi evarūpaṃ puttamaṃsam khādeyyāmā”ti patthanaṃ katvā khādīṃsu, patthanaṃ pana vītivattāva hutvā khādīṃsu, evameva paṇītabhojanaṃ laddhā ‘aho vatāham svepi punadivasepi evarūpaṃ labheyyam’, lūkhamaṃ vā pana laddhā “hiyyo viya me ajja paṇītabhojanaṃ na laddha”nti patthanaṃ vā anusocanaṃ vā akatvā nittaṇhena –

“Atītam nānusoḍāmi, nappajappāmināgataṃ;
Paccuppanna yāpemi, tena vaṇṇo pasīdatī”ti. (jā. 2.22.90) –

Imam ovādam anussarantena “paccuppanneva yāpessāmi”ti paribhuñjitabbo.

Yathā ca te na “ettakam kantāre khādītvā avasiṭṭham kantāraṃ atikkamma loṇambilādīhi yojetvā khādissāmā”ti sannidhiṃ akaṃsu, kantārapariyosāne pana “pure mahājano passatī”ti bhūmiyam vā nikhaṇīṃsu, agginā vā jhāpayīṃsu, evameva –

“Annānamatho pānānaṃ,
Khādānīyānaṃ athopi vatthānaṃ;
Laddhā na sannidhiṃ kayirā,
Na ca parittase tāni alabhamāno”ti. (su. ni. 930); –

Imam ovādam anussarantena catūsu paccayesu yaṃ yaṃ labhati, tato tato attano yāpanamattaṃ gahetvā, sesaṃ sabrahmacārīnaṃ vissajjetvā sannidhiṃ parivajjantena paribhuñjitabbo. Yathā ca te na “koci añño amhe viya evarūpaṃ puttamaṃsam khādītuṃ na labhatī”ti mānaṃ vā dappaṃ vā akaṃsu, nihata mānā pana nihata dappā hutvā khādīṃsu, evameva paṇītabhojanaṃ labhitvā “ahamasmi lābhī cīvarapiṇḍapātādīna”nti na māno vā dappo vā kātabbo. “Nāyaṃ pabbajjā cīvarādihetu, arahattahetu panāyaṃ pabbajjā”ti paccavekkhitvā nihata mānadappeneva paribhuñjitabbo.

Yathā ca te “kiṃ iminā aloṇena anambilena adhūpitena duggandhenā”ti hīletvā na khādīṃsu, hīlanaṃ pana vītivattā hutvā khādīṃsu, evameva piṇḍapātam labhitvā “kiṃ iminā assaṅgaṇabhattasadisena lūkhena nirasena, suvānadoṇiyam tam pakkhipathā”ti evam piṇḍapātam vā “ko imam bhuñjissati, kākasunakhādīnaṃ dehī”ti evam dāyakaṃ vā ahīlentena –

“Sa pattapāṇi vicaranto, amūgo mūgasammato;
Appam dānaṃ na hīleyya, dātāraṃ nāvajāniyā”ti. (su. ni. 718); –

Imaṃ ovādaṃ anussarantena paribhuñjitabbo. Yathā ca te na “tuyhaṃ bhāgo, mayhaṃ bhāgo, tava putto mama putto”ti aññamaññaṃ atimaññiṃsu, samaggā pana, sammodayāna hutvā khādiṃsu, evamevaṃ piṇḍapātaṃ labhitvā yathā ekacco “ko tumhādisānaṃ dassati nikkāraṇā ummāresu pakkhalantānaṃ āhiṇḍantānaṃ vijātamātāpi vo dātabbaṃ na maññati, mayaṃ pana gatagataṭṭhāne paṇītāni cīvarādīni labhāmā”ti sīlavante sabrahmacārī atimaññati, yaṃ sandhāya vuttaṃ –

“So tena lābhasakkārasilokena abhibhūto pariyādiṇṇacitto aññe pesale bhikkhū atimaññati. Tañhi tassa, bhikkhave, moghapurisassa hoti dīgharattaṃ ahitāya dukkhāyā”ti (saṃ. ni. 2.161).

Evam kañci anatimaññitvā sabbehi sabrahmacārīhi saddhiṃ samaggena sammodayānena hutvā paribhuñjitabbaṃ.

Pariññātetī nātāpariññā tīraṇāpariññā pahānāpariññāti imāhi tīhi pariññāhi pariññāte. Kathaṃ? Idha bhikkhu “kabaḷīkārāhāro nāma ayaṃ savatthukavasena ojaṭṭhamakarūpaṃ hoti, ojaṭṭhamakarūpaṃ kattha paṭihaññati? Jivhāpasāde, jivhāpasādo kinnissito? Catumahābhūtanissito. Iti ojaṭṭhamakāṃ jivhāpasādo tassa paccayāni mahābhūtanīti ime dhammā rūpakkhando nāma, taṃ pariggaṇhato uppannā phassapañcamakā dhammā cattāro arūpakkhandhā. Iti sabbepe pañcakkhandhā sañkhepato nāmarūpamattaṃ hotī”ti pajānāti. So te dhamme sarasalakkhaṇato vavattapetvā tesāṃ paccayaṃ pariyesanto anulomapaṭilomaṃ paṭiccasamuppādaṃ passati. Ettāvātānena kabaḷīkārāhāramukhena sappaccayassa nāmarūpassa yāthāvato diṭṭhattā kabaḷīkārāhāro nātāpariññāya pariññāto hoti. So tadeva sappaccayaṃ nāmarūpaṃ aniccaṃ dukkhaṃ anattāti tīpi lakkhaṇāni āropetvā sattannaṃ anupassanānaṃ vasena sammasati. Ettāvātānena so tilakkhaṇapaṭivedhasammasanaññāsañkhātāya tīraṇāpariññāya pariññāto hoti. Tasmīṃyeva nāmarūpe chandarāgāvakaḍḍhanena anāgāmimaggena pariññāto pahānāpariññāya pariññāto hotīti.

Pañcakāmaguṇīkoti pañcakāmaguṇasambhavo rāgo pariññāto hoti. Ettha pana tisso pariññā ekāpariññā sabbāpariññā mūlapariññāti. Katamā **ekāpariññā**? Yo bhikkhu jivhādvāre ekarasatāṇaṃ pariññāti, tena pañcakāmaguṇīko rāgo pariññāto hotīti. Kasmā? Tassāyeva tattha uppajjanato. Sāyeva hi taṇhā cakkhudvāre uppannā rūparāgo nāma hoti, sotādvārādīsu uppannā saddarāgādayo. Iti yathā ekasseva corassa pañcamagge hanato ekasmiṃ magge gahetvā sīse chinne pañcapi maggā khemā honti, evaṃ jivhādvāre rasatāṇhāya pariññātāya pañcakāmaguṇīko rāgo pariññāto hotīti ayaṃ ekāpariññā nāma.

Katamā **sabbāpariññā**? Patte pakkhittapiṇḍapātasmīhi ekasmiṃyeva pañcakāmaguṇīkarāgo labbhati. Kathaṃ? Parisuddhaṃ tāvassa vaṇṇaṃ olokayato rūparāgo hoti, uṇhe sappimhi tattha āsiñcante paṭapaṭāti saddo utṭhahati, tathārūpaṃ khādaniyaṃ vā khādantassa murumurūti saddo uppajjati, taṃ assādayato saddarāgo. Jīrakādivasagandhaṃ assādentassa gandharāgo, sādurasavasena rasarāgo. Mudubhojanaṃ phassavantanti assādayato phoṭṭhabbarāgo. Iti imasmiṃ āhāre satisampajaññaṇa pariggahetvā nicchandarāgaparibhogena paribhutte sabbopi so pariññāto hotīti ayaṃ sabbāpariññā nāma.

Katamā **mūlapariññā**? Pañcakāmaguṇīkarāgassa hi kabaḷīkārāhāro mūlaṃ. Kasmā? Tasmīṃ sati tassuppattito. Brāhmaṇatissabhaye kira dvādasā vassāni jāyampatikānaṃ upanijjhānacittaṃ nāma nāhosi. Kasmā? Āhāramandatāya. Bhaye pana vūpasante yojanasatikā tambapaṇṇidīpo dārakānaṃ jātamaṅgalehi ekamaṅgalo ahosi. Iti mūlabhūte āhāre pariññāte pañcakāmaguṇīko rāgo pariññāto hotīti ayaṃ mūlapariññā nāma.

Natthi taṃ samyojananti tena rāgena saddhiṃ pahānekaṭṭhatāya pahīnattā natthi. Evamayāṃ desanā yāva anāgāmimaggaṃ kathitā. “Ettakena pana mā vosānaṃ āpajjiṃsū”ti etesāyeva rūpādīnaṃ vasena pañcasu khandhesu vipassanaṃ vaḍḍhetvā yāva arahattā kathetuṃ vaṭṭatīti. Paṭhamāhāro (niṭṭhito).

Dutiye **niccammā**ti khurato paṭṭhāya yāva siṅgamūlā sakalasarīrato uddālitacammā kiṃsukarāsivaṇṇā. Kasmā pana aññaṃ hatthiassagoṇādiupamaṃ agahetvā niccammagāvūpamā gahitāti? Titikkhituṃ asamatthabhāvadīpanatthaṃ. Mātugāmo hi uppannaṃ dukkhavedanaṃ titikkhituṃ adhivāsetuṃ na sakkoti, evameva phassāhāro abalo dubbaloti dassanatthaṃ sadisameva upamaṃ āhari. **Kuṭṭanti** silākuṭṭādīnaṃ aññataraṃ. **Kuṭṭanissitā** pāṇā nāma uṇṇanābhisarabūmūsikādayo. **Rukkhanissitā**ti uccālīṅgapāṇakādayo. **Udakanissitā**ti macchasuṃsumārādayo. **Ākāsanissitā**ti ḍaṃsamakasakākakulalādayo. **Khādeyyunti** luñcitvā khādeyyuṃ. Sā tasmim tasmim ṭhāne taṃ taṃṭhānasannissayamūlikam pāṇakhādanabhayaṃ sampassamānā neva attano sakkārasammānaṃ, na piṭṭhiparikammasarīrasambāhanaṃhodakāni icchati, evameva bhikkhu phassāhāramūlakam kilesapāṇakakhādanabhayaṃ sampassamāno tebhūmakaphassena anattiko hoti.

Phasse, bhikkhave, āhāre pariññāti tīhi pariññāhi pariññāte. Idhāpi tisso pariññā. Tattha “phasso saṅkhārakkhandho, taṃsamyayuttā vedanā vedanākkhandho, saññā saññākkhandho, cittam viññānakkhandho, tesam vatthārammaṇāni rūpakkkhandho”ti evaṃ sappaccayassa nāmarūpassa yāthāvato dassanaṃ ñātapariññā. Tattheva tilakkhaṇaṃ āropetvā sattannaṃ anupassanānaṃ vasena aniccādito tulanaṃ tīraṇapariññā. Tasmimyeva pana nāmarūpe chandarāganikkaḍḍhano arahattamaggo pahānapariññā. **Tisso vedanā**ti evaṃ phassāhāre tīhi pariññāhi pariññāte tisso vedanā pariññātāva honti tammūlakattā taṃsamyayuttattā ca. Iti phassāhārasena desanā yāva arahattā kathitā. Dutiyāhāro.

Tatiye **āṅgārakāsū**ti āṅgārānaṃ kāsū. **Kāsū**ti rāsipi vuccati āvāṭopi.

“Āṅgārakāsūṃ apare phuṇanti,
Narā rudantā paridaḍḍhagattā;
Bhayañhi maṃ vindati sūta disvā,
Pucchāmi taṃ mātali devasārathī”ti. (jā. 2.22.462); –

Ettha rāsī “kāsū”ti vutto.

“Kinu santaramānova, kāsūṃ khanasi sārathī”ti? (Jā. 2.22.3). –

Ettha āvāṭo. Idhāpi ayameva adhippeto. **Sādhikaporisā**ti atirekaporisā pañcaratanaṃpamāṇā. **Vītaccikānaṃ vītadhūmānanti** etenassa mahāpariḷāhataṃ dasseti. Jālāya vā hi dhūme vā sati vāto samuṭṭhāti, pariḷāho mahā na hoti, tadabhāve vātābhāvato pariḷāho mahā hoti. **Ārakāvassā**ti dūreyeva bhavye.

Evameva khoti ettha idaṃ opammasaṃsandanaṃ – āṅgārakāsu viya hi tebhūmakavaṭṭaṃ daṭṭhabbaṃ. Jīvitukāmo puriso viya vaṭṭanissito bālaputhujjano. Dve balavanto purisā viya kusalākusalakammaṃ. Tesam taṃ purisaṃ nānābhāsu gahetvā āṅgārakāsūṃ upakaḍḍhanakālo viya puthujjanassa kammāyūhanakālo. Kammañhi āyūhiyamānameva paṭisandhiṃ ākaḍḍhati nāma. Āṅgārakāsūnidānaṃ dukkhaṃ viya kammanidānaṃ vaṭṭadukkhaṃ veditabbaṃ.

Pariññāti tīhi pariññāhi pariññāte. Pariññāyojanā panettha phasse vuttanayeneva veditabbā. **Tisso taṇhāti** kāmataṇhā bhavataṇhā vibhavataṇhāti imā pariññātā honti. Kasmā? Taṇhāmūlakattā manosañcetanāya. Na hi hetumhi appahīne phalaṃ pahīyati. Iti manosañcetanāhārasenapi yāva arahattā desanā kathitā. Tatiyāhāro.

Catutthe **āgucārī**ti pāpacāriṃ dosakāraṃ. **Kathaṃ so purisoti** so puriso kathaṃbhūto, kiṃ yāpeti, na yāpeti pucchati? **Tatheva deva jīvati**ti yathā pubbe, idānipi tatheva jīvati.

Evameva khoti idhāpi idaṃ opammasaṃsandanaṃ – rājā viya hi kammaṃ daṭṭhabbaṃ, āgucārī puriso viya vaṭṭasannissito bālaputhujjano, tīni sattisatāni viya paṭisandhiviññānaṃ, āgucārī purisaṃ

“tīhi sattisatehi hanathā”ti raññā āṇattakālo viya kammaraññā vaṭṭasannissitaputhujjanam gahetvā paṭisandhiyam pakkhipanakālo. Tattha kiñcāpi tīhi sattisatāni viya paṭisandhiviññānam, sattisu pana dukkham natthi, sattīhi pahaṭavaṇamūlakam dukkham, evameva paṭisandhiyampi dukkham natthi, dinnāya pana paṭisandhiyā pavatte vipākadukkham sattipahaṭavaṇamūlakam dukkham viya hoti.

Pariññātetī tīheva pariññāhi pariññāte. Idhāpi pariññāyōjanā phassāhāre vuttanayeneva veditabbā. **Nāmarūpanti** viññāpaccayā nāmarūpam. Viññānasmiñhi pariññāte taṃ pariññāteva hoti tammūlakattā sahuppannattā ca. Iti viññāṇāhāravasenapi yāva arahattā desanā kathitāti. Catutthāhāro. Tatiyam.

4. Atthirāgasuttavaṇṇanā

64. Catutthe **rāgoti**ādīni lobhasseva nāmāni. So hi rañjanavasena rāgo, nandanavasena nandī, taṇhāyanavasena taṇhāti vuccati. **Paṭiṭṭhitam tattha viññāṇam virūḷhanti** kammaṃ javāpetvā paṭisandhiākaḍḍhanasamatthatāya paṭiṭṭhitañceva virūḷhañca. **Yatthāti** tebhūmakavaṭṭe bhummaṃ, sabbattha vā purimapurimapade etaṃ bhummaṃ. **Atthi tattha saṅkhārānam vuddhīti** idaṃ imasmiṃ vipākavaṭṭe ṭhitassa āyativaṭṭahetuke saṅkhāre sandhāya vuttam. **Yattha atthi āyatim punabbhavābhiniḍḍanti** yasmim ṭhāne āyatim punabbhavābhiniḍḍanti atthi.

Evameva khoti ettha idaṃ opammaṣandanaṃ – rajakacittakārā viya hi sahakammasambhāram kammaṃ, phalakabhittidussapaṭā viya tebhūmakavaṭṭam. Yathā rajakacittakārā parisuddhesu phalakādīsū rūpaṃ samuṭṭhāpeti, evameva sasambhārakakammaṃ bhavesu rūpaṃ samuṭṭhāpeti. Tattha yathā akusalena cittakārena samuṭṭhāpitaṃ rūpaṃ virūpaṃ hoti dussaṅghitaṃ amanāpaṃ, evameva ekacco kammaṃ karonto ñānavippayuttana cittaṃ karoti, taṃ kammaṃ rūpaṃ samuṭṭhāpentam cakkhādīnam sampattiṃ adatvā dubbaṇṇam dussaṅghitaṃ mātāpitūnampi amanāpaṃ rūpaṃ samuṭṭhāpeti. Yathā pana kusaleṇa cittakārena samuṭṭhāpitaṃ rūpaṃ surūpaṃ hoti susaṅghitaṃ manāpaṃ, evameva ekacco kammaṃ karonto ñānasampayuttana cittaṃ karoti, taṃ kammaṃ rūpaṃ samuṭṭhāpentam cakkhādīnam sampattiṃ datvā suvaṇṇam susaṅghitaṃ alaṅkatapaṭiyattam viya rūpaṃ samuṭṭhāpeti.

Ettha ca āhāram viññāṇena saddhiṃ saṅkhipitvā āhāranāmarūpānam antare eko sandhi, vipākavidhiṃ nāmarūpena saṅkhipitvā nāmarūpasāṅkhārānam antare eko sandhi, saṅkhārānañca āyatibhavassa ca antare eko sandhīti veditabbo.

Kūṭāgāranti ekakaṇṇikaṃ gāhāpetvā kataṃ agāram. **Kūṭāgārasālāti** dve kaṇṇike gahetvā katasālā. **Evameva khoti** ettha khīṇāsavassa kammaṃ sūriyasmisamaṃ veditabbaṃ. Sūriyasmī pana atthi, sā kevalam paṭiṭṭhāya abhāvena appaṭiṭṭhā nāma jāta, khīṇāsavassa kammaṃ natthitāya eva appaṭiṭṭham. Tassa hi kāyādayo atthi, tehi pana katakammaṃ kusalākusalam nāma na hoti, kiriyamatte ṭhatvā avipākam hoti. Evamassa kammaṃ natthitāya eva appaṭiṭṭham nāma jātanti. Catuttham.

5. Nagarasuttavaṇṇanā

65. Pañcame **nāmarūpe kho sati viññāṇanti** ettha “saṅkhāresu sati viññāṇa”nti ca “avijjāya sati saṅkhārā”ti ca vattabbaṃ bhavēyya, tadubhayampi na vuttam. Kasmā? Avijjāsaṅkhārā hi tatiyo bhavo, tehi saddhiṃ ayam vipassanā na ghaṭiyati. Mahāpuriso hi paccuppannapañcavokāravasena abhinivīṭṭhoti.

Nanu ca avijjāsaṅkhāresu aditṭhesu na sakkā buddhena bhavituntī. Saccam na sakkā, iminā pana te bhavaupādānataṇhāvasena diṭṭhāva. Tasmā yathā nāma godham anubandhanto puriso taṃ kūpaṃ pavitṭham disvā otarivā pavitṭhatṭhānam khaṇitvā godham gahetvā pakkameyya, na parabhāgam khaṇēyya, kasmā? Kassaci natthitāya. Evaṃ mahāpurisopi godham anubandhanto puriso viya

bodhipallañke nisinho jarāmarañato paṭṭhāya “imassa ayaṃ paccayo, imassa ayaṃ paccayo”ti pariyesanto yāva nāmarūpadhammānaṃ paccayaṃ disvā tassapi paccayaṃ pariyesanto viññānameva addasa. Tato “ettako pañcavokārabhavavasena sammasanacāro”ti vipassanaṃ paṭinivattesi, parato tucchakūpassa abhinnaṭṭhānaṃ viya avijjāsāñkhāradvayaṃ atthi, tadetaṃ heṭṭhā vipassanāya gahitattā pāṭiyekkaṃ sammasanūpaḡaṃ na hotīti na aggahesi.

Paccudāvattatīti paṭinivattati. Katamaṃ panettha viññānaṃ paccudāvattatīti? Paṭisandhiviññānaṃpi vipassanāviññānaṃpi. Tattha paṭisandhiviññānaṃ paccayato paṭinivattati, vipassanāviññānaṃ āramañato. Ubhayampi nāmarūpaṃ nātikkamati, nāmarūpato paraṃ na gacchati. **Ettāvatā jāyetha vāti**ādīsu viññāṇe nāmarūpassa paccaye honte, nāmarūpe viññāṇassa paccaye honte, dvīsupi aññamaññapaccayesu hontesu ettakena jāyetha vā upapajjetha vā. Ito hi paraṃ kimaññaṃ jāyetha vā upapajjetha vā, nanu etadeva jāyati ca upapajjati cāti?

Evamaṃ saddhimaṃ aparāparacutipāṭisandhīhi pañca padāni dassetvā puna taṃ ettāvatāti vuttamatthaṃ niyyātento **yadidaṃ nāmarūpapaccayā viññānaṃ, viññāṇapaccayā nāmarūpanti** vatvā tato paraṃ anulomapaccayākāravasena viññāṇapaccayā nāmarūpamūlakaṃ āyatijarāmarānaṃ dassetuṃ **nāmarūpapaccayā saḷāyatananti**ādīmāha.

Añjasanti maggasseva vevacanaṃ. **Uddhāpavanti** āpato uggatattā uddhāpanti laddhavohārena pākāravatthunā samannāgataṃ. **Ramañiyanti** samantā catunnaṃ dvārānaṃ abbhantare ca nānābhāṇḍānaṃ sampattiyā ramañiyaṃ. **Māpehīti** mahājanaṃ pesetvā vāsaṃ kārehi. **Māpeyyāti** vāsaṃ kāreyya. Kārento ca paṭhamaṃ aṭṭhārasa manussakoṭiyo pesetvā “sambuṇṇa”nti pucchitvā “na tāva sambuṇṇa”nti vutte aparāni pañcakulāni peseyya. Puna pucchitvā “na tāva sambuṇṇa”nti vutte aparāni pañcapanñāsakulāni peseyya. Puna pucchitvā “na tāva sambuṇṇa”nti vutte aparāni tiṃsa kulāni peseyya. Puna pucchitvā “na tāva sambuṇṇa”nti vutte aparāni kulasahassaṃ peseyya. Puna pucchitvā “na tāva sambuṇṇa”nti vutte aparāni ekādasanahutāni kulāni peseyya. Puna pucchitvā “na tāva sambuṇṇa”nti vutte aparāni caturāsītikulasahassāni peseyya. Puna “sambuṇṇa”nti pucchite, “mahārāja, kiṃ vadesi? Mahantaṃ nagaraṃ asambādhaṃ, iminā nayena kulāni pesetvā na sakkā pūretuṃ, bheriṃ pana carāpetvā ‘amhākaṃ nagaraṃ imāya ca imāya ca sampattiyā sampannaṃ, ye tattha vasitukāmā, yathāsukkaṃ gacchantu, imañcamañca parihāraṃ labhissanti”ti nagarassa ceva vaṇṇaṃ lokassa ca parihāralābhaṃ ghoṣāpethā”ti vadeyya. So evamaṃ kāreyya. Tato manussā nagaragūṇaṇceva parihāralābhañca sutvā sabbadisāhi samosarivā nagaraṃ pūreyyūṃ. Taṃ aparena samayena iddhañceva assa phītañca. Taṃ sandhāya **tadassa nagaraṃ aparena samayena iddhañceva phītañcāti**ādī vuttaṃ.

Tattha **iddhanti** samiddhaṃ subhikkhaṃ. **Phītanti** sabbasampattīhi pupphitaṃ. **Bāhujaññanti** bahūhi ñātappaṃ, bahujanānaṃ hitaṃ vā. “Bahujana”ntipi pāṭho. **Ākiñṇamanussanti** manussehi ākiñṇaṃ nirantaraṃ phuṭṭhaṃ. **Vuḍḍhivepullappattanti** vuḍḍhippattañceva vepullappattañca, seṭṭhabhāvañceva vipulabhāvañca pattaṃ, dasasahassacakkavāle agganagaraṃ jātanti attho.

Evameva khoti ettha idaṃ opammaṣaṃsandanaṃ – araññapavane caramānapuriso viya hi dīpañkarapādāmūlato paṭṭhāya pāramiyo pūrayamāno mahāpuriso daṭṭhabbo, tassa purisassa pubbahehi manussehi anuyātamaggadassanaṃ viya mahāsattassa anupubbena bodhipallañke nisinnassa pubbhāge aṭṭhaṅgikassa vipassanāmaggassa dassanaṃ, purisassa taṃ ekapadikamaggāṃ anugacchato aparabhāge mahāmaggadassanaṃ viya mahāsattassa uparivipassanāya ciñṇante lokuttaramaggadassanaṃ, purisassa teneva maggena gacchato purato nagaradassanaṃ viya tathāgatassa nibbānanagaradassanaṃ, bahinagaraṃ panettha aññena diṭṭhaṃ, aññena manussavāsaṃ kataṃ, nibbānanagaraṃ satthā sayameva passi, sayāṃ vāsamakāsi. Tassa purisassa catunnaṃ dvārānaṃ diṭṭhakālo viya tathāgatassa catunnaṃ maggānaṃ diṭṭhakālo, tassa catūhi dvārehi nagaraṃ pavīṭṭhakālo viya tathāgatassa catūhi maggehi nibbānaṃ pavīṭṭhakālo, tassa nagarabbhantare bhāṇḍavavattānakālo viya tathāgatassa paccavekkhaññaṇena paropaññāsakusaladhammavavattānakālo. Nagarassa

agārakaraṇattham kulapariyesanakālo viya satthu phalasangāpattito vuṭṭhāya veneyyasatte volokanakālo, tena purisena yācitassa rañño ekaṃ mahākuṭumbikaṃ diṭṭhakālo viya mahābrahmunā yācitassa bhagavato aññāsikoṇḍaññattheraṃ diṭṭhakālo, rañño mahākuṭumbikaṃ pakkosāpetvā “nagaravāsaṃ karohi”ti pahitakālo viya bhagavato ekasmiṃ pacchābhatte aṭṭhārasayojanamaggaṃ gantvā āsāḥhipuṇṇamadivase bārāṇasiyaṃ isipatanam pavisitvā theram kāyasakkhiṃ katvā dhammaṃ desitakālo, mahākuṭumbikena aṭṭhārasa purisakoṭiyo gahetvā nagaram ajjhāvutṭhakālo viya tathāgatena dhammacakke pavattite therassa aṭṭhārasahi brahmakotiḥi saddhiṃ sotāpattiphale patiṭṭhitakālo, evaṃ nibbānanagaraṃ paṭhamam āvāsitaṃ, tato sampuṇṇam nagaranti pucchitvā na tāvāti vutte pañca kulāni ādim katvā yāva caturāsītikulasaḥsapesanaṃ viya tathāgatassa pañcamadivasato paṭṭhāya anattalakkhaṇasuttādīni desetvā pañcavaggiye ādim katvā yasapamukhā pañcapaṇṇāsa kulaputtā, tiṃsa bhaddavaggiyā, saḥsapurāṇajaṭilā, bimbisārapamukhāni ekādasapurisanahutāni, tirokuṭṭānumodane caturāsītisaḥsānīti ettakassa janassa ariyamaggaṃ otāretvā nibbānanagaraṃ pesitakālo, atha tena nayena nagare apūriyamāne bherim carāpetvā nagarassa vaṇṇaghosanaṃ kulānaṃ parihāralābhaghosanaṃ viya ca māssa aṭṭha divase tattha tattha nisīditvā dhammakathikānaṃ nibbānavāṇassa ceva nibbānappattānaṃ jātikantārādinittharaṇānisamsassa ca ghosanaṃ, tato sabbadisāhi āgantvā manussānaṃ nagarasamosaraṇam viya tattha tattha dhammakatham sutvā tato tato nikkhamitvā pabbajjam ādim katvā anulomapaṭipadaṃ paṭipannānaṃ aparimāṇānaṃ kulaputtānaṃ nibbānasamosaraṇam daṭṭhabbam.

Purāṇam magganti ariyam aṭṭhaṅgikaṃ maggaṃ. Ayañhi ariyamaggo pavāraṇasutte (saṃ. ni. 1.215) avattamānakatṭhena “anuppannamaggo”ti vutto, imasmiṃ sutte avaḷaṇṇjanaṭṭhena “purāṇamaggo”ti. **Brahmacariyanti** sikkhattayaṅgahaṃ sakalasāsaṇam. **Iddhanti** jhānassādena samiddham subhikkham. **Phīṭanti** abhiññābharaṇehi pupphitaṃ. **Vitthārikanti** vitthiṇṇam. **Bāhujaññanti** bahujanaviññeyyam. **Yāva devamanussehi suppakāsīti** yāva dasasaḥsacakkavāḷe devamanussehi paricchedo atthi, etasmiṃ antare suppakāsitaṃ sudesitaṃ tathāgatenaṭi. Pañcamam.

6. Sammasasuttavaṇṇanā

66. Chaṭṭhe āmantesiṭi kasmā āmantesi? Yasmāssa sukhumā tilakkhaṇāhatā dhammadesanā upaṭṭhāsi. Tasmim kira janapade manussā sahetukā paññavanto. Siniddhāni kirettha bhojanāni, tānisevato janassa paññā vaḍḍhati, te gambhīraṃ tilakkhaṇāhatam dhammakatham paṭivijjhitum samatthā honti. Teneva bhagavā dīghamajjhimesu mahāsatiṭpaṭṭhānāni (dī. ni. 2.372 ādayo) mahānidānaṃ (dī. ni. 2.95 ādayo), āneñjasappāyam (ma. ni. 3.66 ādayo), saṃyuttake cūlanidānādisuttanti evamādīni aññāni gambhīrāni suttāni tattheva kathesi. **Sammasatha notī** sammasatha nu. **Antaram sammasanti** abbhantaram paccayasammasanaṃ. **Na so bhikkhu bhagavato cittaṃ ārādhesiṭi** paccayākāravasena byākārāpetukāmassa bhagavato tathā abyākāritvā dvattiṃsākāravasena byākāronto ajjhāsayaṃ gahetuṃ nāsakkhi.

Etadavocāti desanā yathānusandhiṃ na gatā, desanāya yathānusandhigamanattham etadavoca. **Tenahānanda, suñāthāti** idam tepiṭake buddhavacane asambhinnapadam. Aññattha hi evaṃ vuttam nāma natthi. **Upadhiniḍānanti** khandhupadhiniḍānaṃ. Khandhapañcakañhettha upadhīti adhippetam. **Uppajjati** jāyati. **Nivisati** punappunam pavattivasena patiṭṭhahati.

Yaṃ kho loke piyarūpaṃ satarūpanti yaṃ lokasmiṃ piyasabhāvañceva madhurasabhāvañca. **Cakkhum loketi**ādīsu lokasmiñhi cakkhādīsu mamattena abhiniviṭṭhā sattā sampattiyam patiṭṭhitā attano cakkhum ādāsādīsu nimittaggaṇānusārena vipasannapañcapasādam suvaṇṇavimāne ugghāṭitamaṇisīhapañjaram viya maññanti, sotaṃ rajatapanāḷikaṃ viya pāmaṅgasuttaṃ viya ca maññanti, tuṅganāsāti laddhavohāraṃ ghānaṃ vaṭṭetvā ṭhapitaharītālavatṭim viya maññanti, jivham rattakambalapaṭalaṃ viya mudusiniddhamadhurarasadam maññanti, kāyam sālalaṭṭhiṃ viya suvaṇṇatorānaṃ viya ca maññanti, manam aññesaṃ manena asadisam ulāraṃ maññanti.

Niccato addakkhunti niccanti addasaṃsu. Sesapadesupi e seva nayo. **Na parimuccimṣu dukkhaṃ** sakalasmāpi vaṭṭadukkhā na parimuccimṣu. **Dakkhissanti** passissanti. **Āpānīyakāṃsoti** sarakassa nāmaṃ. Yasmā panettha āpaṃ pivanti, tasmā “āpānīyo”ti vuccati. Āpānīyo ca so kaṃso cāti āpānīyakāṃso. Surāmaṇḍasarakassetam nāmaṃ. “Vaṇṇasampanno”tiādivacanato pana kaṃse ṭhitapānameva evaṃ vuttam. **Ghammābhitattoti** ghammena abhitatto. **Ghammaparetoti** ghammena phuṭṭho, anugatoti attho. **Pivato hi kho taṃ chādessati** pivantassa taṃ pānīyaṃ vaṇṇadisampattiya ruccissati, sakalasarāmaṃ vā pharivā tuṭṭhiṃ uppādayamānaṃ ṭhassati. **Appaṭisaṅkhāti** apaccavekkhitvā.

Evameva khoti ettha idaṃ opammasaṃsandanaṃ – āpānīyakāṃso viya hi loke piyarūpaṃ sātārūpaṃ ārammaṇaṃ datṭhabbaṃ, ghammābhitattapuriso viya vaṭṭanissito puthujjano, āpānīyakāṃsena nimantanapuriso viya loke piyarūpena sātārūpena ārammaṇena nimantakajano, āpānīyakāṃse sampattiṅca ādīnavaṅca āroceto āpānakamanusso viya ācariyupajjhāyādiko kalyāṇamitto. Yatheva hi tassa purisassa apalokitamanusso āpānīyakāṃse guṇaṅca ādīnavaṅca āroceti, evameva ācariyo vā upajjhāyo vā bhikkhuno pañcasu kāmagaṇesu assādaṅca nissaraṅca katheti.

Tattha yathā āpānīyakāṃsamhi guṇe ca ādīnave ca ārocite so puriso piyavaṇṇadisampadāyameva sañjāvego “sace maraṇaṃ bhavissati, pacchā jānissāmī”ti sahasā appaṭisaṅkhāya taṃ pivitvā maraṇaṃ vā maraṇamattaṃ vā dukkhaṃ nigacchati, evameva, bhikkhu, “pañcasu kāmagaṇesu dassanādivasena uppannasomanassamattameva assādo, ādīnavo pana diṭṭhadhammikasamparāyiko bahu nānappakāro, appassādā kāmā bahudukkhā bahupāyāsā”ti evaṃ ācariyupajjhāyehi ānisaṃsaṅca ādīnavaṅca kathetvā – “samaṇapaṭipadaṃ paṭipajja, indriyesu guttadvāro bhava bhojane mattaññū jāgariyaṃ anuyutto”ti evaṃ ovaḍitopi assādabaddhacittatāya “sace vuttappakāro ādīnavo bhavissati, pacchā jānissāmī”ti ācariyupajjhāye apasādetvā uddesaparipucchādīni ceva vattapaṭipattiṅca pahāya lokāmisakathaṃ kathento kāme paribhuñjitukāmatāya sikkhaṃ paccakkhāya hīnāyāvattati. Tato duccharitāni pūrento sandhicchedanādikāle “coro aya”nti gahetvā rañño dassito idheva hatthapādādīchedanaṃ patvā samparāye catūsu apāyesu mahādukkhaṃ anubhoti.

Pānīyena vā vinetunti sītena vārinā harituṃ. **Dadhimaṇḍakenāti** dadhimaṇḍanamattena. **Bhaṭṭhaloṇikāyāti** saloṇena sattupānīyena. **Loṇasovīraakenāti** sabbadhaññaphalakaḷīrādīni pakkhipitvā loṇasovīraṃ nāma karonti, tena.

Opammasaṃsandanaṃ panettha – ghammābhitattapuriso viya vaṭṭasannissitakāle yogāvacarō datṭhabbo, tassa purisassa paṭisaṅkhā āpānīyakāṃsam pahāya pānīyādīhi pipāsassa vinodanaṃ viya bhikkhuno ācariyupajjhāyānaṃ ovāde ṭhatvā chadvārādīni pariggahetvā anukkamena vipassanaṃ vaḍḍhentassa arahattaphalādhigamo, pānīyādīni cattāri pānāni viya hi cattāro maggā, tesu aññataraṃ pivitvā surāpipāsitaṃ vinodetvā sukhino yena kāmam gamaṇaṃ viya khīṇāsavassa catumaggapānaṃ pivitvā taṇhaṃ vinodetvā agatapubbaṃ nibbānadiṣaṃ gamanakālo veditabbo. Chatṭhaṃ.

7. Naḷakalāpīsuttavaṇṇanā

67. Sattame **kinnu kho, āvusoti** kasmā pucchati? “Evaṃ puṭṭho kathaṃ nu kho byākareyyā”ti. Therassa ajjhāsaya jānanatthaṃ. Apica atīte dve aggasāvaka imam pañhaṃ vinicchayaṃsūti anāgate bhikkhū jānissantītipi pucchati. **Idāneva kho mayanti** idaṃ thero yassa nāmarūpassa viññāṇaṃ paccayoti vuttam, tadeva nāmarūpaṃ viññāṇassa paccayoti vuttatā āha. **Naḷakalāpiyoti** idha pana ayakalāpādivasena upamaṃ anāharitvā viññāṇanāmarūpānaṃ abaladubbala bhāvadassanatthaṃ ayaṃ upama ābhata.

Nirodho hotīti ettake ṭhāne paccayuppannapañcavokārabhavavasena desanā kathitā. **Chattimsāya vatthūhīti** heṭṭhā vissajjitesu dvādasasu padesu ekekasmim tiṇṇam tiṇṇam vasena chattimsāya kāraṇehi. Ettha ca paṭhamo dhammakathikagaṇo, dutiyā paṭipatti, tatiyaṃ paṭipattiphalaṃ. Tattha paṭhamanayena

desanāsampatti kathitā, dutiyena sekkhabhūmi, tatiyena asekkhabhūmīti. Sattamaṃ.

8. Kosambisuttavaṇṇanā

68. Aṭṭhame **aññatrevā**ti ekacco hi parassa saddahitvā yaṃ esa bhaṇati, taṃ bhūtanti gaṇhāti. Aparassa nisīditvā cintentassa yaṃ kāraṇaṃ ruccati, so “atthi eta”nti ruciyā gaṇhāti. Eko “cirakālato paṭṭhāya evaṃ anussavo atthi, bhūtameta”nti anussavena gaṇhāti. Aññassa vitakkayato ekaṃ kāraṇaṃ upaṭṭhāti, so “attheta”nti ākāraparivitakkena gaṇhāti. Aparassa cintayato ekā diṭṭhi uppajjati, yāyassa taṃ kāraṇaṃ nijjhāyantassa khamati, so “attheta”nti diṭṭhinijjhānakkhantiyā gaṇhāti. Thero pana pañcapi etāni kāraṇāni paṭikkhipitvā paccakkhañāṇena paṭividdhabhāvaṃ pucchanto **aññatreva**, **āvuso musila**, **saddhāyāti**ādīmāha. Tattha **aññatrevā**ti saddhādīni kāraṇāni ṭhapetvā, vinā etehi kāraṇehīti attho. **Bhavanirodho nibbānanti** pañcakkhandhanirodho nibbānaṃ.

Tuṇhī ahosīti thero khīṇāsavo, ahaṃ pana khīṇāsavoti vā na vāti vā avatvā tuṇhīyeva aho. **Āyasmā nārado āyasmantaṃ pavitṭhaṃ etadavocā**ti kasmā avoca? So kira cintesi – “bhavanirodho nibbānaṃ nāmāti sekhehipi jānitabbo pañho esa, ayaṃ pana thero imaṃ theramaṃ asekkhabhūmiyā kāreti, imaṃ ṭhānaṃ jānāpessāmī”ti etaṃ avoca.

Sammappaññāya sudiṭṭhanti saha vipassanāya maggapaññāya suṭṭhu diṭṭhaṃ. **Na camhi arahanti** anāgāmimagge ṭhitattā arahamaṃ na homīti dīpeti. Yaṃ panassa idāni “bhavanirodho nibbāna”nti ñāṇaṃ, taṃ ekūnavīsatiyā paccavekkhaṇañāṇehi vimuttaṃ paccavekkhaṇañāṇaṃ. **Udapānoti** vīsatisahatthagambhīro pānīyakūpo. **Udakavārakoti** udakaussiñcanavārako. **Udakanti hi kho ñāṇaṃ assāti** tīre ṭhitassa olokayato evaṃ ñāṇaṃ bhaveyya. **Na ca kāyena phusitvāti** udakaṃ pana nīharitvā kāyena phusitvā viharitumaṃ na sakkuṇeyya. Udapāne udakadassanaṃ viya hi anāgāmīno nibbānadassanaṃ, ghammābhitattapuriso viya anāgāmī, udakavārako viya arahattamaggo, yathā ghammābhitattapuriso udapāne udakaṃ passati. Evaṃ anāgāmī paccavekkhaṇañāṇena “upari arahattaphalasaṃmayo nāma atthi”ti jānāti. Yathā pana so puriso udakavārakassa natthitāya udakaṃ nīharitvā kāyena phusitumaṃ na labhati, evaṃ anāgāmī arahattamaggassa natthitāya nibbānaṃ ārammaṇaṃ katvā arahattaphalasaṃpattiṃ appētvaṃ nisīditumaṃ na labhati. Aṭṭhamaṃ.

9. Upayantisuttavaṇṇanā

69. Navame **upayantoti** udakavaḍḍhanasamaye upari gacchanto. **Mahānadiyoti** gaṅgāyamunādikā mahāsaritāyo. **Upayāpetīti** upari yāpeti, vaḍḍheti pūretīti attho. **Avijjā upayantīti** avijjā upari gacchantī saṅkhārānaṃ paccayo bhavitumaṃ sakkuṇantī. **Saṅkhāre upayāpetīti** saṅkhāre upari yāpeti vaḍḍheti. Evaṃ sabbapadesu attho veditabbo. **Apayantoti** apagacchanto osaranto. **Avijjā apayantīti** avijjā apagacchamānā osaramānā upari saṅkhārānaṃ paccayo bhavitumaṃ na sakkuṇantīti attho. **Saṅkhāre apayāpetīti** saṅkhāre apagacchāpeti. Esa nayo sabbapadesu. Navamaṃ.

10. Susimasuttavaṇṇanā

70. Dasame **garukatoti** sabbehi devamanussehi pāsānacchattaṃ viya cittaṃ garukato. **Mānitoti** manena piyāyito. **Pūjitoti** catupaccayapūjāya pūjito. **Apacitoti** nīcavuttikaraṇena apacito. Sathhārañhi disvā manussā hatthikkhandhādīhi otaranti maggaṃ denti, aṃsakūṭato sātakaṃ apanenti, āsanato vuṭṭhahanti vandanti. Evaṃ so tehi apacito nāma hoti. **Susimoti** evaṃnāmako vedaṅgesu kusalo paṇḍitaparibbājako. **Ehi tvanti** tesamaṃ kira etadahosi – “samaṇo gotamo na jātigottādīni āgama lābhaggappatto jāto, kaviseṭṭho panesa uttamakavitāya sāvakānaṃ ganthaṃ bandhitvā deti, taṃ te uggaṇhitvā upaṭṭhākānaṃ upanisinnakathampi anumodanampi sarabhaññampīti evamādīni kathenti, te tesamaṃ pasannā lābhaṃ upasaṃharanti. Sace mayaṃ yaṃ samaṇo gotamo jānāti, tato thokaṃ jāneyyāma, attano samayaṃ tattha pakkhipitvā mayampi upaṭṭhākānaṃ katheyyāma, tato etehi lābhitarā bhaveyyāma. Ko nu kho samaṇassa gotamassa santike pabbajitvā khippameva uggaṇhitumaṃ

sakkhissatī”ti. Te evaṃ cintetvā “susimo paṭibalo”ti disvā taṃ upasaṅkamtivā evamāhaṃsu.

Yenāyasmā ānando tenupasaṅkamīti kasmā upasaṅkami? Evaṃ kirassa ahosi, “kassa nu kho santikaṃ gantvā ahaṃ imaṃ dhammaṃ khippaṃ laddhuṃ sakkhissāmī”ti? Tato cintesi – “samaṇo gotamo garu tejussado niyamamanuyutto, na sakkā akāle upasaṅkamtuṃ, aññeṇi bahū khattiyādayo samaṇaṃ gotamaṃ upasaṅkamanti, tasmimpi samaye na sakkā upasaṅkamtuṃ. Sāvakesupissa sārīputto mahāpañño vipassanālakkaṇamhi etadagge ṭhapito, mahāmogallāno samādhilakkaṇasmiṃ etadagge ṭhapito, mahākassapo dhutaṅgadhāresu anuruddho dibbacakkhukesu, puṇṇo mantāṇīputto dhammakathikesu, upālithero vinayadhāresu etadagge ṭhapito, ayaṃ pana ānando bahussuto tīpīṭakadhāro, satthāpissa tattha tattha kathitaṃ dhammaṃ āharitvā katheti, pañcasu ṭhānesu etadagge ṭhapito, aṭṭhannaṃ varānaṃ lābhī, catūhi acchāriyabbhūtaḍḍhammehi samannāgato, tassa samīpaṃ gato khippaṃ dhammaṃ laddhuṃ sakkhissāmī”ti. Tasmā yenāyasmā ānando tenupasaṅkami.

Yena bhagavā tenupasaṅkamīti kasmā sayaṃ apabbājetvā upasaṅkami? Evaṃ kirassa ahosi – “ayaṃ tīthiyasamaye pāṭiyekko ‘ahaṃ satthā’ti paṭijānanto carati, pabbajitvā sāsanaṃ alābhāyapi parisakkeyya. Na kho panassāhaṃ ajjhāsayaṃ ājānāmi, satthā jānissatī”ti. Tasmā taṃ ādāya yena bhagavā tenupasaṅkami. **Tenaḥānanda, susimaṃ pabbājethāti** satthā kira cintesi – “ayaṃ paribbājako tīthiyasamaye ‘ahaṃ pāṭiyekko satthā’ti paṭijānamāno carati, ‘idha maggabrahmacariyaṃ caritūṃ icchāmī’ti kira vadatī. Kiṃ nu kho mayi pasanno, udāhu mayhaṃ sāvakesu, udāhu mayhaṃ vā mama sāvakanāṃ vā dhammakathāya pasanno”ti? Athassa ekaṭṭhānēpi pasādābhāvaṃ ñatvā, “ayaṃ mama sāsane dhammaṃ thenessāmīti pabbajati. Itissa āgamaṇaṃ aparissuddhaṃ; nipphatti nu kho kīdisā”ti? Olokento “kiñcāpi ‘dhammaṃ thenessāmī’ti pabbajati, katipāheneva pana ghaṭetvā arahattaṃ gaṇhissatī”ti ñatvā “tenaḥānanda, susimaṃ pabbājethā”ti āha.

Aññā byākatā hotīti te kira bhikkhū satthu santike kammatṭhānaṃ gahetvā temāsaṃ vassaṃ vasantā tasmīṃyeva antotemāse ghaṭentā vāyamaṇā arahattaṃ paṭilabhiṃsu. Te “paṭiladdhaguṇaṃ satthu āroccesāma”ti pavāritapavāraṇā senāsanaṃ saṃsāmetvā satthu santikaṃ āgantvā attano paṭiladdhaguṇaṃ āroccesuṃ. Taṃ sandhāyetaṃ vuttaṃ. **Aññāti** arahattassa nāmaṃ. **Byākatāti** ārocitā. **Assosīti** so kira ohitasoto hutvā tesāṃ tesāṃ bhikkhūnaṃ ṭhitaṭṭhānaṃ gacchati taṃ taṃ kathaṃ suṇitukāmo. **Yena te bhikkhū tenupasaṅkamīti** kasmā upasaṅkami? Taṃ kirassa pavattim sutvā etadahosi – “aññā nāma imasmiṃ sāsane paramappamaṇaṃ sārābhūtā ācariyaṃuṭṭhi maññe bhavissati, pucchitvā naṃ jānissāmī”ti. Tasmā upasaṅkami.

Anekavihitanti anekavidhaṃ. **Iddhividhanti** iddhikoṭṭhāsaṃ. **Āvibhāvaṃ tirobhāvanti** āvibhāvaṃ gahetvā tirobhāvaṃ, tirobhāvaṃ gahetvā āvibhāvaṃ kātuṃ sakkothāti pucchati. **Tirokuṭṭanti** parakuṭṭaṃ. Itarapadadvayepi eseva nayo. **Ummujjanimujjanti** ummujjanañca nimujjanañca. **Pallaṅkenāti** pallaṅkabandhanaṃ. **Kamathāti** nisīdituṃ vā gantuṃ vā sakkothāti pucchati? **Pakkhī sakuṇoti** pakkhayutto sakuṇo. Ayamettha saṅkhepo, vitthārato pana imassa iddhividhassa, ito paresaṃ dibbasotādānañca vaṇṇanāyayo visuddhimagge vuttanayena vedittabboti.

Santā vimokkhāti aṅgasantatāya ceva ārammaṇasantatāya ca santā āruppavimokkhā. **Kāyena phusitvāti** nāmakāyena phusitvā paṭilabhitvā. **Paññāvimuttā kho mayam, āvusoti, āvuso, mayam** nijjhānakā sukkhavipassakā paññāmatteva vimuttāti dasseti. **Ājāneyyāsī vā tvam, āvuso susima, na vā tvam ājāneyyāsīti** kasmā evamāhaṃsu? Evaṃ kira nesam ahosi – “mayam imassa ajjhāsayaṃ gahetvā kathetuṃ na sakkhissāma, dasabalaṃ pana pucchitvā nikkāṅkho bhavissatī”ti. **Dhammatṭhitiñāṇanti** vipassanāñāṇaṃ, taṃ paṭhamataraṃ uppajjati. **Nibbāne ñāṇanti** vipassanāya ciṇṇante pavattamaggañāṇaṃ, taṃ pacchā uppajjati. Tasmā bhagavā evamāha.

Ājāneyyāsī vātīadi kasmā vuttaṃ? Vināpi samādhim evaṃ ñāṇuppattidassanattaṃ. Idañhi vuttaṃ hoti – susima, maggo vā phalaṃ vā na samādhinissando, na samādhīnisamso, na samādhissa nipphatti, vipassanāya paneso nissando, vipassanāya ānisamso, vipassanāya nipphatti, tasmā jāneyyāsī vā tvam, na

vā tvam jāneyyāsi, atha kho dhammaṭṭhitiñāṇaṃ pubbe, pacchā nibbāne ñāṇanti.

Idānissa paṭivedhabhabbatam ñatvā te parivaṭṭam dhammadesanaṃ desento **taṃ kiṃ maññasi, susima? Rūpaṃ niccaṃ vā aniccaṃ vā**tiādimāha? Te parivaṭṭadesanāvasāne pana thero arahattaṃ patto. Idānissa anuyogaṃ āropento **jātipaccayā jarāmarañanti, susima, passasī**tiādimāha. **Api pana tvam, susimā**ti idam kasmā ārabhi? Nijjhānakānaṃ sukkhavipassakabhikkhūnaṃ pākātakaraṇattham. Ayañhettha adhippāyo – na kevalaṃ tvameva nijjhānako sukkhavipassako, etepi bhikkhū evarūpāyevāti. Sesam sabbattha pākātamevāti. Dasamaṃ.

Mahāvaggo sattamo.

8. Samaṇabrāhmaṇavaggo

1. Jarāmarāṇasuttādivaṇṇanā

71-72. Samaṇabrāhmaṇavagge jarāmarāṇādīsu ekekapadavasena ekekaṃ katvā ekādasa suttāni vuttāni, tāni uttānatthānevāti.

Samaṇabrāhmaṇavaggo aṭṭhamo.

9. Antarapeyyālam

1. Satthusuttādivaṇṇanā

73. Ito paraṃ “sathā pariyesitabbo”tiādinayappavattā dvādasa antarapeyyālavaggā nāma honti. Te sabbepi tathā tathā bujjanakānaṃ veneyyapuggalaṇaṃ ajjhāsaya vasena vuttā. Tattha **sathā**ti buddho vā hotu sāvako vā, yaṃ nissāya maggañāṇaṃ labhati, ayaṃ sathā nāma, so pariyesitabbo. **Sikkhā karaṇīyā**ti tividhāpi sikkhā kātabbā. Yogādīsu **yogoti** payogo. **Chandoti** kattukamyatākusalacchando. **Ussolhī**ti sabbasahaṃ adhimattavīriyaṃ. **Appaṭivānī**ti anivattanā. **Ātappanti** kilesatāpanavīriyameva. **Sātaccanti** satatakiriyaṃ. **Satī**ti jarāmarāṇādivasena catusaccapariggāhikā satī. **Sampajaññanti** tādīsameva ñāṇaṃ. **Appamādoti** saccabhāvanāya appamādo. Sesam sabbattha uttānamevāti.

Antarapeyyālo navamo.

Nidānasamuyuttavaṇṇanā niṭṭhitā.

2. Abhisamayasaṃyuttam

1. Nakhasikhāsuttavaṇṇanā

74. Abhisamayasaṃyuttassa paṭhame **nakhasikhāyanti** maṃsaṭṭhānena vimutte nakhagge. Nakhasikhā ca nāma lokiyānaṃ mahatīpi hoti, sathu pana rattuppalapattakoṭi viya sukhumā. Kathaṃ panettha paṃsu patiṭṭhitoti? Adhiṭṭhānabalena. Bhagavatā hi atthaṃ ñāpetukāmena adhiṭṭhānabalena tattha patiṭṭhāpito. **Satimaṃ kalanti** mahāpathaviyā paṃsuṃ satakoṭṭhāse katvā tato ekakoṭṭhāsaṃ. Paratopi eseva nayo. **Abhisametāvinoti** paññāya ariyasaccāni abhisametvā ṭhitassa. **Purimaṃ dukkhakkhandhaṃ parikkhīṇaṃ pariyādiṇṇaṃ upanidhāyā**ti etadeva bahutaraṃ dukkhaṃ, yadidaṃ parikkhīṇanti evaṃ paṭhamaṃ vuttam dukkhakkhandhaṃ upanidhāya, ñāṇena taṃ tassa santike ṭhapetvā upaparikkhīyamāneti attho. Katamaṃ panettha purimadukkhaṃ nāma? Yaṃ parikkhīṇaṃ. Katamaṃ pana parikkhīṇaṃ? Yaṃ paṭhamamaggassa abhāvitattā uppajjeyya. Katamaṃ pana upanidhāya? Yaṃ sattasu attabhāvesu apāye aṭṭhamañca paṭisandhiṃ ādiṃ katvā yattha katthaci

uppajjeyya, sabbaṃ taṃ parikkhīṇanti veditabbaṃ. **Sattakkhattunti** satta vāre, sattasu attabhāvesūti attho. **Paramatāti** idamassa paraṃ pamāṇanti dasseti. **Mahatthiyoti** mahato atthassa nipphāḍako. Paṭhamam.

2. Pokkharāṇīsuttavaṇṇanā

75. Dutiye **pokkharāṇīti** vāpī. **Ubbedhenāti** gambhīratāya. **Samatittikāti** mukhavaṭṭisamā. **Kākapeyyāti** sakkā hoti tīre ṭhitena kākena pakatīyāpi mukhatuṇḍikaṃ otāretvā pātuṃ. Dutiyaṃ.

3. Saṃbhejjaudakasuttādivaṇṇanā

76-77. Tatiye **yatthimāti** yasmiṃ sambhijjaṭṭhāne imā. **Saṃsandantīti** samāgantvā sandanti. **Samentīti** samāgacchanti. **Dve vā ti vāti** dve vā tīṇi vā. **Udakaphusitānīti** udakabindūni. **Saṃbhejjaudakanti** aññāhi nadīhi saddhiṃ sambhinnaṭṭhāne udakaṃ. Catutthaṃ uttānatthameva. Tatiyacatutthāni.

5. Pathavīsuttādivaṇṇanā

78-84. Pañcame **mahāpathaviyāti** cakkavāḷabbhantarāya mahāpathaviyā uddharitvā. **Kolaṭṭhimattiyoti** padaraṭṭhipamāṇā. **Guḷikāti** mattikaguḷikā. **Upanikkhipeyyāti** ekasmiṃ ṭhāne ṭhapeyya. Chaṭṭhādīsū vuttanayeneva attho veditabbo. Pariyosāne pana **aññatitthiyasamaṇabrāhmaṇaparibbājakānaṃ adhiḡamoti** bāhirakānaṃ sabbopi guṇādhiḡamo paṭhamamaggena adhiḡataguṇānaṃ satabhāḡampī sahasabhāḡampī satahasabhāḡampī na upagacchatīti. Pañcamādīni.

Abhisamayasaṃyuttavaṇṇanā niṭṭhitā.

3. Dhātusaṃyuttaṃ

1. Nānattavaggo

1. Dhātunānattasuttavaṇṇanā

85. Dhātusaṃyuttassa paṭhame nissattaṭṭhasuññataṭṭhasaṅkhātena sabhāvaṭṭhena dhātūti laddhanāmānaṃ dhammānaṃ nānāsabhāvo **dhātunānattaṃ**. **Cakkhudhātūti**ādīsū cakkhupasādo cakkhudhātu, rūpārammaṇaṃ rūpadhātu, cakkhupasādavatthukaṃ cittaṃ cakkhaviññāṇadhātu. Sotapasādo sotadhātu, saddārammaṇaṃ saddadhātu, sotapasādavatthukaṃ cittaṃ sotaviññāṇadhātu. Ghānapasādo ghānadhātu, gandhārammaṇaṃ gandhadhātu, ghānapasādavatthukaṃ cittaṃ ghānaviññāṇadhātu. Jivhāpasādo jivhadhātu, rasārammaṇaṃ rasadhātu, jivhāpasādavatthukaṃ cittaṃ jivhaviññāṇadhātu. Kāyapasādo kāyadhātu, phoṭṭhabbārammaṇaṃ phoṭṭhabbadhātu, kāyapasādavatthukaṃ cittaṃ kāyaviññāṇadhātu. Tisso manodhātuyo manodhātu, vedanādayo tayo khandhā sukhumarūpāni nibbānañca dhammadhātu, sabbampi manoviññāṇaṃ manoviññāṇadhātūti. Ettha ca soḷasa dhātuyo kāmāvacarā, avasāne dve catubhūmikāti. Paṭhamam.

2. Phassanānattasuttavaṇṇanā

86. Dutiye **uppajjati phassanānattanti** nānāsabhāvo phasso uppajjati. Tattha cakkhusamphassādayo cakkhaviññāṇādisampayuttā, manosamphasso manodvāre paṭhamajavanasampayutto, tasmā. **Manodhātuṃ paṭiccāti** manodvārāvajjanaṃ kiriyāmanoviññāṇadhātuṃ paṭicca paṭhamajavanasamphasso uppajjatīti ayamettha attho. Dutiyaṃ.

3. Nophassanānattasuttavaṇṇanā

87. Tatiye **no manosamphassaṃ paṭicca uppajjati manodhātūti** manodvāre paṭhamajavanasampayuttaṃ phassaṃ paṭicca āvajjanakiriyāmanoviññādhātu no uppajjatīti evamattho daṭṭhabbo. Tatiyaṃ.

4. Vedanānānattasuttavaṇṇanā

88. Catutthe **cakkhusamphassajā vedanāti** sampaṭicchana manodhātuto paṭṭhāya sabbāpi tasmim dvāre vedanā vatteyyuṃ, nibbatti phāsukatthaṃ pana anantaraṃ sampaṭicchana vedanameva gahetuṃ vaṭṭatīti vuttaṃ. **Manosamphassaṃ paṭiccāti** manodvāre āvajjanasamphassaṃ paṭicca paṭhamajavanavedanā, paṭhamajavanasamphassaṃ paṭicca dutiyajavanavedanāti ayamadhippāyo. Catutthaṃ.

5. Dutiyavedanānānattasuttavaṇṇanā

89. Pañcame tatiyacatutthesu vuttanayāva ekato katvā desitāti. Iti dutiyādīsu catūsu suttesu manodhātuṃ manodhātūti agahetvā manodvārāvajjanaṃ manodhātūti gahitaṃ. Sabbāni cetāni tathā tathā kathite bujjanakānaṃ ajjhāsayaena desitāni. Ito paresupi eseva nayo. Pañcamaṃ.

6. Bāhiradhātunānattasuttavaṇṇanā

90. Chaṭṭhe pana pañca dhātuyo kāmāvacarā, dhammadhātu catubhūmikāti. Chaṭṭhaṃ.

7. Saññānānattasuttavaṇṇanā

91. Sattame **rūpadhātūti** āpāthe patitaṃ attano vā parassa vā sāṭakaveṭhanādivatthukaṃ rūpārammaṇaṃ. **Rūpasaññāti** cakkhuviññānasampayuttā saññā. **Rūpasaṅkappoti** sampaṭicchana dīhi tīhi cittehi sampayutto saṅkappo. **Rūpacchandoti** rūpe chandikataṭṭhena chando. **Rūpapariḷāhoti** rūpe anuḍhanaṭṭhena pariḷāho. **Rūpapariyesanāti** pariḷāhe uppanne sandiṭṭhasambhatte gahetvā tassa rūpassa paṭilābhatthāya pariyesanā. Ettha ca saññāsaṅkappachandā ekajavanavārepi nānājavanavārepi labbhanti, pariḷāhapariyesanā pana nānājavanavāreyeva labbhantīti. **Evaṃ kho, bhikkhave, dhātunānattanti** ettha ca evaṃ rūpādīnānāsabhāvaṃ dhātuṃ paṭicca rūpasaññādinānāsabhāvasaññā uppajjatīti iminā nayena attho veditabbo. Sattamaṃ.

8. Nopariyesanānānattasuttavaṇṇanā

92. Aṭṭhame **no dhammapariyesanaṃ paṭicca uppajjati dhammapariḷāhoti** evaṃ āgataṃ paṭisedhamattameva nānaṃ. Aṭṭhamaṃ.

9. Bāhiraphassanānattasuttādivaṇṇanā

93-94. Navame **uppajjati rūpasaññāti** vuttappakāre ārammaṇe uppajjati saññā. **Rūpasaṅkappoti** tasmimyeva ārammaṇe tīhi cittehi sampayuttasaṅkappo. **Rūpasamphassoti** tadevārammaṇaṃ phusamāno **phasso**. **Vedanāti** tadeva ārammaṇaṃ anubhavamānā vedanā. Chandādayo vuttanayāva. **Rūpalābhoti** pariyesitvā laddhaṃ saha taṇhāya ārammaṇaṃ “rūpalābho”ti vuttaṃ. Ayaṃ tāva sabbasaṅgāhikanayo ekasmim yevārammaṇe sabbadhammānaṃ uppattivāsena vutto. Aparo āgantukārammaṇamissako hoti – rūpasaññā rūpasaṅkappo phasso vedanāti ime tāva cattāro dhammā dhuvaparibhoge nibaddhārammaṇe honti. Nibaddhārammaṇaṃhi iṭṭhaṃ kantaṃ manāpaṃ piyaṃ yaṃkiñci viya upaṭṭhāti, āgantukārammaṇaṃ pana yaṃkiñci samānampi khobhetvā tiṭṭhāti.

Tatridaṃ vatthu – eko kira amaccaputto gāmiyehi parivārito gāmamajjhe tathvā kammaṃ karoti. Tasmīncassa samaye upāsikā nadim̄ gantvā nhatvā alaṅkatapaṭiyattā dhātigaṇaparivutā gehaṃ gacchati. So dūrato disvā “āgantukamātugāmo bhavissati”ti saññaṃ uppādetvā “gaccha, bhāṇe jānāhi, kā esā”ti purisaṃ pesesi. So gantvā taṃ disvā paccāgato, “kā esā”ti puṭṭho yathāsabhāvaṃ ārocesi. Evaṃ āgantukāraṃmaṇaṃ khobheti. Tasmim̄ uppanno chando rūpachando nāma, tadeva āraṃmaṇaṃ katvā uppanno pariḷāho rūpapariḷāho nāma, sahāye gaṇhitvā tassa pariyesanaṃ rūpapariyesanā nāma, pariyesitvā laddhaṃ saha taṇhāya āraṃmaṇaṃ rūpalābho nāma.

Uruvallyavāsī cūḷatissatthero panāha – “kiñcāpi bhagavatā phassavedanā pāḷiyā majjhe gahitā, pāḷim̄ pana parivaṭṭetvā vuttappakāre āraṃmaṇe uppannā saññā rūpasaññā, tasmim̄yeva saṅkappo rūpasaṅkappo tasmim̄ chando rūpacchando, tasmim̄ pariḷāho rūpapariḷāho, tasmim̄ pariyesanā rūpapariyesanā, pariyesitvā laddhaṃ saha taṇhāya āraṃmaṇaṃ rūpalābho. Evaṃ laddhāraṃmaṇe pana phusanaṃ phasso, anubhavanaṃ vedanā. Rūpasamphasso rūpasamphassajā vedanāti idaṃ dvayaṃ labbhati”ti. Aparampi avibhūtavāraṃ nāma gaṇhanti. Āraṃmaṇaṃhi sāṇipākārehi vā parikkhittaṃ tiṇapaṇṇādīhi vā paṭicchannaṃ hoti, taṃ “upaḍḍhaṃ diṭṭhaṃ me āraṃmaṇaṃ, suṭṭhu naṃ passissāmī”ti olokayato tasmim̄ āraṃmaṇe uppannā saññā rūpasaññā nāma. Tasmim̄yeva uppannā saṅkappādayo rūpasaṅkappādayo nāmāti veditabbā. Etthāpi ca saññāsāṅkappaphassavedanāchanda ekajavanavārepi nānājavanavārepi labbhanti, pariḷāhapariyesanālābhā nānājavanavāreyevāti. Dasamaṃ uttānamevāti. Navamadasamāni.

Nānattavaggo paṭhamo.

2. Dutiyavaggo

1. Sattadhātusuttavaṇṇanā

95. Dutiyavaggassa paṭhame **ābhādhātūti** ālokadhātu. Ālokassapi ālokakasiṇe parikammaṃ katvā uppannajjhānassāpīti sahāraṃmaṇassa jhānassa etaṃ nāmaṃ. **Subhadhātūti** subhakasiṇe uppannajjhānavasena sahāraṃmaṇajjhānameva. Ākāsānañcāyatanaṃ eva **ākāsānañcāyanadhātu**. Saññāvedayitanirodhova **saññāvedayitanirodhadhātu**. Iti bhagavā anusandhikusalassa bhikkhuno tattha nisīditvā pañhaṃ pucchitukāmassa okāsaṃ dento desanaṃ niṭṭhāpesi.

Andhakāraṃ paṭiccāti andhakāro hi ālokena paricchinnō, ālokopi andhakārena. Andhakārena hi so pākaṭo hoti. Tasmā “andhakāraṃ paṭicca paññāyati”ti āha. **Asubhaṃ paṭiccāti** etthāpi eseva nayo. Asubhañhi subhena, subhañca asubhena paricchinnaṃ, asubhe satī subhaṃ paññāyati, tasmā evamāha. **Rūpaṃ paṭiccāti** rūpāvacaṇasamāpattim̄ paṭicca. Rūpāvacaṇasamāpattiyā hi satī ākāsānañcāyatanaṃ samāpatti nāma hoti rūpasamatikkamo vā, tasmā evamāha. **Viññāṇañcāyanadhātu** ādīsupi eseva nayo. **Nirodhaṃ paṭiccāti** catunnaṃ khandhānaṃ paṭisaṅkhāppavattim̄ paṭicca. Khandhanirodhañhi paṭicca nirodhasamāpatti nāma paññāyati, na khandhapavattim̄, tasmā evamāha. Ettha ca catunnaṃ khandhānaṃ nirodhova nirodhasamāpattīti veditabbo.

Kathaṃ samāpatti pattabbāti kathaṃ samāpattiyō kīdisā samāpattiyō nāma hutvā pattabbāti? **Saññāsamāpatti pattabbāti** saññāya atthibhāvena saññāsamāpattiyō saññāsamāpattiyō nāma hutvā pattabbā. **Saṅkhārāvasesasamāpatti pattabbāti** sukhumaṃsaṅkhārānaṃ avasiṭṭhatāya saṅkhārāvasesasamāpatti nāma hutvā pattabbā. **Nirodhasamāpatti pattabbāti** nirodhova nirodhasamāpatti nirodhasamāpatti nāma hutvā pattabbāti attho. Paṭhamam̄.

2. Sanidānasuttavaṇṇanā

96. Dutiyē **sanidānanti** bhāvanapuṃsakametaṃ, sanidāno sapaccayo hutvā uppajjati attho.

Kāmadhātuṃ, bhikkhave, paṭiccāti ettha kāmavitakkopi kāmadhātu kāmāvacaradhammāpi, visesato sabbākusalampi. Yathāha –

“Tattha katamā kāmadhātu? Kāmapaṭisaṃyutto takko vitakko saṅkappo appanā byappanā cetaso abhiniropanā micchāsaṅkappo, ayaṃ vuccati kāmadhātu. Heṭṭhato avīcinirayaṃ pariyantaṃ karitvā uparito paranimmitavasavattī deve antokaritvā yaṃ etasmiṃ antare etthāvacarā ettha pariyāpanā khandhadhātuāyatanā rūpā vedanā saññā saṅkhārā viññāṇaṃ, ayaṃ vuccati kāmadhātu. Sabbepi akusalā dhammā kāmadhātū”ti (vibha. 182).

Ettha sabbasaṅgāhikā asambhinnāti dve kathā honti. Kathaṃ? Kāmadhātuggahaṇena hi byāpādadhātuvihimsādhātuyo gahitā hontīti ayaṃ sabbasaṅgāhikā. Tāsaṃ pana dvinnaṃ dhātūnaṃ viṣuṃ āgatattā sesadhammā kāmadhātūti ayaṃ asambhinnakathā. Ayamidha gahetabbā imaṃ kāmadhātuṃ ārammaṇavasena vā sampayogavasena vā paṭicca kāmasaññā nāma uppajjati.

Kāmasaññāṃ paṭiccāti kāmasaññāṃ pana sampayogavasena vā upanissayavasena vā paṭicca kāmasaṅkappo nāma uppajjati. Iminā nayena sabbapadesu attho veditabbo. **Tīhi ṭhānehīti** tīhi kāraṇehi. **Micchā paṭipajjati** ayāthāvapaṭipadaṃ aniyyānikapaṭipadaṃ paṭipajjati.

Byāpādadhātuṃ, bhikkhaveti ettha byāpādavitakkopi byāpādadhātu byāpādopi. Yathāha –

“Tattha katamā byāpādadhātu? Byāpādapaṭisaṃyutto takko vitakko...pe... ayaṃ vuccati byāpādadhātu. Dasasu āghātavattḥūsu cittaṃ āghāto paṭivirodho kopo pakopo...pe... anattamanatā cittaṃ, ayaṃ vuccati byāpādadhātū”ti (vibha. 182).

Imaṃ byāpādadhātuṃ sahaṃjātapaccayādivasena paṭicca byāpādasaññā nāma uppajjati. Sesam purimanayeneva veditabbaṃ.

Vihimsādhātuṃ, bhikkhaveti ettha vihiṃsāvitakkopi vihiṃsādhātu vihiṃsāpi. Yathāha –

“Tattha katamā vihiṃsādhātu? Vihiṃsāpaṭisaṃyutto takko vitakko...pe... ayaṃ vuccati vihiṃsādhātu. Idhekacco pāṇinā vā leḍḍunā vā daṇḍena vā satthena vā rajjuyā vā aññataraññatarena vā satte viheṭṭheti. Yā evarūpā heṭṭhanā viheṭṭhanā hiṃsanā vihiṃsanā rosanā parūpaghāto, ayaṃ vuccati vihiṃsādhātū”ti (vibha. 182).

Imaṃ vihiṃsādhātuṃ sahaṃjātapaccayādivasena paṭicca vihiṃsāsaññā nāma uppajjati. Sesamidhāpi purimanayeneva veditabbaṃ.

Tiṇadāyēti tiṇagahane araññe. **Anayabyasananti** avuḍḍhiṃ vināsaṃ. **Evameva khoti** ettha sukkhatiṇadāyo viya ārammaṇaṃ daṭṭhabbaṃ, tiṇukkā viya akusalasaññā, tiṇakaṭṭhanissitā pāṇā viya ime sattā. Yathā sukkhatiṇadāye ṭhapitaṃ tiṇukkaṃ khippaṃ vāyāmitvā anibbāpentassa te pāṇā anayabyasanaṃ pāpuṇanti. Evameva ye samaṇā vā brāhmaṇā vā uppannaṃ akusalasaññāṃ vikkhambhanatadaṅgasamucchedappahānehi nappajahanti, te dukkhaṃ viharanti.

Visamagatanti rāgavisamādīni anugataṃ akusalasaññāṃ. **Na khippameva pajahatīti** vikkhambhanādivasena sīghaṃ nappajahati. **Na vinodetīti** na nīharati. **Na byantikarotīti** bhaṅgamattampi anavasesento na vigatantaṃ karoti. **Na anabhāvaṃ gametīti** na anuabhāvaṃ gameti. Evaṃ sabbapadesu na – kāro āharitabbo. **Pāṭikaṅkhāti** pāṭikaṅkhitabbā icchitabbā.

Nekkhammadhātuṃ, bhikkhaveti ettha nekkhammavitakkopi nekkhammadhātu sabbepi kusalā dhammā. Yathāha –

“Tattha katamā nekkhammadhātu? Nekkhammapaṭisaṃyutto takko vitakko...pe...

sammāsaṅkappo, ayaṃ vuccati nekkhammadhātū’’ti (vibha. 182).

Idhāpi duvidhā kathā. Nekkhammadhātuggahaṇena hi itarāpi dve dhātuyo gahaṇaṃ gacchanti kusaladhammapariyāpannattā, ayaṃ sabbasaṅgāhikā. Tā pana dhātuyo viṣuṃ dīpetabbāti tā ṭhapetvā sesā sabbakusalā nekkhammadhātūti ayaṃ asambhinnā. Imaṃ nekkhammadhātumaṃ sahaṃjātādīpaccayavasena paṭicca nekkhammasaññā nāma uppajjati. Saññādīni paṭicca vitakkādayo yathānurūpaṃ.

Abyāpādadhātum, bhikkhavi ettha abyāpādavitakkopi abyāpādadhātu abyāpādopi. Yathāha –

“Tattha katamā abyāpādadhātu? Abyāpādapaṭisaṃyutto takko...pe... ayaṃ vuccati abyāpādadhātu. Yā sattesu metti mettāyanā mettāyitattaṃ mettācetovimutti, ayaṃ vuccati abyāpādadhātū’’ti (vibha. 182).

Imaṃ abyāpādadhātumaṃ paṭicca vuttanayeneva abyāpādasaññā nāma uppajjati.

Avihimsādhātum, bhikkhavi etthāpi avihimsāvitakkopi avihimsādhātu karuṇāpi. Yathāha –

“Tattha katamā avihimsādhātu? Avihimsāpaṭisaṃyutto takko...pe... ayaṃ vuccati avihimsādhātu. Yā sattesu karuṇā karuṇāyanā karuṇāyitattaṃ karuṇācetovimutti, ayaṃ vuccati avihimsādhātū’’ti (vibha. 182).

Imaṃ avihimsādhātumaṃ paṭicca vuttanayeneva avihimsāsaññā nāma uppajjati. Sesamaṃ sabbattha vuttānusāreṇeva vedītabbaṃ. Dutīyaṃ.

3. Giṇṇakāvasathasuttavaṇṇanā

97. Tatiye **dhātum, bhikkhavi** ito paṭṭhāya ajjhāsayamaṃ dhātūti dīpeti. **Uppajjati saññāti** ajjhāsayamaṃ paṭicca saññā uppajjati, diṭṭhi uppajjati, vitakko uppajjati. Idhāpi “kaccāno paṇhaṃ pucchissatī’’ti tassa okāsadānatthamaṃ ettāvātāva desanaṃ niṭṭhāpesi. **Asammāsambuddhesūti** chasu sathāresu. **Sammāsambuddhāti** mayamasma sammāsambuddhāti. **Kim paṭicca paññāyatīti** kismiṃ sati hotīti? Sathārānaṃ uppannaṃ diṭṭhiṃ pucchati. Asammāsambuddhesu tesu sammāsambuddhā eteti evamaṃ uppannaṃ titthiyasāvākānampi diṭṭhiṃ pucchatiyeva.

Idāni yasmā tesamaṃ avijjādhātumaṃ paṭicca sā diṭṭhi hoti, avijjādhātu ca nāma mahatī dhātu, tasmā mahatiṃ dhātumaṃ paṭicca tassā uppattiṃ dīpento **mahatī kho esāti**ādīmāha. **Hīnaṃ, kaccāna, dhātumaṃ paṭiccāti** hīnaṃ ajjhāsayamaṃ paṭicca. **Paṇidhīti** cittaṭṭhapanamaṃ. Sā panesā itthibhāvaṃ vā makkaṭāditiracchānabhāvaṃ vā patthentassa uppajjati. **Hīno puggaloti** yassete hīnā dhammā uppajjanti, sabbo so puggalopi hīno nāma. **Hīnā vācāti** yā tassa vācā, sāpi hīnā. **Hīnaṃ ācikkhatīti** so ācikkhantopi hīnameva ācikkhati, desentopi hīnameva desetīti sabbapadāni yojetabbāni. **Upapattīti** dve upapattiyo paṭilābho ca nibbatti ca. Nibbatti hīnakulādivasena vedītabbā, paṭilābho cittuppādakkhaṇe hīnattikavasena. Kathamaṃ? Tassa hi pañcasu nīcakulesu uppajjanato hīnā nibbatti, vessasuddakulesu uppajjanato majjhimā, khattiyabrāhmaṇakulesu uppajjanato paṇītā. Dvādasākusalacittuppādānaṃ pana paṭilābhato hīno paṭilābho, tebhūmakadhammānaṃ paṭilābhato majjhimo, navalokuttaradhammānaṃ paṭilābhato paṇīto. Imasmiṃ pana ṭhāne nibbattiyeva adhippetāti. Tatiyaṃ.

4. Hīnādhimuttikasuttavaṇṇanā

98. Catutthe **samsandantīti** ekato honti. **Samentīti** samāgacchanti, nirantarā honti. **Hīnādhimuttikāti** hīnajjhāsayā. **Kalyāṇādhimuttikāti** kalyāṇajjhāsayā. Catutthamaṃ.

5. Caṅkamasuttavaṅṅanā

99. Pañcame **passatha noti** passatha nu. **Sabbe kho eteti** sārīputtatthero bhagavatā “etadaggaṃ, bhikkhave, mama sāvakaṇaṃ bhikkhūnaṃ mahāpaññaṇaṃ yadidaṃ sārīputto”ti (a. ni. 1.189) mahāpaññesu etadagge ṭhapito. Iti naṃ “khandhantaraṃ dhātvantaraṃ āyatanantaraṃ satipaṭṭhānabodhipakkhiyadhammantaraṃ tilakkhaṇāhataṃ gambhīraṃ pañhaṃ pucchissāma”ti mahāpaññaṇaṃ parivārenti. Sopi tesāṃ pathaviṃ pattharento viya sinerupādato vālikaṃ uddharanto viya cakkavālapabbataṃ bhindanto viya sineruṃ ukkhipanto viya ākāsaṃ vitthārento viya candimasūriye utthāpentō viya ca pucchitapucchitaṃ katheti. Tena vuttaṃ “sabbe kho ete, bhikkhave, bhikkhū mahāpañña”ti.

Mahāmoggallānōpi bhagavatā “etadaggaṃ, bhikkhave, mama sāvakaṇaṃ bhikkhūnaṃ iddhimantānaṃ yadidaṃ mahāmoggallāno”ti iddhimantesu etadagge ṭhapito. Iti naṃ “parikammaṃ ānisaṃsaṃ adhiṭṭhānaṃ vikubbanāṃ pucchissāma”ti iddhimantova parivārenti. Sopi tesāṃ vuttanayeneva pucchitapucchitaṃ katheti. Tena vuttaṃ “sabbe kho ete, bhikkhave, bhikkhū mahiddhikā”ti.

Mahākassapōpi bhagavatā “etadaggaṃ, bhikkhave, mama sāvakaṇaṃ bhikkhūnaṃ dhutavādānaṃ yadidaṃ mahākassapo”ti dhutavādesu etadagge ṭhapito. Iti naṃ “dhutaṅgaparihāraṃ ānisaṃsaṃ samodhānaṃ adhiṭṭhānaṃ bhedaṃ pucchissāma”ti dhutavādāva parivārenti. Sopi tesāṃ tatheva pucchitapucchitaṃ byākaroti. Tena vuttaṃ “sabbe kho ete, bhikkhave, bhikkhū dhutavādā”ti.

Anuruddhattherōpi bhagavatā “etadaggaṃ, bhikkhave, mama sāvakaṇaṃ bhikkhūnaṃ dibbacakkhukānaṃ yadidaṃ anuruddho”ti (a. ni. 1.192) dibbacakkhukesu etadagge ṭhapito. Iti naṃ “dibbacakkhussa parikammaṃ ānisaṃsaṃ upakkilesaṃ pucchissāma”ti dibbacakkhukāva parivārenti. Sopi tesāṃ tatheva pucchitapucchitaṃ katheti. Tena vuttaṃ “sabbe kho ete, bhikkhave, bhikkhū dibbacakkhukā”ti.

Puṇṇattherōpi bhagavatā “etadaggaṃ, bhikkhave, mama sāvakaṇaṃ bhikkhūnaṃ dhammakathikānaṃ yadidaṃ puṇṇo mantāniputto”ti (a. ni. 1.196) dhammakathikesu etadagge ṭhapito. Iti naṃ “dhammakathāya saṅkhepavithhāragambhīruttānavicitrakathādīsū taṃ taṃ ākāraṃ pucchissāma”ti dhammakathikāva parivārenti. Sopi tesāṃ “āvuso, dhammakathikena nāma ādīto parisāṃ vaṇṇetuṃ vaṭṭati, majjhe suññaṭaṃ pakāsetuṃ, ante catusaccavasena kūṭaṃ gaṇhītu”nti evaṃ taṃ taṃ dhammakathānaṃ ācikkhati. Tena vuttaṃ “sabbe kho ete, bhikkhave, bhikkhū dhammakathikā”ti.

Upālīttherōpi bhagavatā “etadaggaṃ, bhikkhave, mama sāvakaṇaṃ bhikkhūnaṃ vinayadharānaṃ yadidaṃ upālī”ti (a. ni. 1.228) vinayadharesu etadagge ṭhapito. Iti naṃ “garukalahukāṃ satekicchaatekicchaṃ āpattānāpattīṃ pucchissāma”ti vinayadharāva parivārenti. Sopi tesāṃ pucchitapucchitaṃ tatheva katheti. Tena vuttaṃ “sabbe kho ete, bhikkhave, bhikkhū vinayadharā”ti.

Ānandattherōpi bhagavatā “etadaggaṃ, bhikkhave, mama sāvakaṇaṃ bhikkhūnaṃ bahussutānaṃ yadidaṃ ānando”ti (a. ni. 1.223) bahussutesu etadagge ṭhapito. Iti naṃ “dasavidhaṃ byañjanabuddhiṃ aṭṭhuppattīṃ anusandhiṃ pubbāparaṃ pucchissāma”ti bahussutāva parivārenti. Sopi tesāṃ “idaṃ evaṃ vattabbaṃ, idaṃ evaṃ gahetabba”nti sabbaṃ katheti. Tena vuttaṃ “sabbe kho ete, bhikkhave, bhikkhū bahussutā”ti.

Devadatto pana pāpiccho icchāpakato, tena naṃ “kulaṅgaṇhanaparihāraṃ nānappakāraṃ kohaṇṇātaṃ pucchissāma”ti pāpicchāva parivārenti. Sopi tesāṃ taṃ taṃ niyāmaṃ ācikkhati. Tena vuttaṃ “sabbe kho ete, bhikkhave, bhikkhū pāpicchā”ti.

Kasmā panete avidūre caṅkamimsūti. “Devadatto satthari paduṭṭhacitto anathampi kātuṃ upakkameyyā”’ti ārakkhaggahaṇatthaṃ. Atha devadatto kasmā caṅkamīti? “Akārako ayaṃ, yadi kārako bhaveyya, na idha āgaccheyyā”’ti attano katadosapaṭicchādanatthaṃ. Kiṃ pana devadatto bhagavato anatham kātuṃ samattho, bhagavato vā ārakkhakkiccam atthīti? Natthi. Tena vuttaṃ “aṭṭhānametaṃ, ānanda, anavakāso, yaṃ tathāgato parūpakkamena parinibbāyeyyā”’ti (cūlava. 341). Bhikkhū pana satthari gāravena āgatā. Teneva bhagavā evaṃ vatvā “vissajjehi, ānanda, bhikkhusaṅgha”’nti vissajjāpesi. Pañcamam.

6. Sagāthāsuttavaṇṇanā

100. Chaṭṭhe **gūtho gūthena saṃsandati sametīti** samuddantare janapadantare cakkavāḷantare ṭhitopi vaṇṇenapi gandhenapi rasenapi nānattam anupagacchanto saṃsandati sameti, ekasadisova hoti nirantaro. Sesesupi eseva nayo. Ayaṃ pana aniṭṭhaupamā hīnājjhāsayaṇam hīnājjhāsayaṇassa sarikkhabhāvadassanattam āhaṭā, khīrādivisiṭṭhopamā kalyāṇājjhāsayaṇam ajjhāsayaṇassa sarikkhabhāvadassanattam.

Saṃsaggāti dassanasavanasaṃsaggādivatthukena taṇhāsnehena. **Vanatho jātoti** kilesavanam jātam. **Asaṃsaggena chijjati** ekato ṭhānanisajjādīni akarontassa asaṃsaggena adassanena chijjati. **Sādhujīvīti** parisuddhajīvitam jīvamāno. **Sahāvaseti** sahavāsam vaseyya. Chaṭṭham.

7. Assaddhasaṃsandanasuttavaṇṇanā

101. Sattame **assaddhā assaddhehīti**ādīsu buddhe vā dhamme vā saṅghe vā saddhāviraḥitā nirojā nirasā puggalā samuddassa orimatīre ṭhitā pārimatīrepi ṭhitehi assaddhehi saddhiṃ tāya assaddhatāya ekasadisā nīrantarā hontī. Tathā ahirikā bhinnamariyādā alajjipuggalā ahirikehi, anottappino pāpakiriyāya abhāyamānā anottappīhi, appassutā sutaviraḥitā appassutehi, kusītā ālasiyapuggalā kusītehi, muṭṭhassatino bhātanikkhittakākamamaṇikkhittasiṅgālasadisā muṭṭhassatīhi, duppaññā khandhādiparicchēdikāya paññāya abhāvena nippaññā tādisēheva duppaññehi, saddhāsampannā cetiyavandanādikkappasutā saddhehi, hirimanā lājipuggalā hirimanehi, ottappino pāpabhīrukā ottappīhi, bahussutā sutadharā āgamadharā tantipālakā vaṃsānurakkhākā bahussutehi, āradhāvīriyā paripuṇṇaparakkamā āradhāvīriyehi, upaṭṭhitassatī sabbakiccapariggāhikāya satiyā samannāgatā upaṭṭhitassatīhi, paññavanto mahāpaññehi vajirūpamaññehi paññavantehi saddhiṃ dūre ṭhitāpi tāya paññāsampattiyā saṃsandanti samenti. Sattamam.

8-12. Assaddhamūlakasuttādivaṇṇanā

102-106. Aṭṭhamādīni teyeva assaddhādīdhamme tikavasena katvā desitāni. Tattha aṭṭhame assaddhādīmūlakā kaṇhapakkhasukkapakkhavasena pañca tikā vuttā, navame ahirikamūlakā cattāro. Dasame anottappamūlakā tayo, ekādasame appassutamūlakā dve, dvādasame kusītamūlako eko tiko vuttoti sabbepi pañcasu suttantesu pannarasa tikā hontī. Pannarasa cete suttantātipi vadanti. Ayaṃ tikapeyyālo nāma. Aṭṭhamādīni.

Dutiyo vaggo.

3. Kammaṭṭhāvaggo

1-2. Asamāhitasuttādivaṇṇanā

107-108. Ito paresu paṭhamam assaddhādīpañcakavasena vuttaṃ, tathā dutiyam. Paṭhame pana asamāhitapadam catuttham, dutiye dussīlapadam. Evaṃ vuccamāne bujjanakapuggalānam ajjhāsayaṇa hi etāni vuttāni. Ettha **asamāhitāti** upacārappanāsamādhiraḥitā. **Dussīlāti** nissīlā. Paṭhamadutiyaṇi.

3-5. Pañcasikkhāpadasuttādivaṇṇanā

109-111. Tatiyaṃ pañcakammāpathavasena bujjanakānaṃ ajjhāsayaavasena vuttaṃ, catutthaṃ sattaṃkammāpathavasena, pañcamaṃ dasakammāpathavasena. Tattha tatiye **surāmerayamajjappamādaṭṭhāyino**ti surāmerayasankhātaṃ majjamaṃ yāya pamādacetanāya pivanti, sā “surāmerayamajjappamādo”ti vuccati, tasmim̐ tiṭṭhantīti surāmerayamajjappamādaṭṭhāyino. Ayaṃ tāvettha asādhāraṇapadassa attho.

Pañcame pāṇamaṃ atipātenti **pāṇātipātino**, pāṇaghātikāti attho. Adinnaṃ ādiyanti **adinnādāyino**, parassahārinoti attho. Vatthukāmesu kilesakāmena micchā caranti **kāmesumicchācāro**. Musā vadanti **musāvādino**, paresaṃ atthabhañjakaṃ tucchaṃ alikaṃ vācaṃ bhāsitaroti attho. Pisunā vācā etesanti **pisuṇavācā**. Mammachedikā pharusā vācā etesanti **pharusavācā**. Samphaṃ niratthakaṃ vacanaṃ palāpanti **samphappalāpino**. Abhijjhāyanti **abhijjhāluno**, parabhaṇḍe lubbhanasīlāti attho. Byāpannaṃ pūtibhūtaṃ cittametesanti **byāpannacittā**. Micchā pāpikā viññugarahitā etesaṃ diṭṭhīti **micchādiṭṭhikā**, kammāpathapariyāpannāya “natthi dinna”ntiādivatthukāya micchāpariyāpannāya aniyyānikadiṭṭhiyā samannāgatāti attho. Sammā sobhanā viññūpasatthā etesaṃ diṭṭhīti **sammādiṭṭhikā**, kammāpathapariyāpannāya “atthi dinna”ntiādikāya kammassakatadiṭṭhiyā sammāpariyāpannāya maggaḍḍhiyā ca samannāgatāti attho. Iduṃ tāvettha anuttānaṃ padānaṃ padavaṇṇanamattaṃ.

Yo pana tesamaṃ pāṇātipāto adinnādānaṃ kāmesumicchācāro musāvādo pisuṇavācā pharusavācā samphappalāpo abhijjhā byāpādo micchādiṭṭhīti kaṇhapakkhe dasavidho attho hoti. Tattha pāṇassa atipāto **pāṇātipāto**, pāṇavadho pāṇaghātoti vuttaṃ hoti. **Pāṇoti** cettha vohārato satto, paramatthato jīvitindriyaṃ. Tasmim̐ pana pāṇe pāṇasaññino jīvitindriyupacchedakaupakkamasamuṭṭhāpikā kāyavacīdvārānaṃ aññataradvārappavattā vadhakacetanā pāṇātipāto. So guṇavirahitesu tiracchānagatādisu pāṇesu khuddake pāṇe appasāvajjo, mahāsārīre mahāsāvajjo. Kasmā? Payogamahantāyā, payogasamattepi vatthumahantāyā. Guṇavantesu manussādisu appaṇe appasāvajjo, mahāguṇe mahāsāvajjo. Sarīraguṇānaṃ pana samabhāve sati kilesānaṃ upakkamānañca mudutāya appasāvajjo, tibbatāya mahāsāvajjoti vedittabbo.

Tassa pañca sambhārā honti – pāṇo, pāṇasaññitā, vadhakacittaṃ, upakkamo, tena maraṇanti. Cha payogā sāhatthiko, ānattiko, nissaggiyo, thāvaro, vijjāmayo, iddhiṃmayoti. Imasmim̐ panatthe vitthāriyamāne atippapañco hoti, tasmā taṃ na vitthārayāma, aññañca evarūpaṃ. Atthikehi pana samantapāsādikamaṃ vinayaṭṭhakathaṃ (pārā. aṭṭha. 172) oloketvā gahetabbo.

Adinnassa ādānaṃ **adinnādānaṃ**, parassaharaṇamaṃ theyyamaṃ corikāti vuttaṃ hoti. Tattha **adinnanti** parapariggahitaṃ, yattha paro yathākāmakāritaṃ āpajjanto adaṇḍāraho anupavajjo hoti. Tasmim̐ pana parapariggahite parapariggahitasaññino tadādāyakaupakkamasamuṭṭhāpikā theyyacetanā adinnādānaṃ. Taṃ hīne parasantake appasāvajjamaṃ, paṇīte mahāsāvajjamaṃ. Kasmā? Vatthupaṇītatāya. Vatthusamatte sati guṇādhikānaṃ santake vatthusmim̐ mahāsāvajjamaṃ, taṃ taṃ guṇādhikamaṃ upādāya tato tato hīnaguṇassa santake vatthusmim̐ appasāvajjamaṃ.

Tassa pañca sambhārā honti – parapariggahitaṃ, parapariggahitasaññitā, theyyacittaṃ, upakkamo, tena haraṇanti. Cha payogā sāhatthikādayova. Te ca kho yathānurūpaṃ theyyāvahāro, pasayhāvahāro, paṭicchannāvahāro, parikappāvahāro, kusāvahāroti imesamaṃ avahārānaṃ vasena pavattāti ayamettha saṅkhepo, vitthāro pana samantapāsādikāyamaṃ (pārā. aṭṭha. 92) vutto.

Kāmesumicchācāroti ettha pana **kāmesūti** methunasamācāresu. **Micchācāro**ti ekantanindito lāmakācāro. Lakkhaṇato pana asaddhammādhippāyena kāyadvārappavattā agamaṇiyatṭhānavitikkamacetanā kāmesumicchācāro. Tattha **agamaṇiyatṭhānaṃ** nāma purisānaṃ tāva māturalakkhitā pituralakkhitā mātāpituralakkhitā bhāturakkhitā bhāginirakkhitā nātirakkhitā gottarakkhitā dhammarakkhitā sārakkhā sapaṇḍāṇḍatī māturalakkhitādayo dasa, dhanakkhitā chandavāsini bhogavāsini

paṭavāsini odapattakinī obhatacumbaṭā dāsī ca bhariyā ca kammakārī ca bhariyā ca dhajāhaṭā muhuttikāti eṭā dhanakkītādayo dasāti vīsati itthiyo. Itthiṣu pana dvinnam sārakkhasaparidaṇḍanam, dasannañca dhanakkītādinanti dvādasannaṃ itthinaṃ aññe purisā. Idaṃ agamanīyaṭṭhānaṃ nāma. So panesa micchācāro sīlādiguṇarahite agamanīyaṭṭhāne appasāvajjo, sīlādiguṇasampanne mahāsāvajjo. Tassa cattāro sambhārā – agamanīyavattu, tasmim sevanacittam, sevanappayogo, maggenamaggapaṭipattiadhivāsananti. Eko payogo sāhatthiko eva.

Musāti visamvādanapurekkhārassa atthabhañjanako vacīpayogo kāyappayogo vā, visamvādanādhippāyena panassa paravisamvādanakāyavacīpayogasamuṭṭhāpikā cetanā, musāvādo. Aparo nayo – **musāti** abhūtaṃ atacchaṃ vatthu. **Vādoti** tassa bhūtaṃ tacchato viññāpanam. Lakkhaṇato pana atathaṃ vatthum tathato param viññāpetukāmassa tathāviññāttisamuṭṭhāpikā cetanā musāvādo. So yamatthaṃ bhañjati, tassa appatāya appasāvajjo, mahantatāya mahāsāvajjo. Api ca gahaṭṭhānaṃ attano santakam adātukāmatāya natthiṭiādinayappavatto appasāvajjo, sakkhinā hutvā atthabhañjanatthaṃ vutto mahāsāvajjo. Pabbajitānaṃ appakampi telam vā sappim vā labhitvā hasādhippāyena “ajja gāme telam nadī maññe sandatī” ti pūraṇakathānayaena pavatto appasāvajjo, adiṭṭhamyeva pana “diṭṭha” ntiādinā nayaena vadantānaṃ mahāsāvajjo. Tassa cattāro sambhārā honti – atathaṃ vatthu, visamvādanacittam, tajjo vāyāmo, parassa tadatthavijānananti. Eko payogo sāhatthikova. So kāyena vā kāyapaṭibaddhena vā vācāya vā paravisamvādakakiriyākaṇe daṭṭhabbo. Tāya ce kiriyāya paro tamatthaṃ jānāti, ayaṃ kiriyāsamuṭṭhāpikacetanākkhaṇeyeva musāvādakammunā bajjhati.

Pisuṇavācātiādisu yāya vācāya, yassa taṃ vācam bhāsati, tassa hadaye attano piyabhāvaṃ, parassa ca suññabhāvaṃ karoti, sā **pisuṇavācā**. Yāya pana attānampi parampi pharusam karoti, yā vācā sayampi pharusā, neva kaṇṇasukhā na hadayaṅgamā, ayaṃ **pharusavācā**. Yena pana samphaṃ palapati niratthakam, so **samphappalāpo**. Tesam mūlabhūtā cetanāpi pisuṇavācādināmameva labhati. Sā eva ca idha adhippetāti.

Tattha samkiliṭṭhacittassa paresam vā bhedāya, attano piyakamyatāya vā kāyavacīpayogasamuṭṭhāpikā cetanā **pisuṇavācā**. Sā yassa bhedam karoti, tassa appaṇatāya appasāvajjā, mahāṇatāya mahāsāvajjā. Tassā cattāro sambhārā – bhinditabbo paro, iti ime nānā bhavissanti, vinā bhavissantiṭi bhedapurekkhārātā, iti aham piyo bhavissāmi vissāsikoti piyakamyatā vā, tajjo vāyāmo, tassa tadatthavijānananti.

Parassa mammacchedakakāyavacīpayogasamuṭṭhāpikā ekantapharusacetanā pharusavācā. Tassā āvibhāvattamidaṃ vatthu – eko kira dārako mātu vacanam anādiyitvā araññaṃ gacchati. Mātā taṃ nivattetuṃ asakkontī, “caṇḍā taṃ mahimsī anubandhatū” ti akkosi. Athassa tatheva araññaṃ mahimsī utthāsi. Dārako, “yaṃ mama mātā mukhena kathesi, taṃ mā hotu, yaṃ cittaena cintesi, taṃ hotū” ti saccakiriyaṃ akāsi. Mahimsī tattheva baddhā viya aṭṭhāsi. Evaṃ mammacchedakopi payogo cittasaṇhatāya pharusavācā na hoti. Mātāpitaro hi kadāci puttake evaṃ vadanti – “corā vo khaṇḍākhaṇḍikaṃ karontū” ti, uppalapattampi ca nesam upari patantaṃ na icchanti. Ācariyupajjhāyā ca kadāci nissitake evaṃ vadanti – “kiṃ ime ahirikā anottappino caranti, niddhamatha ne” ti. Atha ca nesam āgamādhigamasampattiṃ icchanti. Yathā ca cittasaṇhatāya pharusavācā na hoti, evaṃ vacanasāṇhatāya aphaṇsavācāpi na hoti. Na hi mārāpetukāmassa “imaṃ sukhaṃ sayāpethā” ti vacanam aphaṇsavācā hoti. Cittapharusatāya panesā pharusavācāva. Sā yaṃ sandhāya pavattitā, tassa appaṇatāya appasāvajjā, mahāṇatāya mahāsāvajjā. Tassā tayo sambhārā – akkositabbo paro, kupitacittam, akkosanāti.

Anatthaviññāpikā kāyavacīpayogasamuṭṭhāpikā akusalacetanā samphappalāpo. So āsevanamandatāya appasāvajjo, āsevanamahantatāya mahāsāvajjo. Tassa dve sambhārā – bhāratayuddha-sītaharaṇādi-niratthakakathā-purekkhārātā, tathārūpikathākathanañcāti.

Abhijjhāyatīti **abhijjhā**. Parabhaṇḍābhimukhī hutvā tanninatāya pavattatīti attho. Sā “aho

vatidaṃ mamassā”ti evaṃ parabhaṇḍābhijjhāyanalakkhaṇā adinnādānaṃ viya appasāvajjā mahāsāvajjā ca. Tassā dve sambhārā parabhaṇḍaṃ attano pariṇāmanaṇca. Parabhaṇḍavatthuke hi lobhe uppannepi na tāva kammaṭṭhabhedo hoti, yāva na “aho vatidaṃ mamassā”ti attano pariṇāmetīti.

Hitasukhaṃ byāpādayatīti, **byāpādo**. So paravināsāya manopadosalakkhaṇo. Pharusavācā viya appasāvajjo mahāsāvajjo ca. Tassa dve sambhārā parasatto ca, tassa ca vināsacintā. Parasattavatthuke hi kodhe uppannepi na tāva kammaṭṭhabhedo hoti, yāva na “aho vatāyaṃ ucchijjeyya vinasseyyā”ti tassa vināsaṃ cinteti.

Yathābhuccagahaṇābhāvena micchā passatīti **micchādiṭṭhi**. Sā “natthi dinna”ntiādinā nayena viparītadassanalakkhaṇā samphappalāpo viya appasāvajjā mahāsāvajjā ca. Api ca aniyatā appasāvajjā, niyatā mahāsāvajjā. Tassā dve sambhārā – vatthuno ca gahitākāraviparītātā yathā ca naṃ gaṇhāti, tathābhāvena tassā upaṭṭhānanti.

Imesaṃ pana dasannaṃ akusalakammaṭṭhānaṃ dhammato koṭṭhāsato ārammaṇato vedanāto mūlatoti pañcahākārehi vinicchayo veditabbo. Tattha **dhammatoti** etesu hi paṭipāṭiyā satta cetanādhammāva honti, abhijjhādayo tisso cetanāsampayuttā. **Koṭṭhāsato**ti paṭipāṭiyā satta, micchādiṭṭhi cāti ime aṭṭha kammaṭṭhā eva honti, no mūlāni, abhijjhābyāpādā kammaṭṭhā ceva mūlāni ca. Abhijjhā hi mūlaṃ patvā lobho akusalamūlaṃ hoti, byāpādo doso akusalamūlaṃ.

Ārammaṇatoti pāṇātipāto jīvitindriyārammaṇato saṅkhārārammaṇo hoti, adinnādānaṃ sattārammaṇaṃ vā saṅkhārārammaṇaṃ vā, micchācāro phoṭṭhabbavasena saṅkhārārammaṇova, sattārammaṇotipi eke. Musāvādo sattārammaṇo vā saṅkhārārammaṇo vā, tathā pisaṇavācā. Pharusavācā sattārammaṇāva. Samphappalāpo diṭṭhasutamutaviññātavasena sattārammaṇo vā saṅkhārārammaṇo vā, tathā abhijjhā. Byāpādo sattārammaṇova. Micchādiṭṭhi tebhūmakadhammavasena saṅkhārārammaṇā.

Vedanātoti pāṇātipāto dukkhavedano hoti. Kiñcāpi hi rājāno coraṃ disvā hasamānāpi “gacchatha naṃ ghātethā”ti vadanti, sannitṭhāpakacetanā pana nesaṃ dukkhasampayuttāva hoti. Adinnādānaṃ tivedanaṃ, micchācāro sukhamajjhattavasena dvivedano, sannitṭhāpakacitte pana majjhattavedano na hoti. Musāvādo tivedano, tathā pisaṇavācā pharusavācā dukkhavedanā, samphappalāpo tivedano, abhijjhā sukhamajjhattavasena dvivedanā, tathā micchādiṭṭhi. Byāpādo dukkhavedano.

Mūlatoti pāṇātipāto dosamohavasena dvimūlako hoti, adinnādānaṃ dosamohavasena vā lobhamohavasena vā, micchācāro lobhamohavasena. Musāvādo dosamohavasena vā lobhamohavasena vā, tathā pisaṇavācā samphappalāpo ca. Pharusavācā dosamohavasena, abhijjhā mohavasena ekamūlā, tathā byāpādo. Micchādiṭṭhi lobhamohavasena dvimūlāti.

Pāṇātipātā paṭiviratātiādīsu pāṇātipātādayo vuttathā eva. Yāya pana viratīyā ete paṭiviratā nāma honti, sā bhedato tividhā hoti sampattavirati samādānavirati samucchavedaviratīti. Tattha asamādinnaśikkhāpadānaṃ attano jātivayabāhusaccādīni paccavekkhitvā “ayuttaṃ amhākaṃ evarūpaṃ kātu”nti sampattaṃ vatthuaṃ avītikkamantānaṃ uppajjamānā viratīti **sampattaviratīti** veditabbā sīhaḷadīpe **cakkanaupāsakassa** viya. Tassa kira daharakāleyeva mātu rogo uppajji. Vejjena ca “allasasakamaṃsaṃ laddhuṃ vaṭṭati”ti vuttaṃ. Tato cakkanassa bhātā “gaccha tāta khettaṃ āhiṇḍāhī”ti cakkanaṃ pesesi. So tattha gato. Tasmiṇca samaye eko saso taruṇasassaṃ khādītuṃ āgato hoti. So taṃ disvā vegena dhāvanto vallyā baddho “kiri kirī”ti saddamakāsi. Cakkano tena saddena gantvā taṃ gahetvā cintesi “mātu bhesajjaṃ karomī”ti. Puna cintesi – “na metaṃ patirūpaṃ, yvāhaṃ mātu jīvitakāraṇā paraṃ jīvitā voropeyya”nti. Atha naṃ “gaccha araṇṇe sasehi saddhiṃ tiṇodakaṃ paribhuñjā”ti muñci. Bhātara ca “kiṃ tāta saso laddho”ti? Pucchito taṃ pavattiṃ ācikkhi. Tato naṃ bhātā paribhāsi. So mātu santikaṃ gantvā, “yatohaṃ jāto, nābhijjānāmi sañcicca pāṇaṃ jīvitā voropetā”ti saccaṃ vatvā aṭṭhāsi, tāvadeva cassa mātā arogā ahoṣi.

Samādinnaśikkhāpadānaṃ pana śikkhāpadasamādāne ca tatuttari ca attano jīvitam pariccajivā vatthum avītikkamantānaṃ uppajjamānā virati **samādānaviratī**ti veditabbā, **uttaravaḍḍhamānapabbatavāsīpāsakassa** viya. So kira ambariyavihāravāsīpiṅgalabuddharakkhitattherassa santike śikkhāpadāni gahetvā khettaṃ kasati. Athassa goṇo nattho, so taṃ gavesanto uttaravaḍḍhamānapabbataṃ āruhi, tatra naṃ mahāsappo aggahesi. So cintesi – “imāya tikhiṇāya vāsiyā sīsaṃ chindāmi”ti. Puna cintesi – “na metaṃ patirūpaṃ, yvāhaṃ bhāvanīyassa garuno santike śikkhāpadaṃ gahetvā bhindeyya”nti. Evaṃ yāvattiyam cintetvā – “jīvitam pariccajāmi, na śikkhāpada”nti aṃse ṭhapitaṃ tikhiṇadaṇḍavāsīṃ araṇṇe chaḍḍesi. Tāvadeva mahāvālo naṃ muñcivā agamāsīti.

Ariyamaggasampayuttā pana virati **samucchedaviratī**ti veditabbā, yassā uppattito pabhuti pāṇaṃ ghāteśsamīti ariyapuggalānaṃ cittampi na uppajjatīti.

Yathā ca akusalānaṃ, evaṃ imesampi kusalakammaṃ pathānaṃ dhammato koṭṭhāsato ārammaṇato vedanāto mūlatoti pañcahākārehi vinicchayo veditabbo. Tattha **dhammatoti** etesu hi paṭipāṭiyā satta cetanāpi vaṭṭanti viratīyopi, ante tayo cetanāsampayuttāva.

Koṭṭhāsatoti paṭipāṭiyā satta kammaṃ pathā eva, na mūlāni, ante tayo kammaṃ pathā ceva mūlāni ca. Anabhijjhā hi mūlaṃ patvā alobho kusalamūlaṃ hoti, abyāpādo adoso kusalamūlaṃ, sammādiṭṭhi amoho kusalamūlaṃ.

Ārammaṇatoti pāṇātipātādīnaṃ. Ārammaṇāneva etesaṃ ārammaṇāni. Vītikkamitabbavatthutoyeva hi virati nāma hoti. Yathā pana nibbānārammaṇo ariyamaggo kilese pajahati, evaṃ jīvitindriyādiārammaṇāpete kammaṃ pathā pāṇātipātādīni dussīlyāni pajahantīti veditabbā.

Vedanātoti sabbe sukhavedanā vā honti majjhattavedanā vā. Kusalaṃ patvā hi dukkhavedanā nāma natthi.

Mūlatoti paṭipāṭiyā satta nāṇasampayuttacittena viramantassa alobhaadosaamohavasena timūlā honti, nāṇavippayuttacittena viramantassa dvimūlā. Anabhijjhā nāṇasampayuttacittena viramantassa dvimūlā hoti, nāṇavippayuttacittena ekamūlā. Alobho pana attanāva attano mūlaṃ na hoti. Abyāpādepi eseva nayo. Sammādiṭṭhi alobhaadosavasena dvimūlāvāti. Tatiyādīni.

6. Aṭṭhaṅgikasuttavaṇṇanā

112. Chaṭṭhaṃ aṭṭhamaggaṅgavasena bujjanakānaṃ ajjhāsayaavasena vuttaṃ. Chaṭṭhaṃ.

7. Dasaṅgasuttavaṇṇanā

113. Sattamaṃ dasamicchattasammattavasena. Tattha **micchāñāṇinoti** micchāpaccavekkhaṇena samannāgatāti attho. **Micchāvīmuttinoti** anīyānikavīmuttino kusalavīmuttīti gahetvā ṭhitā. **Sammāñāṇinoti** sammāpaccavekkhaṇā. **Sammāvīmuttinoti** niyyānikāya phalavīmuttiyā samannāgatāti. Sattamaṃ.

Kammaṃ pathavaggo tatiyo.

4. Catutthavaggo

1. Catudhātusuttavaṇṇanā

114. Catutthavaggassa paṭhame **pathavīdhātūti** patiṭṭhādhatu. **Āpodhātūti** ābandhanadhātu. **Tejodhātūti** paripācanadhātu. **Vāyodhātūti** vitthambhanadhātu. Ayamettha saṅkhepo, vitthārato pana vīsatiakoṭṭhāsādivasena etā kathetabbā. Paṭhamam.

2. Pubbesambodhasuttavaṇṇanā

115. Dutiye **ayam pathavīdhātuyā assādoti** ayam pathavīdhātunissayo assādo. Svāyam kāyam abbhunnāmetvā udaram pasāretvā, “idha me aṅgulaṃ pavesituṃ vāyamathā”ti vā hattham pasāretvā, “imaṃ nāmetuṃ vāyamathā”ti vā vadati, evaṃ pavattānaṃ vasena veditabbo. **Aniccāti**ādīsu hutvā abhāvākārena aniccā, paṭipīḷanākārena dukkhā, sabhāvavigamākārena vipariṇāmadhammā. **Ayam pathavīdhātuyā ādīnavoti** yena ākārena sā aniccā dukkhā vipariṇāmadhammā, ayamākāro pathavīdhātuyā ādīnavoti attho. **Chandarāgavinayo chandarāgappahānanti** nibbānaṃ āgamma pathavīdhātuyā chandarāgo vinīyati ceva pahīyati ca, tasmā nibbānamassā nissaraṇam.

Ayam āpodhātuyā assādoti ayam āpodhātunissayo assādo. Svāyam aññaṃ āpodhātuyā upaddutaṃ disvā, “kiṃ ayam nipannakālato paṭṭhāya passāvattṭhānābhimukho nikkhamati ceva pavisati ca, appamattakampissa kammaṃ karontassa sedatintaṃ vattham pīletabbatākāram pāpuṇāti, anumodanamattampi kathentassa tālavaṇṇam gaṇhitabbaṃ hoti, mayam pana sāyam nipannā pātova utṭhahāma, māsapuṇṇaghaṭo viya no sarīram, mahākammaṃ karontānaṃ sedamattampi no na uppajjati, asanisaddena viya dhammaṃ kathentānaṃ sarīre usumākāramattampi no natthi”ti evaṃ pavattānaṃ vasena veditabbo.

Ayam tejodhātuyā assādoti ayam tejodhātunissayo assādo. Svāyam sītagahaṇike disvā, “kiṃ ime kiñcīdeva yāgubhattakhajjamattaṃ ajjhoharivā thaddhakucchino nisīditvā sabbarattiṃ aṅgārakaṭāham pariyesanti, phusitamattesu sarīre patitesu aṅgārakaṭāham ottharivā pārupitvāva nipajjanti? Mayam pana atithaddhampi maṃsam vā pūvam vā khādāma, kucchipūram bhattam bhujjāma, tāvadeva no sabbam pheṇapiṇḍo viya vilīyati, sattāhavaddalikāya vattamānāya sarīre sītānudahanamattampi no natthi”ti evaṃ pavattānaṃ vasena veditabbo.

Ayam vāyodhātuyā assādoti ayam vāyodhātunissayo assādo. Svāyam aññe vātabhīruke disvā, “imesam appamattakampi kammaṃ karontānaṃ anumodanamattampi kathentānaṃ sarīram vāto vijjhati, gāvutamattampi addhānaṃ gatānaṃ hatthapādā sīdanti, piṭṭhi rujjati, kucchivātasīsavātakaṇṇavātādīhi niccupaddutā telaphāṇitādīni vātabhesajjāneva karontā atināmenti, amhākam pana mahākammaṃ karontānampi tiyāmarattiṃ dhammaṃ kathentānampi ekadivaseneva dasa yojanāni gacchantānampi hatthapādasamāsīdanamattaṃ vā piṭṭhirujjanamattaṃ vā na hoti”ti, evaṃ pavattānaṃ vasena veditabbo. Evaṃ pavattā hi etā dhātuyo assādentī nāma.

Abbaññāsinti abhivisiṭṭhena ñāṇena aññāsīm. **Anuttaram sammāsambodhinti** uttaravirahitam sabbasetṭham sammā sāmāñca bodhiṃ, atha vā pasattham sundarañca bodhiṃ. **Bodhīti** rukkhopi maggopi sabbaññutaññānampi nibbānampi. “Bodhirukkhamūle paṭhamābhisambuddho”ti (mahāva. 1; udā. 1) ca “antarā ca bodhiṃ antarā ca gaya”nti (mahāva. 11; ma.ni. 1.285) ca āgataṭṭhānesu hi rukkho bodhīti vuccati. “Bodhi vuccati catūsu maggesu ñāṇa”nti (cūḷani. khaggavisāṇasuttaniddesa 121) āgataṭṭhāne maggo. “Pappoti bodhiṃ varabhūrimedhaso”ti (dī. ni. 3.217) āgataṭṭhāne sabbaññutaññānaṃ. “Patvāna bodhiṃ amataṃ asaṅkhata”nti āgataṭṭhāne nibbānaṃ. Idha pana bhagavato arahattamaggo adhippeto.

Sāvakanam arahattamaggo anuttarā bodhi hoti, na hotīti? Na hoti. Kasmā? Asabbaguṇadāyakattā. Tesāñhi kassaci arahattamaggo arahattaphalameva deti, kassaci tisso vijjā, kassaci cha abhiññā, kassaci catasso paṭisambhidā, kassaci sāvakaṇṇamāññānaṃ. Paccakabuddhānampi paccakabodhiññānameva deti. Buddhānaṃ pana sabbaguṇasampattiṃ deti abhiseko viya rañño sabbalokissariyabhāvaṃ. Tasmā aññassa kassacipi anuttarā bodhi na hoti.

Abhisambuddhoti paccaññāsinti “abhisambuddho ahaṃ patto paṭivijjhivā ṭhito”ti evaṃ paṭijāniṃ. **Ñāṇaṇca pana me dassanaṃ udapādīti** adhigataguṇadassanasamatthaṃ paccavekkhaṇaññaṇaṇca me udapādi. **Akuppā me vimuttīti** “ayaṃ mayhaṃ arahattaphalavimutti akuppā”ti evaṃ ñāṇaṃ udapādi. Tattha dvīhākārehi akuppatā veditabbā kāraṇato ca ārammaṇato ca. Sā hi catūhi maggehi samucchinnakilesānaṃ puna anivattanatāya kāraṇatopi akuppā, akuppadhammaṃ nibbānaṃ ārammaṇaṃ katvā pavattatāya ārammaṇatopi akuppā. **Antimāti** pacchimā. **Natthi dāni punabbhavoti** idāni puna añño bhavo nāma natthīti.

Imasmiṃ sutte cattāri saccāni kathitāni. Kathaṃ? Catūsu hi dhātūsu assādo samudayasaccaṃ, ādīnava dukkhasaccaṃ, nissaraṇaṃ nirodhasaccaṃ, nirodhappajānana maggo maggasaccaṃ. Vitthārasavenapi kathetuṃ vaṭṭatīyeva. Ettha hi yaṃ pathavīdhātuṃ paṭicca uppajjati sukhaṃ somanassaṃ, ayaṃ pathavīdhātuyā assādoti pahānapaṭivedho samudayasaccaṃ. Yā pathavīdhātu aniccā dukkhā vipariṇāmadhammā, ayaṃ pathavīdhātuyā, ādīnavoti pariṇānapaṭivedho dukkhasaccaṃ. Yo pathavīdhātuyā chandarāgavinayo chandarāgappahānaṃ, idaṃ pathavīdhātuyā nissaraṇanti sacchikiriyāpaṭivedho nirodhasaccaṃ. Yā imesu tīsu ṭhānesu diṭṭhi saṅkappo vācā kammanto ājīvo vāyāmo sati samādhi, ayaṃ bhāvanāpaṭivedho maggasaccanti. Dutīyaṃ.

3. Acariṃsuttavaṇṇanā

116. Tatiye **acarinti** ñāṇacārena acarīṃ, anubhavanacārenāti attho. **Yāvatāti** yattako. Tatiyaṃ.

4. Nocedaṃsuttavaṇṇanā

117. Catutthe **nissaṭṭīti**ādīni ādito vuttapaṭisedhena yojetvā “na nissaṭṭā, na viṣaṃyuttā, na vipṇamuttā, na vimariyādikatena cetasā vihariṃsū”ti evaṃ veditabbāni. Dutīyanaye **vimariyādikatenāti** nimariyādikatena. Tattha duvidhā mariyādā kilesamariyādā vaṭṭamariyādāti. Tattha ca yassa upaḍḍhā kilesā pahīnā, upaḍḍhā appahīnā, vaṭṭaṃ vā pana upaḍḍhaṃ pahīnaṃ, upaḍḍhaṃ appahīnaṃ, tassa cittaṃ pahīnakilese vā vaṭṭaṃ vā sandhāya vimariyādikatam, appahīnakilese vā vaṭṭaṃ vā sandhāya na vimariyādikatam. Idha pana ubhayassāpi pahīnattā “vimariyādikatena cetasā”ti vuttaṃ, mariyādaṃ akatvā ṭhitena atikkantamariyādena cetasāti attho. Iti tīsupi imesu suttesu catusaccameva kathitaṃ. Catutthaṃ.

5. Ekantadukkhasuttavaṇṇanā

118. Pañcame **ekantadukkhāti** atikkamitvā ṭhitassa tattakāro viya ekanteneva dukkhā. **Dukkhānupatitāti** dukkhena anupatitā. **Dukkhāvakkantāti** dukkhena okkantā otiṇṇā. **Sukhāti** sukhavedanāya paccayabhūtā. Evaṃ sabbattha attho veditabbo. Imasmiṃ sutte dukkhalakkaṇaṃ kathitaṃ. Pañcamaṃ.

6-10. Abhinandasuttādivaṇṇanā

119-123. Chaṭṭhasattamesu vivaṭṭaṃ, avasāne tīsu catusaccamevāti. Chaṭṭhādīni.

Catuttho vaggo.

Dhātusaṃyuttavaṇṇanā niṭṭhitā.

4. Anamataggasaṃyuttaṃ

1. Paṭhamavaggo

1. Tiṇakaṭṭhasuttavaṇṇanā

124. Anamataggasaṃyuttassa paṭhame **anamataggoti** anu amataggo, vassasataṃ vassasahassaṃ ñāṇena anugantvāpi amataggo aviditaggo, nāssa sakkā ito vā etto vā aggaṃ jānitum, aparicchinnapubbāparakoṭikoti attho. **Saṃsāroti** khandhādīnaṃ avicchinnappavattā paṭipāṭi. **Pubbā koṭi na paññāyati** purimamariyādā na dissati. Yadaggena cassa purimā koṭi na paññāyati, pacchimāpi tadaggena na paññāyati, vemajjheyeva pana sattā saṃsaranti. **Pariyādānaṃ gaccheyyāti** idaṃ upamāya khuddakattā vuttaṃ. Bāhirasamayasmīhi attho paritto hoti, upamā mahatī. “Hatthī viya ayaṃ goṇo, goṇo viya sūkaro, samuddo viya talāka”nti hi vutte na tesam tādisaṃ pamāṇaṃ hoti. Buddhasamaye pana upamā parittā, attho mahā. Pāliyañhi eko jambudīpo gahito, evarūpānaṃ pana jambudīpānaṃ satepi sahassepi satasahassepi tiṇādīni tena upakkamena pariyādānaṃ gaccheyyūṃ, na tveva purisassa mātu mātāroti. **Dukkhaṃ paccanubhūtaṃ** tumhehi dukkhaṃ anubhūtaṃ. **Tibbanti** tasseva vevacanaṃ. **Byasananti** ñātibyasanāṇānekavidhaṃ. **Kaṭasīti** susānaṃ, pathaviyeva vā. Sā hi punappunaṃ marantehi sarīranikkhepena vaḍḍhitā. **Alamevāti** yuttameva. Paṭhamaṃ.

2. Pathavīsuttavaṇṇanā

125. Dutīye **mahāpathavinti** cakkavālapariyantaṃ mahāpathaviṃ. **Nikkhipeyyāti** taṃ pathaviṃ bhinditvā vuttappamāṇaṃ guḷikaṃ karitvā ekamantaṃ ṭhapeyya. Dutīyaṃ.

3. Assusuttavaṇṇanā

126. Tatiye **kandantānanti** sasaddaṃ rudamānānaṃ. **Passannanti** sanditaṃ pavattaṃ. **Catūsu mahāsamuddesūti** sinerurasmīhi paricchennesu catūsu mahāsamuddesu. Sinerussa hi pācīnapassaṃ rajatamayaṃ, dakkhiṇapassaṃ maṇimayaṃ, pacchimapassaṃ phalīkamayaṃ, uttarapassaṃ suvaṇṇamayaṃ. Pubbadakkhiṇapassehi nikkhantā rajatamaṇirasmiyo ekato hutvā mahāsamuddapiṭṭhena gantvā cakkavālapabbataṃ āhacca tiṭṭhanti, dakkhiṇapacchimapassehi nikkhantā maṇiphalikarasmiyo, pacchimittarapassehi nikkhantā phalīkasuvaṇṇarasmiyo, uttarapācīnapassehi nikkhantā suvaṇṇarajatarasmiyo ekato hutvā mahāsamuddapiṭṭhena gantvā cakkavālapabbataṃ āhacca tiṭṭhanti. Tāsaṃ rasmīnaṃ antaresu cattāro mahāsamuddā honti. Te sandhāya vuttaṃ “catūsu mahāsamuddesū”ti. **Ñātibyasananti**ādīsu **byasananti** viasanaṃ, vināsoti attho. Ñātīnaṃ byasanaṃ **ñātibyasanaṃ**, bhogānaṃ byasanaṃ **bhogabyasanaṃ**. Rogo pana sayameva ārogyaṃ viyasati vināsetīti byasanaṃ, rogo va byasanaṃ **rogabyasanaṃ**. Tatiyaṃ.

4. Khīrasuttavaṇṇanā

127. Catutthe **mātuthaṇṇanti** ekanāmikāya manussamātu khīraṃ. Imesañhi sattānaṃ gaṇḍuppādakipillikādīsu vā macchakacchapādīsu vā pakkhijātesu vā nibbattakāle mātukhīrameva natthi, ajapasumahimsādīsu nibbattakāle khīraṃ atthi, tathā manussesu. Tattha ajādīkale ca manussesu cāpi “devī sumanā tissā”ti evaṃ nānānāmikānaṃ kucchiyaṃ nibbattakāle aggahetvā tissāti ekanāmikāya eva mātu kucchiyaṃ nibbattakāle pītaṃ thaññaṃ catūsu mahāsamuddesu udakato bahutaranti veditabbaṃ. Catutthaṃ.

5. Pabbatasuttavaṇṇanā

128. Pañcame **sakkā pana, bhanteti** so kira bhikkhu cintesi – “sathā anamataggassa saṃsārassa dīghatamattā ‘na sukaraṃ na sukara’nti kathetiyeva, kathaṃ nacchindati, sakkā nu kho upamaṃ kārāpetu”nti. Tasmā evamāha. **Kāsikenāti** tayo kappāsaṃsū ekato gahetvā kantitasuttamayena atisukhumavatthena. Tena pana parimaṭṭhe kittakaṃ khīyeyyāti. Sāsapamattaṃ. Pañcamaṃ.

6. Sāsapasuttavaṇṇanā

129. Chaṭṭhe **āyasam nagaranti** āyasena pākārena parikkhittam nagaram, na pana anto āyasehi ekabhūmikādipāsādehi ākiṇṇanti daṭṭhabbam. Chaṭṭham.

7. Sāvakasuttavaṇṇanā

130. Sattame **anussareyyunti** ekena kappasatasahassee anussarite aparo tassa ṭhitaṭṭhānato aññaṃ satasahasam, aññaopi aññaṇṇanti evaṃ cattāropi cattārisatasahasāni anussareyyuṃ. Sattamaṃ.

8-9. Gaṅgāsuttādivaṇṇanā

131-132. Aṭṭhame **yā etasmiṃ antare vālikāti** yā etasmiṃ āyāmato pañcayojanasatike antare vālikā. Navame vattabbam natthi. Aṭṭhamanavamāni.

10. Puggalasuttavaṇṇanā

133. Dasame **aṭṭhikaṅkaloti**ādīni tīṇipi rāsivevacanāneva. Imesam pana sattānaṃ saatṭhikālo anattṭhikālova bahutaro. Gaṇḍuppadakādipāṇabhūtānaṇhi etesam aṭṭhimeva natthi, macchakacchapādibhūtānaṃ pana aṭṭhimeva bahutaram, tasmā anaṭṭhikālaṅca bahuatṭhikālaṅca aggahetvā samattṭhikālova gahetabbo. **Uttaro gijjhakūṭassāti** gijjhakūṭassa uttarapasse ṭhito. **Magadhānaṃ giribajeti** magadharaṭṭhassa giribaje, giriparikkhepe ṭhitoti attho. Sesam sabbattha uttānamevāti. Dasamaṃ.

Paṭhamo vaggo.

2. Dutiyavaggo

1. Duggatasuttavaṇṇanā

134. Dutiyavaggassa paṭhame **duggatanti** daliddam kapaṇam. **Durūpetanti** dussaṅṭhānehi hatthapādehi upetaṃ. Paṭhamaṃ.

2. Sukhitasuttavaṇṇanā

135. Dutīye **sukhitanti** sukhasamappitam mahaddhanaṃ mahābhogaṃ. **Susajjitanti** alaṅkatapaṭiyattaṃ hatthikkhandhagataṃ mahāparivāraṃ. Dutīyaṃ.

3. Tiṃsamattasuttavaṇṇanā

136. Tatiye **pāveyyakāti** pāveyyadesavāsino. **Sabbe āraṇṇikāti**ādīsū dhutaṅgasamādānavasena tesam āraṇṇikādibhāvo veditabbo. **Sabbe sasamyojanāti** sabbe sabandhanā, keci sotāpannā, keci sakadāgāmino, keci anāgāmino. Tesu hi puthujjano vā khīṇāsavo vā natthi. **Gunnanti**ādīsū setakāḷādivaṇṇesu ekekavaṇṇakālova gahetabbo. **Pāripanthakāti** paripanthe tiṭṭhanakā panthaghātorā. **Pāradārikāti** paradāracārittam āpajjanakā. Tatiyaṃ.

4-9. Mātusuttādivaṇṇanā

137-142. Catutthādīsū liṅganiyamena ceva cakkavāḷaniyamena ca attho veditabbo. Purisānaṇhi mātugāmakālo, mātugāmānaṅca purisakālo evamettha liṅganiyamo. Imamhā cakkavāḷā sattā paracakkavāḷam, paracakkavāḷā ca imam cakkavāḷam saṃsaranti. Tesu imasmiṃ cakkavāḷe mātugāmakāle mātubhūtaṇṇeva dassento **yo namātābhūtapubboti** āha. **Yo napitābhūtapubboti**ādīsūpi

eseva nayo. Catutthādīni.

10. Vepullapabbatasuttavaṇṇanā

143. Dasame **bhūtapubbanti** atītakāle ekaṃ apadānaṃ āharitvā dasseti. **Samaññā udapādīti** paññatti ahosi. **Catūhena ārohanīti** idaṃ thāmamajjhime sandhāya vuttaṃ. **Agganti** uttamaṃ. **Bhaddayuganti** sundarayugalaṃ. **Tihena ārohanīti** ettāvata kira dvinnaṃ buddhānaṃ antare yojanaṃ pathavī ussannā, so pabbato tiyojanubbedho jāto.

Appaṃ vā bhiyyoti vassasatato uttariṃ appaṃ dasa vā vīsaṃ vā vassāni. Puna vassasatameva jīvanako nāma natthi, uttamakoṭṭiyā pana saṭṭhi vā asīti vā vassāni jīvanti. Vassasataṃ pana appatvā pañcavassadasavassādikāle mīyamānāva bahukā. Ettha ca kakusandho bhagavā cattālīsavassasahassāyukakāle, koṇāgamano tiṃsavassasahassāyukakāle nibbattoti idaṃ anupubbena parihīnasadisam kamaṃ, na pana evaṃ parihīnaṃ, vaḍḍhitvā vaḍḍhitvā parihīnanti veditabbaṃ. Kathaṃ? Kakusandho tāva bhagavā imasmiṃyeva kappe cattālīsavassasahassāyukakāle nibbato āyupamānaṃ pañca koṭṭhāse katvā cattāro ṭhatvā pañcame vijjamāneyeva parinibbuto. Taṃ āyu parihāyamānaṃ dasavassakālaṃ patvā puna vaḍḍhamānaṃ asaṅkheyyaṃ hutvā tato parihāyamānaṃ tiṃsavassasahassāyukakāle ṭhitaṃ, tadā koṇāgamano nibbato. Tasmimpi tatheva parinibbuto taṃ āyu dasavassakālaṃ patvā puna vaḍḍhamānaṃ asaṅkheyyaṃ hutvā parihāyitvā vīsavassasahassakāle ṭhitaṃ, tadā kassapo bhagavā nibbato. Tasmimpi tatheva parinibbuto taṃ āyu dasavassakālaṃ patvā puna vaḍḍhamānaṃ asaṅkheyyaṃ hutvā parihāyitvā vassasatakālaṃ pattaṃ, atha ambhākaṃ sammāsambuddho nibbato. Evaṃ anupubbena parihāyitvā vaḍḍhitvā vaḍḍhitvā parihīnanti veditabbaṃ. Tattha ca yaṃ āyuparimāṇesu mandesu buddhā nibbattanti, tesampi tadeva āyuparimāṇaṃ hotīti. Dasamaṃ.

Dutiyo vaggo.

Anamataggasaṃyuttavaṇṇanā niṭṭhitā.

5. Kassapasamāyuttaṃ

1. Santuṭṭhasuttavaṇṇanā

144. Kassapasamāyuttassa paṭhame **santuṭṭhāyanti** santuṭṭho ayaṃ. **Itarītareṇāti** na thūlasukhumalūkhapaṇīthirajinṇānaṃ yena kenaci, atha kho yathāladdhādīnaṃ itarītareṇa yena kenaci santuṭṭhoti attho. Cīvarasmiñhi tayo santosā yathālābhasantoso yathābalasantoso yathāsāruppasantosoti. Piṇḍapātādīsupi eseve nayo.

Tesaṃ ayaṃ pabhedasaṃvaṇṇanā – idha bhikkhu cīvaraṃ labhati sundaraṃ vā asundaraṃ vā, so teneva yāpeti, aññaṃ na pattheti, labhantopi na gaṇhāti. Ayamassa cīvare yathālābhasantoso. Atha pana pakatidubbalo vā hoti ābādhajarābhīhūto vā, garucīvaraṃ pārupanto kilamati, so sabhāgena bhikkhuna saddhiṃ taṃ parivattetvā lahukena yāpentopi santuṭṭhova hoti. Ayamassa cīvare yathābalasantoso. Aparo paṇītapaccayalābhī hoti, so paṭṭacīvarādīnaṃ aññataraṃ mahagghacīvaraṃ bahūni vā cīvarāni labhitvā – “idaṃ therānaṃ cirapabbajitānaṃ, idaṃ bahussutānaṃ anurūpaṃ, idaṃ gilānānaṃ, idaṃ appalābhīnaṃ hotū”ti datvā tesaṃ purāṇacīvaraṃ vā saṅkarakūṭādito vā pana nantakāni uccinitvā tehi saṅghāṭiṃ katvā dhārentopi santuṭṭhova hoti. Ayamassa cīvare yathāsāruppasantoso.

Idha pana bhikkhu piṇḍapātaṃ labhati lūkhaṃ vā paṇītaṃ vā, so teneva yāpeti, aññaṃ na pattheti, labhantopi na gaṇhāti. Ayamassa piṇḍapāte yathālābha santoso. Yo pana attano pakativiruddhaṃ vā byādhiviruddhaṃ vā piṇḍapātaṃ labhati, yenassa paribhuttana aphāsu hoti, so sabhāgassa bhikkhuno

taṃ datvā tassa hatthato sappāyabhojanam bhutvā samaṇadhammam karontopi santuṭṭhova hoti. Ayamassa piṇḍapāte yathābalasantoso. Aparo bahum paṇītam piṇḍapātam labhati, so taṃ cīvaram viya cirapabbajita-bahussuta-appalābhagilānānam datvā, tesam vā sesakam piṇḍāya vā caritvā missakāhāram bhuñjantopi santuṭṭhova hoti. Ayamassa piṇḍapāte yathāsārappasantoso.

Idha pana bhikkhu senāsanam labhati manāpam vā amanāpam vā, so tena neva somanassam na paṭigham uppādeti, antamaso tiṇasanthārakenāpi yathāladdheneva tussati. Ayamassa senāsane yathālābhasantoso. Yo pana attano pakativiruddham vā byādhiviruddham vā senāsanam labhati, yatthassa vasato aphāsu hoti, so taṃ sabhāgassa bhikkhuno datvā tassa santake sappāyasenāsane vasantopi santuṭṭhova hoti. Ayamassa senāsane yathābalasantoso. Aparo mahāpuñño leṇamaṇḍapakūṭāgārādīni bahūni paṇītasenāsānāni labhati, so tāni cīvarādīni viya cirapabbajitabahussutaappalābhagilānānam datvā yattha katthaci vasantopi santuṭṭhova hoti. Ayamassa senāsane yathāsārappasantoso. Yopi “uttamasenāsanam nāma pamādaṭṭhānam, tattha nisinnassa thinamiddham okkamati, niddābhībhūtassa paṭibujjhato pāpavitakkā pātubhavantī”ti paṭisañcikkhitvā tādisam senāsanam pattampi na sampaṭicchati, so taṃ paṭikkhipitvā abbhokāsarukkhamulādīsu vasanto santuṭṭhova hoti. Ayampi senāsane yathāsārappasantoso.

Idha pana bhikkhu bhesajjam labhati lūkham vā paṇītam vā, so yaṃ labhati teneva tussati, aññaṃ na pattheti, labhantopi na gaṇhāti. Ayamassa gilānapaccaye yathālābhasantoso. Yo pana telenatthiko phāṇītam labhati, so taṃ sabhāgassa bhikkhuno datvā tassa hatthato telam gahetvā vā aññadeva vā pariyesitvā bhesajjam karontopi santuṭṭhova hoti. Ayamassa gilānapaccaye yathābalasantoso. Aparo mahāpuñño bahum telamadhuphāṇitādīpaṇītabhesajjam labhati, so taṃ cīvaram viya cirapabbajita-bahussuta-appalābhagilānānam datvā tesam ābhatena yena kenaci yāpentopi santuṭṭhova hoti. Yo pana ekasmim bhājane muttahaṛītakam ṭhapetvā ekasmim catumadhuram “gaṇha, bhante, yadicchasi”ti vuccamāno sacassa tesu aññatarenapi rogo vūpasammati, atha “muttahaṛītakam nāma buddhādīhi vaṇṇita”nti catumadhuram paṭikkhipitvā muttahaṛītakena bhesajjam karonto paramasantuṭṭhova hoti. Ayamassa gilānapaccaye yathāsārappasantoso. Iti ime tayo santose sandhāya “santuṭṭhāyam, bhikkhave, kassapo itarītarena cīvarenā”ti vuttam.

Vaṇṇavādīti eko santuṭṭho hoti, santosassa vaṇṇam na katheti. Eko na santuṭṭho hoti, santosassa vaṇṇam katheti. Eko neva santuṭṭho hoti, na santosassa vaṇṇam katheti. Eko santuṭṭho ca hoti, santosassa ca vaṇṇam katheti. Ayaṃ tādisoti dassetuṃ **itarītaracīvarasantuṭṭhiyā ca vaṇṇavādīti** vuttam. **Anesananti** dūteyyapahiṇagamanānuyogappabhedam nānappakāram anesanam. **Aladdhāti** alabhitvā. Yathā ca ekacco “katham nu kho cīvaram labhissāmī”ti puññavantehi bhikkhūhi saddhim ekato hutvā kohaṇṇam karonto uttasati paritassati, ayaṃ evam aladdhā ca cīvaram na paritassati. **Laddhā cāti** dhammena samena labhitvā. **Agadhītoti** vigatalobhagedho. **Amucchītoti** adhimattataṇhāya muccham anāpanno. **Anajjhāpannoti** taṇhāya anottaṭṭho apariyonaddho. **Ādīnavadassāvīti** anesanāpattiyaṅca gadhitaparibhoge ca ādīnavam passamāno. **Nissaraṇapaññoti**, “yāvadeva sītassa paṭighātāyā”ti vuttanissaraṇameva jānanto paribhuñjātīti attho. **Itarītarena piṇḍapātenāti**ādīsipi yathāladdhādīnam yena kenaci piṇḍapātena, yena kenaci senāsanena, yena kenaci gilānapaccayabhesajjaparikkhārenāti evamattho daṭṭhabbo.

Kassapena vā hi vo, bhikkhave, ovaḍissāmīti ettha yathā mahākassapatthero catūsu paccayesu tīhi santosehi santuṭṭho, tumhepi tathārūpā bhavathāti ovaḍanto kassapena ovaḍati nāma. **Yo vā panassa kassapasadisoti** etthāpi yo vā panaññopi kassapasadiso mahākassapatthero viya catūsu paccayesu tīhi santosehi santuṭṭho bhaveyya, tumhepi tathārūpā bhavathāti ovaḍanto kassapasadisena ovaḍati nāma. **Tathattāya paṭipajjitabbanti** “sammāsambuddhassa imāya imasmim santuṭṭhisutte vuttasallekhācārapaṭipattiyā kathanam nāma bhāro, amhākampi imam paṭipattim paripūram katvā pūraṇam bhāroyeva, āgato kho pana bhāro gahetabbo”ti cintetvā yathā mayā kathitam, tathattāya tathābhāvāya tumhehipi paṭipajjitabbanti. Paṭhamam.

2. Anottappīsuttavaṇṇanā

145. Dutiye **anātāpīti** yaṃ vīriyaṃ kilese ātapati, tena rahito. **Anottappīti** nibbhayo kilesuppattito kusalānuppattito ca bhayarahito. **Sambodhāyāti** sambujjhanatthāya. **Nibbānāyāti** nibbānasacchikiriyāya. **Anuttarassa yogakkhemassāti** arahattassa tañhi anuttarañceva catūhi ca yogehi khemaṃ.

Anuppannātiādīsu ye pubbe appaṭiladdhapubbaṃ cīvarādiṃ vā paccayaṃ upaṭṭhākasaddhivihārika-antevāsīnaṃ vā aññatarato manuññavatthum paṭilabhivā taṃ subhaṃ sukhanti ayoniso gaṇhantassa aññataraṃ vā pana ananubhūtapubbaṃ ārammaṇaṃ yathā tathā vā ayoniso āvajjentassa lobhādayo pāpakā akusalā dhammā uppajjanti, te anuppannāti veditabbā. Aññathā hi anamatagge saṃsāre anuppannā nāma pāpakā dhammā natthi. Anubhūtapubbepi ca vatthumhi ārammaṇe vā yassa pakatibuddhiyā vā uddesaparipucchāya vā pariyattinavakammayonisomanasikārānaṃ vā aññataravasena pubbe anuppajjitvā pacchā tādīsena paccayena sahasā uppajjanti, imepi “anuppannā uppajjamānā anattāya saṃvatteyyu”nti veditabbā. Tesueva pana vatthārammaṇesu punappunaṃ uppajjamānā nappahīyanti nāma, te “uppannā appahīyamānā anattāya saṃvatteyyu”nti veditabbā. Ayamettha saṅkhepo, vitthārato pana uppannānuppannabhedo ca pahānappahānavidhānañca sabbaṃ visuddhimagge ñāṇadassanavisuddhiniddese kathitaṃ.

Anuppannā me kusalā dhammāti appaṭiladdhāpi sīlasamādhimaggaphalasaṅkhātā anavajjadhammā. **Uppannāti** teyeva paṭiladdhā. **Nirujjhamānā anattāya saṃvatteyyunti** te sīlādīdhammā parihānivasena puna anuppattiyā nirujjhamānā anattāya saṃvatteyyunti veditabbā. Ettha ca lokiyā parihāyanti, lokuttarānaṃ parihāni natthīti. “Uppannānaṃ kusalānaṃ dhammānaṃ ṭhitiyā”ti imassa pana sammappadhānassa vasenāyaṃ desanā katā. Dutiyaṃ maggo vā sīghaṃ anuppajjamāno, paṭhamamaggo nirujjhamāno anattāya saṃvatteyyāti evampettha attho daṭṭhabbo. Iti imasmiṃ sutte ime cattāro sammappadhānā pubbabhāgavipassanāvasena kathitāti. Dutiyaṃ.

3. Candūpamasuttavaṇṇanā

146. Tatiye **candūpamāti** candasadisā hutvā. Kiṃ parimaṇḍalatāya? No, apica kho yathā cando gaganatalaṃ pakkhandamāno na kenaci saddhiṃ santhavaṃ vā sinehaṃ vā ālayaṃ vā nikantiṃ vā patthanaṃ vā pariyuṭṭhānaṃ vā karoti, na ca na hoti mahājanassa piyo manāpo, tumhepi evaṃ kenaci saddhiṃ santhavādīnaṃ akaraṇena bahujanassa piyā manāpā candūpamā hutvā khattiyakulādīni cattāri kulāni upasaṅkamathāti attho. Apica yathā cando andhakāraṃ vidhamati, ālokaṃ pharati, evaṃ kilesandhakāravidhamanena ñāṇālokapharaṇena cāpi candūpamā hutvāti evamādīhipi nayehi ettha attho daṭṭhabbo.

Apakasseva kāyaṃ apakassa cittanti teneva santhavādīnaṃ akaraṇena kāyañca cittañca apakassivā, apanetvāti attho. Yo hi bhikkhu araṇṇepi na vasati, kāmavitakkādayopi vitakketi, yaṃ neva kāyaṃ apakassati, na cittaṃ. Yo hi araṇṇepi kho viharati, kāmavitakkādayo pana vitakketi, yaṃ kāyameva apakassati, na cittaṃ. Yo gāmaṇe vasati, kāmavitakkādayopi kho na ca vitakketi, yaṃ cittaṃ eva apakassati, na kāyaṃ. Yo pana araṇṇe ceva vasati, kāmavitakkādayo ca na vitakketi, yaṃ ubhayampi apakassati. Evarūpā hutvā kulāni upasaṅkamathāti dīpento “apakasseva kāyaṃ apakassa citta”nti āha.

Niccanavakāti niccaṃ navakāva, āgantukasadisā eva hutvāti attho. Āgantuko hi paṭipāṭiyā sampattagehaṃ pavisitvā sace naṃ gharasāmikā disvā, “amhākaṃ puttabhātaro vippavāsaṃ gatā evaṃ vicariṃsū”ti anukampamānā nisīdāpetvā bhojenti, bhuttamattoyeva “tumhākaṃ bhājanaṃ gaṇhathā”ti utthāya pakkamati, na tehi saddhiṃ santhavaṃ vā karoti, na kiccakaraṇīyāni vā saṃvidahati, evaṃ tumhepi paṭipāṭiyā sampattagehaṃ pavisitvā yaṃ iriyāpathesu pasannā manussā denti, taṃ gahetvā

chinnasanthavā, tesam kiccakaraṇīye abyāvaṭā hutvā nikkhamathāti dīpeti.

Imassa pana niccanavakabhāvassa āvibhāvattam dvebhātikavatthu kathetabbaṃ – vasālanagaragāmato kira dve bhātikā nikkhamitvā pabbajitā, te cūlanāgattothero ca mahānāgattothero cāti paññāyimsu. Te cittalapabbate tiṃsa vassāni vasitvā arahattam pattā “mātaram passissāmā”ti āgantvā vasālanagaravihāre vasitvā punadivase mātugāmaṃ piṇḍāya pavisimsu. Mātāpi tesam uḷunkena yāguṃ nīharitvā ekassa patte ākiri. Tassā taṃ olokayamānāya puttasiṃho uppajji. Atha naṃ āha – “tvam, tāta, mayham putto mahānāgo”ti. Thero “pacchimaṃ theram puccha upāsike”ti vatvā pakkāmi. Pacchimatherassapī yāguṃ datvā, “tāta, tvam mayham putto cūlanāgo”ti pucchi? Thero “kiṃ, upāsike, purimaṃ theram na pucchasi”ti? Vatvā pakkāmi. Evaṃ mātārāpi saddhiṃ chinnasanthavo bhikkhu niccanavako nāma hoti.

Appagabbhāti na pagabbhā, aṭṭhaṭṭhānena kāyapāgabbhiyena, catuṭṭhānena vacīpāgabbhiyena, anekattṭhānena manopāgabbhiyena ca virahitāti attho. **Aṭṭhaṭṭhānam kāyapāgabbhiyam** nāma saṅghaṇapuggala-bhojanasālā-jantāgharanahānatittha-bhikkhācāramagga-antaragharappavesanesu kāyena appatirūpakaraṇam. Seyyathidaṃ – idhekacco saṅghamajjhe pallatthikāya vā nisīdati pāde pādam ādhāyitvā vāti evamādi (mahāni. 165). Tathā gaṇamajjhe. **Gaṇamajjheti** catuparisasannipāte vā suttantikagaṇadisannipāte vā. Tathā vuḍḍhatare puggale. Bhojanasālāya pana vuḍḍhānam āsanam na deti, navānam āsanam paṭibāhati. Tathā jantāghare. Vuḍḍhe cettha anāpucchā aggijalanādīni karoti. Nhānatitthe ca yadidaṃ “daharo vuḍḍhoti pamānam akatvā āgatapaṭipāṭiyā nhāyitabba”nti vuttam, tampi anādiyanto pacchā āgantvā udakam otarivā vuḍḍhe ca nave ca bādhati. Bhikkhācāramagge pana aggāsanaaggodakaaggapiṇḍānam atthāya purato gacchati bāhāya bāham paharanto. Antaragharappavesane vuḍḍhehi paṭhamataram pavisati, daharehi saddhiṃ kāyakīlanakam karotīti evamādi.

Catuṭṭhānam vacīpāgabbhiyam nāma saṅghaṇapuggalaantaragharesu appatirūpavācānicchāraṇam. Seyyathidaṃ – idhekacco saṅghamajjhe anāpucchā dhammam bhāsati. Tathā pubbe vuttappakāraṇassa gaṇassa majjhe puggalassa ca santike, tattheva manussehi pañham puṭṭho vuḍḍhataram anāpucchā vissajjeti. Antaraghare pana “itthannāme kiṃ atthi? Kiṃ yāgu, udāhu khādanīyam bhojanīyam? Kiṃ me dassasi? Kiṃ aṅga khādissāma? Kiṃ bhuñjissāma? Kiṃ pivissāmā”tiādīni bhāsati.

Anekattṭhānam manopāgabbhiyam nāma tesu tesu ṭhānesu kāyavācāhi ajjhācāram anāpajjitvāpi manasāva kāmavitakkādīnam vitakkanam. Apica dussīlasseva sato “sīlavāti maṃ jano jānātū”ti evam pavattā pāpicchatāpi manopāgabbhiyam. Iti sabbesampi imesam pāgabbhiyānam abhāvena appagabbhā hutvā upasaṅkamathāti vadati.

Jarudapānanti jīṇṇakūpaṃ. Pabbatavisamanti pabbate visamam papātattṭhānam. **Nadīvidugganti** nadiyā viduggam chinnataṭṭhānam. **Apakasseva kāyanti** tādisāni ṭhānāni yo khiḍḍādīpasuto kāyam anapakassa ekatobhāriyam akatvāva vāyupatthambhakaṃ aggāhāpetvā cittampi anapakassa “ettha patito hatthapādabhañjanādīni pāpuṇāti”ti anādīnavadassavitāya anubbejetvā sampiyāyamāno oloketi, so patitvā hatthapādabhañjanādianattham pāpuṇāti. Yo pana udakatthiko vā aññena vā kenaci kiccena oloketukāmo kāyam apakassa ekato bhāriyam katvā vāyupatthambhakaṃ gāhāpetvā, cittampi apakassa ādīnavadassanena saṃvejetvā oloketi, so na patati, yathāruciṃ oloketvā sukhī yena kāmam pakkamati.

Evameva khoti ettha idaṃ opammasaṃsandanaṃ – jarudapānādayo viya hi cattāri kulāni, olokanapuriso viya bhikkhu. Yathā anapakattṭhakāyacitto tāni oloketto puriso tattha patati, evam arakkhitehi kāyādīhi kulāni upasaṅkamanto bhikkhu kulesu bajjhati, tato nānappakāram sīlapādabhañjanādianattham pāpuṇāti. Yathā pana apakattṭhakāyacitto puriso tattha na patati, evam rakkhiteneva kāyena rakkhitehi cittehi rakkhitāya vācāya suppaṭṭhitāya satiyā apakattṭhakāyacitto hutvā kulāni upasaṅkamanto bhikkhu kulesu na bajjhati. Athassa yathā tattha apatitassa purisassa, na pādā

bhañjanti, evaṃ sīlapādo na bhijjati. Yathā hatthā na bhañjanti, evaṃ saddhāhattho na bhijjati. Yathā kucchi na bhijjati, evaṃ samādhikucchi na bhijjati. Yathā sīsaṃ na bhijjati, evaṃ ñāṇasīsaṃ na bhijjati, yathā ca taṃ khāṇukaṇṭakādayo na vijjhanti, evamimaṃ rāgakaṇṭakādayo na vijjhanti. Yathā so nirupaddavo yathārucci oloketvā sukhī yena kāmāṃ pakkamati, evaṃ bhikkhu kulāni nissāya cīvarādayo paccaye paṭisevanto kammaṭṭhānaṃ vaḍḍhetvā saṅkhāre sammasanto arahattaṃ patvā lokuttarasukhena sukhito yena kāmāṃ agatapubbaṃ nibbānadisaṃ gacchati.

Idāni yo hīnādhimuttiko micchāpaṭipanno evaṃ vadeyya “sammāsambuddho ‘tividdhaṃ pāgabbbhiyaṃ pahāya niccānavakattena candūpamā kulāni upasaṅkamathā’ti vadanto aṭṭhāne ṭhapeti, asayhaṃ bhāraṃ āropeti, yaṃ na sakkā kātuṃ taṃ kāreti”ti, tassa vādapathaṃ pacchinditvā, “sakkā evaṃ kātuṃ, atthi evarūpo bhikkhū”ti dassento **kassapo, bhikkhavi**tiādīmāha.

Ākāse pāṇiṃ cālesīti nīle gaganantare yamakavijjutaṃ cārayamāno viya heṭṭhābhāgaṃ uparibhāgaṃ ubhatopassesu pāṇiṃ sañcāresi. Idañca pana tepītake buddhavacane asambhinnapadaṃ nāma. **Attamanoti** tuṭṭhacitto sakamano, na domanassena pacchinditvā gahitamano. **Kassapassa, bhikkhavi**ti idampi purimanayeneva paravādaṃ pacchinditvā atthi evarūpo bhikkhūti dassanattaṃ vuttaṃ.

Pasannākāraṃ kareyyunti cīvarādayo paccaye dadeyyuṃ. **Tathattāya paṭipajjeyyunti** sīlassa āgataṭṭhāne sīlaṃ pūrayamānā, samādhivipassanā maggaphalānaṃ āgataṭṭhāne tāni tāni sampādayamānā tathābhāvāya paṭipajjeyyūṃ. **Anudayanti** rakkhaṇabhāvaṃ. **Anukampanti** muducittataṃ. Ubhayañcetam kārūññasēva vevacanaṃ. **Kassapo, bhikkhavi**ti idampi purimanayeneva paravādaṃ pacchinditvā atthi evarūpo bhikkhūti dassanattaṃ vuttaṃ. **Kassapena vāti** ettha candopamādivasena yojanaṃ katvā purimanayeneva attho vedītabbo. Tatiyaṃ.

4. Kulūpakasuttavaṇṇanā

147. Catutthe **kulūpakoti** kulagharānaṃ upagantā. **Dentuyeva meti** dadantuyeva mayhaṃ. **Sandīyatīti** aṭṭiyati pīliyati. Sesamettha vuttanayānusāreṇeva vedītabbaṃ. Catutthaṃ.

5. Jiṇṇasuttavaṇṇanā

148. Pañcame **jiṇṇoti** thero mahallako. **Garukānīti** taṃ satthu santikā laddhakālato paṭṭhāya chinnabhinnāṭṭhāne suttasaṃsibbanena ceva aggaḷadānena ca anekāni paṭalāni hutvā garukāni jātāni. **Nibbasanānīti** pubbe bhagavatā nivāsetvā apanītatāya evaṃladdhanāmāni. **Tasmāti** yasmā tvaṃ jiṇṇo ceva garupaṃsukūlo ca. **Gahapatānīti** paṃsukūlikaṅgaṃ vissajjetvā gahapatīhi dinnacīvarāni dhārehīti vadati. **Nimantanānīti** piṇḍapātīkaṅgaṃ vissajjetvā salākabhattādīni nimantanāni bhujjāhīti vadati. **Mama ca santiketī** āraññīkaṅgaṃ vissajjetvā gāmantasenāsaneyeva vasāhīti vadati.

Nanu ca yathā rājā senāpatiṃ senāpatiṭṭhāne ṭhapetvā tassa rājūpaṭṭhānādīnā attano kammaṇa ārādhentasseva taṃ ṭhānantaraṃ gahetvā aññassa dadamāno ayuttaṃ nāma karoti, evaṃ satthā mahākassapattherassa paccuggamanatthāya tigāvutaṃ maggaṃ gantvā rājagahassa ca nāḷandāya ca antare bahuputtakarukkhamūle nisinnō tīhi ovādehi upasampādetvā tena saddhiṃ attano cīvaraṃ parivattetvā theram jātiāraññīkaṅgañceva jātipaṃsukūlikaṅgañca akāsi, so tasmim kattukamyatāchandena satthu cittaṃ ārādhentasseva paṃsukūlādīni vissajjāpetvā gahapatīcīvarapaṭiggahaṇādīsū niyojento ayuttaṃ nāma karotīti. Na karotī. Kasmā? Attajjhāsayaṭṭā. Na hi satthā dhutaṅgāni vissajjāpetukāmo, yathā pana aghaṭṭitā bherīādayo saddaṃ na vissajjenti, evaṃ aghaṭṭitā evarūpā puggalā na sīhanādaṃ nadantīti nadāpetukāmo sīhanādajjhāsayaṇa evamāha. Theropi satthu ajjhāsayaṇurūpeneva “ahaṃ kho, bhante, dīgharattaṃ āraññīko cevā”tiādīnā nayena sīhanādaṃ nadati.

Diṭṭhadhammasukhavihāranti diṭṭhadhammasukhavihāro nāma āraññikasessa labbhati, no gāmantavāsino. Gāmantasmīhi vasanto dāraśasaddaṃ suṇāti, asappāyarūpāni passaṭṭhi, asappāye sadde suṇāti, tenassa anabhirati uppajjati. Āraññiko pana gāvutaṃ vā aḍḍhayojanaṃ vā atikkamitvā araññaṃ ajjhogāhetvā vasanto dīpibyaḅḅhaśihādīnaṃ sadde suṇāti, yesaṃ savanaḅḅaccayā amānusikāśavanaḅḅarati uppajjati. Yaṃ sandhāya vuttaṃ –

“Suññāgāraṃ pavitṭhassa, santacittassa bhikkhuno;
Amānusiṅ ratī hoti, sammā dhammaṃ vipassato.

“Yato yato sammasati, khandhānaṃ udayabbayaṃ;
Labhati pītipāmojjaṃ, amataṃ taṃ vijānataṃ. (dha. pa. 373-374);

“Purato pacchato vāpi, aparo ce na vijjati;
Tattheva phāsu bhavati, ekassa ramato vane”ti.

Tathā piṇḍapātīkassa labbhati, no apiṇḍapātīkassa. Apiṇḍapātīko hi akālacārī hoti, turitacāraṃ gacchati, parivatteti, palibuddhova gacchati, tattha ca bahusaṃsayo hoti. Piṇḍapātīko pana na akālacārī hoti, na turitacāraṃ gacchati, na parivatteti, apalibuddhova gacchati, tattha ca na bahusaṃsayo hoti.

Kathaṃ? Apiṇḍapātīko hi gāmato dūravihāre vasamāno kālasseva “yāguṃ vā pārivāsikabhattaṃ vā lacchāmi, āśanaśālāya vā pana uddesaḅḅhattādīsū kiñcīdeva mayhaṃ pāpuṇissati”ti makkaṭṭakasuttāni chindanto sayitaḅḅorūpāni utṭhāpento pātova gacchanto akālacārī hoti. Manusse khettakammādīnaṃ atthāya gehā nikkhanteyeva sampāpuṇitūṃ migāṃ anubandhanto viya vegena gacchanto turitacārī hoti. Antarā kiñcīdeva disvā “asukaḅḅāsako vā asukaḅḅāsikā vā gehe, no gehe”ti pucchati, “no gehe”ti sutvā “idāni kuto labhissāmi”ti? Aggidaḅḅḅho viya pvedaḅḅati, sayāṃ pacchimaḅḅisaṃ gantukāmo pācīnaḅḅisaṃ salākaṃ labhitvā aññaṃ pacchimaḅḅisaṃ laddhasalākaṃ upasaṅkamitvā, “bhante, ahaṃ pacchimaḅḅisaṃ gamissāmi, mama salākaṃ tumhe gaṅḅhatha, tumhākaṃ salākaṃ mayhaṃ dethā”ti salākaṃ parivatteti. Ekaṃ vā pana salākaḅḅhattaṃ āharitvā paribhuṅḅanto “apaśasaḅḅapi salākaḅḅhattassa pattaṃ dethā”ti manussehi vutte, “bhante, tumhākaṃ pattaṃ detha, ahaṃ mayhaṃ patte bhattaṃ pakkhipitvā tumhākaṃ pattaṃ dassāmi”ti aññaśsa pattaṃ dāpetvā bhante āḅaṭṭe attano patte pakkhipitvā pattaṃ paḅḅidanto pattaṃ parivatteti nāma. Vihāre rājarājaḅḅamaḅḅattādayo maḅḅādānaṃ denti, iminā ca bhīyyo dūraḅḅame salākaḅḅ laddhā, tattha agaḅḅchanto puna sattāhaṃ salākaṃ na labhatīti alābhabhayena gacchati, evaṃ gacchanto palibuddho hutvā gacchati nāma. Yassa cesa salākaḅḅhattādīno atthāya gacchati, “taṃ dassanti nu kho me, udāhu na dassanti, paṅḅitaṃ nu kho dassanti, udāhu lūkhaṃ, thokaṃ nu kho, udāhu bahukaṃ, sītaṃ nu kho, udāhu uṅḅa”nti evaṃ tattha ca bahusaṃsayo hoti.

Piṇḍapātīko pana kālasseva vuṭṭhāya vattapaḅḅivattaṃ katvā sarīraṃ paḅḅijaggitvā vasaṅḅḅhānaṃ pavisitvā kammaḅḅḅhānaṃ manasikatvā kālaṃ sallakkhetvā maḅḅājanaśsa uḅḅuṅkaḅḅhikkhādīni dātuṃ paḅḅonakāle gacchatīti na akālacārī hoti, ekekaṃ paḅḅavāraṃ cha koḅḅḅhāse katvā vipassanto gacchatīti na turitacārī hoti, attano gaḅḅbhāvena “asuko gehe, na gehe”ti na pucchati, salākaḅḅhattādīniyeva na gaṅḅhāti. Agaṅḅhanto kiṃ parivattessati? Na aññaśsa vasaṅḅa palibuddhova hoti, kammaḅḅḅhānaṃ manasikaḅḅaronto yaḅḅāruḅḅi gacchati, itaro viya na bahusaṃsayo hoti. Ekasmiṃ gāme vā vīthiyā vā alabhītvā aññaḅḅattha carati. Tasmimḅḅi alabhītvā aññaḅḅattha caranto missakodanaṃ śankaḅḅḅhitvā amataṃ viya paribhuṅḅitvā gacchati.

Paṃśukūlikassa labbhati, no apaṃśukūlikassa. Apaṃśukūliko hi vassaḅḅvāsikaṃ pariyesanto carati, na śeṅāśanaśsaḅḅāyaṃ pariyesati. Paṃśukūliko pana na vassaḅḅvāsikaṃ pariyesanto carati, śeṅāśanaśsaḅḅāyameva pariyesati. Tecaḅḅvarīkassa labbhati, na itaśsa. Atecaḅḅvarīko hi bahubhaṅḅo bahupaḅḅikkhāro hoti, tenassa phāśuvihāro natthi. Appicḅḅādīnaḅḅceva labbhati, na itaśsa. Tena vuttaṃ – “attano ca diṭṭhadhammasukhavihāraṃ śampassaṃmāno”ti. Paḅḅicaṃḅaṃ.

6. Ovādasuttavaṇṇanā

149. Chaṭṭhe **ahaṃ vāti** kasmā āha? Theraṃ attano ṭhāne ṭhapanatthaṃ. Kiṃ sārīputtamoggallānā natthīti? Atthi. Evaṃ panassa ahosi “ime na ciraṃ ṭhassanti, kassapo pana vīsavassasatāyuko, so mayi parinibbute sattapaṇṇiguhāyaṃ nisīditvā dhammavinayasāṅgahaṃ katvā mama sāsanaṃ pañcavassasahassaparimāṇakālapavattanakaṃ karissati, attano taṃ ṭhāne ṭhāpemi, evaṃ bhikkhū kassapassa sussūsitabbaṃ maññissantī”ti. Tasmā evamāha. **Dubbacāti** dukkhena vattabbā. **Dovacassakaraṇehīti** dubbacabhāvakaraṇehi. **Appadakkhiṇaggāhinoti** anusāsaniṃ sutvā padakkhiṇaṃ na gaṇhanti yathānusiṭṭhaṃ na paṭipajjanti, appaṭipajjantā vāmagāhino nāma jātāti dasseti. **Accāvadanteti** atikkamma vadante, sutapariyattiṃ nissāya ativiya vādaṃ karonteti attho. **Ko bahutaraṃ bhāsissatīti** dhammaṃ kathento ko bahuṃ bhāsissati, kiṃ tvam, udāhu ahanti? **Ko sundarataranti**, eko bahuṃ bhāsanto asahitaṃ amadhuraṃ bhāsati, eko sahitaṃ madhuraṃ, taṃ sandhāyāha “ko sundaratarā”nti? Eko pana bahuṃca sundaraṇca kathento ciraṃ na bhāsati, lahuññeva uṭṭhāti, eko addhānaṃ pāpeti, taṃ sandhāyāha “ko ciratarā”nti? Chaṭṭhaṃ.

7. Dutiyaovādasuttavaṇṇanā

150. Sattame **saddhāti** okappanasaddhā. **Vīriyanti** kāyikacetasaṃkāyaṃ vīriyaṃ. **Paññāti** kusalaḍḍhammajānanapaññā. **Na santi bhikkhū ovādakāti** imassa puggalassa ovādakā anusāsakā kalyāṇamittā natthīti idaṃ, bhante, parihānanti dasseti. Sattamaṃ.

8. Tatiyaovādasuttavaṇṇanā

151. Aṭṭhame **tathā hi panāti** pubbe sovacassatāya, etarahi ca dovacassatāya kāraṇapaṭṭhapane nipāto. **Tatrāti** tesu thesu. **Ko nāmāyaṃ bhikkhūti** ko nāmo ayaṃ bhikkhu? Kiṃ tissatthero kiṃ nāgattheroti? **Tatrāti** tasmiṃ evaṃ sakkāre kayiramāne. **Tathattāyāti** tathābhāvāya, āraññikādibhāvāyāti attho. **Sabrahmacārikāmoti** “ime maṃ parivāretvā carantū”ti evaṃ kāmehi icchati patthetīti sabrahmacārikāmo. **Tathattāyāti** lābhasakkāranibbattanatthāya. **Brahmacārupaddavenāti** yo sabrahmacāriṇaṃ catūsu paccayesu adhimattacchandarāgo upaddavoti vuccati, tena upaddutā. **Abhipatthanāti** adhimattapatthanā. **Brahmacāriabhipatthanenāti** brahmacāriṇaṃ adhimattapatthanāsaṅkhātena catupaccayabhāvena. Aṭṭhamaṃ.

9. Jhānābhīññasuttavaṇṇanā

152. Navame **yāvadeva ākaṅkhāmīti** yāvadeva icchāmi. Yāni pana ito paraṃ **vivicceva kāmehīti**ādinā nayena cattāri rūpāvacarajjhānāni, **sabbaso rūpasaññānaṃ samatikkamāti**ādinā nayena catasso arūpasamāpattiyo, **sabbaso nevasaññānāsaññāyatanaṃ samatikkamma saññāvedayitanirodhanti** evaṃ nirodhasamāpatti, **anekavihiṭaṃ iddhividhanti**ādinā nayena pañca lokikābhīññā ca vuttā. Tattha yaṃ vattabbaṃ siyā, taṃ sabbamaṃ anupadavaṇṇanāya ceva bhāvanāvidhānena ca saddhiṃ visuddhimagge (visuddhi. 1.69) vitthāritameva. Chaḷabhiññāya pana **āsavānaṃ khayāti** āsavānaṃ khayena. **Anāsavanti** āsavānaṃ apaccayabhūtaṃ. **Cetovimuttinti** arahattaphalasaṃpattiṃ. **Paññāvīti** arahattaphalapaññānaṃ. Navamaṃ.

10. Upassayasuttavaṇṇanā

153. Dasame **āyāma, bhanteti** kasmā bhikkhunīupassayagamaṇaṃ yāceti? Na lābhasakkārahetu, kammaṭṭhānatthikā panettha bhikkhuniyo atthi, tā ussukkāpetvā kammaṭṭhānaṃ kathāpessāmīti yāceti. Nanu ca so sayampi tepitako bahussuto, kiṃ sayamaṃ kathetuṃ na sakkotīti? No na sakkoti. Buddhapaṭibhāgassa pana sāvakaṃsa kathaṃ saddhātabbaṃ maññissantīti yāceti. **Bahukicco tvam bahukaraṇīyoti** kiṃ thero navakammādiṇasuto, yena naṃ evamāhāti? No, satthari pana parinibbute catasso parisā ānandattheraṃ upasaṅkamitvā, “bhante, idāni kassa pattacīvaraṃ gahetvā caratha, kassa

parivenaṃ sammajjatha, kassa mukhodakaṃ dethā”ti rodanti paridevanti. Thero “aniccā saṅkhārā, vuddhasarīrepi nillajjova maccurājā pahari. Esā saṅkhārānaṃ dhammatā, mā socittha, mā paridevitthā”ti parisam saññāpeti. Idamassa bahukiccaṃ. Taṃ sandhāya thero evamāha. **Sandassesīti** paṭipattiguṇaṃ dassesi. **Samādapesīti** gaṇhāpesi. **Samuttejesīti** samussāhesi. **Sampahaṃsesīti** paṭiladdhaguṇena modāpesi.

Thullatissāti sarīrena thulā, nāmena tissā. **Vedehamuninoti** paṇḍitamunino. Paṇḍito hi ñāṇasaṅkhātena vedena īhati sabbakiccāni karoti, tasmā “vedeho”ti vuccati. Vedeho ca so muni cāti, vedehamuni. **Dhammaṃ bhāsitaḃbaṃ maññatīti** tipīṭakadharassa dhammabhaṇḍāgārikassa sammukhe sayam araṇṇāvāsī paṃsukūliko samāno “dhammakathiko aha”nti dhammaṃ bhāsitaḃbaṃ maññati. Idam kiṃ pana, kathaṃ panāti? Avajānamānā bhaṇati. **Assosīti** aññena āgantvā ārocitavasena assosi. **Āgamehi tvam, āvusoti** tiṭṭha tvam, āvuso. **Mā te saṅgho uttari upaparikkhīti** mā bhikkhusaṅgho atirekaokāse taṃ upaparikkhīti. Idam vuttaṃ hoti – “ānandena buddhapaṭibhāgo sāvako vārito, ekā bhikkhunī na vāritā, tāya saddhiṃ santhavo vā sineho vā bhavissatī”ti mā taṃ saṅgho evaṃ amaññīti.

Idāni attano buddhapaṭibhāgabhāvaṃ dīpento **taṃ kiṃ maññasi, āvusoti**ādīmāha? **Sattaratananti** sattahatthappamaṇaṃ. **Nāganti** hatthiṃ. **Aḍḍhaṭṭharatanaṃ vāti** aḍḍharatanaena ūnaaṭṭharatanaṃ, purimapaḍato paṭṭhāya yāva kumbhā vidatthādihikasattahatthubbedhanti attho. **Tālapattikāyāti** taruṇatālapaṇṇena. **Cavitthāti** cutā, na matā vā naṭṭhā vā, buddhapaṭibhāgassa pana sāvakassa upavādaṃ vatvā mahākassapatthere chahi abhiññāhi sīhanādaṃ nadante tassā kāsāvāni kaṇṭakasākhā viya kacchusākhā viya ca sarīraṃ khādituṃ āraddhāni, tāni hāretvā setakāni nivatthakkaṇeyevassā cittassādo udapādīti. Dasamaṃ.

11. Cīvarasuttavaṇṇanā

154. Ekādasame **dakkhiṇāgirisminti** rājagahaṃ parivāretvā ṭhitassa girino dakkhiṇabhāge janapado dakkhiṇāgiri nāma, tasmim cārikaṃ caratīti attho. Cārikā ca nāma duvidhā hoti turitacārikā ca aturitacārikā ca. Tattha yaṃ ekacco ekaṃ kāsāvaṃ nivāsetvā ekaṃ pārupitvā pattacīvaraṃ aṃse laggetvā chattaṃ ādāya sarīrato sedehi paggharantehi divasena sattaṭṭhayaḃjanāni gacchati, yaṃ vā pana buddhā kiñciveva bodhaneyyasattaṃ disvā yojanasatampi yojanasahassampi khaṇena gacchanti, esā **turitacārikā** nāma. Devasikaṃ pana gāvutaṃ aḍḍhayaḃjanaṃ tigāvutaṃ yojananti ettakaṃ addhānaṃ ajjatanāya nimantanam adhivāsayaḃto janasaṅgahaṃ karoto gamanaṃ, esā **aturitacārikā** nāma. Ayaṃ idha adhippetā.

Nanu ca thero pañcavīsati vassāni chāyā viya dasabalassa pacchato pacchato gacchantova ahoṣi, “kahaṃ ānando”ti vacanassa okāsameva na adāsi, so kismim kāle bhikkhusaṅghena saddhiṃ cārikaṃ carituṃ okāsaṃ labhatīti? Satthu parinibbānasaṃvacchare. Parinibbute kira satthari mahākassapatthero satthu parinibbāne sannipatitassa bhikkhusaṅghassa majjhe nisīditvā dhammavinayaṃ saṅgāyanatthaṃ pañcasate bhikkhū uccinitvā, “āvuso, mayaṃ rājagahe vassaṃ vasantā dhammavinayaṃ saṅgāyissāma, tumhe pure vassūpanāyikāya attano palibodhaṃ ucchinditvā rājagahe sannipatathā”ti vatvā attanā rājagahaṃ gato. Ānandattheropi bhagavato pattacīvaraṃ ādāya mahājanaṃ saññāpento sāvattiṃ gantvā tato nikkhamma rājagahaṃ gacchanto dakkhiṇāgirismim cārikaṃ cari. Taṃ sandhāyetam vuttaṃ.

Yebhuyyena kumārabhūtāti ye te hīnāyāvattā nāma, te yebhuyyena kumārakā daharā taruṇā ekavassikadvevassikā bhikkhū ceva anupasampannakumārakā ca. Kasmā panete pabbajitā, kasmā hīnāyāvattātī? Tesam kira mātāpitaro cintesuṃ – “ānandatthero satthu vissāsiko aṭṭha vare yācitvā upaṭṭhahati, icchiticchitaṭṭhānaṃ satthāraṃ gahetvā gantuṃ sakkoti, amhākaṃ dārake etassa santike pabbājema, so satthāraṃ gahetvā āgamissati, tasmim āgate mayaṃ mahāsakkāraṃ kātuṃ labhissāmā”ti. Iminā tāva kāraṇena nesam ñātakā te pabbājesuṃ. Satthari pana parinibbute tesam sā patthanā upacchinnā, atha te ekadivaseneva uppabbājesuṃ.

Yathābhirantanti yathāruciyā yathāajjhāsayena. **Tikabhojanam paññattanti**, idaṃ “gaṇabhojane aññatra samayā pācittiya”nti (pāci. 211). Idaṃ sandhāya vuttaṃ. Tattha hi tiṇṇaṃ janānaṃ akappiyanimantaṃ sādīyitvā ekato paṭiggaṇhantānaṃ anāpatti, tasmā “tikabhojana”nti vuttaṃ.

Dummaṅkūnaṃ puggalānaṃ niggahāyāti dussīlapuggalānaṃ niggaṇhanatthaṃ. **Pesalānaṃ bhikkhūnaṃ phāsuvihārāyāti** dummaṅkūnaṃ niggaheneva pesalānaṃ uposathapavāraṇā vattanti, samaggavāso hoti, ayaṃ tesam phāsuvihāro hoti, imassa phāsuvihārassa atthāya. **Mā pāpicchā pakkhaṃ nissāya saṅghaṃ bhindeyyunti** yathā devadatto sapaṇiso kulesu viññāpetvā bhuñjanto pāpicche nissāya saṅghaṃ bhindī, evaṃ aññepi pāpicchā gaṇabandhena kulesu viññāpetvā bhuñjamānā gaṇaṃ vaḍḍhetvā taṃ pakkhaṃ nissāya mā saṅghaṃ bhindeyyunti, iti iminā kāraṇena paññattanti attho. **Kulānuddayatāya cāti** bhikkhusaṅhe uposathapavāraṇaṃ katvā samaggavāsaṃ vasante manussā salākabhaddāni datvā saggaparāyaṇā bhavanti, iti imāya kulānuddayatāya ca paññattanti attho.

Sassaghātaṃ maññe carasīti sassam ghātento viya āhiṇḍasi. **Kulūpaghātaṃ maññe carasīti** kulāni upaghātento viya hananto viya āhiṇḍasi. **Olujjati** visesena palujjati bhijjati. **Palujjanti kho te, āvuso, navappāyāti**, āvuso, ete tuyhaṃ pāyena yebhuyyena navakā ekavassikaduvassikā daharā ceva sāmaṇerā ca palujjanti bhijjanti. **Na vāyaṃ kumārako mattamaññāsīti** ayaṃ kumārako attano pamāṇaṃ na jānātīti theram tājento āha.

Kumārakavādā na muccāmāti kumārakavādato na muccāma. **Tathā hi pana tvanti** idamassa evaṃ vattabbatāya kāraṇadassanatthaṃ vuttaṃ. Ayañhettha adhippāyo – yasmā tvaṃ imehi navehi bhikkhūhi indriyasamvararahitehi saddhiṃ vicarasi, tasmā kumārakehi saddhiṃ vicaranto kumārakoti vattabbataṃ arahasīti.

Aññatitthiyapubbo samānoti idaṃ yasmā therassa imasmim sāsane neva ācariyo na upajjhāyo paññāyati, sayam kāsāyāni gahetvā nikkhanto, tasmā anattamanatāya aññatitthiyapubbatam āropayamānā āha.

Sahasāti ettha rāgamohacāropi sahasācāro, idaṃ pana dosacāravasena vuttaṃ. **Appaṭisaṅkhāti** appaccavekkhitvā, idāni attano pabbajjam sodhento **yatvāham, āvusoti**ādīmāha. Tattha **aññaṃ satthāraṃ uddisitunti** thapetvā bhagavantaṃ aññaṃ mayhaṃ satthāti evaṃ uddisituṃ na jānāmi. **Sambādho gharāvāsoti**ādīsu sacepi saṭṭhihatthe ghare yojanasatantarepi vā dve jāyampatikā vasanti, tathāpi tesam sakiñcanasapalibodhaṭṭhena gharāvāso sambādhoyeva. **Rajāpathoti** rāgarajādīnaṃ utthānaṭṭhānanti mahāaṭṭhakathāyaṃ vuttaṃ. “Āgamanapatho”tipi vattuṃ vaṭṭati. Alagganaṭṭhena abbhokāso viyāti **abbhokāso**. Pabbajito hi kūtāgāraratanamayapāsādadevavimānādīsu pihitadvāravātapānesu paṭicchannesu vasantopi neva laggati na sajjati na bajjhati, tena vuttaṃ “abbhokāso pabbajjā”ti. Apica **sambādho gharāvāso** kusalakiriyāya okāsābhāvato **rajāpatho** asaṃvutasaṅkāraṭṭhānaṃ viya rajānaṃ, kilesarajānaṃ sannipātaṭṭhānato, **abbhokāso pabbajjā** kusalakiriyāya yathā sukhaṃ okāsasabbhāvato.

Nayidaṃ sukaraṃ...pe... pabbajeyyanti ettha ayaṃ saṅkhepakathā – yadetam sikkhattayabrahmacariyaṃ ekampi divasaṃ akhaṇḍam katvā carimakacittaṃ pāpetabbatāya **ekantaparipuṇṇam** caritabbaṃ, ekadivasaṃ ca kilesamalena amalīnaṃ katvā carimakacittaṃ pāpetabbatāya **ekantaparissuddham, saṅkhalikhitaṃ** likhitasāṅkhasadisam dhotasaṅkhasappaṭibhāgaṃ caritabbaṃ, idaṃ na sukaraṃ agāraṃ ajjhāvasatā agāramajjhe vasantena ekantaparipuṇṇam...pe... carituṃ, yaṃnūnāhaṃ kesamassuṃ ohāretvā kasāyarasapītātāya kāsāyāni brahmacariyaṃ carantānaṃ anucchavikāni vatthāni acchādetvā paridahitvā agārasmā nikkhamitvā anagāriyaṃ pabbajeyyanti. Ettha ca yasmā agārassa hitam kasivaññijjādikkammaṃ **agāriyanti** vuccati, taṃ pabbajjāya natthi, tasmā pabbajjā anagāriyāti ñātabbā, taṃ anagāriyaṃ. **Pabbajeyyanti** paṭipajjeyyaṃ.

Paṭapilotikānanti jinṇapilotikānaṃ terasahatthopi hi navasāṭako dasānaṃ chinnaḥkālato paṭṭhāya

pilotikāti vuccati. Iti mahārahāni vatthāni chinditvā kataṃ saṅghāṭiṃ sandhāya “paṭapilotikānaṃ saṅghāṭi”nti vuttam. **Addhānamaggapaṭipanno**ti addhajojanato paṭṭhāya maggo addhānanti vuccati, taṃ addhānamaggaṃ paṭipanno, dīghamaggaṃ paṭipanno ti attho.

Idāni yathā esa pabbajito, yathā ca addhānamaggaṃ paṭipanno, imassatthassa āvibhāvattam abhinīhārato paṭṭhāya anupubbikathā kathetabbā – atīte kira kappasatasahassamatthake padumuttaro nāma satthā udapādi, tasmim haṃsavatīnagaraṃ upanissāya kheme migadāye viharante vedehe nāma kuṭumbiko asītkoṭidhanavibhavo pātova subhojanaṃ bhuñjitvā uposathaṅgāni adhiṭṭhāya gandhapupphādini gahetvā vihāraṃ gantvā satthāraṃ pūjetvā vanditvā ekamantaṃ nisīdi. Tasmim khaṇe satthā mahānisabhattheraṃ nāma tatiyasāvakaṃ “etadaggaṃ, bhikkhave, mama sāvakaṇaṃ bhikkhūnaṃ dhutavādānaṃ yadidaṃ nisabho”ti etadagge ṭhapesi. Upāsako taṃ sutvā pasanno dhammakathāvasāne mahājane utṭhāya gate satthāraṃ vanditvā, “bhante, sve mayhaṃ bhikkhaṃ adhivāsethā”ti āha. Mahā kho, upāsaka, bhikkhusaṅghoti. Kittako bhagavāti. Aṭṭhasaṭṭhibhikkhusatasahassanti. Bhante, ekaṃ sāmaṇerampi vihāre asesetvā bhikkhaṃ adhivāsethāti. Satthā adhivāsesi. Upāsako satthu adhivāsanaṃ viditvā gehaṃ gantvā mahādānaṃ sajjitvā punadivase satthu kālaṃ ārocāpesi. Satthā pattacīvaramādāya bhikkhusaṅghaparivuto upāsakassa gharaṃ gantvā paññattāsane nisinno dakkhiṇodakāvasāne yāgubhattādini sampaṭicchanto bhattavissaggaṃ akāsi. Upāsakopi satthu santike nisīdi.

Tasmim antare mahānisabhatthero piṇḍāya caranto tameva vīthim paṭipajji. Upāsako disvā utṭhāya gantvā therāṃ vanditvā “pattaṃ, bhante, no dethā”ti āha. Thero pattaṃ adāsi. Bhante, idheva pavisatha, satthāpi gehe nisinnoti. Na vaṭṭissati upāsakāti. Upāsako therassa pattaṃ gahetvā piṇḍapātassa pūretvā nīharitvā adāsi. Tato therāṃ anugantvā nivatto satthu santike nisīditvā evamāha – “bhante, mahānisabhatthero ‘satthā gehe nisinno’ti vuttepi pavisitum na icchi, atthi nu kho etassa tumhākaṃ guṇehi atireko guṇo”ti. Buddhānaṃ vaṇṇamaccheraṃ nāma natthi. Atha satthā evamāha – “upāsaka, mayaṃ bhikkhaṃ āgamayamānā gehe nisīdāma, so bhikkhu na evaṃ nisīditvā bhikkhaṃ udikkhati. Mayaṃ gāmantasenāsane vasāma, so araṇṇasmimyeva vasati. Mayaṃ channe vasāma, so abbhokāsamhiyeva vasati. Iti tassa ayaṇca ayaṇca guṇo”ti mahāsamuddaṃ pūrayamānova kathesi. Upāsako pakatiyāpi jalamānadīpo telena āsitto viya suṭṭhutaṃ pasanno hutvā cintesi – “kiṃ mayhaṃ aññāya sampattiyā, anāgate ekassa buddhassa santike dhutavādānaṃ aggabhāvattāya patthanam karissāmi”ti?

So punapi satthāraṃ nimantetvā teneva niyāmena satta divasāni dānaṃ datvā sattame divase aṭṭhasaṭṭhibhikkhusatasahassassa ticīvarāni datvā satthu pādāmūle nipajjitvā evamāha – “yaṃ me, bhante, satta divasāni dānaṃ dentassa mettaṃ kāyakammaṃ mettaṃ vacīkammaṃ mettaṃ manokammaṃ, imināhaṃ na aññaṃ devasampattiṃ vā sakkamārabrahmasampattiṃ vā patthemī, idaṃ pana me kammaṃ anāgate ekassa buddhassa santike mahānisabhattherena pattatṭhānantaram pāpuṇanattāya terasadhutaṅgadharaṇaṃ aggabhāvassa paccayo hotū”ti. Satthā “mahantaṃ ṭhānaṃ iminā patthitaṃ, samijjhissati nu kho”ti olokento samijjhanabhāvaṃ disvā āha – “manāpaṃ te ṭhānaṃ patthitaṃ, anāgate satasahassakappamatthake gotamo nāma buddho uppajjissati, tassa tvaṃ tatiyasāvako mahākassapatthero nāma bhavissasi”ti. Taṃ sutvā upāsako “buddhānaṃ dve kathā nāma natthī”ti punadivase pattabbaṃ viya taṃ sampattiṃ amaññittha. So yāvatāyukaṃ sīlaṃ rakkhitvā tattha kālaṅkato sagge nibbatti.

Tato paṭṭhāya devamanussesu sampattiṃ anubhavanto ito ekanavutikappe vipassimhi sammāsambuddhe bandhumatīnagaraṃ nissāya kheme migadāye viharante devaḷokā cavitvā aññatarasmim pariṇiṇṇe brāhmaṇakule nibbatti. Tasmīṅca kāle “vipassī bhagavā sattame sattame saṃvacchare dhammaṃ kathetī”ti mahantaṃ kolāhalaṃ hoti. Sakalajambudīpe devatā “satthā dhammaṃ kathessati”ti ārocenti, brāhmaṇo taṃ sāsanaṃ assosi. Tassa ca nivāsanaśāṭako eko hoti, tathā brāhmaṇiyā, pārupanaṃ pana dvinnampi ekameva. Sakalanagare “ekasāṭakabrāhmaṇo”ti paññāyati. Brāhmaṇānaṃ kenacideva kiccena sannipāte sati brāhmaṇim gehe ṭhapetvā sayam gacchati,

brāhmaṇīnaṃ sannipāte sati sayam gehe tiṭṭhati, brāhmaṇī taṃ vatthaṃ pārupitvā gacchati. Tasmim̐ pana divase brāhmaṇo brāhmaṇim̐ āha – “bhoti, kiṃ rattim̐ dhammassavanaṃ suṇissasi divā”ti? “Mayaṃ mātuḡāmajātikā nāma rattim̐ sotuṃ na sakkoma, divā sossāmi”ti brāhmaṇaṃ gehe ṭhapetvā vatthaṃ pārupitvā upāsikāhi saddhim̐ divā gantvā satthāraṃ vanditvā ekamante nisinnā dhammaṃ sutvā upāsikāhiyeva saddhim̐ āgamāsi. Atha brāhmaṇo brāhmaṇim̐ gehe ṭhapetvā vatthaṃ pārupitvā vihāraṃ gato.

Tasmim̐ ca samaye satthā parisamajjhe alaṅkatadhammāsane sannisinno cittabjāniṃ ādāya ākāsagaṅgaṃ otārento viya sineruṃ matthaṃ katvā sāgaraṃ nimmathento viya dhammakathaṃ katheti. Brāhmaṇassa parisante nisinnassa dhammaṃ suṇantassa paṭhamayāmasmim̐yeva sakalasarīraṃ pūrayamānā pañcavaṇṇā pīti uppajji. So pārutavatthaṃ saṅgharivā “dasabalassa dassāmi”ti cintesi. Athassa ādīnavasahassaṃ dassayamānaṃ maccheraṃ uppajji, so “brāhmaṇiyā ca mayhaṅca ekameva vatthaṃ, aññaṃ kiñci pārupanaṃ natthi, apārupitvā ca nāma bahi carituṃ na sakkā”ti sabbathāpi adātukāmo ahoṣi. Athassa nikkhante paṭhamayāme majjhimayāmeṃpi tatheva pīti uppajji, so tatheva ca cintetvā tatheva adātukāmo ahoṣi. Athassa majjhimayāme nikkhante pacchimayāmeṃpi tatheva pīti uppajji, so “taraṇaṃ vā hotu maraṇaṃ vā, pacchāpi jānissāmi”ti vatthaṃ saṅgharivā satthu pādamaṃ ṭhapesi. Tato vāmahatthaṃ ābhujitvā dakkhiṇena hatthena tikkhattuṃ apphoṭetvā “jitaṃ me jitaṃ me”ti tayo vāre nadi.

Tasmiṅca samaye bandhumarājā dhammāsanaṃ pacchato antosāṇiyaṃ nisinnā dhammaṃ suṇāti. Rañño ca nāma “jitaṃ me”ti saddo amanāpo hoti. So purisaṃ pesesi “gaccha etaṃ puccha kiṃ vadesi”ti? So tena gantvā pucchito āha – “avasesā hatthiyānādīni āruya asicammādīni gahetvā parasenaṃ jinanti, na taṃ acchariyaṃ, ahaṃ pana pacchato āgacchantassa kūṭaḡoṇassa muggarena sīsaṃ bhinditvā taṃ palāpento viya maccheracittaṃ madditvā pārutavatthaṃ dasabalassa adāsim̐, taṃ me macchariyaṃ jita”nti āha. Puriso gantvā taṃ pavattim̐ rañño ārocesi. Rājā āha – “amhe bhāṇe dasabalassa anurūpaṃ na jānimhā, brāhmaṇo pana jāni”ti vatthayugampi pesesi. Taṃ disvā brāhmaṇo cintesi – “ayaṃ mayhaṃ tuṅhī nisinnassa paṭhamaṃ kiñci adatvā satthu guṇe kathentassa adāsi, satthu guṇe paṭicca uppannaṃ mayhaṃ ko attho”ti tampi vatthayugaṃ dasabalasseva adāsi. Rājā “kiṃ brāhmaṇena kata”nti? Pucchitvā, “tampi tena vatthayugaṃ tathāgatasseva dinna”nti sutvā aññāni dve vatthayugāni pesesi. So tānipi adāsi. Rājā aññānipi cattārīti evaṃ yāva dvattimsa vatthayugāni pesesi. Atha brāhmaṇo “idaṃ vaḡḡhetvā gahaṇaṃ viya hoti”ti attano atthāya ekaṃ brāhmaṇiyā atthāya ekanti dve vatthayugāni gahetvā timsa yugāni tathāgatasseva adāsi. Tato paṭṭhāya ca satthu vissāsiko jāto.

Atha naṃ rājā ekadivasaṃ sītasamaye satthu santike dhammaṃ suṇantaṃ disvā satasahassagghaṇikaṃ attano pāruṭaṃ rattakambalaṃ datvā āha – “ito paṭṭhāya idaṃ pārupitvā dhammaṃ suṇāhi”ti. So “kiṃ me iminā kambalena imasmim̐ pūtikāye upanītenā”ti? Cintetvā, antogandhakuṭiyaṃ tathāgatamañcassa upari vitānaṃ katvā āgamāsi. Atha ekadivasaṃ rājā pātova vihāraṃ gantvā antogandhakuṭiyaṃ satthu santike nisīdi. Tasmiṅca samaye chabbaṇṇā buddharasmiyo kambalaṃ paṭihaññanti, kambalo ativiya virocāti. Rājā uddhaṃ olokeno sañjānitvā āha – “bhante, amhākaṃ esa kambalo, amhehi ekasāṭakabrāhmaṇassa dinno”ti. Tumhehi, mahārāja, brāhmaṇo pūjito, brāhmaṇena ahaṃ pūjitoti. Rājā “brāhmaṇo yuttakaṃ aññāsi, na maya”nti pasīditvā yaṃ manussānaṃ upakārahūtaṃ, taṃ sabbam̐ aṭṭhaṭṭhakaṃ katvā sabbatṭhakaṃ nāma dānaṃ datvā purohitaṭṭhāne ṭhapesi. Sopi “aṭṭhaṭṭhakaṃ nāma catusaṭṭhi hoti”ti catusaṭṭhi salākabhattāni upanibandhāpetvā yāvajivaṃ dānaṃ datvā sīlaṃ rakkhitvā tato cuto sagge nibbatti.

Puna tato cuto imasmim̐ kappe koṅāgamaṇassa ca bhagavato kassapadasabalassa cāti dvinnaṃ buddhānaṃ antare bārāṇasiyaṃ kuṭumbiyaghare nibbato, so vuddhimanvāya gharāvāsaṃ vasanto ekadivasaṃ araṅṅhe jaṅghavihāraṃ carati. Tasmiṅca samaye paccekabuddho nadīṭire cīvarakammaṃ karonto anuvāte appahonte saṅgharivā ṭhapetuṃ āraddho. So disvā, “kasmā, bhante, saṅgharivā ṭhapethā”ti? Āha. Anuvāto nappahotīti. “Iminā, bhante, karoṭhā”ti sāṭakaṃ datvā, “nibbattanibbattaṭṭhāne me kenaci pariḡāni mā hotu”ti patthanaṃ paṭṭhapesi. Gharepissa bhaginiyā

saddhiṃ bhariyāya kalahaṃ karontiyā paccekabuddho piṇḍāya pāvīsi.

Athassa bhaginī paccekabuddhassa piṇḍapātaṃ datvā tassa bhariyaṃ sandhāya “evarūpaṃ bālaṃ yojanasatena parivajjeyya”nti patthanam paṭṭhapesi. Sā gehadvāre thitā taṃ sutvā, “imāya dinnam bhataṃ esa mā bhuñjatū”ti pattaṃ gahetvā piṇḍapātaṃ chaḍḍetvā kalalassa pūretvā adāsi. Itarā disvā, “bāle maṃ tāva akkosa vā pahara vā. Evarūpassa pana dve asaṅkheyyāni pūritapāramissa pattato bhataṃ chaḍḍetvā kalalaṃ dātuṃ na yutta”nti āha. Athassa bhariyāya paṭisaṅkhānaṃ uppajji. Sā “tiṭṭhatha, bhante”ti kalalaṃ chaḍḍetvā pattaṃ dhovivā gandhacūṇṇena ubbaṭṭetvā pavarassa catumadhurassa pūretvā upari āsittena padumagabbhavaṇṇena sappinā vijjotamānaṃ paccekabuddhassa hatthe thapetvā, “yathā ayaṃ piṇḍapāto obhāsajāto, evaṃ obhāsajātaṃ me sarīraṃ hotū”ti patthanam paṭṭhapesi. Paccekabuddho anumoditvā ākāsaṃ pakkhandi. Tepi jāyampatikā yāvātāyukaṃ kusalaṃ katvā sagge nibbattitvā puna tato cavitvā upāsako bārāṇasiyaṃ asītikoṭivibhavassa seṭṭhino putto hutvā nibbatti, itarā tādisasseva dhītā hutvā nibbatti.

Tassa vuddhippattassa tameva seṭṭhidhītaṃ ānayaṃsu. Tassā pubbe adinnavipākassa tassa kammassa ānubhāvena patikulaṃ pavitṭhamattāya ummārabbhantare sakalasarīraṃ ugghāṭitavaccakuṭi viya duggandham jātaṃ. Seṭṭhikumāro “kassāyaṃ gandho”ti pucchitvā “seṭṭhikaññāyā”ti sutvā “nīharatha nīharathā”ti ābhataṇiyāmeneva kulagharāṃ pesesi. Sā eteneva nīhārena sattasu thānesu paṭinivattitā cintesi – “ahaṃ sattasu thānesu paṭinivattā. Kiṃ me jīvitenā”ti? Attano ābharaṇabhaṇḍaṃ bhañjāpetvā suvaṇṇiṭṭhakaṃ kāresi ratanāyataṃ vidatthivittataṃ caturaṅgulubbedham. Tato haritālamanosilāpiṇḍaṃ gahetvā aṭṭha uppalahatthake ādāya kassapadasabalassa cetiyakaraṇaṭṭhānaṃ gatā. Tasmiṃca khāṇe ekā iṭṭhakapanti parikkhipitvā āgacchamānā ghaṭaniṭṭhakāya unā hoti. Seṭṭhidhīta vaḍḍhakiṃ āha – “imaṃ iṭṭhakaṃ ettha thapethā”ti. Amma, bhaddake kāle āgatāsi, sayameva thapehīti. Sā āruya telena haritālamanosilaṃ yojetvā tena bandhanena iṭṭhakaṃ patiṭṭhāpetvā upari aṭṭhahi uppalahatthakehi pūjaṃ katvā vanditvā, “nibbattanibbattaṭṭhāne me kāyato candanagandho vāyatu, mukhato uppalagandho”ti patthanam katvā, cetiyam vanditvā, padakkhiṇam katvā agamāsi.

Atha tasmimyeva khāṇe yassa seṭṭhiputtassa paṭhamam geham nītā, tassa taṃ ārabba sati udapādi. Nagarepi nakkhattam saṃghuṭṭham hoti. So upaṭṭhāke āha – “tadā idha ānītā seṭṭhidhīta atthi, kahaṃ sā”ti? “Kulagehe sāmī”ti. “Ānetha naṃ, nakkhattam kīḷissāmā”ti. Te gantvā, taṃ vanditvā thitā “kiṃ, tātā, āgatathā”ti? Tāya puṭṭhā taṃ pavattiṃ ācikkhiṃsu. “Tātā, mayā ābharaṇabhaṇḍena cetiyam pūjitaṃ, ābharaṇam me natthi”ti. Te gantvā seṭṭhiputtassa ārocesuṃ. “Ānetha naṃ, piḷandhanam labhissāmā”ti. Te ānayaṃsu. Tassā saha gharappavesena sakalageham candanagandhañceva nīluppalagandhañca vāyi.

Seṭṭhiputto taṃ pucchi – “paṭhamam tava sarīrato duggandho vāyi, idāni pana te sarīrato candanagandho, mukhato uppalagandho vāyati. Kiṃ eta”nti? Sā ādito paṭṭhāya attano katakammaṃ ārocesi. Seṭṭhiputto “niyyānikaṃ vata buddhānaṃ sāsana”nti pasīditvā yojanikaṃ suvaṇṇacetiyam kambalakañcukena parikkhipitvā tattha tattha rathacakkappamāṇehi suvaṇṇapadumehi alaṅkari. Tesam dvādasahatthā olambakā honti. So tattha yāvātāyukaṃ thatvā sagge nibbattitvā tato cuto bārāṇasito yojanamatte thāne aññatarasmiṃ amaccakule nibbatti. Seṭṭhikaññā devalokato cavitvā rājakule jeṭṭhadhīta hutvā nibbatti.

Tesu vayappattesu kumārassa vasanaḡāme nakkhattam saṃghuṭṭham, so mātaram āha – “sāṭakam me amma dehi, nakkhattam kīḷissāmī”ti. Sā dhotavattam nīharitvā adāsi. “Amma thūlam ida”nti. Aññam nīharitvā adāsi, tampi paṭikkhipi. Aññam nīharitvā adāsi, tampi paṭikkhipi. Atha naṃ mātā āha – “tāta, yādise gehe mayam jātā, natthi no ito sukhumatarassa paṭilābhāya puñña”nti. “Labhanaṭṭhānaṃ gacchāmi ammā”ti. “Putta aham ajeva tuyham bārāṇasinagare rajjapaṭilābhampi icchāmi”ti. So mātaram vanditvā āha – “gacchāmi ammā”ti. “Gaccha, tātā”ti. Evam kirassā cittaṃ ahosi – “kahaṃ gamissati, idha vā ettha vā gehe nisīdissati”ti? So pana puññaniyāmena nikkhamitvā bārāṇasiṃ gantvā uyyāne maṅgalasilāpette sasīsam pārupitvā nipajji. So cā bārāṇasirañño kālaṅkatassa sattamo divaso

hoti.

Amaccā rañño sarītrakiccaṃ katvā rājaṅgaṇe nisīditvā mantayimṣu – “rañño ekā dhītāva atthi, putto natthi. Arājakaṃ rajjaṃ na tiṭṭhati. Ko rājā hoti”ti mantetvā, “tvaṃ hohi, tvaṃ hohi”ti. Purohito āha – “bahuṃ oloketuṃ na vaṭṭati, phussarathaṃ vissajjemā”ti. Te kumudavaṇṇe cattāro sindhave yojetvā, pañcavidhaṃ rājakakudhabhaṇḍaṃ setacchattañca rathasmimyeva ṭhapetvā rathaṃ vissajjetvā pacchato tūriyāni paggaṇhāpesuṃ. Ratho pācīnadvārena nikkhamitvā uyyānābhimukho ahoṣi, “paricayena uyyānābhimukho gacchati, nivattemā”ti keci āhaṃsu. Purohito “mā nivattayitthā”ti āha. Ratho kumāraṃ padakkhiṇaṃ katvā ārohanasajjo hutvā aṭṭhāsi. Purohito pārupanaṃ apanetvā pādatalāni oloketo “tiṭṭhatu ayaṃ dīpo, dvisahassadīpaparivāresu catūsu dīpesu esa rajjaṃ kātuṃ yutto”ti vatvā, “punapi tūriyāni paggaṇhātha punapi paggaṇhāthā”ti tikkhattuṃ tūriyāni paggaṇhāpesi.

Atha kumāro mukhaṃ vivaritvā oloketvā, “kena kamma āgatathā”ti? Āha. “Deva, tumhākaṃ rajjaṃ pāpuṇāti”ti. “Rājā kaha”nti. “Devattaṃ gato sāmī”ti. “Kati divasā atikkantā”ti? “Ajja sattamo divaso”ti. “Putto vā dhītā vā natthi”ti. “Dhītā atthi deva, putto natthi”ti. “Tena hi karissāmi rajja”nti. Te tāvadeva abhisekamaṇḍapaṃ katvā rājadhītaraṃ sabbālankārehi alankarivā uyyānaṃ ānetvā kumārassa abhisekaṃ akaṃsu.

Athassa katābhisekassa satahassagghaṇikaṃ vatthaṃ upaharimṣu. So “kimidaṃ, tātā”ti? Āha. “Nivāsanavattaṃ devā”ti. “Nanu, tātā, thūla”nti. “Manussānaṃ paribhogavattesu ito sukhumataraṃ natthi devā”ti. “Tumhākaṃ rājā evarūpaṃ nivāsesi”ti? “Āma, devā”ti. “Na maññe puññaṃ tumhākaṃ rājā, suvaṇṇabhiṅgāraṃ āharatha, labhissāma vattha”nti. Suvaṇṇabhiṅgāraṃ āharimṣu. So uttāhāya hatthe dhovivā, mukhaṃ vikkhāletvā, hatthena udakaṃ ādāya, puratthimadisāya abbhukkiri, ghanapathaviṃ bhindivā aṭṭha kapparukkā uttāhāimṣu. Puna udakaṃ gahetvā dakkhiṇaṃ pacchimaṃ uttaranti evaṃ catasso disā abbhukkiri, sabbadisāsu aṭṭha aṭṭha katvā dvattimṣa kapparukkā uttāhāimṣu. So ekaṃ dibbadussaṃ nivāsetvā ekaṃ pārupitvā “nandarañño vijite suttakantikā itthiyo mā suttaṃ kantimṣūti evaṃ bherim cārāpethā”ti vatvā, chattaṃ ussāpetvā, alankatapaṭiyatto hatthikkhandhavaragato nagaraṃ pavisitvā, pāsādaṃ āruya mahāsampattiṃ anubhavi.

Evaṃ kāle gacchante ekadivasaṃ devī rañño sampattiṃ disvā, “aho tapassī”ti kāruññākāraṃ dassesi. “Kimidaṃ devī”ti? Ca puṭṭhā, “atimahatī, deva, sampatti, atīte buddhānaṃ saddahitvā kalyāṇaṃ akattha, idāni anāgatassa paccayaṃ kusalaṃ na karoṭhā”ti? Āha. “Kassa dassāmi? Sīlavanto natthi”ti. “Asuñño, deva, jambudīpo arahantehi, tumhe dānameva sajjetha, ahaṃ arahante lacchāmi”ti āha. Rājā punadivase pācīnadvāre dānaṃ sajjāpesi. Devī pātova uposathaṅgāni adhiṭṭhāya uparipāsāde puratthābhimukhā urena nipajjitvā – “sace etissā disāya arahanto atthi, āgacchantu amhākaṃ bhikkhaṃ gaṇhantū”ti āha. Tassaṃ disāyaṃ arahanto nāhesuṃ. Taṃ sakkāraṃ kapaṇaddhikayācakānaṃ adāṃsu.

Punadivase dakkhiṇadvāre dānaṃ sajjetvā tatheva akāsi, punadivase pacchimadvāre. Uttaradvāre sajjitadvase pana deviyā tatheva nimantentiyaṃ himavante vasantānaṃ padumavatiyā puttānaṃ pañcasatānaṃ paccekabuddhānaṃ jeṭṭhako mahāpadumapaccekabuddho bhātike āmantesi “mārisā, nandarājā tumhe nimanteti, adhivāsetha tassā”ti. Te adhivāsetvā punadivase anotattadahe mukhaṃ dhovivā ākāse āgantvā uttaradvāre otarimṣu. Manussā gantvā “pañcasatā, deva, paccekabuddhā āgatā”ti rañño ārocesuṃ. Rājā saddhiṃ deviyā gantvā vanditvā pattāṃ gahetvā paccekabuddhe pāsādaṃ āropetvā tesāṃ dānaṃ datvā bhattakiccāvasāne rājā saṅghatherassa, devī saṅghanavakassa pādāmūle nipajjitvā, “ayyā paccayehi na kilamissanti, mayaṃ puññaṃ na hāyissāma, amhākaṃ yāvajjivāṃ idha nivāsāya paṭiññaṃ dethā”ti paṭiññaṃ kāretvā uyyāne pañca paṇṇasālāsātāni pañca caṅkamanasātānī sabbākāreṇa nivāsaṭṭhānaṃ sampādetvā tattha vasāpesuṃ.

Evaṃ kāle gacchante rañño paccanto kupito. “Ahaṃ paccantaṃ vūpasametūṃ gacchāmi, tvaṃ paccekabuddhesu mā pamajji”ti devim ovaditvā gato. Tasmim anāgateyeva paccekabuddhānaṃ āyusaṅkhārā khīṇā. Mahāpadumapaccekabuddho tiyāmarattiṃ jhānakīlaṃ kīlitvā aruṇuggamaṇe

ālambanaphalakaṃ ālambitvā ʘhitakova anupādisesāya nibbānadhātuyā parinibbāyi, etenupāyena sesāpīti sabbepe parinibbutā. Punadivase devī paccekabuddhānaṃ nisīdanaṭṭhānaṃ haritūpalittaṃ kāretvā pupphāni vikiritvā dhūpaṃ datvā tesāṃ āgamaṇaṃ olokayantī nisinnā āgamaṇaṃ apassantī purisaṃ pesesi – “gaccha, tāta, jānāhi, kiṃ ayyānaṃ kiñci aphāsuka”nti? So gantvā mahāpadumassa paṇṇasālāya dvāraṃ vivaritvā tattha apassanto caṅkamaṇaṃ gantvā ālambanaphalakaṃ nissāya ʘhitaṃ disvā vanditvā, “kālo, bhante”ti āha. Parinibbutasarīraṃ kiṃ kathessati? So “niddāyati maññe”ti gantvā piṭṭhipāde hatthena parāmasi. Pādānaṃ sītalatāya ceva thaddhatāya ca parinibbutabhāvaṃ ʘatvā dutiyassa santikaṃ agamāsi, evaṃ tatiyassāti sabbesāṃ parinibbutabhāvaṃ ʘatvā rājakulaṃ gato. “Kahaṃ, tāta, paccekabuddhā”ti? Puṭṭho “parinibbutā, devī”ti āha. Devī kandaṇṭī rodantī nikkhamitvā nāgarehi saddhiṃ tattha gantvā sādhuḱīlitaṃ kāretvā paccekabuddhānaṃ sarīrakiccaṃ katvā dhātuyo gahetvā cetiyaṃ patiṭṭhāpesi.

Rājā paccantaṃ vūpasametvā āgato paccuggamaṇaṃ āgataṃ deviyaṃ pucchi “kiṃ, bhadda, paccekabuddhesu nappamajji, nirogā ayyā”ti? “Parinibbutā devā”ti. Rājā cintesi – “evarūpānampi paṇḍitānaṃ maraṇaṃ uppajjati, amhākaṃ kuto mokkho”ti? So nagaraṃ agantvā uyyānameva pavisitvā jeṭṭhaputtaṃ pakkosāpetvā tassa rajjaṃ paṭiyādetvā sayāṃ samaṇakapabbajjaṃ pabbajji, devīpi “imasmiyaṃ pabbajite ahaṃ kiṃ karissāmi”ti? Tattheva uyyāne pabbajitā. Dvepi jhānaṃ bhāvetvā tato cutā brahmaloke nibbattiṃsu.

Tesu tattheva vasantesu amhākaṃ satthā loke uppajjitvā pavattitavaradhammacakko anupubbena rājagahaṃ pāvīsi. Ayaṃ pippalimāṇavo magadharatṭhe mahātitthabrāhmaṇagāme kapilabrāhmaṇassa aggamahesiyā kucchimhi nibbatta, ayaṃ bhaddā kāpilānī maddaratṭhe sāgalanagare kosiyagottabrāhmaṇassa aggamahesiyā kucchimiyā nibbattā. Tesāṃ kho anukkamena vaḍḍhamānānaṃ pippalimāṇavassa vīsatime vasse bhaddāya soḷasame vasse sampatte mātāpitaro puttaṃ oloketvā, “tāta, tvaṃ vayappatto, kulavaṃso nāma paṭiṭṭhapetabbo”ti ativiya nippīlayiṃsu. Māṇavo āha – “mayhaṃ sotapathe evarūpaṃ kathaṃ mā kathetha. Ahaṃ yāva tumhe dharatha, tāva paṭijaggissāmi, tumhākaṃ pacchato nikkhamitvā pabbajissāmi”ti. Te katipāhaṃ atikkamitvā puna kathayiṃsu, sopi tattheva paṭikkhipi. Puna kathayiṃsu, punapi paṭikkhipi. Tato paṭṭhāya mātā nirantaraṃ kathetiyeva.

Māṇavo “mama mātaraṃ saññāpessāmi”ti rattasuvaṇṇassa nikkhasahassaṃ datvā suvaṇṇakārehi ekaṃ itthirūpaṃ kārapetvā tassa majjanaghaṭṭanādikkammapariyosāne taṃ rattavatthaṃ nivāsāpetvā vaṇṇasampannehi pupphehi ceva nānālaṅkārehi ca alaṅkārapetvā mātaraṃ pakkosāpetvā āha – “amma evarūpaṃ āramaṇaṃ labhanto gehe vasāmi, alabhanto na vasāmi”ti. Paṇḍitā brāhmaṇī cintesi – “mayhaṃ putto puññavā dinnadāno katābhinihāro, puññaṃ karonto na ekakova akāsi, addhā etena saha katapuññaṃ suvaṇṇarūpakapaṭibhāgā bhavissati”ti atṭha brāhmaṇe pakkosāpetvā sabbakāmehi santappetvā suvaṇṇarūpakaṃ rathaṃ āropetvā, “gacchatha, tāta, yattha amhākaṃ jātigottabhogehi samānakule evarūpaṃ dārikaṃ passatha, imameva suvaṇṇarūpakaṃ, paṇṇākāraṃ katvā dethā”ti uyyojesi.

Te “amhākaṃ nāma etaṃ kamma”nti nikkhamitvā, “kattha gamissāma”ti? Cintetvā, “maddaratṭhaṃ nāma itthākaro, maddaratṭhaṃ gamissāma”ti maddaratṭhe sāgalanagaraṃ agamiṃsu. Tattha taṃ suvaṇṇarūpakaṃ nhānatitthe ʘhapetvā ekamantaṃ nisīdiṃsu. Atha bhaddāya dhātī bhaddaṃ nhāpetvā alaṅkaritvā sirigabbhe nisīdāpetvā nhāyituṃ āgacchantī taṃ rūpakaṃ disvā, “ayyadhītā me idhāgatā”ti saññāya tadjetvā “dubbinite, kiṃ tvaṃ idhāgatā”ti? Talasattikaṃ uggiritvā, “gaccha sīgha”nti gaṇḍapasse pahari. Hattho pāsāne paṭihato viya kampittha. Sā paṭikkamitvā “evaṃ thaddham nāma mahāgīvaṃ disvā, ‘ayyadhītā me’ti saññaṃ uppādesiṃ, ayyadhītāya hi me ayaṃ nivāsanaṭṭigāhikāpi ayuttā”ti āha. Atha naṃ te manussā parivāretvā “evarūpā te sāmīdhītā”ti pucchiṃsu. “Kiṃ esā, imāya satagaṇeṇa sahasagaṇeṇa mayhaṃ ayyā abhirūpataṛā, dvādasahatthe gabbhe nisinnāya paḍīpakiccaṃ natthi, sarīrobhāseneva tamaṃ vidhamatī”ti. “Tena hi āgacchā”ti taṃ khujjaṃ gahetvā suvaṇṇarūpakaṃ rathaṃ āropetvā kosiyagottassa gharadvāre ʘhatvā āgamaṇaṃ nivedayiṃsu.

Brāhmaṇo paṭisanthāraṃ katvā, “kuto āgatattā”ti? Pucchi. “Magadharatthe mahātitthagāme kapilabrāhmaṇassa gharato”ti. “Kiṃ kāraṇā āgatā”ti. “Iminā nāma kāraṇenā”ti. “Kalyāṇaṃ, tātā, samajātigottavibhavo amhākaṃ brāhmaṇo, dassāmi dārika”nti paṇṇākāraṃ gaṇhi. Te kapilabrāhmaṇassa sāsanaṃ paṇiṃsu – “laddhā dārikā, kattabbaṃ karoṭhā”ti. Taṃ sāsanaṃ sutvā pippalimāṇavassa ārocayiṃsu – “laddhā kira dārikā”ti. Māṇavo “ahaṃ na labhissāmi cintesiṃ, ime laddhāti ca vadanti, anattiko hutvā paṇṇaṃ pesissāmi”ti rahogato paṇṇaṃ likhi, “bhaddā attano jātigottabhogānurūpaṃ gharāvāsaṃ labhatu, ahaṃ nikkhamitvā pabbajissāmi, mā pacchā vippaṭisārini ahoṣi”ti. Bhaddāpi “asukassa kira maṃ dātukāma”ti sutvā rahogatā paṇṇaṃ likhi, “ayyaputto attano jātigottabhogānurūpaṃ gharāvāsaṃ labhatu. Ahaṃ nikkhamitvā pabbajissāmi, mā pacchā vippaṭisārī ahoṣi”ti. Dvepi paṇṇāni antarāmagge samāgacchiṃsu. “Idaṃ kassa paṇṇa”nti? Pippalimāṇavena bhaddāya pahitanti. “Idaṃ kassa paṇṇa”nti? Bhaddāya pippalimāṇavassa pahitanti ca vutte dvepi vācetvā, “passatha dāraṇaṃ kamma”nti phāletvā araṇṇe chaḍḍetvā samānapaṇṇaṃ likhitvā ito ca etto ca pesesuṃ. Iti tesam anicchamānānaṃyeva samāgamo ahoṣi.

Taṃdivasaṃyeva ca māṇavopi ekaṃ pupphadāmaṃ ganthāpesi, bhaddāpi ekaṃ ganthāpesi. Tāni āsanamajjhe ṭhapetvā bhuttasāyamāsā ubhopi “sayanaṃ āruhissāma”ti samāgantvā māṇavo dakkhiṇapassena sayanaṃ āruhi. Bhaddā vāmapassena āruhitvā āha – “yassa passe pupphāni milāyanti, tassa rāgacittaṃ uppananti vijānissāma, imaṃ pupphadāmaṃ na allīyitabba”nti. Te pana aññaṃaññaṃ sarīrasamphassabhayena tiyāmarattiṃ niddaṃ anokkamantāva vītināmenti, divā pana hasitamattampi na hoti. Te lokāmisena asaṃsaṭṭhā yāva mātāpitaro dharanti, tāva kuṭumbaṃ avicāretvā tesu kālaṅkatesu vicārayiṃsu. Mahatī māṇavassa sampatti, ekadivasaṃ sarīraṃ ubbaḍḍetvā chaḍḍetabbaṃ suvaṇṇacuṇṇameva magadhanāḷiyā dvādasanāḷimattaṃ laddhuṃ vaṭṭati. Yantabaddhāni saṭṭhi mahātaḷākāni, kammanto dvādasayojaniko, anurādhapurappamaṇā cuddasa dāsagāmā, cuddasa hatthānīkā, cuddasa assānīkā, cuddasa rathānīkā.

So ekadivasaṃ alaṅkataṃ assaṃ āruya mahājanaparivuto kammantaṃ gantvā khettakoṭiyam ṭhito naṅgalehi bhinnatṭhānato kākādayo sakūṇe gaṇḍuppadakādīpāṇe uddharitvā khādante disvā, “tātā, ime kiṃ khādanti”ti pucchi? “Gaṇḍuppadake ayyā”ti. “Etehi kataṃ pāpaṃ kassa hoti”ti? “Tumhākaṃ, ayyā”ti. So cintesi – “sace etehi kataṃ pāpaṃ mayhaṃ hoti, kiṃ me karissati sattaasītikoṭidhanaṃ? Kiṃ dvādasayojano kammanto, kiṃ yantabaddhāni saṭṭhi mahātaḷākāni, kiṃ cuddasa gāmā? Sabbametaṃ bhaddāya kāpilāniyā niyyātetvā nikkhamitvā pabbajissāmi”ti.

Bhaddāpi kāpilāni tasmīṃ khaṇe abbhantaravattumhi tayo tilakumbhe pattharāpetvā dhātīhi parivutā nisinnā kāke tilapāṇake khādamaṇe disvā, “ammā kiṃ ime khādanti”ti? Pucchi. “Pāṇake ayye”ti. “Akusalaṃ kassa hoti”ti? “Tumhākaṃ ayye”ti. Sā cintesi – “mayhaṃ catuhattavattham nāḷikodanamattaṅca laddhuṃ vaṭṭati, yadi ca panetaṃ ettakena janena kataṃ akusalaṃ mayhaṃ hoti, bhavasahassenapi vaṭṭato sīsaṃ ukkhipituṃ na sakkā, ayyaputte āgatamatteyeva sabbam tassa niyyātetvā nikkhamma pabbajissāmi”ti.

Māṇavo āgantvā nhatvā pāsādaṃ āruya mahārahe pallaṅke nisīdi, athassa cakkavattino anucchavikaṃ bhojanaṃ sajjayiṃsu. Dvepi bhuñjitvā parijane nikkhante rahogatā phāsukaṭṭhāne nisīdiṃsu. Tato māṇavo bhaddaṃ āha – “bhadda, tvaṃ imaṃ gharaṃ āgacchanti kittakaṃ dhanaṃ āharī”ti? “Pañcapanṇāsa sakaṭasahassāni ayyā”ti. “Etaṃ sabbam, yā ca imasmīṃ ghare sattaasītikoṭīyo, yantabaddhā saṭṭhitaḷākādībheda sampatti atthi, sabbam tuyhaṃyeva niyyātemī”ti. “Tumhe pana ayyā”ti. “Ahaṃ pabbajissāmi”ti. “Ayyā ahampi tumhākaṃyeva āgamaṇaṃ olokayamānā nisinnā, ahampi pabbajissāmi”ti. Tesam ādittapaṇṇakuṭi viya tayo bhavā upatṭhahiṃsu. Te “pabbajissāma”ti vatvā antarāpaṇato kasāyarasapītāni vatthāni mattikāpatte ca āharāpetvā aññaṃaññaṃ kese ohāretvā, “ye loke arahanto, te uddissa amhākaṃ pabbajjā”ti pabbajitvā thavikāsu patte osāpetvā aṃse laggetvā pāsādato otariṃsu. Gehe dāsesu ca kammakāresu ca na koci sañjāni.

Atha ne brāhmaṇagāmato nikkhamma dāsagāmadvārena gacchante ākappakuttavasena

dāsagāmvāsino sañjāniṃsu. Te rudantā pādesu nipatitvā “kiṃ amhe anāthe karotha ayyā” ti? Āhaṃsu. “Mayaṃ, bhāṇe ‘ādittapaṇṇasālā viya tayo bhavā’ ti pabbajimhā, sace tumhesu ekekaṃ bhujissaṃ karoma, vassasatampi nappahoti, tumheva tumhākaṃ sīsaṃ dhovitvā bhujissā hutvā jīvathā” ti vatvā tesam rodantānaṃyeva pakkamiṃsu. Thero purato gacchanto nivattitvā olokeno cintesi – “ayaṃ bhaddā kāpilānī sakalajambudīpagghanikā itthī mayhaṃ pacchato āgacchati. Thānaṃ kho panetaṃ vijjati, yaṃ kocideva evaṃ cinteyya ‘ime pabbajitvāpi vinā bhavituṃ na sakkonti, ananucchavikaṃ karonti’ ti. “Koci vā pana manam padūsetvā apāyapūrako bhaveyya. Imaṃ pahāya mayā gantum vaṭṭatī” ti cittaṃ uppādesi.

So purato gacchanto dvedhāpathaṃ disvā tassa matthake aṭṭhāsi. Bhaddāpi āgantvā vanditvā aṭṭhāsi. Atha naṃ āha – “bhadde, tādisiṃ itthiṃ mama pacchato āgacchantiṃ disvā, ‘ime pabbajitvāpi vinā bhavituṃ na sakkonti’ ti cintetvā amhesu paduṭṭhacitto mahājano apāyapūrako bhaveyya. Imasmiṃ dvedhāpathe tvaṃ ekaṃ gaṇha, ahaṃ ekena gamissāmi” ti. “Āma, ayya, pabbajitānaṃ mātugāmo nāma malaṃ, ‘pabbajitvāpi vinā na bhavanti’ ti amhākaṃ dosaṃ passanti, tumhe ekaṃ maggaṃ gaṇhatha, vinā bhavissāmā” ti tikkhattuṃ padakkhiṇaṃ katvā catūsu thānesu pañcapaṭiṭṭhitena vanditvā dasanakhasamodhānasamujjalaṃ añjaliṃ paggayha, ‘satasahassakappamāṇe addhāne kato mittasanthavo ajja bhijjati’ ti vatvā, “tumhe dakkhiṇajātikā nāma, tumhākaṃ dakkhiṇamaggo vaṭṭati, mayaṃ mātugāmā nāma vāmajātikā, amhākaṃ vāmamaggo vaṭṭatī” ti vanditvā maggaṃ paṭipannā. Tesam dvedhābhūtakāle ayaṃ mahāpathavī “ahaṃ cakkavālagirisinerupabbate dhāretuṃ sakkontīpi tumhākaṃ guṇe dhāretuṃ na sakkomi” ti vadanti viya viravamānā akampi, ākāse asanisaddo viya pavatti, cakkavālapabbato unnadi.

Sammāsambuddho veḷuvanamahāvihāre gandhakuṭiyaṃ nisinno pathavīkampanasaddaṃ sutvā, “kassa nu kho pathavī kampaṭī” ti? Āvajjento “pippalimāṇavo ca bhaddā ca kāpilānī maṃ uddissa appameyyaṃ sampattiṃ pahāya pabbajitā, tesam viyogaṭṭhāne ubhinnaṃpi guṇabalena ayaṃ pathavīkampo jāto, mayāpi etesaṃ saṅghaṃ kātuṃ vaṭṭatī” ti gandhakuṭito nikkhamma sayameva pattacīvaraṃ ādāya, asītimahātheresu kañci anāmantetvā tigāvutaṃ maggaṃ paccuggamaṃ katvā rājagahassa ca nālandāya ca antare bahuputtakanigrodharukkhamūle pallaṅkaṃ ābhujitvā nisīdi. Nisīdanto pana aññataro paṃsukūliko viya anisīditvā buddhavesaṃ gahetvā asītihatthā ghanabuddharasmiyo vissajjento nisīdi. Iti tasmīṃ khaṇe paṇṇachattasakaṭacakkakūṭāgārādippamāṇā buddharasmiyo ito cito ca vipphandantiyo vidhāvantiyo candimasahassasūriyasahassauggamanakālo viya kurumānā taṃ vanantaraṃ ekobhāsaṃ akaṃsu. Dvattiṃsamahāpurisalakkhaṇānaṃ siriyaṃ samujjalitatārāgaṇaṃ viya gaganam, supupphitakamalakuvalayaṃ viya salilaṃ, vanantaraṃ virocittha. Nigrodharukkhasa nāma khandho seto hotī, pattāni nīlāni pakkāni rattāni. Tasmīṃ pana divase sataśākho nigrodharukkho suvaṇṇavaṇṇo ahoṣi.

Iti yā sā **addhānamaggapaṭipannoti** padassa atthaṃ vatvā, “idāni yathā esa pabbajito, yathā ca addhānamaggaṃ paṭipanno. Imassa atthassa āvibhāvattaṃ abhinīhārato paṭṭhāya ayaṃ anupubbikathā kathetabbā” ti vuttā, sā evaṃ veditabbā.

Antarā ca rājagahaṃ antarā ca nālandanti rājagahassa ca nālandāya ca antare. **Satthārañca vatāhaṃ passeyyaṃ bhagavantameva passeyyanti** sace ahaṃ satthāraṃ passeyyaṃ, imaṃyeva bhagavantaṃ passeyyaṃ. Na hi me ito aññena satthārā bhavituṃ sakkāti. **Sugatañca vatāhaṃ passeyyaṃ bhagavantameva passeyyanti** sace ahaṃ sammāpaṭipattiyā suṭṭhu gatattā sugataṃ nāma passeyyaṃ, imaṃyeva bhagavantaṃ passeyyaṃ. Na hi me ito aññena sugatena bhavituṃ sakkāti. **Sammāsambuddhañca vatāhaṃ passeyyaṃ bhagavantameva passeyyanti** sace ahaṃ sammā sāmāñca saccāni buddhattā sammāsambuddhaṃ nāma passeyyaṃ, imaṃyeva bhagavantaṃ passeyyaṃ. Na hi me ito aññena sammāsambuddhena bhavituṃ sakkāti ayamettha adhippāyo. Evaṃ dassaneneva “bhagavati ‘ayaṃ satthā, ayaṃ sugato, ayaṃ sammāsambuddho’ ti nikkāṅkho ahaṃ, āvuso, ahoṣi” nti dīpeti. **Satthā me, bhanteti** idaṃ kiñcāpi dve vāre āgataṃ, tikkhattuṃ pana vuttanti veditabbaṃ. Iminā hi so “evaṃ tikkhattuṃ sāvakattaṃ sāvesiṃ, āvuso” ti dīpeti.

Ajānaññevāti ajānamānova. Dutiyapadepi eseva nayo. **Muddhāpi tassa vipateyyāti** yassa aññassa “ajānaṃyeva jānāmī”ti paṭiññassa bāhirakassa satthuno evaṃ sabbacetāsā samannāgato pasannacitto sāvako evarūpaṃ paramanipaccakāraṃ kareyya, tassa vaṇṭachinnatālapakkaṃ viya gīvato muddhāpi vipateyya, sattadhā pana phaleyyāti attho. Kiṃ vā etena, sace mahākassapatthero iminā cittappasādena imaṃ paramanipaccakāraṃ mahāsamuddassa kareyya, tattakapāle pakkhittaudakabindu viya vilayaṃ gaccheyya. Sace cakkavālassa kareyya, thusamuṭṭhi viya vikireyya. Sace sinerupabbatassa kareyya, kākatuṇḍena pahaṭapiṭṭhamuṭṭhi viya viddhamseyya. Sace mahāpathaviyā kareyya, vātāhatabhasmapuñjo viya vikireyya. Evarūpopi pana therassa nipaccākāro satthu suvaṇṇavaṇṇe pādapiṭṭhe lomamattampi vikopetuṃ nāsakkhi. Tiṭṭhatu ca mahākassapo, mahākassapasadisānaṃ bhikkhūnaṃ sahasampī satahasampī nipaccākāradassanena neva dasabalassa pādapiṭṭhe lomamattampi vikopetuṃ paṃsukūlacīvare vā aṃsumattampi cāletuṃ sakkoti. Evaṃ mahānubhāvo hi satthā.

Tasmātiha te kassapāti yasmā ahaṃ jānanto eva “jānāmī”ti, passanto eva ca “passāmī”ti vadāmi, tasmā, kassapa, tayā evaṃ sikkhitabbaṃ. **Tibbanti** bahalaṃ mahantaṃ. **Hirottappanti** hirī ca ottappañca. **Paccupaṭṭhitam bhavissatīti** paṭhamatarameva upaṭṭhitam bhavissati. Yo hi therādīsu hirottappaṃ upaṭṭhapetvā upasaṅkamati therādayopi taṃ sahirikā saottappā ca hutvā upasaṅkamantīti ayametha ānisaṃso. **Kusalūpasamhitanti** kusalasannissitaṃ. **Aṭṭhiṃ katvāti** attānaṃ tena dhammena aṭṭhikaṃ katvā, taṃ vā dhammaṃ “esa mayhaṃ attho”ti aṭṭhiṃ katvā. **Manasi katvāti** citte ṭhapetvā. **Sabbacetāsā samannāharitvāti** cittassa thokampi bahi gantuṃ adento sabbena samannāharacittena samannāharitvā. **Ohitasototi** ṭhapitasoto, ñāṇasotañca pasādasotañca odahitvā mayā desitaṃ dhammaṃ sakkaccameva suṇissāmīti evañhi te sikkhitabbaṃ. **Sātasahagatā ca me kāyagatāsati** asubhesu ceva ānāpāne ca paṭhamajjhānavasena sukhasampayuttā kāyagatāsati. Yo ca panāyaṃ tividho ovādo, therassa ayameva pabbajjā ca upasampadā ca ahoṣi.

Saraṇoti sakilesa saiṇo hutvā. **Raṭṭhapiṇḍaṃ bhuñjinti** saddhādeyyaṃ bhuñjiṃ. Cattāro hi paribhogā theyyaparibhogo iṇaparibhogo dāyajjaparibhogo sāmiparibhogoti. Tattha dussīlassa saṅghamajjhe nisīditvā bhuñjantassāpi paribhogo **theyyaparibhogo** nāma. Kasmā? Catūsu paccayesu anissaratāya. Sīlavato apaccavekkhitaparibhogo **iṇaparibhogo** nāma. Sattannaṃ sekhānaṃ paribhogo **dāyajjaparibhogo** nāma. Khīṇāsavassa paribhogo **sāmiparibhogo** nāma. Iti khīṇāsavova sāmī hutvā anaṇo paribhuñjati. Thero attanā puthujjanena hutvā paribhuttaparibhogaṃ iṇaparibhogaṃyeva karonto evamāha. **Aṭṭhamiyā aññā udapādīti** aṭṭhame divase arahattaphalaṃ uppajji.

Atha kho, āvuso, bhagavā maggā okkammāti maggato okkamaṇaṃ paṭhamataraṃ taṃdivaseyeva ahoṣi, arahattādhigamo pacchā. Desanāvārassa pana evaṃ āgatattā arahattādhigamo paṭhamaṃ dīpito. Kasmā pana bhagavā maggā okkantoti? Evaṃ kirassa ahoṣi “imaṃ bhikkhuṃ jātiāraññikaṃ jātipaṃsukūlikaṃ jātiēkāsanikaṃ karissāmī”ti. Tasmā okkami.

Mudukā kho tyāyanti mudukā kho te ayaṃ. Imañca pana vācaṃ bhagavā taṃ cīvaraṃ padumapupphavaṇṇena pāṇinā antantena parāmasanto āha. Kasmā evamāhāti? Therena saha cīvaraṃ parivattetukāmatāya. Kasmā parivattetukāmo jātoti? Theram attano ṭhāne ṭhapetukāmatāya. Thero pana yasmā cīvarassa vā pattassa vā vaṇṇe kathite “imaṃ tumhākaṃ gaṇhathā”tivacanaṃ cārittameva, tasmā “paṭiggaṇhātu me, bhante, bhagavā”ti āha. **Dhāressasi pana me tvam, kassapa, sāṇāni paṃsukūlāni nibbasanānīti**, kassapa, tvam imāni paribhogajīṇāni paṃsukūlāni pārupituṃ sakkhissasīti vadati. Tañca kho na kāyabalaṃ sandhāya, paṭipattipūraṇaṃ pana sandhāya evamāha. Ayañhettha adhippāyo – ahaṃ imaṃ cīvaraṃ puññaṃ nāma dāsiṃ pārupitvā āmakasusāne chaḍḍitaṃ taṃ susānaṃ pavisitvā tumbamattehi pāṇakehi samparikiṇṇaṃ te pāṇake vidhunitvā mahāariyavaṃse ṭhatvā aggahesiṃ, tassa me imaṃ cīvaraṃ gahitadivase dasasahassacakkavāle mahāpathavī mahāviraṃ viravamānā kampittha, ākāso taṭataṭāyi, cakkavāladevatā sādhu-kāramadaṃsu, “imaṃ cīvaraṃ gaṇhantena bhikkhunā jātipaṃsukūlikena jātiāraññikena jātiēkāsanikena jātisapadānacārikena bhavituṃ vaṭṭati, tvam imassa cīvarassa anucchavikaṃ kātuṃ sakkhissasī”ti. Theropi attanā pañcannaṃ hatthīnaṃ balaṃ dhāreti, so

taṃ atakkayitvā “ahametaṃ paṭipattiṃ pūressāmī”ti ussāhena sugatacīvarassa anucchavikaṃ kātukāmo “dhāressāmaḥaṃ, bhante”ti āha. **Paṭipajjinti** paṭipannosmi. Evaṃ pana cīvaraparivattanaṃ katvā ca therena pārutacīvaraṃ bhagavā pārūpi, satthu cīvaraṃ thero. Tasmim̐ samaye mahāpathavī udakapariyantaṃ katvā unnadantī kampittha.

Bhagavato puttotiādīsu thero bhagavantaṃ nissāya ariyāya jātiyā jātoti bhagavato putto. Urena vasitvā mukhato nikkhantaovādavasena pabbajjāya ceva upasampadāya ca patiṭṭhitattā **oraso mukhato jāto**. Ovādadhammato jātattā ovādadhammena ca nimmitattā **dhammajo dhammanimmito**. Ovādadhammadāyādaṃ navalokuttaradhammadāyādameva vā arahatīti **dhammadāyādo**. **Paṭiggahitāni sāṇāni paṃsukūlānī**ti satthārā pārutaṃ paṃsukūlacīvaraṃ pārūpanatthāya paṭiggahitaṃ.

Sammā vadamāno vadeyyāti yaṃ puggalaṃ “bhagavato putto”tiādīhi guṇehi sammā vadamāno vadeyya, mamaṃ taṃ sammā vadamāno vadeyya, ahaṃ evarūpoti. Ettāvatā therena pabbajjā ca parisodhitā hoti. Ayañhettha adhippāyo – āvuso, yassa na upajjhāyo paññāyati, na ācariyo, kiṃ so anupajjhāyo anācariyo nhāpitamuṇḍako sayamaṅgahitakāsāvo “titthiyapakantako”ti saṅkhaṃ gato evaṃ tigāvutaṃ maggaṃ paccuggamaṃ labhati, tīhi ovādehi pabbajjaṃ vā upasampadaṃ vā labhati, kāyena kāyaṃ cīvaraparivattanaṃ labhati? Passa yāva dubbhāsitaṃ vacanaṃ thullanandāya bhikkhuniyāti. Evaṃ pabbajjaṃ sodhetvā idāni chahi abhiññāhi sīhanādaṃ nadituṃ **ahaṃ kho, āvusotiādīmāha**. Sesam purimanayeneva veditabbaṃ. Ekādasamaṃ.

12. Paraṃmaraṇasuttavaṇṇanā

155. Dvādasame **tathāgatoti** satto. **Na hetamaṃ, āvuso, atthasaṃhitanti**, āvuso, etaṃ diṭṭhigataṃ atthasannissitaṃ na hoti. **Nādirahmacariyakanti** maggabrahmacariyassa pubbhāgapaṭipadāpi na hoti. **Etañhi, āvuso, atthasaṃhitanti**, āvuso, etaṃ catusaccakammaṭṭhānaṃ atthasannissitaṃ. **Etaṃ ādirahmacariyakanti** etaṃ maggabrahmacariyassa ādi pubbhāgapaṭipadā. Dvādasamaṃ.

13. Saddhammappatirūpakasuttavaṇṇanā

156. Terasame **aññāya saṅṭhahimsūti** arahatte patiṭṭhahimsu. **Saddhammappatirūpakanti** dve saddhammappatirūpakāni adhiḡamasaddhammappatirūpakaṅca pariyattisaddhammappatirūpakaṅca. Tattha –

“Obhāse ceva ñāṇe ca, pītiyā ca vikampati;
Passaddhiyā sukhe ceva, yehi cittaṃ pavedhati.

“Adhimokkhe ca paggāhe, upaṭṭhāne ca kampati;
Upekkhāvajjanāya ceva, upekkhāya ca nikantiyā.

“Imāni dasa ṭhānāni, paññā yassa paricitā;
Dhammuddhaccakusalo hoti, na ca sammoha gacchatī”ti. (paṭi. ma. 2.7); –

Idaṃ vipassanāññāssa upakkilesajātaṃ **adhiḡamasaddhammappatirūpakaṃ** nāma. Tisso pana saṅgītiyo anāruḷhaṃ dhātukathā ārammaṇakathā asubhakathā ñāṇavatthukathā vijjākaraṇḍakoti imehi pañcahi kathāvatthūhi paribāhiraṃ guḷhavinayaṃ guḷhavessantaraṃ guḷhamahosadhaṃ vaṇṇapiṭakaṃ aṅgulimālapīṭakaṃ raṭṭhapālagajitaṃ ālavakagajitaṃ vedallapīṭakanti abuddhavacanaṃ **pariyattisaddhammappatirūpakaṃ** nāma.

Jātarūpappatirūpakanti suvaṇṇarasavidhānaṃ ārakūṭamayaṃ suvaṇṇavaṇṇaṃ ābharaṇajātaṃ. Chaṇakālesu hi manussā “ābharaṇabhaṇḍakaṃ gaṇhissāmā”ti āpaṇaṃ gacchanti. Atha ne āpaṇikā evaṃ vadanti, “sace tumhe ābharaṇatthikā, imāni gaṇhatha. Imāni hi ghanāni ceva vaṇṇavantaṇi ca

appagghāni cā’’ti. Te tesam sutvā, ‘‘kāraṇaṃ ime vadanti, imāni piḷandhitvā sakkā nakkhattaṃ kīlītuṃ, sobhanti ceva appagghāni cā’’ti tāni gahetvā gacchanti. Suvannaḅhaṇḍaṃ avikkīyamānaṃ nidahitvā ṭhapetabbaṃ hoti. Evaṃ taṃ jātarūpappatirūpake uppanne antaradhāyati nāma.

Atha saddhammassa antaradhānaṃ hotīti adhigamasaddhammassa paṭipattisaddhammassa pariyattisaddhammassāti tividhassāpi saddhammassa antaradhānaṃ hoti. Paṭhamabodhiyañhi bhikkhū paṭisambhidappattā ahesuṃ. Atha kāle gacchante paṭisambhidā pāpuṇituṃ na sakkhiṃsu, chaḷabhiññā ahesuṃ. Tato cha abhiññā pāpuṇituṃ asakkontā tisso vijjā pāpuṇiṃsu. Idāni kāle gacchante tisso vijjā pāpuṇituṃ asakkontā āsavakkhayamattaṃ pāpuṇissanti. Tampi asakkontā anāgāmiphalaṃ, tampi asakkontā sakadāgāmiphalaṃ, tampi asakkontā sotāpattiphalaṃ. Gacchante kāle sotāpattiphalaṃ pattiṃ na sakkhissanti. Atha nesam yadā vipassanā imehi upakkilesehi upakkilīṭṭhā āraddhamattāva ṭhassati, tadā adhigamasaddhammo antarahito nāma bhavissati.

Paṭhamabodhiyañhi bhikkhū catunnaṃ paṭisambhidānaṃ anucchavikaṃ paṭipattiṃ pūrayiṃsu. Gacchante kāle taṃ asakkontā channaṃ abhiññānaṃ, tampi asakkontā tissannaṃ vijjānaṃ, tampi asakkontā arahattaphalamattassa. Gacchante pana kāle arahattassa anucchavikaṃ paṭipattiṃ pūretuṃ asakkontā anāgāmiphalassa anucchavikaṃ paṭipattiṃ pūressanti, tampi asakkontā sakadāgāmiphalassa, tampi asakkontā sotāpattiphalassa. Yadā pana sotāpattiphalassapi anucchavikaṃ paṭipadaṃ pūretuṃ asakkontā sīlapārisuddhimatteva ṭhassanti, tadā paṭipattisaddhammo antarahito nāma bhavissati.

Yāva pana tepiṭakaṃ buddhavacanaṃ vattati, na tāva sāsanaṃ antarahitanti vattuṃ vaṭṭati. Tiṭṭhantu tīṇi vā, abhidhammapiṭake antarahite itaresu dvīsu tiṭṭhantesupi antarahitanti na vattabbameva. Dvīsu antarahitesu vinayapiṭakamatte ṭhitepi, tatrāpi khandhakaparivāresu antarahitesu ubhatovibhaṅgamatte, mahāvinaye antarahite dvīsu pātimokkhesu vattamānesupi sāsanaṃ anantarahitameva. Yadā pana dve pātimokkhā antaradhāyissanti, atha pariyattisaddhammassa antaradhānaṃ bhavissati. Tasmīṃ antarahite sāsanaṃ antarahitaṃ nāma hoti. Pariyattiyā hi antarahitāya paṭipatti antaradhāyati, paṭipattiyā antarahitāya adhigamo antaradhāyati. Kiṃ kāraṇā? Ayañhi pariyatti paṭipattiyā paccayo hoti, paṭipatti adhigamassa. Iti paṭipattitopi pariyattimeva pamāṇaṃ.

Nanu ca kassapasammāsambuddhakāle kapilo nāma anārādhakabhikkhu ‘‘pātimokkhaṃ uddisissāmi’’ti bījanaṃ gahetvā āsane nisinno ‘‘atthi imasmiṃ vattantā’’ti pucchi, atha tassa bhayena yesampi pātimokkho vattati, tepi ‘‘mayam vattāmā’’ti avatvā ‘‘na vattāmā’’ti vadiṃsu, so bījanaṃ ṭhapetvā uṭṭhāyāsanaṃ gato, tadā sammāsambuddhassa sāsanaṃ osakkanti? Kiñcāpi osakkitaṃ, pariyatti pana ekanteneva pamāṇaṃ. Yathā hi mahato taḷākassa pāliyā thirāya udakaṃ na ṭhassatīti na vattabbaṃ, udake sati padumādīni pupphāni na pupphissantīti na vattabbaṃ, evameva mahātaḷākassa thirapālisadise tepiṭake buddhavacane sati mahātaḷāke udakasadisā paṭipattipūrakā kulaputtā natthīti na vattabbā, tesu sati mahātaḷāke padumādīni pupphāni viya sotāpannādayo ariyapuggalā natthīti na vattabbāti evam ekantato pariyattiyeva pamāṇaṃ.

Pathavīdhātūti dve satasahassāni cattāri ca nahutāni bahalā mahāpathavī. **Āpodhātūti** pathavito paṭṭhāya yāva subhakiṇṅhabrahmalokā uggataṃ kappavināsakaṃ udakaṃ. **Tejodhātūti** pathavito paṭṭhāya yāva ābhassarabrahmalokā uggato kappavināsako aggi. **Vāyodhātūti** pathavito paṭṭhāya yāva vehapphalabrahmalokā uggato kappavināsako vāyu. Etesu hi ekadhammopi satthu sāsanaṃ antaradhāpetuṃ na sakkoti, tasmā evamāha. **Idheva te uppajjantīti** lohato lohakhādakaṃ malaṃ viya imasmiṃ mayhamyeva sāsane te uppajjanti. **Moghapurisāti** tucchapurisā.

Ādikeneva opilavatīti ettha **ādikenāti** ādānena gahaṇena. **Opilavatīti** nimujjati. Idaṃ vuttaṃ hoti – yathā udakacarā nāvā bhaṇḍaṃ gaṇhantī nimujjati, evam pariyattiādīnaṃ pūraṇena saddhammassa antaradhānaṃ na hoti. Pariyattiyā hi hāyamānāya paṭipatti hāyati, paṭipattiyā hāyamānāya adhigamo hāyati. Pariyattiyā pūrayamānāya pariyattidharā puggalā paṭipattiṃ pūrenti, paṭipattipūrakā adhigamaṃ pūrenti. Iti navacando viya pariyattiyādīsu vaḍḍhamānāsu mayham sāsanaṃ vaḍḍhati yevāti dasseti.

Idāni yehi dhammehi saddhammassa antaradhānañceva ʘhiti ca hoti, te dassento **pañca khoti**ādīmāha. Tattha **okkamanīyāti** avakkamanīyā, heṭṭhāgamanīyāti attho. **Satthari agāravāti**ādīsu **agāravāti** gāravarahitā. **Appatissāti** appatissayā anīcavuttikā. Tattha yo cetiyaṅgaṇaṃ ārohanto chattaṃ dhāreti, upāhanaṃ dhāreti, aññato oloketvā kathaṃ kathento gacchati, ayaṃ **satthari agāravo** nāma.

Yo dhammassavanassa kāle saṅghuṭṭhe daharasāmaṇerehi parivārito nisīdati, aññāni vā navakammādīni karoti, dhammassavanagge nisinno niddāyati, vikkhitto vā aññaṃ kathento nisīdati, ayaṃ **dhamme agāravo** nāma.

Yo therupaṭṭhānaṃ gantvā, avanditvā nisīdati, hatthapallatthikaṃ dussapallatthikaṃ karoti, aññaṃ vā pana hatthapādakukkuccaṃ karoti, vuḍḍhānaṃ santike anajjhīṭṭho katheti, ayaṃ **saṅghe agāravo** nāma.

Tisso pana sikkhā apūrentova **sikkhāya agāravo** nāma hoti. Aṭṭha samāpattiyo anibbattento tāsāṃ vā pana nibbattanatthāya payogaṃ akaronto **samādhismiṃ agāravo** nāma. Sukkapakkho vuttavipallāseneva veditabboti. Terasamaṃ.

Kassapasamaṃyuttavaṇṇanā niṭṭhitā.

6. Lābhasakkārasamaṃyuttaṃ

1. Paṭhamavaggo

1. Dāruṇasuttavaṇṇanā

157. Lābhasakkārasamaṃyuttassa paṭhame **dāruṇoti** thaddho. **Lābhasakkārasilokoti** ettha **lābho** nāma catupaccayaḷābho. **Sakkāroti** tesamaṃeva sukatānaṃ susaṅkhatānaṃ lābho. **Silokoti** vaṇṇaghoso. **Kaṭukoti** tikhiṇo. **Pharusoti** kharo. **Antarāyikoti** antarāyakaro. Paṭhamaṃ.

2. Baḷisasuttavaṇṇanā

158. Dutīye **bāḷisikoti** baḷisaṃ gahetvā caramāno macchaghātaḷo. **Āmisagatanti** āmisamakkhitaṃ. **Āmisacakkhūti** āmise cakkhu dassanaṃ assāti āmisacakkhu. **Gilabaḷisoti** gilitabaḷiso. **Anayaṃ āpannoti** dukkhaṃ patto. **Byasanaṃ āpannoti** vināsaṃ patto. **Yathākāmakaraṇīyoti** yathākāmena yathāruciyā yatheva naṃ bāḷisiko icchati, tathevassa kattabboti attho. **Yathākāmakaraṇīyo pāpimatoti** yathā kilesamārassa kāmo, evaṃ kattabbo, nirayaṃ vā tiracchānayaṇiṃ vā pettivisaṃ vā pāpetabbo. Dutīyaṃ.

3-4. Kummasuttādivaṇṇanā

159-160. Tatiye **mahākummaḷanti** mahantaṃ aṭṭhikacchapakuḷaṃ. **Agamāsīti** “ettha addhā kiñci khāditaḷbaṃ atthi, taṃ maccharāyanta maṃ esa nivāreti”ti saññāya agamāsī. **Papatāyāti** papatā vuccati dīgharajjukabaddho ayakantakosake daṇḍakaṃ pavesetvā gahito kaṇṇikasallasāṇṭhāno, ayakaṇṭako, yasmīṃ vegena patitvā kaṭāhe laggamate daṇḍako nikkhamati, rajjuko ekābaddho gacchateva. **So kummoti** so viddhakummo. **Yena so kummoti** udakasaddaṃ sutvā sāsaṅkaṭṭhānaṃ bhavissatīti nivattitvā yena so atthakāmo kummo. **Na dāni tvaṃ amhākanti** idāni tvaṃ amittahatthaṃ gato, na amhākaṃ santakoti attho. Evaṃ sallapantānaṃyeva ca nesaṃ nāvāya ʘhito luddo rajjukamaṃ ākaḍḍhitvā kummaṃ gahetvā yathākāmaṃ akāsī. Sesamettha ito anantarasutte ca uttānameva. Tatiyacaṭṭhāni.

5. Mīlhakasuttavaṇṇanā

161. Pañcame **mīlhakā**ti gūthapāṇakā. **Gūthādī**ti gūthabhakkhā. **Gūthapūrā**ti anto gūthena bharitā. **Puṇṇā gūthassā**ti idaṃ purimasseva atthadīpanaṃ. **Atimaññeyyā**ti pacchimapāde bhūmiyaṃ ṭhapetvā purimapāde gūthassa upari āropetvā ṭhitā ‘‘ahamhi gūthādī’’ti bhaṇantī atimaññeyya. **Piṇḍapāto cassa pūro**ti aparopissa pattapūro paṇṭapīṇḍapāto bhavēyya. Pañcamaṃ.

6. Asanisuttavaṇṇanā

162. Chaṭṭhe **kaṃ, bhikkhave, asanivicakkanti**, bhikkhave, kaṃ puggalaṃ matthake patitvā maddamānaṃ sukkāsanīcakkamaṃ āgacchatu. **Appattamānasanti** anadhigatārahattaṃ. Iti bhagavā na sattānaṃ dukkhakāmatāya, ādīnaṃ pana dassetuṃ evamāha. Asanīcakkāñhi matthake patitaṃ ekameva attabhāvaṃ nāseti, lābhasakkārasilokena pariyaḍiṇṇacitto nirayādīsū anantadukkhaṃ anubhoti. Chaṭṭhaṃ.

7. Diddhasuttavaṇṇanā

163. Sattame **diddhagatenā**ti gatadiddhena. **Visallenā**ti visamakkhītena. **Sallenā**ti sattiyaṃ. Sattamaṃ.

8. Siṅgālasuttavaṇṇanā

164. Aṭṭhame **siṅgālo**ti jarasiṅgālo. Yathā hi suvaṇṇavaṇṇopi kāyo pūtikāyo tveva, taṃkhaṇaṃ gaḷitampi ca muttaṃ pūtimuttantveva vuccati, evaṃ tadahujātopi siṅgālo jarasiṅgālotveva vuccati. **Ukkaṇṭakena nāmā**ti evaṃnāmakena rogena. So kira sītakāle uppajjati. Tasmaṃ uppanne sakalasarīrato lomāni patanti, sakalasarīraṃ nillomaṃ hutvā, samantato phuṭati, vātabbhāhatā vaṇā rujjanti. Yathā ummattakasunakhena daṭṭho puriso anavaṭṭhitova bhamatī, evaṃ tasmaṃ uppanne bhamitabbo hoti, asukaṭṭhāne sotthi bhavissatīti na paññāyati. Aṭṭhamaṃ.

9. Verambhasuttavaṇṇanā

165. Navame **verambhavātā**ti evaṃnāmakā mahāvātā. Kīdise pana ṭhāne te vātā vāyantīti? Yattha ṭhitassa cattāro dīpā uppalinipattamattā hutvā paññāyanti. **Yo pakkhī gacchatī**ti navavuṭṭhe deve viravanto vātasakuṇo tattha gacchati, taṃ sandhāyetaṃ vuttaṃ. **Arakkhiteneva kāyenā**tiādīsū hatthapāde kīḷāpento khandhaṭṭhiṃ vā nāmento kāyaṃ na rakkhati nāma, nānāvidhaṃ duṭṭhullakathaṃ kathento vācaṃ na rakkhati nāma, kāmavitakkādayo vitakkento cittaṃ na rakkhati nāma. **Anupaṭṭhitāya satiyā**ti kāyagatāsatiṃ anupaṭṭhapetvā. Navamaṃ.

10. Sagāthakasuttavaṇṇanā

166. Dasame **asakkārena cūbhayanti** asakkārena ca ubhayena. **Samādhī**ti arahattaphalasaṃmādhī. So hi tena na vikampati. **Appamāṇavihārinoti** appamāṇena phalasaṃmādhinā viharantassa. **Sātatikanti** satatakāriṃ. **Sukhumaṃdiṭṭhivipassakanti** arahattamaggadiṭṭhiyā sukhumadiṭṭhiphalasaṃpattiattāhāya vipassanaṃ paṭṭhapetvā āgatattā vipassakamaṃ. **Upādānakkhayārāma**nti upādānakkhayasaṅkhāte nibbāne rataṃ. **Āhu sappuriso itī**ti sappurisoti kathentīti. Dasamaṃ.

Paṭṭhama vaggo.

2. Dutiyavaggo

1-2. Suvanṇapātisuttādivaṇṇanā

167-168. Dutiyavaggassa paṭhame **sampajānamusā bhāsantanti** appamattakenapi kāraṇena sampajānameva musā bhāsantaṃ. “Sīlaṃ pūressāmī”’ti saṃvihitabhikkhuṃ sinerumattopi paccayarāsi cāletuṃ na sakkoti. Yadā pana sīlaṃ pahāya sakkāranissito hoti, tadā kuṇḍakamuṭṭhihetupi musā bhāsati, aññāṃ vā akiccaṃ karoti. Dutiyaṃ uttānamevāti. Paṭhamadutiyāni.

3-10. Suvanṇanikkhasuttādivaṇṇanā

169. Tatiyādīsū **suvanṇanikkhassāti** ekassa kañcananikkhassa. **Siṅgīnikkhassāti** siṅgīsuvanṇanikkhassa. **Pathaviyāti** cakkavāḷabbhantarāya mahāpathaviyā. **Āmisakiñcikkahetūti** kassacideva āmisassa hetu antamaso kuṇḍakamuṭṭhinopi. **Jīvitahetūti** aṭaviyaṃ corehi gahetvā jīvite voropiyamāne tassapi hetu. **Janapadakalyāṇiyāti** janapade uttamitthiyā. Tatiyādīni.

Dutiyo vaggo.

3. Tatiyavaggo

1-2. Mātugāmasuttādivaṇṇanā

170-171. Tatiyavaggassa paṭhame **na tassa, bhikkhave, mātugāmoti** na tassa raho ekakassa nisinnassa tena dhammena atthikopi mātugāmo cittaṃ pariyādātuṃ sakkoti, yassa lābhasakkārasiloko cittaṃ pariyādātuṃ sakkotīti, attho. Dutiyaṃ uttānamevāti. Paṭhamadutiyāni.

3-6. Ekaputtakasuttādivaṇṇanā

172-175. Tatiye **saddhāti** sotāpannā. Sesamettha uttānameva. Tathā catutthe pañcame chaṭṭhe ca. Tatiyādīni.

7. Tatiyasamaṇabrāhmaṇasuttavaṇṇanā

176. Sattame **samudayantiādīsū** saha pubbakammena attabhāvo kolaputtiyaṃ vaṇṇapokkharatā kalyāṇavākkaraṇatā dhutaguṇāvīkaraṇaṃ cīvaradhāraṇaṃ parivārasampattīti evamādi lābhasakkārasa samudayo nāma, taṃ samudayasaccavasena nappajānāti, nirodho ca paṭipadā ca nirodhasaccamaggasaccavaseneva veditabbā. Sattamaṃ.

8. Chavisuttavaṇṇanā

177. Aṭṭhame yasmā lābhasakkārasiloko narakādīsū, nibbattento sakalampi imaṃ attabhāvaṃ nāseti, idhāpi maraṇampi maraṇamattampi dukkhaṃ āvahati, tasmā **chaviṃ chindatīti**ādi vuttaṃ. Aṭṭhamaṃ.

9. Rajjusuttavaṇṇanā

178. Navame **vāḷarajjuyāti** suttādīmayā rajju mudukā hoti vāḷarajju kharā pharusā, tasmā ayameva gahitā. Navamaṃ.

10. Bhikkhusuttavaṇṇanā

179. Dasame **diṭṭhadhammasukhavihārāti** phalasaṃpattisukhavihārā. **Tesāhamassāti** tesam

ahaṃ assa. Khīṇāsavo hi lābhī puññasampanno yāgukhajjakādīni gahetvā āgatāgatānaṃ anumodanaṃ karonto dhammaṃ desento pañhaṃ vissajjento phalasaṃpattim appētvā nisīdituṃ okāsaṃ na labhati, taṃ sandhāya vuttanti. Dasamaṃ.

Tatiyo vaggo.

4. Catutthavaggo

1-4. Bhindisuttādivaṇṇanā

180-183. Catutthavaggassa paṭhamaṃ uttānameva. Dutiyādīsu **kusalamūlanti** alobhādītividhakusaladhammo. **Sukko dhammoti** tasseva pariyāyadesanā. Ayaṃ panettha saṅkhepattho – yassa kusalamūlādisaṅkhātassa anavajjadhammassa asamucchinnatā devadatto sagge vā nibbatteyya, maggaphalāni vā adhigaccheyya, svāssa **samucchedamagamā** sabbaso samucchinno vinaṭṭho. Paṭhamādīni.

5. Acirapakkantasuttavaṇṇanā

184. Pañcame **parābhavāyāti** avaḍḍhiyā vināsāya. **Assatarīti** vaḷavāya kucchismiṃ gadrabhassa jātā. **Attavadhāya gabbhaṃ gaṇhātīti** taṃ assena saddhiṃ sampayojenti, sā gabbhaṃ gaṇhitvā kāle sampatte vijāyituṃ na sakkoti, pādehi bhūmiyaṃ paharantī tiṭṭhati, athassā cattāro pāde catūsu khāṇukesu bandhitvā kucchiṃ phāletvā potaṃ nīharanti, sā tattheva marati. Tenetaṃ vuttaṃ. Pañcamaṃ.

6. Pañcarathasatasuttavaṇṇanā

185. Chaṭṭhe **bhattābhīhāroti** abhiharitabbaṃ bhattaṃ. Tassa pana pamāṇaṃ dassetuṃ **pañca ca thālipākasatānīti** vuttaṃ. Tattha eko thālipāko dasannaṃ purisānaṃ bhattaṃ gaṇhāti. **Nāsāya pittaṃ bhindeyyunti** acchapittaṃ vā macchapittaṃ vāssa nāsapuṭe pakkhipeyyaṃ. Chaṭṭhaṃ.

7-13. Mātusuttādivaṇṇanā

186-187. Sattame **mātupi hetūti** “sace musā bhaṇasi, mātaraṃ te vissajjessāma. No ce bhaṇasi, na vissajjessāmā”ti evaṃ corehi aṭaviyaṃ pucchamāno tassā corahatthagatāya mātuyāpi hetu sampajānamusā na bhāseyyāti attho. Ito paresupi eseva nayoti. Sattamādīni.

Lābhasakkārasaṃyuttavaṇṇanā niṭṭhitā.

7. Rāhulasāmyuttaṃ

1. Paṭhamavaggo

1-8. Cakkhusuttādivaṇṇanā

188-195. Rāhulasāmyuttassa paṭhame **ekoti** catūsu iriyāpathesu ekavīhārī. **Vūpakaṭṭhoti** vivekaṭṭho nissaddo. **Appamattoti** satiyā avippavasanto. **Ātāpīti** vīriyasampanno. **Pahitatto vihareyyanti** visesādhigamattāya pesitatto hutvā vihareyyaṃ. **Aniccanti** hutvā abhāvākārena aniccaṃ. Atha vā uppādavayavantatāya tāvakālikatāya vipariṇāmakotiṇiyā niccapaṭikkhepatoti imehipi kāraṇehi aniccaṃ. **Dukkanti** catūhi kāraṇehi dukkhaṃ dukkhamanaṭṭhena dukkhavattukaṭṭhena satatasampīḷanaṭṭhena sukhaṭikkhepenāti. **Kallanti** yuttaṃ. **Etaṃ mamāti** taṇhāgāho. **Esohamasmīti** mānagāho. **Eso me**

attāti diṭṭhigāho. Taṇhāgāho cetha aṭṭhasatataṇhāvīcaritavasena, mānagāho navavidhamānavasena, diṭṭhigāho dvāsaṭṭhidiṭṭhivasena veditabbo. **Nibbindaṃ virajjati** ettha virāgavasena cattāro maggā kathitā, **virāgā vimuccati** ettha vimuttivasena cattāri sāmāññaphalāni.

Ettha ca pañcasu dvāresu pasādāva gahitā, **manoti** iminā tebhūmakam sammasanacāraccittam. Dutiye pañcasu dvāresu ārammaṇameva. Tatiye pañcasu dvāresu pasādavatthukacittameva, manoviññāṇena tebhūmakam sammasanacāraccittam gahitam. Evaṃ sabbattha nayo netabbo. Chaṭṭhe tebhūmakadhammā. Aṭṭhame pana **taṇhāti** tasmim tasmim dvāre javanappattāva labbhati. Paṭhamādīni.

9. Dhātusuttavaṇṇanā

196. Navame viññāṇadhātuvasena nāmaṃ, sesāhi rūpanti nāmarūpaṃ kathitam. Navamaṃ.

10. Khandhasuttavaṇṇanā

197. Dasame rūpakkhandho kāmāvacaro, sesā cattāro sabbasaṅgāhikaparicchedena catubhūmakā. Idha pana tebhūmakāti gahetabbā. Dasamaṃ.

Paṭhamo vaggo.

2. Dutiyaṃ vaggō

1-10. Cakkhusuttādivaṇṇanā

198-199. Dutiye dasa uttānatthāneva. Paṭhamādīni.

11. Anusayasuttavaṇṇanā

200. Ekādasame **imasmīna saviññāṇake kāyeti** attano saviññāṇakakāyaṃ dasseti, **bahiddhā cāti** parassa saviññāṇakam vā aviññāṇakam vā. Purimena vā attano ca parassa ca viññāṇameva dasseti, pacchimena bahiddhā anindriyabaddharūpaṃ. **Ahaṅkāramamaṅkāramānānusayāti** ahaṅkāradīṭṭhi ca mamaṅkārataṇhā ca mānānusayā ca. **Na honti** ete kilesā katham jānantassa etesu vatthūsu na honti pucchati. **Sammappaññāya passati** saha vipassanāya maggapaññāya suṭṭhu passati. Ekādasamaṃ.

12. Apagatasuttavaṇṇanā

201. Dvādasame **ahaṅkāramamaṅkāramānāpagatanti** ahaṅkārato ca mamaṅkārato ca mānato ca apagataṃ. **Vidhā samatikkantanti** mānakoṭṭhāse suṭṭhu atikkantaṃ. **Santaṃ suvimuttanti** kilesavūpasamena santaṃ, kileseheva suṭṭhu vimuttaṃ. Sesam uttānamevāti. Dvādasamaṃ.

Dutiyo vaggo.

Dvīsupi asekkhabhūmi kathitā. Paṭhamo panettha āyācantassa desito, dutiyo anāyācantassa. Sakalepi pana rāhulasamṃyutte therassa vimutti-paripācanīyadhammāva kathitāti.

Rāhulasamṃyuttavaṇṇanā niṭṭhitā.

8. Lakkhaṇasamṃyuttaṃ

1. Paṭhamavaggo

1. Aṭṭhisuttavaṇṇanā

202. Lakkhaṇasamṃyutte yvāyaṃ āyasmā ca lakkhaṇoti lakkhaṇatthero vutto, esa jaṭilasahassabbhantare ehibhikkhūpasampadāya upasampanno ādittapariyāyāvasāne arahattaṃ patto eko mahāsāvakoṭi veditabbo. Yasmā pana lakkhaṇasampanna sabbākārapariyūreṇa brahmasamena attabhāvena samannāgato, tasmā ‘‘lakkhaṇo’’ti saṅkhaṃ gato. Mahāmogallāno pana pabbajitadivasato sattame divase arahattaṃ patto dutiyo aggasāvako.

Sitaṃ pātvākāsīti mandahasitaṃ pātuakāsi, pakāsayi dassesīti vuttaṃ hoti. Kiṃ pana disvā thero sitaṃ pātvākāsīti? Upari pāliyaṃ āgataṃ aṭṭhikasaṅkhalikaṃ ekaṃ petaloke nibbattaṃ sattaṃ disvā. Tañca kho dibbena cakkhunā, na pasādacakkhunā. Pasādacakkhussa hi ete attabhāvā na āpāthaṃ āgacchanti. Evarūpaṃ pana attabhāvaṃ disvā kāruṇṇe kattabbe kasmā sitaṃ pātvākāsīti? Attano ca buddhañāssa ca sampattiṃ samanussaraṇato. Tañhi disvā thero ‘‘adiṭṭhasaccena nāma puggalena paṭilabhitabbā evarūpā attabhāvā mutto ahaṃ, lābhā vata me, suladdhaṃ vata me’’ti attano ca sampattiṃ anussarivā – ‘‘aho buddhassa bhagavato ñāṇasampatti, ‘yo kammavipāko, bhikkhave, acinteyyo na cintetabbo’’ti desesi, paccakkhaṃ vata katvā buddhā desenti, suppaṭividdhā buddhānaṃ dhammadhātū’’ti evaṃ buddhañāṇasampattiñca anussarivā sitaṃ pātvākāsīti.

Atha lakkhaṇatthero kasmā na addasa, kimassa dibbacakkhu natthīti? No natthi, mahāmogallāno pana āvajjento addasa, itaro pana anāvajanena na addasa. Yasmā pana khīṇāsavā nāma na akāraṇā sitaṃ karonti, tasmā taṃ lakkhaṇatthero pucchi **ko nu kho, āvuso moggallāna, hetu, ko paccayo sitassa pātukammāyāti?** Thero pana yasmā yehi ayaṃ upapatti sāmaṃ adiṭṭhā, te dussaddhāpayā honti, tasmā bhagavantaṃ sakkhiṃ katvā byākātukāmatāya **akālo kho, āvusotiādimāha.** Tato bhagavato santike puṭṭho **idhāhaṃ, āvusotiādinā** nayena byākāsi.

Tattha **aṭṭhikasaṅkhalikanti** setaṃ nimmaṃsalohitaṃ aṭṭhisāṅghātaṃ. **Gijjhāpi kākāpi kulalāpīti** etepi yakkhagijjhā ceva yakkhakākā ca yakkhakulalā ca paccetabbā. Pākatikānaṃ pana gijjhādīnaṃ āpāthampi etaṃ rūpaṃ nāgacchati. **Anupatitvā anupatitvāti** anubandhitvā anubandhitvā. **Vitudentīti** asidhārūpamehi tikhiṇehi lohatuṇḍakehi vijjhivā vijjhivā ito cito ca caranti gacchanti. **Sā sudaṃ aṭṭassaraṃ karotīti** ettha **sudanti** nipāto, sā aṭṭhikasaṅkhalikā aṭṭassaraṃ āturassaraṃ karotīti attho. Akusalavipākānubhavanatthaṃ kira yojanappamaṇāpi tādisā attabhāvā nibbattanti, pasādussadā ca honti pakkagaṇḍasadisā. Tasmā sā aṭṭhikasaṅkhalikā balavavedanāturā tādisaṃ saddamakāsīti.

Evañca pana vatvā puna āyasmā mahāmogallāno ‘‘vatṭagāmisattā nāma evarūpā attabhāvā na muccanti’’ti sattesu kāruṇṇaṃ paṭicca uppannaṃ dhammasaṃvegaṃ dassento **tassa mayhaṃ, āvuso, etadahosi acchariyaṃ vata bhotiādimāha.** Tato bhagavā therassa ānubhāvaṃ pakāseto **cakkhubhūtā vata, bhikkhave, sāvakā viharantītiādimāha.** Tattha cakkhu bhūtaṃ jātaṃ uppannaṃ etesanti **cakkhubhūtā,** bhūtacakkhukā uppannacakkhukā cakkhuṃ uppādetvā viharantīti attho. Dutiyapadepi eseva nayo. **Yatra hi nāmāti** ettha **yatrāti** kāraṇavacanaṃ. Tatrāyaṃ atthayojanā – yasmā nāma sāvakopi evarūpaṃ ñassati vā dakkhati vā sakkhiṃ vā karissati, tasmā avocumha – ‘‘cakkhubhūtā vata, bhikkhave, sāvakā viharanti, ñāṇabhūtā vata, bhikkhave, sāvakā viharanti’’ti. **Pubbeva me so, bhikkhave, satto diṭṭhoti** bodhimaṇḍe sabbaññutaññāpaṭivedhena appamaṇesu cakkavālesu appamaṇe sattanikāye bhavagatiyonīṭhitinivāse ca paccakkhaṃ karontena mayā pubbeva so satto diṭṭhoti vadati.

Goghātakoti gāvo vadhitvā aṭṭhito maṃsaṃ mocetvā vikkiṇitvā jīvikaṃ kappanakasatto. **Tasseva kammaṃ vipākāvasesenāti** tassa nānācetanāhi āyūhitassa aparāpariyakammaṃ. Tatra hi yāya cetanāya narake paṭisandhi janitā, tassā vipāke parikkhīṇe avasesakammaṃ vā kammanimittaṃ vā ārammaṇaṃ katvā puna petādīsu paṭisandhi nibbattati, tasmā sā paṭisandhi kammaṃsabhāgatāya

ārammaṇasabhāgatāya vā “tasseva kammassa vipākāvaseso”’ti vuccati. Ayañca satto evaṃ uppanno. Tenāha – “tasseva kammassa vipākāvasesenā”’ti. Tassa kira narakā cavanakāle nimmaṃsakatānaṃ gunnaṃ aṭṭhirāsiyeva nimittaṃ ahoṣi. So paṭicchannampi taṃ kammaṃ viññūnaṃ pākaṃ viya karonto aṭṭhisāṅkhalikapeto jāto. Paṭhamaṃ.

2. Pesisuttavaṇṇanā

203. Maṃsapesivatthusmiṃ **goghātakoti** gomaṃsapesiyo katvā sukkhāpetvā vallūravikkayena anakāni vassāni jīvikaṃ kappesi, tenassa narakā cavanakāle maṃsapesiyeva nimittaṃ ahoṣi. So maṃsapesipeto jāto. Dutiyamaṃ.

3. Piṇḍasuttavaṇṇanā

204. Maṃsapiṇḍavatthusmiṃ **sākuṇikoti** sakuṇe gahetvā vikkiṇanakāle nippakkhacamme maṃsapiṇḍamatte katvā vikkiṇanto jīvikaṃ kappesi, tenassa narakā cavanakāle maṃsapiṇḍova nimittaṃ ahoṣi. So maṃsapiṇḍapeto jāto. Tatiyamaṃ.

4. Nicchavisuttavaṇṇanā

205. Nicchavivatthusmiṃ tassa orabbhikassa eḷake vadhitvā vadhitvā niccamme katvā kappitajīvikassa purimanayeneva niccammaṃ eḷakasarīraṃ nimittaṃ ahoṣi. So nicchavipeto jāto. Catutthamaṃ.

5. Asilomasuttavaṇṇanā

206. Asilomavatthusmiṃ so sūkariko dīgharattaṃ nivāpapurūṭṭhe sūkare asinā vadhitvā vadhitvā dīgharattaṃ jīvikaṃ kappesi, tassa ukkhittāsikabhāvova nimittaṃ ahoṣi. Tasmā asilomapeto jāto. Pañcamamaṃ.

6. Sattisuttavaṇṇanā

207. Sattilomavatthusmiṃ so māgaviko ekaṃ migañca sattiñca gahetvā vanaṃ gantvā tassa migassa samīpaṃ āgatāgate mige sattiya vijjhivā māresi, tassa sattiya vijjhanakabhāvoyeva nimittaṃ ahoṣi. Tasmā sattilomapeto jāto. Chatthamaṃ.

7. Usulomasuttavaṇṇanā

208. Usulomavatthusmiṃ **kāraṇikoti** rājāparādhike anakāhi kāraṇāhi pīḷetvā avasāne kaṇḍena vijjhivā māraṇakapuriso. So kira “amukasmim padese viddho maratī”’ti ṇatvāva vijjhati. Tassevaṃ jīvikaṃ kappetvā narake uppanassa tato pakkāvasesena idhūpapattikāle usunā vijjhanabhāvoyeva nimittaṃ ahoṣi. Tasmā usulomapeto jāto. Sattamaṃ.

8. Sūcilomasuttavaṇṇanā

209. Sūcilomavatthusmiṃ **sūtoti** assadamako. Godamakotipi vadantiyeva. Tassa patodasūciya vijjhanabhāvoyeva nimittaṃ ahoṣi. Tasmā sūcilomapeto jāto. Aṭṭhamaṃ.

9. Dutiyasūcilomasuttavaṇṇanā

210. Dutiyē sūcilomavatthusmiṃ **sūcakoti** pesuññakārako. So kira manusse aññaamaññañca bhindi,

rājakule ca ‘‘imassa imaṃ nāma atthi, iminā idaṃ nāma kata’’nti sūcetvā sūcetvā anayabyasaṃ pāpesi. Tasmā yathā tena sūcetvā manussā bhinnā, tathā sūcīhi bhedanadukkhaṃ paccanubhotuṃ kammameva nimittaṃ katvā sūcilomapeto jāto. Navamaṃ.

10. Kumbhaṇḍasuttavaṇṇanā

211. Aṇḍabhārivatthusmiṃ **gāmakūṭakoti** vinicchayāmacco. Tassa kammaabhāgatāya kumbhamattā mahāghaṭappamānā aṇḍā ahesuṃ. So hi yasmā raho paṭicchane ṭhāne lañjaṃ gahetvā kūṭavinicchayena pākaṭaṃ dosaṃ karonto sāmike assāmike akāsi, tasmāssa rahassaṃ aṅgaṃ pākaṭaṃ nibbattaṃ. Yasmā daṇḍaṃ paṭṭhapento paresaṃ asayaṃ bhāraṃ āropesi, tasmāssa rahassaṃ aṅgaṃ asayabhāro hutvā nibbattaṃ. Yasmā yasmim ṭhāne ṭhitena samena bhavitabbaṃ, tasmim ṭhatvā visamo ahoṣi, tasmāssa rahassaṃge visamā nisajjāva ahoṣīti. Dasamaṃ.

Paṭhamo vaggo.

2. Dutiyavaggo

1. Sasāsakasuttavaṇṇanā

212. Pāradārikavatthusmiṃ so satto parassa rakkhitagopitaṃ sassāmikaṃ phassaṃ phusanto mīḷhasukhena kāmasukhena cittaṃ ramayitvā kammaabhāgatāya gūthaphassaṃ phusanto dukkhamanubhavituṃ tattha nibbatta. Paṭhamaṃ.

2. Gūthakhādasuttavaṇṇanā

213. Duṭṭhabrahmaṇavatthu pākaṭameva. Dutiyamaṃ.

3. Nicchavitthisuttavaṇṇanā

214. Nicchavitthivatthusmiṃ yasmā mātuḡāmo nāma attano phasse anissaro, sā ca taṃ sāmikassa santakaṃ phassaṃ thenetvā paresaṃ abhiraṭṭiṃ uppādesi, tasmā kammaabhāgatāya sukhasamphassā vaṭṭitvā dukkhasamphassaṃ anubhavituṃ nicchavitthi hutvā uppānā. Tatiyamaṃ.

4. Maṅgulitthisuttavaṇṇanā

215. Maṅgulitthivatthusmiṃ **maṅgulinti** virūpaṃ duddasikaṃ bībhaccaṃ. Sā kira yakkhadāsikammaṃ karontī ‘‘iminā ca iminā ca evaṃ balikamme kate ayaṃ nāma tumhākaṃ vaḍḍhi bhavissati’’ti mahājanassa gandhapupphādīni vañcanāya gahetvā mahājanaṃ duddiṭṭhiṃ micchādiṭṭhiṃ gaṇhāpesi, tasmā tāya kammaabhāgatāya gandhapupphādīnaṃ thenitattā duggandhā, duddassanassa gāhitattā duddasikā virūpā bībhaccā hutvā nibbattā. Catutthamaṃ.

5. Okilinīsuttavaṇṇanā

216. Okilinīvatthusmiṃ **uppakkaṃ okiliniṃ okirinti** sā kira aṅgaracitake nipānā vipphandamānā viparivattamānā paccati, tasmā uppakkā ceva hoti uṇhena agginā pakkasarīrā, okilinī ca kilinnasarīrā, bindūnissā sarīrato paggharanti, okirinī ca aṅgarasamparikīṇṇā. Tassā hi heṭṭhatopi kiṃsukapupphavaṇṇā aṅgārā, ubhayapassesupī, ākāsatopissā upari patanti. Tena vuttaṃ – ‘‘uppakkaṃ okiliniṃ okirini’’nti. **Sā issāpakatā sapattim aṅgarakaṭāhena okirīti** tassa kira rañño ekā nāṭakinī aṅgarakaṭāhaṃ samīpe ṭhapetvā gattato udakaṃ puñchatī, pāṇinā ca sedaṃ karoti. Rājāpi tāya saddhiṃ kathaṅca karoti, paritūṭṭhākāraṅca dasseti. Aggamahesī taṃ asahamānā issāpakatā hutvā

acirapakkantassa rañño taṃ aṅgārakaṭāhaṃ gahetvā tassā upari aṅgāre okiri. Sā taṃ kammaṃ katvā tādisaṃyeva vipākaṃ paccanubhavituṃ petaloke nibbattā. Pañcamaṃ.

6. Asīsakasuttavaṇṇanā

217. Coraghātavatthusmiṃ so rañño āṇāya dīgharattaṃ corānaṃ sīsāni chinditvā petaloke nibbattanto asīsakaṃ kabandhaṃ hutvā nibbatti. Chaṭṭhaṃ.

7-11. Pāpabhikkhusuttādivaṇṇanā

218-222. Bhikkhuvatthusmiṃ **pāpabhikkhūti** lāmakabhikkhu. So kira lokassa saddhādeyye cattāro paccaye paribhuñjitvā kāyavacīdvārehi asaṃyato bhinnājīvo cittakeḷiṃ kīlanto vicari. Tato ekaṃ buddhantaṃ niraye paccitvā petaloke nibbattanto bhikkhusadiseneva attabhāvena nibbatti. Bhikkhunīsikkhamānāsāmaṇerasāmaṇerīvatthūsupi ayameva vinicchayo. Sattamādīni.

Lakkhaṇasaṃyuttavaṇṇanā niṭṭhitā.

9. Opammasaṃyuttaṃ

1. Kūṭasuttavaṇṇanā

223. Opammasaṃyuttassa paṭhame kūṭaṃ gacchantīti **kūṭaṅgamā**. Kūṭaṃ samosarantīti **kūṭasamosaraṇā**. **Kūṭasamugghātāti** kūṭassa samugghātena. **Avijjāsamugghātāti** arahattamaggena avijjāya samugghātena. **Appamattāti** satiyā avippavāse ṭhitā hutvā. Paṭhamamaṃ.

2. Nakhasikhasuttavaṇṇanā

224. Dutīye **manussesu paccājāyantīti** ye manussalokato cutā manussesu jāyanti, te evaṃ appakāti adhippāyo. **Aññatra manussehīti** ye pana manussalokato cutā ṭhapetvā manussalokaṃ catūsu apāyesu paccājāyanti, te mahāpathaviyaṃ paṃsu viya bahutarā. Imasmiñca sutte devāpi manusseheva saṅgahitā. Tasmā yathā manussesu jāyantā appakā, evaṃ devesupīti veditabbā. Dutīyaṃ.

3. Kulasuttavaṇṇanā

225. Tatiye **suppadhamsiyānīti** suviheṭhiyāni. **Kumbhatthenakehīti** ye paragharaṃ pavisitvā dīpālokena oloketvā parabhaṇḍaṃ haritukāmā ghaṭe dīpaṃ katvā pavisanti, te kumbhatthenakā nāma, tehi kumbhatthenakehi. **Suppadhamsiyo hoti amanussehīti** mettābhāvanārahitaṃ paṃsupisācakā vidhamsayanti, pageva ulārā amanussā. **Bhāvitāti** vaḍḍhitā. **Bahulikatāti** punappunaṃ katā. **Yānikatāti** yuttayānaṃ viya katā. **Vatthukatāti** patiṭṭhānaṭṭhena vatthu viya katā. **Anuṭṭhitāti** adhiṭṭhitā. **Paricitāti** samantato citā suvaḍḍhitā. **Susamāraddhāti** cittena suṭṭhu samāraddhā. Tatiyaṃ.

4. Okkhāsuttavaṇṇanā

226. Catutthe **okkhāsantanti** mahāmukkhaukkhalīnaṃ satamaṃ. **Dānaṃ dadeyyāti** paṇṭabhojanabharitānaṃ mahāukkhālīnaṃ satamaṃ dānaṃ dadeyya. ‘‘Ukkāsata’’ntipi pāṭho, tassa daṇḍadīpikāsantanti attho. Ekāya pana dīpikāya yattake ṭhāne āloko hoti, tato satagunaṃ ṭhānaṃ sattahi ratanehi pūretvā dānaṃ dadeyyāti attho. **Gadduhanamattanti** goduhanamattaṃ, gāviyā ekavāraṃ aggathanākaḍḍhanamattanti attho. Gandhaūhanamattaṃ vā, dvīhi aṅgulīhi gandhapinḍaṃ gahetvā ekavāraṃ ghāyanamattanti attho. Ettakampi hi kālaṃ yo pana gabbhapariveṇavīhārūpacāra paricchhedena vā cakkavāḷaparicchhedena vā aparimāṇāsu lokadhātūsu vā sabbasattesu hitapharaṇaṃ mettacittaṃ

bhāvetuṃ sakkoti, idaṃ tato ekadivasam tikkhattuṃ dinnadānato mahapphalataram. Catuttham.

5. Sattisuttavaṇṇanā

227. Pañcame **paṭīṇissāmī**tiādīsu agge paharivā kappāsavaṭṭiṃ viya nāmento niyyāsavaṭṭiṃ viya ca ekato katvā alliyāpento **paṭīṇeti** nāma. Majjhe paharivā nāmetvā dhārāya vā paharivā dvepi dhārā ekato alliyāpento **paṭīkoṭṭeti** nāma. Kappāsavaṭṭanakaraṇīyaṃ viya pavattento cīrakālaṃ saṃvellitakīlaṅgaṃ pasāretvā puna saṃvellento viya ca **paṭivatteti** nāma. Pañcamaṃ.

6. Dhanuggahasuttavaṇṇanā

228. Chaṭṭhe **daḷhadhammā dhanuggahāti** daḷhadhanuno issāsā. Daḷhadhanu nāma dvisahassathāmaṃ vuccati, dvisahassathāmaṃ nāma yassa āropitassa jiyābaddho lohasīsādīnaṃ bhāro daṇḍe gahetvā yāva kaṇḍappamāṇā ukkhittassa pathavito muccati. **Susikkhitāti** dasadvādasavassāni ācariyakule uggahitasippā. **Katahatthāti** yo sippameva uggaṇhāti, so katahattho na hoti, ime pana katahatthā ciṅṇavasībhāvā. **Katūpāsānāti** rājakulādīsu dassitasippā.

Tassa purisassa javoti evarūpo añño puriso nāma na bhūtapubbo, bodhisattasseva pana javanaḥṣakālo nāma āsi. Tadā bodhisatto cattāri kaṇḍāni āhari. Tadā kirassa kaniṭṭhabhātaro “mayam, bhātika, sūriyena saddhiṃ javissāmā”ti ārocesuṃ. Bodhisatto āha – “sūriyo sīghajavo, na sakkhissatha tumhe tena saddhiṃ javitu”nti. Te dutiyaṃ tatiyaṃ tatheva vatvā ekadivasam “gacchāmā”ti yugandharapabbataṃ āruhitvā nisīdiṃsu. Bodhisatto “kahaṃ me bhātaro”ti? Pucchitvā, “sūriyena saddhiṃ javituṃ gatā”ti vutte, “vinassissanti tapassino”ti te anukampamāno sayampi gantvā tesam santike nisīdi. Atha sūriye uggacchante dvepi bhātaro sūriyena saddhiṃyeva ākāsaṃ pakkhantā, bodhisattopi tehi saddhiṃyeva pakkhanto. Tesu ekassa apatteyeva antarabhattachasamaye pakkhantaresu aggi uṭṭhahi, so bhātaram pakkositvā “na sakkomī”ti āha. Tameṃ bodhisatto “mā bhāyī”ti samassāsetvā pakkhapaṅjarena paliveṭhetvā daratham vinodetvā “gacchā”ti pesesi.

Dutiyo yāva antarabhattachā javitvā pakkhantaresu aggimhi uṭṭhahite tathevāha. Tampi so tatheva katvā “gacchā”ti pesesi. Sayam pana yāva majjhanhikā javitvā, “ete bālāti mayāpi bālena na bhavitabba”nti nivattitvā – “adiṭṭhasahāyakaṃ bārāṇasirājaṃ passissāmī”ti bārāṇasiṃ agamāsi. Tasmim nagaramatthake paribbhamante dvādasayojanaṃ nagaram pattakaṭāhena otthaṭapatto viya ahoṣi. Atha paribbhamantassa paribbhamantassa tattha tattha chiddāni paññāyīṃsu. Sayampi anekahaṃsasahasasadiṣo paññāyī. So vegam paṭisaṃharitvā rājagehābhimukho ahoṣi. Rājā oloketvā – “āgato kira me piyasahāyo javanaḥṣo”ti vātapānaṃ vivaritvā ratanapīṭhaṃ paññāpetvā olokeno aṭṭhāsi. Bodhisatto ratanapīṭhe nisīdi.

Athassa rājā saḥassapākena telena pakkhantarāni makkhetvā, madhulāje ceva madhurapānakañca adāsi. Tato naṃ kataparibhogam “samma, kahaṃ agamāsī”ti? Pucchi. So tam pavattim ārocetvā “athāham, mahārāja, yāva majjhanhikā javitvā – ‘natthi javitena attho’ti nivatto”ti ācikkhi. Atha rājā āha – “ahaṃ, sāmi, tumhākaṃ sūriyena saddhiṃ javanavegam passitukāmo”ti. Dukkaram, mahārāja, na sakkā tayā passitunti. Tena hi, sāmi, sarikkhakamattampi dassēhīti. Āma, mahārāja, dhanuggahe sannipātehīti. Rājā sannipātesī. Haṃso tato cattāro gahetvā nagaramajjhe toraṇaṃ kāretvā attano gīvāya ghaṇḍaṃ piḷandhāpetvā toraṇassa upari nisīditvā – “cattāro janā toraṇaṃ nissāya catudisābhimukhā ekekaṃ kaṇḍaṃ khipantū”ti vatvā, sayam paṭhamakaṇḍeneva saddhiṃ uppatitvā, tam kaṇḍaṃ aggahetvāva, dakkhiṇābhimukhaṃ gatakaṇḍaṃ dhanuto ratanamattāpagataṃ gaṇhi. Dutiyaṃ dviratanamattāpagataṃ, tatiyaṃ tiratanamattāpagataṃ, catuttham bhūmiṃ appattameva gaṇhi. Atha naṃ cattāri kaṇḍāni gahetvā toraṇe nisinnakāleyeva addasaṃsu. So rājānaṃ āha – “passa, mahārāja, evaṃsīgho amhākaṃ javo”ti. Evaṃ bodhisatteneva javanaḥṣakāle tāni kaṇḍāni āharitānīti veditabbāni.

Purato dhāvanti aggato javanti. Na panetā sabbakālaṃ puratova honti, kadāci purato, kadāci pacchato honti. Ākāsaṭṭhakavimānesu hi uyyānānipi honti pokkharāṇiyopi, tā tattha nahāyanti, udakakīlaṃ kīlamānā pacchatopi honti, vegena pana gantvā puna puratova dhāvanti. **Āyusaṅkhārāti** rūpajīvitindriyaṃ sandhāya vuttaṃ. Tañhi tato sīghataraṃ khīyati. Arūpadhammānaṃ pana bhedo na sakkā paññāpetuṃ. Chaṭṭhaṃ.

7. Āṇisuttavaṇṇanā

229. Sattame **dasārahānanti** evaṃnāmakānaṃ khattiyānaṃ. Te kira satato dasabhāgaṃ gaṇhiṃsu, tasmā “dasārahā”ti paññāyīṃsu. **Ānakoti** evaṃladdhanāmo mudīngo. Himavante kira mahākuḷīradaho ahoṣi. Tattha mahanto kuḷīro otiṇṇotiṇṇaṃ hatthiṃ khādāti. Atha hatthī upaddutā ekaṃ kareṇuṃ sakkariṃsu “imissā puttāṃ nissāya amhākaṃ sotthi bhavissatī”ti. Sāpi mahesakkaṃ puttāṃ vijāyī. Te tampi sakkariṃsu. So vuddhippatto mātaraṃ pucchi, “kasmā maṃ ete sakkarontī”ti? Sā taṃ pavattimācikkhi. So “kiṃ mayhaṃ kuḷīro pahoti? Etha gacchāmā”ti mahāhatthiparivāro tattha gantvā paṭhamameva otari. Kuḷīro udakasaddeneva āgantvā taṃ aggahesi. Mahanto kuḷīrassa aḷo, so taṃ ito vā etto vā cāletuṃ asakkonto mukhe soṇḍaṃ pakkhipitvā viravi. Hatthino “yaṃnissāya mayāṃ ‘sotthi bhavissatī’ti amaññimhā, so paṭhamataraṃ gahito”ti tato tato palāyīṃsu.

Athassa mātā avidūre ṭhatvā “mayāṃ thalanāgā, tumhe udakanāgā nāma, nāgehi nāgo na viheṭhetabbo”ti kuḷīraṃ piyavacanena vatvā imaṃ gāthamāha –

“Ye kuḷīrā samuddasmiṃ, gaṅgāya yamunāya ca;
Tesaṃ tvaṃ vārijo seṭṭho, muñca rodantiyā paja”nti.

Mātugāmasaddo nāma purise khobhetvā tiṭṭhati, tasmā so gahaṇaṃ sithilamakāsi. Hatthipoto vegena ubho pāde ukkhipitvā taṃ piṭṭhiyaṃ akkami. Saha akkamaṇā piṭṭhi mattikabhājanaṃ viya bhijji. Atha naṃ dantehi vijjhivā ukkhipitvā thale chaḍḍetvā tuṭṭharavaṃ ravi. Atha naṃ hatthī ito cito ca āgantvā maddiṃsu. Tassa eko aḷo paṭikkamitvā pati, taṃ sakkō devarājā gahetvā gato.

Itaro pana aḷo vātātapena sukkhitvā pakkalākhārasavaṇṇo ahoṣi, so deve vuṭṭhe udakoghena vuyhanto dasabhātikānaṃ rājūnaṃ uparisote jālaṃ pasārāpetvā gaṅgāya kīlantānaṃ āgantvā jāle laggī. Te kīlāpariyosāne jālamhi ukkhipiyamāne taṃ disvā pucchiṃsu “kiṃ eta”nti? “Kuḷīraaḷo sāmī”ti. “Na sakkā esa ābharāṇatthāya upanetuṃ, pariyanandhāpetvā bheriṃ karissāmā”ti? Pariyanandhāpetvā pahariṃsu. Saddo dvādasayojanaṃ nagaraṃ avatthari. Tato āhaṃsu – “na sakkā idaṃ divase divase vādetuṃ, chaṇḍadivasatthāya maṅgalabherī hotū”ti maṅgalabheriṃ akaṃsu. Tasmīṃ vādite mahājano anhāyitvā apiḷandhitvā hatthiyānādīni āruya sīghaṃ sannipatanti. Iti mahājanaṃ pakkosivā viya ānetīti **ānako** tvevassa nāmaṃ ahoṣi.

Aññaṃ āṇiṃ odahiṃsūti aññaṃ suvaṇṇarajatādimaṃ āṇiṃ ghaṭayīṃsu. **Āṇisaṅghāṭova** **avasissīti** suvaṇṇādimaṃ āṇiṃ saṅghāṭamattameva avasesaṃ ahoṣi. Athassa dvādasayojanappamaṇo saddo antosālāyampi dukkhena suyyittha.

Gambhīrāti pālivasena gambhīrā sallasuttasadisā. **Gambhīratthāti** atthavasena gambhīrā mahāvedallasuttasadisā (ma. ni. 1.449 ādayo). **Lokuttarāti** lokuttaraatthadīpakā. **Suññatappaṭisaṃyuttāti** sattasuññatadhammamattameva pakāsakā saṃkhittasāṃyuttasadisā. **Uggahetabbaṃ pariyaṇuṇitabbanti** uggahetabbe ca pariyaṇuṇitabbe ca. **Kavikatāti** kavīhi katā. Itaraṃ tasseva vevacanaṃ. **Cittakkharāti** vicitraakkharā. Itaraṃ tasseva vevacanaṃ. **Bāhirakāti** sāsanato bahibhūtā. **Sāvakabhāsītāti** tesaṃ tesaṃ sāvakehi bhāsītā. **Sussūsissantīti** akkharacittatāya ceva savanasampattiyā ca attamaṇā hutvā sāmaṇeradahaṃbhikkhumātugāmamahāgahapatikādayo “esa dhammakathiko”ti sannipatitvā sotukāmā bhavissanti. **Tasmāti** yasmā tathāgatabhāsītā suttantā anuggayhamānā antaradhāyanti, tasmā. Sattamaṃ.

8. Kaliṅgarasuttavaṇṇanā

230. Aṭṭhame **kaliṅgarūpadhānā**ti kaliṅgaraghaṭṭikam sīsūpadhānañceva pādūpadhānañca katvā. **Appamattā**ti sippuggahaṇe appamattā. **Ātāpinoti** uṭṭhānavīriyātāpena yuttā. **Upāsanasminti** sippānaṃ abhiyoge ācariyānañca payirupāsane. Te kira tadā pātova uṭṭhāya sippasālaṃ gacchanti, tattha sippaṃ uggahetvā sajjhāyādīhi abhiyogaṃ katvā mukhaṃ dhovitvā yāgupānāya gacchanti. Yāguṃ pivitvā puna sippasālaṃ gantvā sippaṃ gaṇhitvā sajjhāyaṃ karontā pātarāsāya gacchanti. Katapātarāsā samānā “mā pamādena ciraṃ niddokkamaṃ ahoṣī”ti khadiraghaṭṭikāsu sīse ca pāde ca upadahitvā thokaṃ nipajjitvā puna sippasālaṃ gantvā sippaṃ gahetvā sajjhāyanti. Sāyaṃ sajjhāyaṃ karontā ca gehaṃ gantvā bhuttasāyamāsā paṭhamayāmaṃ sajjhāyaṃ katvā sayanakāle tatheva kaliṅgaraṃ upadhānaṃ katvā sayanti. Evaṃ te akkhaṇavedhino vāavedhino ca ahesuṃ. Idaṃ sandhāyetaṃ vuttaṃ.

Otaranti vivaraṃ. **Ārammaṇanti** paccayaṃ. **Padhānasminti** padhānabhūmiyaṃ vīriyaṃ kurumānā. Paṭhamabodhiyaṃ kira bhikkhū bhattakiccaṃ katvāva kammaṭṭhānaṃ manasi karonti. Tesāṃ manasikarontānaṃyeva sūriyo atthaṃ gacchati. Te nhāyitvā puna caṅkamaṃ otarivā paṭhamayāmaṃ caṅkamanti. Tato “mā ciraṃ niddāyimhā”ti sarīradarathavinodanattaṃ nipajjantā kaṭṭhakhaṇḍaṃ upadahitvā nipajjanti, te puna pacchimayāme vuṭṭhāya caṅkamaṃ otaranti. Te sandhāya idaṃ vuttaṃ. Ayampi dīpo tiṇṇaṃ rājūnaṃ kāle ekaghaṇḍiniggghoso ekapadhānabhūmi ahoṣi. Nānāmukhe pahaṭaghaṇḍi pilicchikoḷiyaṃ osarati, kalyāṇiyaṃ pahaṭaghaṇḍi nāgadīpe osarati. “Ayaṃ bhikkhu puthujjano, ayaṃ puthujjano”ti aṅgulim pasāretvā dassetaḥho ahoṣi. Ekadivasaṃ sabbe arahantova ahesuṃ. **Tasmāti** yasmā kaliṅgarūpadhānānaṃ māro ārammaṇaṃ na labhati, tasmā. Aṭṭhamaṃ.

9. Nāgasuttavaṇṇanā

231. Navame **ativalanti** atikkantavelaṃ kālaṃ atikkantappamaṇaṃ kālaṃ. **Kimaṅgaṃ panāhanti** ahaṃ pana kiṃkāraṇā na upasaṅkamissāmi? **Bhisamuḷā**lanti bhisañceva muḷālañca. **Abbuhetvāti** uddharitvā. **Bhīnkacchāpāti** hatthipotakā. Te kira abhiṇṇaṃ bhīnkārasaddaṃ karonti, tasmā bhīnkacchāpāti vuccanti. **Pasannākāraṃ karontī** pasannehi kattabākāraṃ karonti, cattāro paccaye denti. **Dhammaṃ bhāsantī**ti ekaṃ dve jātakāni vā suttante vā uggaṇhitvā asambhinnena sarena dhammaṃ desenti. **Pasannākāraṃ karontī** tesāṃ tāya desanāya pasannā gihī paccaye denti. **Neva vaṇṇāya hoti na balāyāti** neva guṇavaṇṇāya, na ñāṇabalāya hoti, guṇavaṇṇe pana parihāyante sarīravaṇṇopi sarīrabalampi parihāyati, tasmā sarīrassa neva vaṇṇāya na balāya hoti. Navamaṃ.

10. Biḷārasuttavaṇṇanā

232. Dasame **sandhisamalasaṃkaṭṭireti** ettha **sandhī**ti bhinnagharānaṃ sandhi, **samaloti** gāmato gūthanikkhamaṇaṃ maggo, **saṃkaṭṭiranti** saṅkāraṭṭhānaṃ. **Mudumūsinti** mudukaṃ mūsikaṃ. **Vuṭṭhānaṃ paññāyatī**ti desanā paññāyati. Dasamaṃ.

11. Siṅgālasuttavaṇṇanā

233. Ekādasame **yena yena icchatī**ti so jarasiṅgālo icchiticchitaṭṭhāne iriyāpathakappanena sītavātūpavāyanena ca antarantarā cittassādampi labhatīti dasseti. **Sakyaputtiyaapaṭiññoti** idaṃ devadattaṃ sandhāya vuttaṃ. So hi ettakampi cittassādaṃ anāgate attabhāve na labhissatīti. Ekādasamaṃ.

12. Dutiyasiṅgālasuttavaṇṇanā

234. Dvādasame **kataññutāti** katajānaṃ. **Kataveditāti** katavisesajānaṃ. Tatriddaṃ jarasiṅgālassa kataññutāya vatthu – satta kira bhātaro khettaṃ kasanti. Tesāṃ sabbakaniṭṭho khettopariyante ṭhatvā gāvo rakkhati. Athekaṃ jarasiṅgālaṃ ajagara gaṇhi, so taṃ disvā yaṭṭhiyā

pothetvā vissajjāpesi. Ajagaro siṅgālaṃ vissajjētvā tameva gaṇhi. Siṅgālo cintesi – “mayhaṃ iminā jīvitam dinnam, ahampi imassa dassāmī”ti yāgughaṭṭassa upari ṭhapitam vāsiṃ mukhena ḍamsitvā tassa santikaṃ agamāsi. Itare bhātaro disvā, “siṅgālo vāsiṃ haratī”ti anubandhiṃsu. So tehi diṭṭhabhāvaṃ ñatvā vāsiṃ tassa santike chaḍḍetvā palāyi. Itare āgantvā kaniṭṭhaṃ ajagarena gahitaṃ disvā vāsiyā ajagaraṃ chinditvā taṃ gahetvā agamaṃsu. Evaṃ jarasiṅgāle siyā yā kāci kataññutā kataveditā. **Sakyaputtiyapaṭiññeti** idampi devadattassa ācārameva sandhāya vuttanti. Dvādasamaṃ.

Opammasaṃyuttavaṇṇanā niṭṭhitā.

10. Bhikkhusaṃyuttam

1. Kolitasuttavaṇṇanā

235. Bhikkhusaṃyuttassa paṭhame, **āvusoti** sāvakanāṃ ālāpo. Buddhā hi bhagavanto sāvake ālapantā, “bhikkhave”ti ālapanti, sāvakā pana “buddhehi sadisā mā homā”ti, “āvuso”ti paṭhamam vatvā pacchā, “bhikkhave”ti bhaṇanti. Buddhēhi ca ālapite bhikkhusaṅgho, “bhante”ti paṭivacanaṃ deti sāvakehi, “āvuso”ti. **Ayam vuccatīti** yasmā dutiyajjhāne vitakkavicārā nirujjhanti, yesaṃ nirodhā saddāyatanam appavattiṃ gacchati, tasmā yadetam dutiyam jhānam nāma, ayam vuccati “ariyānam tuṇhībhāvo”ti. Ayamettha yojanā. “Dhammī vā kathā ariyo vā tuṇhībhāvo”ti ettha pana kammaṭṭhānamanasikāropi paṭhamajjhānādīnipi ariyo tuṇhībhāvotveva saṅkham gatāni.

Vitakkasahagatāti vitakkārammaṇā. **Saññāmanasikārāti** saññā ca manasikāro ca. **Samudācarantīti** pavattanti. Therassa kira dutiyajjhānam na paguṇam. Athassa tato vuṭṭhitassa vitakkavicārā na santato upaṭṭhahimṃsu. Iccassa dutiyajjhānampi saññāmanasikārāpi hānabhāgiyāva ahesum, taṃ dassento evamāha. **Saṅṭhāpehīti** sammā ṭhāpehi. **Ekodibhāvam karohīti** ekaggaṃ karohi. **Samādahāti** sammā ādaha āropehi. **Mahābhiññatanti** chaḷabhiññatam. Satthā kira iminā upāyena satta divase therassa hānabhāgiyam samādhiṃ vaḍḍhetvā theram chaḷabhiññatam pāpesi. Paṭhamam.

2. Upatissasuttavaṇṇanā

236. Dutie **atthi nu kho taṃ kiñci lokasminti** idam atiuḷārampi sattaṃ vā saṅkhāram vā sandhāya vuttam. **Satthupi khoti** idam yasmā ānandattherassa satthari adhimatto chando ca pemañca, tasmā “kiṃ nu kho imassa therassa satthu vipariṇāmenapi sokādayo nuppajjeyyu”nti jānanattham pucchati? **Dīgharattanti** sūkarakhataleṇadvāre dīghanakhaparibbājakassa vedanāpariggahasuttantaṃ desitadivasato paṭṭhāya atikkantakālam sandhāyāha. Tasmīñhi divase therassa ime vaṭṭānugatakiḷesā samūhatāti. Dutiyam.

3. Ghaṭasuttavaṇṇanā

237. Tatiye **ekavihāreti** ekasmiṃ gabbhe. Tadā kira bahū āgantukā bhikkhū sannipatiṃsu. Tasmīṃ pariveṇaggena vā vihāraggena vā senāsanesu apāpuṇantesu dvinnam therānam eko gabbho sampatto. Te divā pāṭiyekkesu ṭhānesu nisīdanti, rattiṃ pana nesam antare cīvarasāñiṃ pasārenti. Te attano attano pattapattaṭṭhāneyeva nisīdanti. Tena vuttam “ekavihāre”ti. **Oḷārikenāti** idam oḷārikārammaṇatam sandhāya vuttam. Dibbacakkhudibbasotadhātuvihārena hi so vihāsi, tesañca rūpāyatanasaddāyatanasāṅkhātam oḷārikaṃ ārammaṇam. Iti dibbacakkhunā rūpassa diṭṭhattā dibbāya ca sotadhātuyā saddassa sutattā so vihāro oḷāriko nāma jāto. **Dibbacakkhu visujjhīti** bhagavato rūpadassanatthāya visuddham ahoṣi. **Dibbā ca sotadhātūti** sāpi bhagavato saddasuṇanattham visujjhi. Bhagavatopi therassa rūpadassanatthāñceva saddasuṇanatthāñca tadubhayaṃ visujjhi. Tadā kira thero “katham nu kho etarahi satthā viharatī”ti ālokaṃ vaḍḍhetvā dibbena cakkhunā satthāram jetavane vihāre gandhakuṭiyam nisinnam disvā tassa dibbāya sotadhātuyā saddam suṇi. Satthāpi tatheva akāsi.

Evam te aññamaññaṃ passimṣu ceva, saddaṇca assosum.

Āraddhavīriyoti paripuṇṇavīriyo paggahitavīriyo. **Yāvadeva upanikkhepanamattāyāti** tiyojanasahassavitthārassa himavato santike ṭhapitā sāsapamattā pāsāṇasakkharā “himavā nu kho mahā, ayam nu kho pāsāṇasakkharā”ti evam yāva upanikkhepanamattasseva atthāya bhavēyyāti vuttam hoti. Paratopi eseva nayo. **Kappanti** āyukappam. **Loṇaghaṭṭayāti** cakkavālamukhavatṭiyā ādhāraṃ katvā mukhavatṭiyā brahmalokaṃ āhacca ṭhitāya loṇacāṭiyāti dasseti.

Ime pana therā upamaṃ āharantā sarikkhakeneva ca vijjamānaguṇena ca āharimṣu. Kathaṃ? Ayañhi iddhi nāma accuggataṭṭhena ceva vipulaṭṭhena ca himavantasadisā, paññā catubhūmakadhamme anupavisitvā ṭhitatṭhena sabbabyañjanesu anupavittṭhaloṇarasasadisā. Evam tāva sarikkhakatṭhena āharimṣu. Samādhilakkhaṇaṃ pana mahāmogallānattherassa vibhūtaṃ pākaṭaṃ. Kiñcāpi sārīputtattherassa avijjamānaiddhi nāma natthi, bhagavatā pana “etadaggaṃ, bhikkhave, mama sāvakaṇaṃ bhikkhūnaṃ iddhimantānaṃ yadidaṃ mahāmogallāno”ti ayameva etadagge ṭhapito. Vipassanālakkhaṇaṃ pana sārīputtattherassa vibhūtaṃ pākaṭaṃ. Kiñcāpi mahāmogallānattherassāpi paññā atthi, bhagavatā pana “etadaggaṃ, bhikkhave, mama sāvakaṇaṃ bhikkhūnaṃ mahāpaññānaṃ yadidaṃ sārīputto”ti (a. ni. 1.189) ayameva etadagge ṭhapito. Tasmā yathā ete aññamaññaṃ dhuraṃ na pāpuṇanti, evam vijjamānaguṇena āharimṣu. Samādhilakkhaṇasmiñhi mahāmogallāno nipphattiṃ gato, vipassanālakkhaṇe sārīputtatthero, dvīsupi etesu sammāsambuddhoti. Tatiyaṃ.

4. Navasuttavaṇṇanā

238. Catutthe **apossukko**ti nirussukko. **Saṅkasāyatīti** viharati. **Veyyāvaccanti** cīvare kattabbakiccaṃ. **Ābhicetasikānanti** abhicittaṃ uttamacittaṃ nissitānaṃ. **Nikāmalābhīti** icchiticchitakkaṇe samāpajjanasamatthatāya nikāmalābhī. **Akicchalābhīti** jhānapāripanthike sukkena vikkhambhetvā samāpajjanasamatthatāya adukkhalābhī. **Akasiralābhīti** yathāparicchedena vuttānasamatthatāya vipulalābhī, paguṇajjhānoti attho. **Sithilamārabbhāti** sithilavīriyaṃ pavattetvā. Catutthaṃ.

5. Sujātasuttavaṇṇanā

239. Pañcame **abhirūpoti** aññāni rūpāni atikkantarūpo. **Dassanīyoti** datṭhabbayutto. **Pāsādikoti** dassanena cittaṃ pasādetuṃ samattho. **Vaṇṇapokkharatāyāti** chavivaṇṇasundaratāya. Pañcamaṃ.

6. Lakuṇḍakabhaddiyasuttavaṇṇanā

240. Chaṭṭhe **dubbaṇṇanti** virūpasarīraṇaṃ. **Okoṭimakanti** rassaṃ. **Paribhūtarūpanti** pamānavasena paribhūtajātikaṃ. Taṃ kira chabbaggiyā bhikkhū, “āvuso bhaddiya, āvuso, bhaddiyā”ti tattha tattha parāmasitvā nānappakāraṃ kīlanti ākaḍḍhanti parikaḍḍhanti. Tena vuttam “paribhūtarūpa”nti. Kasmā pana evarūpo jāto? Ayam kira atīte eko mahārājā ahoṣi, tassa mahallakā ca mahallakittiyō ca paṭikūlā honti. So sace mahallake passati, tesam cūlaṃ ṭhapāpetvā kacchaṃ bandhāpetvā yathāruci kīlāpeti. Mahallakittiyopi disvā tāsampi icchiticchitaṃ vipakāraṃ katvā yathāruci kīlāpeti. Tesam puttadhītādīnaṃ santike mahāsārajjam uppajjati. Tassa pāpakiriyā pathavito paṭṭhāya chadevaloke ekakoḷāhalaṃ akāsi.

Atha sakko cintesi – “ayam andhabālo mahājanaṃ viheṭheti, karissāmiṃ niggaha”nti. So mahallakagāmiyavaṇṇaṃ katvā yānake ekaṃ takkacāṭiṃ āropetvā yānaṃ pesento nagaraṃ pavisati. Rājāpi hatthiṃ āruya nagarato nikkhanto taṃ disvā – “ayam mahallako takkayānakena amhākaṃ abhimukho āgacchati, vāretha vārethā”ti āha. Manussā ito cito ca pakkhandantāpi na passanti. Sakko hi “rājāva maṃ passatu, mā aññe”ti evam adhiṭṭhahi. Atha tesu manussesu “kahaṃ, deva, kahaṃ devā”ti vadantesu eva rājā saha hatthinā vaccho viya dhenuyā yānassa heṭṭhā pāvīsi. Sakko takkacāṭiṃ bhīndi.

Rājā sīsato paṭṭhāya takkena kilinnasarīro ahosi. So sarīraṃ ubbaṭṭāpetvā uyyānapokkharāṇiyam nhatvā alaṅkatasarīro nagaraṃ pavisanto puna taṃ addasa. Disvā “ayaṃ so amhehi diṭṭhamahallako puna dissati. Vāretha vāretha na”nti āha. Manussā “kahaṃ, deva, kahaṃ, devā”ti ito cito ca vidhāvimsu. So paṭhamavippakārameva puna pāpuṇi. Tasmim̐ khaṇe sakko goṇe ca yānañca antaradhāpetvā ākāse ṭhatvā āha, “andhabāla, tvaṃ mayi takkavāṇijako eso”ti saññaṃ karosi, sakkohaṃ devarājā, “tavetaṃ pāpakiriyaṃ nivāressāmi”ti āgato, “mā puna evarūpaṃ akāsī”ti santajjetvā agamāsi. Iminā kammaṇa so dubbaṇṇo ahosi.

Vipassīsammasambuddhakāle panesa cittapattakokilo nāma hutvā khome migadāye vasanto ekadivasaṃ himavantaṃ gantvā madhuraṃ ambapalaṃ tuṇḍena gahetvā āgacchanto bhikkhusaṅghaparivāraṃ satthāraṃ disvā cintesi – “ahaṃ aññesu divasesu rittako tathāgataṃ passāmi. Ajja pana me imaṃ ambapakaṃ atthi, dasabalassa taṃ dassāmi”ti otarivā ākāse carati. Satthā tassa cittaṃ ñatvā upaṭṭhākaṃ olokesi. So pattaṃ nīharivā dasabalaṃ vanditvā satthu hatthe ṭhapesi. Kokilo dasabalassa patte ambapakaṃ paṭiṭṭhāpesi. Satthā tattheva nisīditvā taṃ paribhuñji. Kokilo pasannacitto punappunaṃ dasabalassa guṇe āvajjetvā dasabalaṃ vanditvā attano kulāvakaṃ gantvā sattāhaṃ pītisukheneva vītināmesi. Iminā kammaṇa saro madhuro ahosi.

Kassapasammāsambuddhakāle pana cetiye āraddhe “kiṃpamāṇaṃ karoma? Sattayojanappamāṇaṃ. Atimahantaṃ etaṃ, chayojanappamāṇaṃ karoma. Idampi atimahantaṃ, pañcayojanaṃ karoma, catuyojanaṃ, tiyojanaṃ, dviyojana”nti. Ayaṃ tadā jeṭṭhakavaḍḍhakī hutvā, “evaṃ, bho, anāgate sukhaṭṭijaggitaṃ kātuṃ vaṭṭatī”ti vatvā rajjuṃ ādāya parikkhipanto gāvutamattake ṭhatvā, “ekekāṃ mukhaṃ gāvutaṃ hotu, cetiyaṃ yojanāvattāṃ yojanubbedhaṃ bhavissatī”ti āha. Te tassa vacane aṭṭhaṃsu. Cetiyaṃ sattadivasasattamāsādhikehi sattahi saṃvaccharehi niṭṭhitaṃ. Iti appamāṇassa buddhassa pamāṇaṃ akāsīti. Tena kammaṇa okoṭimako jāto.

Hatthayo pasadā migāti hatthino ca pasadamigā ca. **Natthi kāyasmim̐ tulyatāti** kāyasmim̐ pamāṇaṃ nāma natthi, akāraṇaṃ kāyapamāṇanti attho. Chaṭṭhaṃ.

7. Visākhasuttavaṇṇanā

241. Sattame **poriyā vācāyāti** puravāsīnaṃ nagaramanussānaṃ vācāsadisāya aparihīnakkharapadāya madhuravācāya. **Vissatṭhāyāti** asandiddhāya apalibuddhāya, pittasemhehi anupahatāyāti attho. **Anelagalāyāti** yathā dandhamanussā mukhena kheḷaṃ gaḷantena vācaṃ bhāsanti, na evarūpāya, atha kho niddosāya visadavācāya. **Pariyāpannāyāti** catusaccapariyāpannāya cattāri saccāni amuñcitvā pavattāya. **Anissitāyāti** vaṭṭanissitaṃ katvā akathitāya. **Dhammo hi isinaṃ dhajoti** navavidhalokuttaradhammo isīnaṃ dhajo nāmāti. Sattamaṃ.

8. Nandasuttavaṇṇanā

242. Aṭṭhame **ākoṭitapaccākoṭitānīti** ekasmim̐ passe pāṇinā vā muggarena vā ākoṭanena ākoṭitāni, parivattetvā ākoṭanena paccākoṭitāni. **Añjetvāti** añjanena pūretvā. **Acchaṃ pattanti** vipasannaṇaṃ mattikāpattaṃ. Kasmā pana thero evamakāsīti? Satthu ajjhāsayaṇānanatthaṃ. Evaṃ kirassa ahosi “sace satthā ‘sobhati vata me ayaṃ kaniṭṭhabhātiko’ti vakkhati, yāvajjivaṃ iminā vākārena carissāmi. Sace ettha dosaṃ dassati, imaṃ ākāraṃ pahāya saṅkāracoḷaṃ gahetvā cīvaraṃ katvā dhārento pariyaṇtasenāsane vasanto carissāmi”ti. **Assasīti** bhavissasi.

Aññātuñchenāti abhilakkhitesu issarajanagehesu kaṭukabhaṇḍasambhāraṃ sugandhaṃ bhojanaṃ pariyaṇtasassa uñcho ñātuñcho nāma. Gharapaṭipāṭiyā pana dvāre ṭhitena laddhaṃ missakabhōjanaṃ aññātuñcho nāma. Ayamidha adhippeto. **Kāmesu anapekkhinanti** vatthukāmakilesakāmesu nirapekkhaṃ. **Āraññiko cātiādi** sabbaṃ samādānavaseneva vuttaṃ. **Kāmesu ca anapekkhoti** idaṃ suttaṃ devaloke accharāyo dassetvā āgatena aparabhāge kathitaṃ. Imassa kathitadivasato paṭṭhāya thero

ghaṭento vāyamanto katipāheneva arahatte patiṭṭhāya sadevake loke aggadakkhiṇeyyo jāto.
Aṭṭhamam.

9. Tissasuttavaṇṇanā

243. Navame **dummanoti** uppannadomanasso. Kasmā panāyaṃ evaṃ dukkhī dummano jātoti? Khattiyapabbajito hesa, tena naṃ pabbājetvā dupaṭṭasātakam nivāsāpetvā varacivaram pārupetvā akkhīni añjetvā manosilātelena sīsam makkhesuṃ. So bhikkhūsu rattiṭṭhānadivāṭṭhānam gatesu “bhikkhunā nāma vivittokāse nisīditabba”nti aṅānanto bhojanasālam gantvā mahāpīṭham āruhitvā nisīdi. Disāvacarā āgantukā paṃsukūlikā bhikkhū āgantvā, “imināva nīhārena rajokiṇṇehi gattehi na sakkā dasabalam passituṃ. Bhaṇḍakam tāva ṭhapessāmā”ti bhojanasālam agamaṃsu. So tesu mahātheresu āgacchantesu niccalo nisīdiyeva. Aññe bhikkhū “pādavattam karoma, tālavaṇṇena bījāmā”ti āpucchanti. Ayaṃ pana nisinnakova “kativassathā”ti? Pucchitvā, “mayam avassikā. Tumhe pana kativassathā”ti? Vutte, “mayam ajja pabbajitā”ti āha. Atha naṃ bhikkhū, “āvuso, adhunā chinnacūlosi, ajjāpi te sīsamūle ūkāgandho vāyatiyeva, tvam nāma ettakesu vuḍḍhataresu vattam āpucchantesu nissaddo niccalo nisinnō, apacitimatampi te natthi, kassa sāsane pabbajitosi”ti? Parivāretvā tam vācāsattīhi paharantā “kiṃ tvam iṇaṭṭo vā bhayaṭṭo vā jīvituṃ asakkonto pabbajito”ti? Āhaṃsu. So ekampi theram olokesi, tena “kiṃ maṃ olokesi mahallakā”ti? Vutte aññam olokesi, tenapi tatheva vutte athassa “ime maṃ parivāretvā vācāsattīhi vijjhanti”ti khattiyamāno uppajji. Akkhīsu maṇivaṇṇāni assūni sañcariṃsu. Tato ne āha – “kassa santikam āgatathā”ti. Te “kiṃ pana tvam ‘mayham santikam āgatā’ti? Amhe maññasi gihibyañjanabhaṭṭhakā”ti vatvā, “sadevake loke aggapuggalassa satthu santikam āgatamhā”ti āhaṃsu. So “mayham bhātu santike āgatā tumhe, yadi evam idāni vo āgatamaggeneva gamanam karissāmi”ti kujjhivā nikkhanto antarāmage cintesi – “mayi imināva nīhārena gate sathā ete na nīharāpessati”ti dukkhī dummano assūni pavattayamāno agamāsi. Iminā kāraṇena esa evam jātoti.

Vācāsannitodakenāti vacanapatodena. **Sañjambharimakamsūti** sañjambharitam nirantaram phuṭam akamsu, upari vijjhimsūti vuttam hoti. **Vattāti** pare yadicchakam vadatiyeva. **No ca vacanakkhamoti** paresam vacanam khamituṃ na sakkoti. Idāni tāva tvam iminā kopena iminā vuttavācāsannitodakena viddho. Atīte pana raṭṭhato ca pabbājītoti. Evaṃ vutte, “katarasmim kāle bhagavā”ti? Bhikkhū bhagavantam yācimsu.

Sathā āha – atīte bārānasiyam bārānasirajā rajjam kāresi. Atheke jātimā, eko mātaṅgoti dve isayo bārānasim agamaṃsu. Tesu jātimā puretaram gantvā kumbhakārasālāyam nisīdi. Mātaṅgo tāpaso pacchā gantvā tattha okāsam yāci kumbhakāro “atthettha paṭhamataram pavīṭṭho pabbajito, tam pucchā”ti āha. So attano parikkhāram gahetvā sālāya dvāramūle ṭhatvā, “amhākampi ācariya ekarattivāsāya okāsam dethā”ti āha. “Pavisa, bho”ti. Pavisitvā nisinnam, “bho, kiṃ gottosi”ti? Pucchi. “Caṇḍālagottomhī”ti. “Na sakkā tayā saddhim ekaṭṭhāne nisīdituṃ, ekamantam gacchā”ti. So ca tattheva tiṇasanthārakam pattharivā nipajji, jātimā dvāram nissāya nipajji. Itaro passāvattthāya nikkhamanto tam urasmim akkami. “Ko eso”ti ca vutte? “Aham ācariyā”ti āha. “Re caṇḍāla, kiṃ aññato maggam na passasi? Atha me āgantvā akkamasī”ti. “Ācariya, adisvā me akkantosi, khama mayha”nti. So mahāpurise bahi nikkhante cintesi – “ayam paccāgacchantopi itova āgamissati”ti parivattetvā nipajji. Mahāpurisopi “ācariyo ito sīsam katvā nipanno, pādasamīpena gamissāmi”ti pavisanto puna urasmimyeva akkami. “Ko eso”ti ca vutte? “Aham ācariyā”ti āha. “Paṭhamam tāva te aṅānantena katam, idāni maṃ ghaṭentova akāsi, sūriye te uggacchante sattadhā muddhā phalatū”ti sapi. Mahāpuriso kiñci avatvā purearuṇeyeva sūriyam gaṇhi, nāssa uggantuṃ adāsi. Manussā ca hatthiassādayo ca pabujjhimsu.

Manussā rājakulam gantvā, “deva, sakalanagare appabuddho nāma natthi, na ca aruṇuggam paññāyati, kinnu kho eta”nti? Tena hi nagaram parivīmaṃsathāti. Te parivīmaṃsantā kumbhakārasālāyam dve tāpase disvā, “imesam etam kammam bhavissati”ti gantvā rañño ārocesuṃ. Rañña ca “pucchatha ne”ti vuttā āgantvā jātimantam pucchimsu – “tumhehi andhakāram kata”nti. “Na mayā katam, esa pana kūṭajaṭilo chavo anantamāyo, tam pucchathā”ti. Te āgantvā mahāpurisam

pucchimsu – “tumhehi, bhante, andhakāraṃ kata”nti. “Āma ayaṃ ācariyo maṃ abhisapi, tasmā mayā kata”nti. Te gantvā rañño ārocesuṃ. Rājāpi āgantvā mahāpurisaṃ “tumhehi kataṃ, bhante”ti? Pucchi. “Āma, mahārājā”ti. “Kasmā bhante”ti? “Iminā abhisapitomi, sace maṃ eso khamāpessati, sūriyaṃ vissajjessāmi”ti. Rājā “khamāpetha, bhante, eta”nti āha. Itaro “mādiso jātimā kiṃ evarūpaṃ caṇḍālaṃ khamāpessati? Na khamāpemi”ti.

Atha naṃ manussā “na kiṃ tvaṃ attano ruciyā khamāpessasi”ti? Vatvā hatthesu ca pādesu ca gahetvā pādamūle nipajjāpetvā “khamāpehi”ti āhaṃsu. So nissaddo nipajji. Punapi naṃ “khamāpehi”ti āhaṃsu. Tato “khama mayhaṃ, ācariyā”ti āha. Mahāpuriso “ahaṃ tava tuyhaṃ khamitvā sūriyaṃ vissajjessāmi, sūriye pana uggate tava sīsaṃ sattadhā phalissati”ti vatvā, “imassa sīsappamaṇaṃ mattikāpiṇḍaṃ matthake ṭhapetvā etaṃ nadiyā galappamaṇe uduke ṭhapethā”ti āha. Manussā tathā akaṃsu. Ettāvata saraṭṭhakaṃ rājabalaṃ sannipati. Mahāpuriso sūriyaṃ muñci. Sūriyasma āgantvā mattikāpiṇḍaṃ pahari. So sattadhā bhijji. Tāvadeva so nimujjitvā ekena titthena uttaritvā palāyi. Satthā imaṃ vatthum āharitvā, “idāni tava tvaṃ bhikkhūnaṃ santike paribhāsaṃ labhasi, pubbepi imaṃ kodhaṃ nissāya raṭṭhato pabbājito”ti anusandhiṃ ghaṭetvā atha naṃ ovaḍanto **na kho te taṃ tissa patirūpantiādimaḥa**. Navamaṃ.

10. Theranāmakasuttavaṇṇanā

244. Dasame **vaṇṇavādīti** ānisaṃsavādī. **Yaṃ atītaṃ taṃ pahīnanti** atīte khandhapañcake chandarāgappahānena taṃ pahīnaṃ nāma hoti. **Anāgatanti** anāgatampi khandhapañcakaṃ tattha chandarāgapaṇinissaggena paṇinissatṭhaṃ nāma hoti. **Sabbābhikhuntī** sabbā khandhāyatanadhātuyo ca tayo bhava ca abhibhavitvā ṭhitaṃ. **Sabbavidunti** taṃ vuttappakāraṃ sabbaṃ viditaṃ pākaṭaṃ katvā ṭhitaṃ. **Sabbesu dhammesūti** tesveva dhammesu taṇhādītṭhilepehi anupalittaṃ. **Sabbañjahanti** tadeva sabbaṃ tattha chandarāgappahānena jahitvā ṭhitaṃ. **Taṇhakkhaye vimuttanti** taṇhakkhayaśāṅkhāte nibbāne tadārammaṇāya vimuttiyā vimuttaṃ. Dasamaṃ.

11. Mahākappinasuttavaṇṇanā

245. Ekādasame **mahākappinoti** evaṃnāmako abhiññābalappatto asītimahāsāvakaṇaṃ abbhantaro mahāthero. So kira gihikāle kukkuṭavatīnagare tiyojanasatikāṃ rajjaṃ akāsi. Pacchimabhavikattā pana tathārūpaṃ sāsanaṃ sotuṃ ohitasoto vicarati. Athekadivasaṃ amaccasahassaparivuto uyyānakīlikāṃ agamāsi. Tadā ca majjhimadesato jaṅghavāṇijā taṃ nagaraṃ gantvā, bhaṇḍaṃ paṭisāmetvā, “rājānaṃ passissāmā”ti paṇṇākārahatthā rājakuladvāraṃ gantvā, “rājā uyyānaṃ gato”ti sutvā, uyyānaṃ gantvā, dvāre ṭhitā, paṭihārassa ārocayimsu. Atha rañño nivedite rājā pakkosāpetvā niyyātitaṇṇākāre vanditvā ṭhite, “tātā, kuto āgatathā”ti? Pucchi. “Sāvattitho devā”ti. “Kacci vo raṭṭhaṃ subhikkhaṃ, dhammiko rājā”ti? “Āma, devā”ti. “Atthi pana tumhākaṃ dese kiñci sāsana”nti? “Atthi, deva, na pana sakkā ucchitṭhamukhehi kathetu”nti. Rājā suvaṇṇabhiṅgārena udakaṃ dāpesi. Te mukhaṃ vikkhāletvā dasabalābhimukhā añjaliṃ paggaṇhitvā, “deva, amhākaṃ dese buddharatanaṃ nāma uppanna”nti āhaṃsu. Rañño “buddho”ti vacane sutamatte sakalasarīraṃ pharamānā pīti uppajji. Tato “buddhoti, tātā, vadathā”ti? Āha. “Buddhoti deva vadāmā”ti. Evaṃ tikkhattuṃ vadāpetvā, “buddhoti padaṃ aparimānaṃ, nāssa sakkā parimānaṃ kātu”nti tasmimyeva pasanno satahassaṃ datvā puna “aññaṃ kiṃ sāsana”nti? Pucchi. “Deva dhammaratanaṃ nāma uppanna”nti. Tampi sutvā tatheva tikkhattuṃ paṭiññaṃ gahetvā aparampi satahassaṃ datvā puna “aññaṃ kiṃ sāsana”nti? Pucchi. “Saṅgharatanaṃ deva uppanna”nti. Tampi sutvā tatheva tikkhattuṃ paṭiññaṃ gahetvā aparampi satahassaṃ datvā dinnabhāvaṃ paṇṇe likhitvā, “tātā, deviyā santikaṃ gacchathā”ti pesesi. Tesu gatesu amacce pucchi, “tātā, buddho loke uppanno, tumhe kiṃ karissathā”ti? “Deva tumhe kiṃ kattukāmā”ti? “Ahaṃ pabbajissāmi”ti. “Mayampi pabbajissāmā”ti. Te sabbepi gharaṃ vā kuṭumbaṃ vā anapaloketvā ye asse āruya gata, teheva nikkhamimsu.

Vāṇijā anojādeviyā santikaṃ gantvā paṇṇaṃ dassesuṃ. Sā vācetvā “rañña tumhākaṃ bahū

kahāpaṇā dinnā, kiṃ tumhehi kataṃ, tātā”ti? Pucchi. “Piyasāsanam devi ānīta”nti. “Amhepi sakkā, tātā, suṇāpetu”nti. “Sakkā devi, ucchiṭṭhamukhehi pana vattum na sakkā”ti. Sā suvaṇṇabhiṅgārena udakaṃ dāpesi. Te mukhaṃ vikkhāletvā rañño ārocitanayeneva ārocesum. Sāpi sutvā uppannapāmojjā teneva nayena ekekasmim pade tikkhattum paṭiññaṃ gahetvā paṭiññaṅgaṇāyā tīṇi tīṇi katvā navasatasahassāni adāsi. Vāṇijā sabbānīpi dvādasasatasahassāni labhiṃsu. Atha ne “rājā kahaṃ, tātā”ti, pucchi. “Pabbajissāmīti nikkhanto devi”ti. “Tena hi, tātā, tumhe gacchathā”ti te uyyojetvā rañña saddhim gatānaṃ amaccānaṃ mātugāme pakkosāpetvā, “tumhe attano sāmikānaṃ gataṭṭhānaṃ jānātha ammā”ti pucchi. “Jānāma ayye, rañña saddhim uyyānakīlikaṃ gatā”ti. Āma gatā, tattha pana gantvā, “buddho uppanno, dhammo uppanno, saṅgho uppanno”ti sutvā, “dasabalassa santike pabbajissāmā”ti gatā. “Tumhe kiṃ karissathā”ti? “Tumhe pana ayye kiṃ kattukāmā”ti? “Ahaṃ pabbajissāmi, na tehi vantavamaṇaṃ jivhagge ṭhapeyya”nti. “Yadī evaṃ, mayampi pabbajissāmā”ti sabbā rathe yojāpetvā nikkhamiṃsu.

Rājāpi amaccasahassena saddhim gaṅgāyā tīraṃ pāpuṇi. Tasmīṇca samaye gaṅgā pūrā hoti. Atha naṃ disvā, “ayaṃ gaṅgā pūrā caṇḍamacchākiṇṇā, amhehi saddhim āgatā dāsā vā manussā vā natthi, ye no nāvaṃ vā uḷumpaṃ vā katvā dadeyyum, etassa pana satthu guṇā nāma heṭṭhā avīcīto upari yāva bhavaggā patthaṭā, sace esa satthā sammāsambuddho, imesaṃ assānaṃ khurapiṭṭhāni mā tementū”ti udakapiṭṭhena asse pakkhandāpesum. Ekaassasāpi khurapiṭṭhamattaṃ na temi, rājamaggena gacchantā viya paratīraṃ patvā purato aññaṃ mahānaḍiṃ pāpuṇiṃsu. Tattha aññaṃ saccakiriyaṃ natthi, tāya eva saccakiriyaṃ tampi aḍḍhayojanavittāraṃ naḍiṃ atikkamiṃsu. Atha tatiyaṃ candabhāgaṃ nāma mahānaḍiṃ patvā tampi tāya eva saccakiriyaṃ atikkamiṃsu.

Satthāpi taṃdivasaṃ paccūsasamaye mahākaraṇāsamaṃpattito vuṭṭhāya lokaṃ olovento “ajja mahākappino tiyojanasatikāṃ rajjaṃ pahāya amaccasahassaparivāro mama santike pabbajitum āgacchatī”ti disvā, “mayā tesam paccuggamaṇaṃ kātum yutta”nti pātova sarīrapaṭijaggaṇaṃ katvā, bhikkhusaṅghaparivāro sāvattiyam piṇḍāya caritvā, pacchābhattaṃ piṇḍapātaṭṭhānto sayameva pattacīvaraṃ gahetvā, ākāse uppativā candabhāgāyā nadiyā tīre tesam uttaraṇatitthassa abhimukhe ṭhāne mahānigrodharukkho atthi, tattha pallākena nisīditvā parimukhaṃ satim upaṭṭhapetvā chabbaṇṇabuddharasmiyo vissajjesi. Te tena titthena uttarantā ca chabbaṇṇabuddharasmiyo ito cito ca vidhāvantiyo oloventā dasabalassa puṇṇacandasassirikaṃ mukhaṃ disvā, “yaṃ satthāraṃ uddissa mayam pabbajitā, addhā so eso”ti dassaneneva niṭṭhaṃ gantvā diṭṭhaṭṭhānato paṭṭhāya onatā vandamānā āgamma satthāraṃ vandimṃsu. Rājā gopphakesu gahetvā satthāraṃ vanditvā ekamantaṃ nisīdi saddhim amaccasahassena. Satthā tesam dhammaṃ kathesi. Desanāpariyosāne sabbe arahatte patiṭṭhāya satthāraṃ pabbajjaṃ yāciṃsu. Satthā “pubbe ime cīvaradānassa dinnattā attano cīvarāni gahetvā āgatā”ti suvaṇṇavaṇṇaṃ hatthaṃ pasāretvā, “etha bhikkhavo svākkhāto dhammo, caratha brahmacariyaṃ sammā dukkhassa antakiriyaṃ”ti āha. Sāva tesam āyasmantānaṃ pabbajjā ca upasampadā ca ahoṣi, vassasatṭhikattherā viya satthāraṃ parivārayiṃsu.

Anojāpi devī rathasahassaparivārā gaṅgātīraṃ patvā rañño atthāya ābhattaṃ nāvaṃ vā uḷumpaṃ vā adisvā attano byattatāya cintesi – “rājā saccakiriyaṃ katvā gato bhavissati, so pana satthā na kevalaṃ tesameva atthāya nibbatta, sace so satthā sammāsambuddho, amhākaṃ rathā mā udake nimujjiṃsū”ti udakapiṭṭhe rathe pakkhandāpesi. Rathānaṃ nemivaṭṭimattampi na temi. Dutiyatatiyanadīpi teneva saccakārena uttaramānāyeva nigrodharukkhamūle satthāraṃ addasa. Satthā “imāsaṃ attano sāmike passantīnaṃ chandarāgo uppajjitvā maggaphalānaṃ antarāyaṃ kareyya, so evaṃ kātum na sakkhissati”ti yathā aññaṃaññaṃ na passanti, tathā akāsi. Tā sabbāpi titthato uttaritvā dasabalaṃ vanditvā nisīdimṃsu. Satthā tāsam dhammaṃ kathesi, desanāpariyosāne sabbāpi sotāpattiphale patiṭṭhāya aññaṃaññaṃ passiṃsu. Satthā “uppalavaṇṇā āgacchatū”ti cintesi. Therī āgantvā sabbā pabbājetvā ādāya bhikkhunīnaṃ upassayaṃ gatā. Satthā bhikkhusahassaṃ gahetvā ākāseṇa jetavanaṃ agamāsi. Imaṃ sandhāyetaṃ vuttaṃ – “mahākappinoti evaṃ nāmako abhiññābalappatto asītimahāsāvakaṇaṃ abhantaro mahāthero”ti.

Janetasminti janite pajāyāti attho. **Ye gottapaṭisārīnōti** ye “mayam vāsetṭhā gotamā”ti gottam paṭisaranti paṭijānanti, tesam khattiyo seṭṭhoti attho. **Vijjācaraṇasampannōti** aṭṭhahi vijjāhi ceva pannarasadhammabhedenā caraṇena ca samannāgato. **Tapatīti** virocāti. **Jhāyī tapati brāhmaṇōti** khīṇāsavabrāhmaṇo duvidhena jhānena jhāyamāno tapati virocāti. Tasmim pana khaṇe kāludāyitthero duvidhena jhānena jhāyamāno avidūre nisinno hoti. **Buddho tapatīti** sabbaññubuddho virocāti. Sabbamaṅgalagāthā kiresā. Bhātikarājā kira ekam pūjam kāretvā ācariyakam āha – “tīhi ratanehi amuttam ekam jayamaṅgalam vadathā”ti. So tepiṭakam buddhavacanam sammāsivā imam gātham vadanto “divā tapati ādicco”ti vatvā atthaṅgamentassa sūriyassa añjalim paggaṇhi. “Rattimābhāti candimā”ti, uṭṭhahantassa candassa añjalim paggaṇhi. “Sannaddho khattiyo tapatī”ti rañño añjalim paggaṇhi. “Jhāyī tapati brāhmaṇo”ti bhikkhusaṅghassa añjalim paggaṇhi. “Buddho tapati tejasā”ti vatvā pana mahācetiyaassa añjalim paggaṇhi. Atha nam rājā “mā hattham otārehi”ti ukkhittasmiṃyeva hatthe sahasam ṭhapesi. Ekādasamaṃ.

12. Sahāyakasuttavaṇṇanā

246. Dvādasame **cirarattaṃsametikāti** dīgharattam saṃsanditvā sametvā ṭhitaladdhino. Te kira pañcajāṭisatāni ekatova vicariṃsu. **Sameti nesam saddhammoti** idāni imesam ayam sāsanadhammo saṃsandati sameti. **Dhamme buddhappavedite**ti buddhena pavedite dhamme etesam sāsanadhammo sobhatīti attho. **Suvinītā kappinenāti** attano upajjhāyena ariyappavedite dhamme suṭṭhu vinītā. Sesam sabbattha uttānamevāti. Dvādasamaṃ.

Bhikkhusaṃyuttavaṇṇanā niṭṭhitā.

Iti sārathappakāsiniyā saṃyuttanikāya-aṭṭhakathāya

Nidānavaggavaṇṇanā niṭṭhitā.